

XHAFER DURMISHI



FAKTE PËR LËVIZJEN E JUSUF GËRVALLËS

KAPITUJT	Faqe
Letra nga Xhafer Durmishi	3
Letra nga Faridin Tafallari	70
Letra nga Sabri Novosella	84
Letra nga Xhafer Shatri	105
Letra nga Ibrahim Kelmendi	175
Big Brother-i i vitit 1984	261
Zëri i Jusuf Gërvallës për Pararojën	281

Këto letra kanë të bëjnë, me disa përjashtime, me dy vitet e para pas atentatit të 17 janarit 1982, në pragun e shtëpisë së Vëllezërve Gërvalla në Untergruppenbach. Pseudonimet e personave që më së shumti hasen në këto letra janë:

Sabri Novosella=Mërgimi e në ndonjë rast Kameri

Xhafer Shatri = Lleshi, Uka, Xhema

Ibrahim Kelmendi = inicialet IK, Iljazi, Shoku

Xhafer Durmishi = Shpendi, Skenderi, Salihu, Gj.,

Abdullah Prapashtica=Kushtrim Kosova

Osman Osmani=Halimi dhe Nexhati

Faton Topalli=Qemajli

Vlen të potencohet se Ibrahim Kelmendi, të gjitha letrat e periudhës 14 prill 1983 - 19 mars 1984, që janë parashtruar në këtë përmbledhje, ia dërgon Forumit që është quajtur Qendra Ekzekutive (QE).



Ndërtesa ku ka banuar Faridin Tafallari në vitet 1980-të, në Haiterbacherstr.75, 7270 Nagold, në të cilën pas 17 janarit 1982, u bartën materialet kryesore që ishin në shtëpinë e Vëllezërve Gërvalla. Aktivitet i dëndur nga kjo shtëpi u zhvillua sidomos pas janarit 1982. Të gjitha letrat në këtë përmbledhje, me disa përjashtime, kanë kaluar nëpër këtë shtëpi dhe janë ruajtur brenda mureve e nën kulmin e saj për shumë vite. Faridinin e falenderoj për kujdesin dhe dërgimin e shumë letrave edhe gjatë këtij viti, duke mundësuar kështu që kjo vepër të dalë sa më e plotë.

Letra nga Xhafer Durmishi

Shkurt 1982-korrik 1985

1. Letër bashkatdhetarëve në Nagold, 8 shkurt 1982
2. Komitetit të Degës "Hasan Prishtina", 26 shkurt 1982
3. Letër Sabri Novosellës, mars 1982
4. Pajazit Ibrahimit në Australi, 7 mars 1982
5. Letër Sabri Novosellës, maj 1982
6. Letër Sabri Novosellës, 22 maj 1982
7. Procesverbali i KVG, 11 korrik 1982
8. Letër Faridin Tafallarit, 13 korrik 1982
9. Letër Sabri Novosellës, 14 korrik 1982
10. Letër Xhafer Shatrit, 6 gusht 1982
11. Procesverbali i rrethit të Shtutgartit, 26 shtator 1982
12. Letër Lëvizjes në emër të KVG, 1 tetor 1982
13. Letër Xhafer Shatrit, tetor 1982
14. Letër Faridin Tafallarit, vjeshtë 1982
15. Letër Faridin Tafallarit, vjeshtë 1982

16. Letër Faridin Tafallarit, vjeshtë 1982
17. Letër Faridin Tafallarit, vjeshtë 1982
18. Letër Faridin Tafallarit, fillim i Nëntorit 1982
19. Letër Faridin Tafallarit, 25 nëntor 1982
20. Letër Faridin Tafallarit, 29 nëntor 1982
21. Letër Engjëll Kolanecit, nëntor 1982
22. Letër Faridin Tafallarit, 30 nëntor 1982
23. Letër Xhafer Shatrit dhe Sabri Novosellës, 3 dhjetor 1982
24. Letër Xhafer Shatrit, 5 dhjetor 1982
25. Letër Faridin Tafallarit, 8 dhjetor 1982
26. Letër Faridin Tafallarit, 10 dhjetor 1982
27. Letër Faridin Tafallarit, 11 dhjetor 1982
28. Letër Faridin Tafallarit, 14 dhjetor 1982,
29. Letër Faridin Tafallarit, 16 dhjetor 1982
30. Letër Faridin Tafallarit, 20 dhjetor 1982

31. Letër Faridin Tafallarit, 29 dhjetor 1982
32. Letër Faridin Tafallarit, 30 dhjetor 1982
33. Letër e Xhafer Durmishit për Faridin Tafallarit, dhjetor 1982
34. Letër Faridin Tafallarit, 2 janar 1983
35. Letër Faridin Tafallarit, shkurt 1983
36. Shkrim i Xhafer Durmishit si material për mbledhjen e parë të Qendrës Ekzekutive në mesin e marsit 1983 në Gjenevë
37. Letër e Xhavit Ramabajës për Xhafer Durmishin, mars 1983
38. Letër Ibrahim Kelmendit dhe Qendrës Ekzekutive, 24 prill 1983
39. Letër Faridin Tafallarit, 26 prill 1983
40. Letër Qendrës Ekzekutive, 4 maj 1983
41. Letër Xhafer Shatrit, 4 maj 1983
42. Letër Xhafer Shatrit, 13 qershor 1983

43. Letër e Xhafer Durmishit për Faridin Tafallarin, vjeshtë 1983
44. Letër Bashkësisë së klubeve, 1 nëntor 1983
45. Letër shokëve në Saar-Louis, nëntor 1983
46. Letër Qendrës Ekzekutive, 3 janar 1984 (pjesë)
47. Letër e Xhafer Durmishit për Faridin Tafallarin, mars 1984
48. Letër delegatëve të Bashkësisë së klubeve, mars 1984
49. Shokëve të Shtutgartit, 14 maj 1984
50. Letër J.M., 14 gusht 1984
51. Letër Remzi Ademit, 18 gusht 1984
52. Letër Imer Berishës, 24 shkurt 1985
53. Letër shokëve në Gjermani e Zvicër, 22 mars 1985
54. Letër Remzi Ademit, korrik 1985
55. Letër Hysen Gërvallës, 22 korrik 1985

1. Letër bashkatdhetarëve në Nagold, 8 shkurt 1982

Letër falenderimi për bashkatdhetarët në Nagold
Të dashur bashkatdhetarë të Nagoldit!

Na lejoni që të përfitojmë nga rasti për t'ju falenderuar për zëmbësishëm për kujdesin e madh që treguat me rastin e ngjarjes së hidhur që ngjau në mbrëmjen e 17 janarit në Untergruppenbach.

Ju falenderojmë për të gjitha, për telegramet, për vizitat në familje kur na erdhët menjëherë me të dëgjuar lajmin që ta ndani hidhërimin me ne, për pjesëmarrjen në marshin protestues për të shprehur hapur revoltën e cila na ka përfshi të gjithëve, për nderimet e fundit që u bëmë dëshmorëve ku ju edhe njëherë treguat respektin për veprën e tyre, për ndihmat materiale të pakursyera me të cilat na ndihmuat aq shumë.

Pjesëmarrja juaj me gjithë zemër na e zvogëloi shumë dhembjen tonë.

Ju falenderojmë të gjithëve që në këtë dhe të huaj na rrethuat ngrohtësisht, duke e kuptuar gjendjen se sa fortë ia kemi nevojën njëri-tjetrit.

Për aq sa kemi mundësi, ne nuk do të kursejmë veten tonë dhe do të mundohemi ta arsyetojmë ndihmën dhe kujdesin tuaj.

8 shkurt 1982 Untergruppenbach Shoqëria e punëtorëve të Shtutgartit (Xhafer Durmishi)

(Faridin Tafallari, Dhimbje krenare, Tiranë1998, f. 244)

2. Komitetit të Degës "Hasan Prishtina", 26 shkurt 1982

Letër drejtuar Komitetit të degës së LRSNJ "Hasan Prishtina"
Të dashur shokë!

Udhëtimin e Shpendit (Xhafer Durmishit) e quajtmë si shumë të suksesshëm. Ardhja e Halimit (Osman Osmanit) është me vend dhe angazhimi i tij i menjëhershëm me siguri do të jetë i frytshëm. Ditën kur u kthye Shpendi pra të hënën, ditën e parë të javës, kur shokët ia filluan javës së re të punës.

Meqë këndej shokët janë të shpërndarë në pika të ndryshme dhe që në atë javë nuk kishin farë automjeti, mbledhja zgjedhore e Komitetit nuk mundi me u thirrë gjer më 26 shkurt 1982. Atë mbrëmje në një qytet larg nga këtu u mblodhën: Shpendi

(Xhafer Durmishi), Halimi (Osman Osmani), Drita (Suzana Gërvalla), Agimi (Nuhi Sylejmani), Agroni dhe Guximi (Haxhi Berisha).

Mbledhjen e hapi Shpendi i cili në fillim i njoftoi të pranishmit mbi bashkimin, me organizatën e re dhe me detyrën e qëllimin e ardhjes së Halimit.

Ai për këtë mbledhje propozoi këtë rend dite:

Formimi i degës së LRSNJ për Evropën Perëndimore.

a) Që kjo degë e LRSNJ ta merr emrin e dëshmorëve Gërvalla, pra të quhet "Komiteti Vëllezërit Gërvalla".

b) Që Komiteti të përbëhet nga pesë anëtarë

Të ndryshme

Ky rend dite u aprovua një zërit nga të pranishmit.

1. Që në fillim u propozua të zgjidhen anëtarët e Komitetit, pra pesë veta. Meqë Agimi ishte edhe më parë si arkatar, Agroni si anëtarë së bashku me Dritën dhe **Shpendin** nuk u diskutua shumë rreth tyre se a duhet të jenë anëtarë të Komitetit të riorganizuar apo jo. Halimi propozoi që Komiteti t'i ketë edhe dy kandidatë. Ky propozim u quajt me vend dhe i arsyeshëm dhe si i tillë u aprovua. Arsimit që në fillim tha se pyetjen për arkatarë nuk ka nevojë ta përsërisim pasi arkatarin e veshëm e kemi që nga fillimi. Propozimi i Arsimit që edhe më tutje të jetë arkatarë Agimi i aprovua. Shpendi pasi i numëroi disa detyra që i ka pasur Drita si shoqja më e ngushtë e Sokolit (për të cilat disa nga të pranishmit nuk kanë qenë në dijeni) e njëherit i njoftoi se ajo pas një kohe do të shkoj në A. Ai atë e propozoi si sekretare deri sa ajo të jetë në mesin tonë. Ky propozim u aprovua unanimisht. Fjalën pastaj e mori Drita e cila u falenderua dhe në vazhdim i njoftoi të pranishmit se Shpendi (Xhafer Durmishi-shën. im) ishte njeriu që ishte udhëzuar ta ndihmonte Sokolin dhe për këto detyra të kryera ai kohët e fundit ishte pranuar edhe anëtarë i KQ (Komitetit Qendror-shën. im) të ish-LNÇKVSHJ. Duke pas parasysh këtë, vazhdoi ajo, unë mendoj se ai duhet të jetë kryetar i komitetit të degës së LRSNJ për Evropën Perëndimore. Edhe me këtë propozim të pranishmit u pajtuan. Për anëtar mbetën Halimi dhe Agroni.

Me shkuarjen e Dritës (Suzana Gërvallës në Shqipëri-shën i Xh.D.) ne do të mblidhemi prapë dhe në vendin e sekretarit do të zgjidhet Halimi. Ndërsa anëtarë i ri i komitetit do të jetë Arsimit. Kandidati i ri besojmë se në bazë të punës së tij do të zgjidhet Luli.

a) Propozimi që komiteti të quhet "Vëllezërit Gërvalla" u aprovua një zërit.

b) Lidhur me këtë pikë të rendit të ditës duke pasur parasysh faktin se ishte i pranishëm anëtari i ri Halimi edhe ca anëtarë të tjerë të ish-LNÇKVSHJ nuk dinin shumë në lidhje me përbërjen në numër të një komiteti, mbretëroi pak heshtja. Me këtë rast Shpendi shpjegoi se Lëvizja NÇ me këtë praktikë punon që disa vjet dhe se kjo formë është treguar mjaftë e suksesshme. Halimi vazhdoi se ai me shokët e tij kanë vepruar ndryshe dhe se nuk kanë shumë eksperience lidhur me funksionimin e një komiteti të tillë sidomos në kushtet jashtë atdheut dhe pasi ne ishim të pranishëm tetë ndërsa komiteti do të kishte vetëm pesë anëtarë. Halimi tha se faktikisht për anëtarët e këtij komiteti po dinë 8 veta. Ai tha se edhe ata aktivist të dalluar të jen si kandidat për komitet. Ky propozim dhe arsyetimi i cekur më lartë u pranua. Pra komiteti i degës së LRSNJ "Vëllezërit Gërvalla" për Evropën Perëndimore ka me shkuarjen e Dritës ai do të duket kështu soji:

1. Shpendi	Kryetar	Xhafer Durmishi
2. Drita/Halimi	Sekretar	Suzana Gërvalla/Osman Osmani
3. Agimi	arkatar	Nuhi Sylejmani
4. Agroni	anëtarë	Faridin Tafallari
5. Halimi	anëtar	Osman Osmani

6. Halili	kandidat	Hafiz Gagica
7. Guximi	kandidat	Haxhi Berisha
8. Arsimi	Përgjegjës i rinisë	Naim Haradinaj

2) Në pikën të ndryshme diskutimet u zhvilluan rreth anëtarësisë, çështjet materiale, puna rreth vendosjes në një bazë të re dhe nxjerrjes sa më të shpejtë të numrit të ri të organit.

Për këto dhe të tjerat herën e ardhshme.

Ju përshëndesin shokët e "Komitetit Vëllezërit Gërvalla" (Xhafer Durmishi)

Kosova – Republikë" (Faridin Tafallari, Terror-Dhimbje-Qëndresë, Tiranë 1997, faqe 357-358)

3. Letër Sabri Novosellës, mars 1982

Vëlla Mërgim!

Një shok nga Dibra për të cilin të kam folur, ka shkuar në kamp. Ai prej kampi na lajmëron se si ka arritur një spiun të UDB- së. Fjalët e tij i muarrëm me rezervë të madhe, sidomos kur të kihet parasysh historia e XH.SH., e njëherazi edhe ky shoku është njeri që dyshon shumë sa që tani po më thonë se ai paska shprehur dyshime edhe në mua, kur unë kam thënë një herë kam banuar gjatë studimeve e njëherë jo. Unë vërtetë ashtu kam thënë se gjatë 4, 5 viteve studimi edhe kam banuar edhe kam udhëtuar. Nejsë.

Pas bisedës me ju që atë natë, për në Itali i nisëm katër shokë me një automobil. Ndër ta edhe Halimi (Osman Osmani). Edhe unë plotësisht mendoj se do t'ia vlen barra qeran këtij udhëtimi. Organin e dorëzuar për radhitjen e shtylave na kushtoi 1400 DM. janë 17 artikuj (pa poezi). S' bashku me fotografitë dhe titujt beso se do të dal mjaftë material. Pjesa dërmuese e shkrimeve është e Sokolit, megjithëse nga kapuçonët nuk është kthyer as gjysma e materialeve të përgatitura për numër. Organin do ta nxjerrim si numrin 3 të LNÇKVSHJ, por për hir të formimit më të shpejtë, që të mos presim deri tek numri i ardhshëm do të dalim me një fletë të shkapur si te Lajm. Nr 3, duke e quajtur shtojca e zërit. artikujt e saj "Një udhëtim në izr..." dhe "Plisi i bardh mbi faqe të zezë" nuk u dorëzuan në radhitje pasi H. e kishte humbur ndërsa të dytin arkatari ma solli me vonesë. Unë i kisha dorëzuar në radhitje për hir të shpejtësisë edhe pse kështu krejtësisht s'na doli, dhe më tepër për shkak të familjes vendosëm që këtë numër ta punojmë në shtypin e qytetit, sepse këta kapuçonët interesohen fortë se ç'po bëhet, e pa rregullimin e shoqes së Sokolit nuk kishim mund t'i largojmë mjetet e punës siç është një makinë e tillë. Dhe beso që se kjo është e arsyeshme. Kam frikë se organi do të na del me ca gabime gjuhësore jo për fajin tonë, por për shkak të atyre që e përgatisin.

Unë solla edhe mendimin tuaj për I.K. (Ibrahim Kelmendin). Nuk m'i pranuan me pikëpamjet e shumicës e pikëpamje të tilla shprehu edhe Halimi, sidomos pas njohjes me te. Tani shoqja e Sokolit thotë se I.K., i ka thënë Sokolit (Jusufit) para dy viteve, se po qe se doni mund t'iu fus dhe nxjerrë nga Kosova pa therrë në këmbë. Pastaj kur unë iu them se ata janë përcjellë me javë apo muaj të tërë, pse atëherë nuk ndodhi kjo një natë më parë kur me ta ndodhej edhe I.K., me të cilin ata u kthyen në ora gati tre të natës, pas shikimit të filmave. Unë më tepër se kurdoherë po e kuptoj përgjegjësinë për rrjedhën e ngjarjeve dhe nuk kam dëshirë që kjo të zbulohet nëse është e vërtetë. I.K. u interesua shumë se ku ka qenë Besniku në Itali ai thoshte se kemi disa shokë të mirë në kamp. Nga informatat e mëvonshme vim në përfundim se I.K. mund të ketë ditë për XH. Këtu parimisht s'ka gjë të keqe.

Herën e fundit me disa sjellje të tija siç ishte këndimi i pandërprerë korridorit dhe sjellja prej kapadaiu nga dhoma në dhomë mi kaloi gjithë kufijtë e durimit dhe me

të vërtetë, kur i shikojsha fotografitë e dy vëllezërve më dukej sikur po më thonë se ç'je duke bërë? Andaj vendosëm që atë natë të bisedojmë me te për disa gjëra. Edhe pse shqiptari nuk e ka zakon me e pyetë mysafirin, pse ke ardhë, unë u detyrova me ia bërë një pyetje të tillë qysh në fillim të bisedës. I thashë se rruga e gjatë, shumë shpenzime, etj., a ke diç për të thënë? Po tha! Tani është njëvjetori i demonstratave, të bisedojmë për ndonjë manifestim apo komemoracion. Të bashkëpunojmë. Në bisedime merrte pjesë edhe shoqja e librit, e cila nuk guxonte të fliste, përveç atëherë kur iu dashke të mbrohej nga akuzat, sidomos të mijat, kur ju thashë se juve ju ka interesuar biseda e çdo kujt këtu dhe për këtë e keni bërë veshin cingare....Në bisedime merrnin pjesë rreth 10 veta, gjë që nuk i pëlqente fare I.K. dhe për këtë u ankua. I fola edhe për: 9000 DM, 26000 njësi të hollash belge, 700 Fr.zvicerane dhe 1300 Fr.franceze, të cilat janë gjetur në palën e një jorgani në dhomën e fjetjes së mysafirëve. I.K. tha se kjo është e montuar nga dikush dhe se atij i intereson përçamja, duke thënë se këtu paska hyrë armiku duke aluduar në mua. I fola për bashkëpunimin e mëparshëm. Ai thoshte se për këtë dinë vetëm ata tre, e jo tjetër kush, ndërsa tani dikujt ato marrëdhënie i intereson t'i interpretoi si të do. Unë thashë se faktet ekzistojnë dhe ato flasin mjaftë. Nëse doni bashkëpunim duhet t'i rishikoni disa gjëra të kaluara. I fola për të hollat në xhirollogarinë "Ndihmat për Kosovën" të publikuar në numrin e parafundit të revistës "Liria". Kush ka tani pushtet në to nëse nuk keni ju, pse nuk u shpenzua asnjë mark nga to për këtë rast, çdo të thotë populli nesër kur ta marrë vesh këtë? I kaloi të gjitha këto pyetje në heshtje duke arsyetuar se punët kanë qenë të ndara. Foli pastaj për mundësinë e botimit të ndonjë broshure të përbashkët në lidhje me rastin. I thamë që atë ta bëjë secila organizatë në organet e veta.

U ndal. Po të më thuheshin fjalë të tilla mua me të vërtetë, në atë vend s'do të dukesh kurrë. Me atë nuk ndodh kështu. Kjo na e rritë edhe më tepër dyshimin se ai me të vërtetë është i detyruar nga dikush që të duroi gjithçka vetëm të jetë i pranishëm dhe të vëzhgojë. Për dashnoren e tij ka paraqit azil. Atë ditë kishin ardhur te avokati rreth çështjes së azilit e këtë nuk donte ta tregonte. Sa i përket çështjes së Has. Po del në pah se unë kam gabuar që nuk të kam dëgjuar. Ai tani është në klubin e Dyseldorfit ku qarkullon I.K. Po thonë se është duke u mërziur shumë. Por po të ishe në vendin tim dhe me eksperiencën time besoj se do të veprojshe si unë. Ai me të vërtetë ishte i habitur shumë.

Unë iu kam pas afruar me të vërtetë singerisht disa herë dhe i kam rrehë shumë gjëra që na preokupojnë. Por ai vazhdimisht ndahej me orë të tëra vetëm me I.K.. Shoku ynë që ka çue material me te në Kosovë do shkoi me bisedue me të. Nga Australia, respektivisht nga shoqëria "Bajram Curri" na ka ardhë një ngushëllim për familjen dhe një falenderim për dërgimin e revistave të cilat i kanë pëlqyer shumë. U qova prapë edhe ekzemplarë tjerë duke përfshirë edhe numrat e Lajmëtarit. Adresën e Besnikut nuk e kemi. Besojmë se shumë adresa të konfiskuara së shpejti do t'i kemi në dorë. Megjithatë na i dërgo të gjitha ato adresa që na ke pas dërguar më parë. Gjithashtu na dërgo adresat që do t'i sigurosh nëpërmjet Plakut. Punën e udhëtimit të Kushtrimit me shokë a e kryeve ende apo jo. Në mbledhjen e afërt që do të thërrasim do ta shtrojmë si çështje që donë zgjidhje edhe punën e dërgimit të materialit në Kosovë, duke pas parasysh se ky ishte edhe AMANETI i Sokolit në çastet kritike të jetës së tij. E presim përgjigjen menjëherë.

Përsëndetje vëllazërore e revolucionare nga Shpendi (Xhafer Durmishi)

(Faridin Tafallari, Me tre yjet e pavdekësisë në ato vite të stuhishme, Tiranë 2010, f. 285-287)

4. Pajazit Ibrahimit në Australi, 7 mars 1982

Shoku Pajazit,

Përgjigjen në letrën time e mora nga shoku prej të cilit ta kam dërguar. Unë jam duke banuar në banesën e Familjes Gërvalla. Mirëpo shkrimi i letrave me adresë të kësaj familje nuk është i mirë sepse nganjëherë letrat po vijnë të çelura.

Revistat me sa e kuptova u paskan pëlqyer dhe për këtë jemi të gëzuar. Edhe ne na erdhi mjaft mirë që kishit dërguar ata ekzemplarë të numrit 16 të gazetës së Shoqërisë "Bajram Curri." Herave tjera na dërgoni më tepër, sepse ndikojnë mirë tek punëtorët në Perëndim, të cilët janë të shumtë dhe që shkojnë shpesh në Atdhe.

Në fillim po të prezantohem me të vërtetë se kush jam.

Unë jam Xhafer Durmishi, nga Stanovci i Poshtëm, një fshat afër Vushtrrisë. Vëllau im i madh quhet Xhevat, është student i mjekësisë dhe është shok i ngushtë i vëllaut tënd Nexhatit. Në qershor të vitit 1981 u largova pasi e ndieja veten të rrezikuar nga fushata e burgosjeve. Unë në Kosovë kam qenë anëtarë i Lëvizjes Nacionalçlirimtare të Kosovës dhe viseve tjera shqiptare në Jugosllavi. Kur dola jashtë, përmes lidhjeve me shokë jashtë atdheut mora kontakt me Jusuf Gërvallën, një nga udhëheqësit me rëndësi të Lëvizjes.

Për punën dhe aktivitetin e Lëvizjes do të informohemi edhe në letrat tjera. Verën e vitit të kaluar isha pak ditë tek Nexhati në Chur. Aty ai ma tregoi një letër tuajën në të cilën ju flitshi për disa shqiptarë të Zvicrës, anëtar të "Frontit të Kuq". Atë organizatë e kemi kuptuar, e udhëheqë një Ibrahim Kelmendi nga fshati Vuthaj, tani i shpërngulur në një fshat afër Pejës. Me ardhjen e Jusuf Gërvallës në Gjermani ai njoftohet edhe me Ibrahim Kelmendin, të cilit i ndihmon dhe ia nxjerrë tre numra të gazetës së "Frontit të Kuq" me emrin "Bashkimi".

Jusufi, anëtar i LNÇKVSHJ pra e ka ndihmuar dhe popullarizuar në masën më të madhe "Frontin e Kuq". Prej janarit 1981 Jusufi nuk i ndihmon më Ibrahim Kelmendit në nxjerrjen e gazetës "Bashkimi" për disa shkaqe.

Në organizimin e demonstratave të punëtorëve në Perëndim, krahas Lëvizjes e cila ka bërë shtypjen e thirrjeve me teknikën e saj kanë ndihmuar dhe marrë pjesë Organizata e Marksist-Leninstëve të Kosovës të cilën jashtë Atdheut e ka udhëheqë Kadri Zeka, i cili u vra në mbrëmjen e 17 janarit në Untergruppenbach. Atë ditë aty ka qenë edhe Ibrahim Kelmendi i cili nga këta është larguar kah ora 13.30. Këta të tre janë vra kah ora 22.15 kur me insistimin e Kadriut dalin për të thirrë në telefon në Zvicër prej një automati. Për shkak të provokimeve, familja Gërvalla nuk kishte telefon, e kabina telefonike për thirrje ndërkombëtare gjendej në një fshat tjetër. Kadriu donte t'i telefononte gruas së tij në St Gallen të Zvicrës. Sa i përket OMLK-së nuk dimë se si do të organizohen e vazhdojnë punën e tyre. Sa i përket LNÇKVSHJ mund të them se do të përpiqemi ta vazhdojmë luftën me hov edhe më të madh. Këtu kemi organizua një komitet me emrin Vëllezërit Gërvalla. Për shkak të disa arsyeve që nuk po i përmendi, me Ibrahim Kelmendin do të bashkëpunojmë e koordinojmë aktivitetin por nuk do të kemi marrëdhënie të ngushta me te.

Këtu, si edhe tek ju ka shumë shqiptarë, ka shumë të mirë dhe ka disa agjentë të konsullatave jugosllave të cilat ekzistojnë në shumë qytete të Gjermanisë.

Duke pasur për bazë këtë, shumë shokë të Lëvizjes e po ashtu edhe të OMLK nuk njihen nga masat me emrat e tyre të vërtetë por vetëm përmes pseudonimeve. Këtu me shokë jemi marrë vesh të quhem Skënder. Si Xhafer pos dy tre vetave askush nuk më njeh. Tani po më njeh edhe ti. Pra është mirë që këtë punë ta din vetëm ti e para shokëve tuaj më përmend me emrin Skënder. Tani letrën ma ktheni dhe më folni se si po ju

duket kjo puna jonë. Ne do t'ju informojmë më gjerësisht në letrat tjera. Presim edhe mendimet tuaja.

Unë mendoj se unë dhe ti përbëjmë një rast të mirë që të ndikojmë në afrimin e Lëvizjes dhe Shoqërisë “Bajram Curri” në Australi. Kështu përveç këmbimeve të letrave tona private të bëhet komunikimi në mes Komitetit Vëllezërit Gërvalla, Komitetit të Lëvizjes në Zvicër dhe Sh.B.K Bajram Curri. Këtë po e përfundoj me kaq duke ju nisur njëherit edhe disa ekzemplarë të Zërit të Kosovës, të janarit 82, me bindjen se po u plotësoj dëshirën ju dhe bashkatdhetarëve tjerë. Shkruani për aktivitetin, për jetën dhe peripetitë e bashkatdhetarëve në Australi.

Përsëndetje vëllazërore dhe revolucionare nga ne të gjithë.

Kosova-Republikë!

Personalisht ti dhe Shoqëria Bajram Curri, Familjes Gërvalla mund t'i drejtoheni në adresën:

Familja Gërvalla, Habichtchöhe str. 40, 7101 Untergruppenbach,
West Germany (Xhafer Durmishi)

5. Letër Sabri Novosellës, maj 1982

Shoku Mërgim, maj 1982

Që në fillim po të tregoj se udhëzimi yt që unë t'i shkruaj letrat me makinë, tani për tani praktikisht është vështirë të realizohet e njëkohësisht t'i përgjigjet ritmit të letrave tuaja.

Pas të gjithë atyre ditëve të ngarkuara me aq tension po mundohemi t'i themi vetes se kemi pushuar, por unë vetë jam dobësuar fizikisht. Vështirë është me të vërtetë me u pajtua me faktin se ata nuk janë më fizikisht.

Demonstrata e Bonit shkoi për mrekulli. Ishte më mirë se sa e kishim paramenduar. Uka në fillim, para demonstratës ishte pesimist dhe nuk u angazhua në organizimin e saj. Në telefon, pas demonstratës kur i tregova se si ka shkuar puna, u duk se u nda i kënaqur, por më tha se ishte frikësuar për ndonjë prishje të rendit sepse këtë e ka marrë si punë fëmijësh. Pastaj vazhdoi duke më thënë që thirrjet për demonstrata të mos nënshkruhen në emër të organeve të organizatave sepse kjo po përdoret si shkas për të ushtruar tortura mbi të burgosurit. Nuk ishte dakord që demonstrata të thirret në Vjenë e as tjetërkund. Në telefon më tha se “shiqo se sikur mos kjo është sikur me ndezë zjarr me kashtë dhe vazhdoi se në qoftë se nuk është shpërndarë thirrja për demonstratën e Vjenës në masë të madhe dhe nëse ka mundësi të tërhiqet, le të tërhiqet. Lajmi kishte marrë dhenë edhe pse thirrjet mund të tërhiqeshin, nuk u tërhoqëm.

Në Vjenë vërtetë na pritën befasi. Në thirrje, siç e ke parë demonstrata parashihej të fillonte në ora 11.00 ndërsa arritja e autobusëve në vendin e caktuar filloi nga ora 09.00. Kah ora 09.30 u mblodhën afër 300 veta. Policia erdhi dhe thoshte se nuk keni leje, se dokumenti të cilin ne e kishim për demonstratë është vetëm kërkesa për demonstratë por jo edhe leja. Në anën tjetër shtypi lajmëronte për demonstratë. Policia nuk lëshoi pe dhe duke pritur na detyroi t'i fusim parullat në autobus. Në diskutime e sipër me kalimin e kohës numri i njerëzve shtoej dhe në ora 11.00 ishin rreth 700 veta. Kish nga të gjitha anët e Gjermanisë, Zvicrës dhe Belgjika dhe disa nga Suedia. Gjithashtu kishin dalë disa të Vjenës por jo sa është paramenduar kur të kihet fakti se në Vjenë ka me mijëra shqiptarë.

Ambasada jugosllave ishte aktivizuar në masën e duhur, mirëpo agjentëve të saj u doli më vështirë se sa e kishin menduar. Shumë prej tyre u rrahën dhe u konfiskuan shumë aparate fotografimi.

Këtu është bërë një punë e madhe përpara. Angazhimi i tërë familjes së Sokolit në veprimtarinë patriotike duke gjetur hapësirat e 'demokracisë perëndimore' u dallua aq shumë. Këtë po e theksoj tani për të treguar se kjo familje ka shkri në veprimtari shumë të holla. Kështu mund të thuhet se në mes ndihmave familjes dhe atyre të punës patriotike të cilat u zvogëluan për shkak të të parave nuk ka qenë kurrsesi e mundur të tërhiqet një vijë e prerë megjithëse me të gjitha mundësit këtë jemi munduar ta bëjmë.

Tani jemi duke i rregulluar gurët e varreve....

Që nga 17 janari e deri më sot, në mënyrë të organizuar përveç në tri vende nuk kemi mund me shkua nëpër punëtor. Halimi (Osman Osmani) me tre shokë të tjerë kanë qenë në Zvicër para demonstratës së Vjenës. Kanë shpërndarë thirrjet dhe janë pritur si nuk bënë më mirë. Organi u ka rregulluar shumë terrenin. Unë me ish-arkatarin, para Vjenës isha në Dyseldorf në klubin "Emin Duraku" i cili për rastin e 17 janarit ka ndihmuar me mbi 22000 DM. Edhe aty na pritën mirë. Një nga më të moshuarit më tha: "Nëse sot Kosova nuk çlirohet ju udhëheqësia do të jeni fajtor. Nëse nuk na udhëhiqni e nuk merreni vesh, do t'ju vrasim. Bashkohuni dhe tregoni se ç' duhet të bëjmë dhe për të tjerat shiqo Bacën."

A flet kjo për largim masash apo afrim. Kjo fletë edhe për atë se presioni nga baza për bashkim është aq i madh sa ai që del pengesë në këtë rrugë do të duhet t'a tregojmë. Komunikatën dhe adresat i mora nga sekretari më 2/5-1982 dhe ishin të çelura. Tash nuk e di si thua për atë komunikatë. Çelja e tyre është një punë e keqe. Tani po ta dërgoj këtë adresë të një gjermani. Në këtë mund të shkruash letrat me rëndësi. Gjysmën e kësaj letre po e shkruaj pas bisedës telefonike. Halimi sonte nuk është këtu. Qe dy netë me Hasanin janë në një tjetër vend.

Presioni i policisë në këtë shtëpi po shtohet sepse ata po e vërejnë se këtu ende ka lëvizje dhe këtu ende ka njëfarë burimi. Por ne megjithëse po e dimë se si duhet ende nuk po jemi në gjendje të largohemi nga këtu. Nesër do të vij një marksist gjerman dhe do të ushtrojmë me makinën, teknikën e gazetës. (Është fjala për studimin e disa funksioneve të avancuara të makinës së markës IBM Electronic Selectric Composer, përmes doracakut "Handbook" në gjermanisht, të cilat nuk kisha pasur rast me i mësuar në tërësinë e tyre nga Jusufi - shën i Xh.D.). E di se do të duhej që t'i kontrolloni shkrimet edhe ju me shokët atje. Do t'i fotokopjojmë artikujt dhe po ua dërgojmë që t'i kontrolloni. Unë besoj se edhe ky do të jetë shumë i mirë. Fatoni i ka dërguar dy artikuj, por njëri ishte shumë i ngjashëm dhe i cituar nga Skënder Osumi "Si po shkon Jugosllavia titiste në Kongresin e XII". Prej Abdullah Prapashticës nuk ka ardhë asgjë. Unë i kam përgatitë disa shkrime, por pjesa më e madhe do të jetë e Jusufit. Aftësitë e Ukës në këtë drejtim nuk i di. Fjalët e tij të thëna "punë fëmijësh" në fillim nuk iu kam kushtuar rëndësi fare, por tingëllima e tyre e keqe po vjen duke u rritë. Kur ma the sot atë lajm u gëzova dhe disi po e ndjej njëfarë mobilizimi. Por edhe ndonjë punë e keqe po më demoralizon shumë.

Mirë u pafshim

Skënderi (Xhafer Durmishi)

6. Letër Sabri Novosellës, 22 maj 1982

Shoku Mërgim,

22 maj 1982

Dje e mora një letër nga Xhafer Shatri. Po ta dërgoj të fotokopjuar. Edhe letrat tuaja të dërguara tek shoku gjerman i mora. Do të veprohet asi soji dhe besoj se do të ndikoj pozitivisht. Momentalisht nuk kemi gjetur banesë por sot do të shikojmë një vend për një dydhomëshe që kushton 400 DM në muaj. Në qoftë se nuk është e zënë do të bëhet shumë mirë. Këtu po ta dërgoj edhe nga një letër që kam marrë nga Suedia dhe SHBA. Jemi duke punuar në dalje të revistës, por prapë se prapë emri i saj po kontestohet e diskutohet. Prej Ankarasë nuk ka ardhë ndonjë material.

Këtu po e përfundoj me kaq.

Të fala

Skënderi (Xhafer Durmishi)

7. Procesverbali i KVG, 11 korrik 1982

Procesverbal i mbledhjes së Komitetit Vëllezërit Gërvalla (KVG) i mbajtur më 11 korrik 1982

Rendi i ditës:

Një analizë e punës së gjertanishme

Diskutimi rreth Projektstatutit të Lëvizjes

Puna rreth revistës

Caktimi i datës për takimin e ardhshëm

Të ndryshme

Shtatë të pranishmit (Skënderi, Halimi=Osman Osmani, Naim Haradinaj, Faridin Tafallari, Haxhi Berisha, Hafiz Gagica dhe Nuhi Sylejmani) njëzëri e aprovojnë propozimin mbi rendin e ditës. Skënderi hapë diskutimin rreth pikës së parë.

Fjalën e merr shoku Faridin.

Shpjegim: Në diskutim u vendosë që analiza të bëhet nga 17 janari e gjer më sot. Pritja e njerëzve sipas Faredinit ka qenë e mirë dhe ndihmat për këtë kanë ndikua. Kjo nuk është bërë me një organizim të mirëfilltë por është veprua në atë mënyrë që secili ka veprua si ia ka marrë mendja më së miri. Dalja e numrit të tretë të ZK ka qenë ngjarje e madhe.

Sjelljet e Ibrahim Kelmendit (IK) nuk kanë qenë të mira.

Veprimi i ngutshëm nga ana jonë, pra nga Skënderi dhe Haxhiu, si dhe vonimi i Nuhiut që të thotë fjalën e tij me një shumë të hollash prej njëmbëdhjetëmijë DM. Mosmarrëveshja në mes veti për këtë veprim. Demonstratat kanë kaluar mirë. Udhëtimi i Suzanës për në Shqipëri ka qenë në rregull. Formimi i KVG konsiderohet ngjarje e madhe. Riorganizimet në rregull. I dyti jo aq i mirë sepse mungoi Haxhiu. Fushata e shfaqjes së filmave çmohet lartë. Demonstrata e Bonit çmohet lartë e gjithashtu e Vjenës përkundër vështirësive. Haxhiu nuk e sqaroi situatën gjer në fund. Demonstrata e Bernit në rregull. Numri i fundit i revistës dhe komunikata të mira. Me kaq shoku Faridin e mbylli fjalën e tij.

Pas kësaj Skënderi i drejtohet Nuhiut që ta merr fjalën por ai përgjigjet se don të dëgjoj të tjerët e vetë do të flasë në fund. Të tjerët pajtohen me këtë.

Fjalën e merr Naimi:

Pritjen e quan të mirë megjithëse ram në konflikt me IK. Hapat tonë i quan të drejtë sidomos përjashtimin e tij nga shtëpia e Jusufit. Edhe Nuhiu ka qëndruar mirë një kohë të gjatë në pritjen e njerëzve. Marshet protestuese në rregull. Varrimi kishte me

qenë më i mirë sikur për incizimin me video kamerë të angazhohej një punëtor profesional. Numri i tretë i revistës i realizuar mirë. Demonstrata e Vjenës më e mirë se e Bonit. Formimi i KVG me vend. E sheh si rënie dhe në kundërshtim me komunikatën. Heqja e citatit të JG e gabueshme. Me kaq Naimi e mbaron fjalën e vetë.

Haxhiu: Pritja në rregull. Për shkak të mos organizimit më të mirë kanë lindur mospajtime. Ka pasur sabotim dhe zhagjitje të punëve nga ana e IK. I është tërheq vërejtja disa herë. Sipas mendimit tim ai nuk ka jetuar fare me atmosferën ato ditë. Angazhimin e një punëtori profesional për incizimin e varrimit e quan të panevojshëm. Përmes formimit të KVG u vazhdua puna e mëparshme. Vështirësitë me demonstratën e Vjenës kanë të bëjnë me qëndrimin anësor të policisë të cilët na thonin herë po e herë jo. (Haxhiu ka qenë i angazhuar për leje dhe ka bërë një udhëtim gjer në Vjenë ditën e enjte më 22 prill 1982). Megjithatë këtë e çmoj më shumë se të tjerat.

Halimi (Osman Osmani): Formimi i KVG i domosdoshëm (ky ia fillon nga kjo ngjarje pasi më parë nuk ka qenë këtu). Puna ka vazhdua por ka pasur dobësi. Për shkak të mos përvojës mund të kemi bërë gabime, por largimi i tij nga familja i mirë për të mos thënë i domosdoshëm. Gabim strategjik që ia kemi thënë të gjitha. Puna e komitetit dhe vetë ekzistenca e tij kanë qenë formale.

Nuhi Sylejmani: Pritja ka mund me qenë më e mirë, por ngjarje të tilla të befasishme s'kemi mund ndryshe. Nuk është i kënaqur. Pritja ka qenë formale. Nuk kemi diskutue në mes veti. Ditën e varrimit nuk dilnin njerëzit prej dhome. Ka shkua si në diktaturë. Video filmimin e varrimit është dashur ta bëjë një profesionist ashtu siç thotë Naim Haradinaj. Formimi i KVG i mirë por është dashur më parë të formohen celulatat e pastaj komiteti dhe jo anasjelltas. S'kemi pasur asnjë shokë afër veti. Organizimi i brendshëm jo i mirë. Dekonspirimin e dënon dhe e quan krim të madh. Veprime me gjaknxehtësi dhe pa marrëveshje i kanë dhënë IK fakte për sulm megjithëse përjashtimi nga shtëpia e Jusufit ka qenë i drejtë.

Udhëtimi i Suzanës në Shqipëri mirë, megjithëse nuk jemi marrë vesh në mes veti. Demonstrata e Bonit e mirë por me Skënderin ka pasur mosmarrëveshje sepse kam brohoritur Kosova-Republikë dhe lavdi Marksizëm-leninizmit e ai më ka thënë mos bëjë ashtu. (Shkaktohet një qeshje kur Nuhiu thotë se më ka thënë mos thuaj Kosova-Republikë, Marksizëm-Leninizëm dhe Nuhiu e përmirëson veten dhe thotë se më ka thënë vetëm mos me brohoritë Marksizëm-Leninizëm.

Skënderi: Moskuptim ka pasur me shokët e Zvicrës dhe të Dyseldorfit lidhur me atë që të lexohen nga dy referate. Shfaqja publike e dyshimeve ndaj IK e gabueshme. Demonstrata e Vjenës përkundër vështirësive është historike sepse është demonstrata e parë shqiptare që bëhet për Kosovën në Austri. Përgjigjja e masave në thirrjet tona është fakti më demantues kundër gënjeshtreve se njerëzit janë dëshpëruar.

Mbyllet pika e parë.

Lexohet projektstatuti në dorëshkrim. Në përgjithësi nuk kishte vërejtje ndaj tij. U vendos që të shtypet dhe të shpërndahet për diskutim e gjithashtu të shërbej si bazë për formimin e celulave të reja.

Nga Skënderi u lexua letra e Abdullah Prapashticës (Kushtrimit). Datë nuk kishte, andaj duhet ta veçojmë me titullin: "Të dashur shokë! Të analizohet". Kjo letër paraqiti disa risi të të shkruarit sepse letra të formuluar në atë formë para këtyre shokëve ende nuk janë lexuar. U vërejt edhe brengosje pse gjithë ato materiale teorike, ligjërata, artikuj e shpjegime të ndryshme, pasi na tregohet se ekzistojnë, thuhet se u gjetën të bllokuara. 'Pra ne kemi shumë nevojë për ato materiale të nevojshme'. Letra e Kushtrimit u kopjua me nga një ekzemplarë për secilin pjesëmarrës.

Skënderi duke ju referuar udhëzimeve të Kushtrimit që të organizohemi sa më shumë edhe nëse në fillim ai të duket formal dhe shton: Ne e kemi formuar një komitet

të vetëm (VG) dhe nga kryetari i tij momentalisht po na thuhet se e kemi formuar pa asnjë shokë afër, e në anën tjetër thirrmi që të formojmë kaq organizata e forume dhe përfundoi se me të vërtetë vlerësimet e Nuhiut dhe Kushtrimit janë diametralisht të kundërta. Nuhiu pa e kuptuar shpjegimin tim nxehet duke menduar se kam diçka ndaj vlerësimit të tij. Më tutje Skënderi thotë: Nga një drejtim i KQ të LRSNJ ka ardhur një letër ku kërkohet të shpjegohet çështja se a po largohen punëtorët apo nuk po largohen. Pasi Halimi (Osman Osmani) ka dërguar lajme se punëtorët po na largohen ndërsa Skënderi njëkohësisht ka raportuar se jo vetëm që nuk po largohen por po na afrohen. Për këtë ai këtë çështje e shtron para të gjithëve që të japin vlerësimet e tyre.

Nuhiu e merr fjalën dhe thotë: Po është e vërtetë se njerëzit po na largohen. Në pyetjen se a po u largohen disa njerëzve apo luftës ai përgjigjet: Po na largohen neve, disa vetave, se po ikin prej nesh si prej drejt. ... Faridini ndërhyrë dhe thotë flisni qetë, se më mirë po shkon dhe Nuhiu le ta përfundoj fjalën e vetë. Nuhiu vazhdon: E mirë pra-unë jam drejt. Unë (Skënderi) në këtë kohë nuk i kam në dorë fletët e procesverbalit. Kur i marrë ato prapë që të shënoj fjalën e çdonjërit, ai thotë se nuk thash ashtu. Halimi duke e ditur se është ai i cili e ka informuar KQ se po largohen njerëzit e merr fjalën dhe thotë se këtë e kam bërë me telefon, se ashtu e kam pasur përshtypjen. Prej të tjerëve asnjë nuk ishte i mendimit se njerëzit po na largohen, as neve e as luftës. Nga ky forum u kërkua nga Nuhiu e Halimi që t'i përgatisin me shkrim vlerësimet e tyre duke i bazuar ato me shembuj konkret dhe t'i raportojnë KQ.

Në lidhje me këtë pikë të hapur diskutimi zgjerohet. Në kohët e fundit ka pasur një konflikt në mes Skënderit e Halimit. Si shkak mund të merret një banesë e Nuhiut. Sk i thotë Nuhiut se pse ti me i thënë një njeriu në Shtutgart se këta djemtë po më bëjnë dallavere dhe a mund ta argumentosh këtë. Nuhiu thotë se kjo është çështje private dhe do ta shqyrtoj me atë punëtorin.

Gjithashtu Faridini i drejtohet Nuhiut me fjalët se pse po i përhapë disa fjalë nënçmuese për djemtë duke thënë se edhe filloren e kanë marrë privatisht e kanë ardhë të lavdërohen si studenta. Nuhiu thotë se a është gjallë Qemal Haxhillari (fquinji i parë i Faridin Tafallarit i cili kohëve të fundit është shoqërua më shumë me Nuhiun). Më pas Nuhiu hidhërohet duke i ndryshuar fjalët para të gjithëve herë pas here. Në një moment ngrihet në këmbë dhe thotë: Eh me kend kam mbetë me folë dhe me këto fjalë largohet. Pra ai u largua vetë dhe iku.

Me kaq edhe mbledhja u mbyll, të gjithë të dëshpëruar me sjelljen jonjerëzore të Nuhiut. Në lidhje me largimin dhe shenjat e tij kohëve të fundit KVG do të përgatitë një material të veçantë, si dhe për ndikimin e Halimit dhe punën e tij prej se iu ka bashkua KVG.

Procesmbajtësi

Skënderi (Xhafer Durmishi)

PS. Në pikën tre u diskutua rreth revistës. Më përfaqësisht për të foli Sk. Ai tha se puna rreth revistës duhet të filloj menjëherë. Për këtë hap i parë është që makina të vendoset tek shokët gjerman. A pyeti të pranishmit se a ka dikush që të propozoj ndonjë zgjidhje, a don t'a shtroj këtu para nesh, apo don ta thotë në mënyre individuale apo të na thuhet 'bëni si t'ua merr mendja', dhe kjo çështje të mbetet për ata që janë përgjegjës për revistën. Pas një heshtje Nuhiu tha: 'Bëni si të doni!'

8. Letër Faridin Tafallarit, 13 korrik 1982

Shoku Faridin, 13 korrik 1982

Projektstatutin do ta shtypim sonte në makinë dhe do ta dërgojmë sa më shpejt me postë. Ulu e bisedo pak me Qendin por pa i dhënë diçka. Prej neve mos të del fjala. Për këtë të shtunë tuboi shokët. Lexojua projektstatutin, por kopje të tij nuk ke nevojë t'u japësh. Pra thirre një mbledhje me këtë rend dite:

1. Leximi i Statutit (të përkohshëm të LRSHJ).

Në të vërtetë ti ua lexon si me qenë statut i vërtetë që të shohim se a po u pëlqen.

2. Situata momentale.

3. Të ndryshme

4. Caktimi i mbledhjes së ardhshme.

Për situatën momentale folu për atë në Kosovë, ku dje erdhi një shok i Haxhiut dhe tha se ka shumë milici e ushtri. Milicët serb bajnë "shlema" e ata shqiptarë jo. Parulla ka vazhdimisht dhe kudo. Sa i përket neve, edhe ne do të bashkohemi me situatën në Kosovë. Lufta e armatosur duhet të shtyhet edhe për një kohë. Ne duhet akoma të zhvillojmë luftën me mjete demokratike dhe në këtë mënyrë të vazhdojmë ta dobësojmë armikun tonë. Lexojua edhe artikullin e Ademit "Kthimi" dhe krahaso atë se për çka mundohet Ademi, e për çka brengoset Nikolla Pano. Në pikën 3 të rendit të ditës ata le ta marrin fjalën vet dhe të diskutojnë dhe le të bëjnë pyetje çka t'u intereson e ne i përcjellim me shkrim.

Me kaq prit të fala nga Skënderi (Xhafer Durmishi)

(Faridin Tafallari, T-Dhimbje-Qëndresë, Tiranë 1997, f.435)

9. Letër Sabri Novosellës, 14 korrik 1982

Shoku Mërgim, 14 korrik 1982

Këtë letër po ia dërgoj njëkohësisht edhe shokut që ka ardhur kohëve të fundit jashtë (XhSh).

Me këtë letër do të mundohem që në maksimum t'i qëndroj besnik realitetit.

Kush janë ata të cilët Halimi (Osman Osmani) i ka raportuar tek ju si rrugaç?

1. Hafizi, 23 vjeçar nga Gjilani, i malësisë së Karadakut. Ka mbaruar shkollën e mesme dhe regjistruar diçka në Prishtinë. Babai i tij qe 10 vjet ka punua në Ludwigsburg. Nëpërmjet babait ka ardhur në Gjermani dhe është njohur me Bardhin e Jusufin. Gjatë demonstratave të vitit të kaluar është treguar shumë aktiv dhe siç kam shkruar në një letër tjetër ka qenë hija (përcjellësi) i Jusufit. Në të vërtetë edhe për numrin 1 të Lajmëtarit të lirisë i ka dhënë 200 DM. Është depërtues dhe ia hynë punës në një mjedis ku nuk është punuar më parë. Është i martuar. Në banesën e babës së tij kemi qëndruar shumë, me muaj të tërë. Nga banesa e tij Jusufi e ka nisur telegramin dërguar Partisë së Punës gjatë fillimeve të Kongresit të VIII. Babait të tij ia kanë marrë pasaportën. Hafizi kurrë nuk ankohe.

Halimi i ka thënë një ditë se babën ta kanë ndalë në shtëpi pasi që ka qenë organizimi i dobët. Unë po i tregoj këto cilësi sepse për anën tjetër sigurisht mund të jeni të informuar.

2. Naim Haradinaj, djali i Ismailit, i dënuar me 14 vjet burg, ndërsa vëllau i tij është dënuar me 5 vjet. Në shtëpi ka nënën, gjyshen, një vëlla të vogël dhe një motër. Gjendjen ekonomike e kanë pasur shumë të mirë por ajo po vjen duke u vështirësuar për shkak të mungesës së krahut të punës. Për Naimin disa herë ka shkruar shtypi. Është i pari që e ka dërguar në Kosovë Lajmëtarin e Lirisë. Ka kryer edhe shumë aksione tjera.

Ne Gjermani gjatë vitit të kaluar jo vetëm që nuk është kursyer por të gjitha të hollat çka ka punua i ka shpenzua në rrugë për organizimin e demonstratave. Sigurisht mërzhitet, e sidomos pas 17 janarit nuk duket se është ai që ka qenë.

3. Haxhi Berisha, 22 vjeçar. Është detyruar ta ndërprej shkollën e mesme pasi ju ka djegur shtëpia dhe është detyruar të vij në Gjermani. I ka ndihmua në fillim Bardhi, por shumë pak pasi menjëherë është mësuar me mjedisin e këtuhit. Është shumë praktik. U ka gjetë punë në firma gjermane shumicës prej nesh. Sa i përket demonstratave vlejné të njëjta sikurse për Naimin. Është nip i Jusufit. Ka qenë tri herë në Kosovë me materiale deri në nga 1000 ekzemplarë dhe në të tri rastet ka kaluar me sukses. Duket se e kanë hetuar punën e tij dhe nuk mund të marrë më rrugët që ka bërë më parë. Më 1979 i ka mbajtur 3 muaj burg.

Këto janë në pika të shkurta disa të dhëna për këta të rinj që kanë bërë punën më të madhe në rrethin e Shtutgartit.

Sa i përket nen temës së dytë, në këtë letër lidhur me çështjen “se a po na largohen masat apo jo” puna qëndron kështu siç. Vrasja e tre shokëve mund të merret me mend se sa ka ndikua. Humbja e një njeriu po duket se mund t’ia ndryshoj kahjen një shteti 700 milionësh e lere më sa mund ta dëmtojë një shoqëri të ngushtë. Po ju them, e mund ta dini edhe vetë, se Jusufi nuk ka pasur kohë me u marrë me punë organizative, megjithëse në atë drejtim është punua. Njerëzit që kanë qenë pak më larg, gjërat i idealizojné, sidomos pas ngjarjes i kanë bërë të shenjta. Kjo ka të bëjë pra vetëm me atë planin sipërfaqësor.

Ekzistojné disa individ që thonë se unë kam qenë afër këtyre punëve gjithmonë e kam qenë me Jusufin bashkë, etj. etj. Në këtë ekstrem është sidomos Nuhiu i cili të bëhet monoton duke thënë se “u takojshim ata të tre si intelektual dhe më marrshin mua mbas veti si klasë punëtore” pra një njeri tek i cili masat janë të mbështetura. Pra ky është kampion në mesin e atyre që brohorasin kudo se Jusufi më ka marrë me veti, se disa gjëra vetëm me mua i kanë biseduar etj. etj. Ky njeri është ai i cili ka lëshua fjalët se masat po na largohen. Këto fjalë i ka thënë në konsultim me Halimin. Të tjerët këto vlerësime i kanë kundërshtuar vendosmërisht, ndërsa unë që para të dyve përhapjen e këtyre vlerësimeve e kam quajtur punë armiqësore. Diçka më shumë për këtë do të kuptosh nga procesverbali i mbledhjes së KVG e gjithashtu edhe një nga një raport të cilin u angazhua ta dërgoj Halimi lidhur me këtë çështje. Por lidhur me disponimin e masave pyeteni edhe Xh. Shatrin. Ai tha se pata dëshirë ta shohë këtë lëndë me të cilën do të kemi punë dhe ishte i mahnitun.

Disa veprime të Halimit: Tre apo katër përfaqësuesit PKMLSHJ thonë se kanë dalë jashtë me i bashkua njerëzit se këta nuk e paskan ditë se duhet dhe është mirë me u bashkua, se e paskan ditë se bashkimi bënë fuqinë etj. Dhe këto qëndrime bajate i mbajnë dhe llomotisin edhe atëherë kur të tjerët për këtë çështje kanë dhënë jetën. Strategjia e tyre thonë është kjo: Ata ia kanë tërhequr vërejtjen shtetit (Jugosllavisë) me nota zyrtare, se po nuk u ndërmorën masa do të bëhet ajo çka u bë. Pra edhe në këto punë qëlloi dhe fitoi lotaria. Dhe tani pasi qeveria mori guximin e të çmendurit e nuk ia vuri gishtin kokës para një note të tillë duhet ta dijë më mirë se me kend ka punë dhe kujt ka guxua me ia kthye fjalën. Në të vërtetë sipas fjalëve të Halimit, pas Kongresit të XII të LKJ, puna duhet të ndryshoj plotësisht. Duhet të ndryshohet taktika dhe të kalohet në kërkesë për bashkim kombëtar. Lidhur me këtë kur ishim duke përgatitur gazetën, patë thënë se ndoshta ky do të jetë numri i vetëm që do të bëhet në këtë formë, sepse pas Kongresit të XII ndryshe do të jetë. Pra populli i Kosovës duhet të luftoj për bashkim por vetëm atëherë kur këtë të ia lejon Partia. Unë e kundërshtova shumë në këto lëkundjet e tyre. Këto si duket ia ka përcjellë përgjegjësit të vetë dhe e ka marrë

vesh se ashtu nuk shkon. Ajo vërehet edhe në shpjegimin 'gjenial' në letrën e tij të fundit 'se kjo punë nuk mvaret nga ne.'

Kushtrimi i ka dërguar disa letra dhe Halimi ua ka lexua disa shokëve siç të kam treguar në një letër të gjatë. Ata shumë pikëpamje nuk ia kanë pranuar kështu që Halimi i ka tërheq. Letrën tënde dërguar KVG e lexova para shokëve dhe është pranuar mirë. Halimi më tha se pse nuk po i lexon para shokëve edhe letrat e Kushtrimit. I thash mi sjell. Riorganizimin e udhëzuar e quajti formal si dhe krejt punën dhe ekzistencën e KVG. I fryri në vesh edhe Nuhiut me fjalët 'se zgjedhja jote është formale, duke i thënë se ti je një njeri i madh por fjala jote nuk po të dëgjohet.' Dhe kur këto fjalë iu bashkuan edhe me ato prapëshitë e veta i mjaftuan që ai ta filloi një propagandë të keqe sidomos ndaj Hafizit dhe për të tjerët duke u thënë se janë të pashkollë dhe lavdërohen se po bëjnë punë të mëdha. Edhe ato fjalët se nuk kishim shokë afër veti, e formuam komitet ua atribuon këtyre të treve duke thënë se nuk ka qenë nevoja të futen në atë rreth. Këtë pikëpamje e mbron edhe Halimi duke thënë se, apo duke e përmirësuar këtë, se në komitet hynë njerëz jo që nuk kanë shokë, por që nuk kanë celula të formuara duke nënkuptuar me këtë, këta tre shokët që i kam përmendur më lartë. Prandaj largimi kaq i shpejt i Nuhiut është meritë e Halimit. Se ai do të largohej është vërejtur sidomos kur i kanë ardhë shoqja dhe fëmijët. Kështu që iu bënë shumë. Frika është një arsye tjetër.

Thuaju le t'i koordinojnë më mirë mendimet. Në njërën anë Kushtrimi thërret për formimin e njëqind organizatave të brendshme duke i ndarë njerëzit në funksione të ndryshme, dhe shton se nuk prishë punë aspak që kjo punë të duket formale, ndërsa Halimi për të vetmin komitet të formuar, që është i vërtetë dhe real, e quan formal dhe që prishë punë, se po të ishte degë, apo 'front demokratik', organizatë e grave, apo shtab i ushtrisë së kuqe shqiptare, edhe pse formal nuk do të prishte punë. Makinën me të cilën përgatitet gazeta kam vendosur ta dërgoj tek një shokë që banon larg nga këtu, dhe do të shkoj unë vetë që të merrem me atë punë. Pasi edhe ashtu, sipas marrëveshjes së 15 majit 82, është vendosë që Halimi të merret me çështje organizative në Kosovë e Uka me punë organizative jashtë ndërsa unë të merrem me gazetën. Sa i përket gazetës, pasi kjo është çështja jonë kryesore, unë jam i mendimit që kompetencat më të mëdha ti jepen Xh. Shatrit. Sido që të jetë në këtë drejtim do të fillojnë punët menjëherë.

Shumë të fala (Xhafer Durmishi)

10. Letër Xhafer Shatrit, 6 gusht 1982

Shoku Llesh (Xh. Shatrit) 6 gusht 1982

Sot e mora një letër së bashku me artikullin e Le Mondit.

Në Bruksel, siç ju ka njoftuar edhe shoku F (Faridin Tafallari) nuk mundëm të shkojmë pasi në këtë drejtim na pengoi policia e Belgjikës.

U kthyem në Dyseldorf. Prej orës 3 pas mesnate gjer ne 7 të mëngjesit zhvillova disa bisedime me IK, të cilat u mbështollën dhe u ngrit toni. Aty u fol shumëçka por esenca e disa kërkesave të IK qëndronte më shumë në çështjen se të gjitha sendet e thënuna kanë dalë prej një pike, duke m'u drejtuar për këtë mua. Çka e kam thënë unë vet nuk e mohoj para askujt. Për këtë nuk po zgjatem shumë se disa çështje duhet t'i diskutojmë në një tubim së bashku të cilin duhet ta thërrasim pa vonesë.

Kontaktin me Mitat Vranicën e kam marrë përmes një shoku të tij në Augsburg ku isha para tri javësh për të shfaqur filma. Ai far burri i Augsburgut kur shoku ynë ia ka dhënë revistën tonë "Zërin" ai në të njëjtin rast ia ka tregua në besim një tub letrash të korrespondencës së tij të dendur me Mitat Vranicën. Ky punëtor në Augsburg quhet Rexhep Sadiku dhe është dervish i rrethit të Gjakovës. Atë ditë kur ishim për filma na

ka bërë muhabet të madh. Ka shpërndarë shumë artikujt e Zërit të Popullit dhe ka një bibliotekë të pasur me literaturë të shëndoshë. Është burrë afër 50 vjeçar.

M. Vranicës unë deri më tani nuk i kam shkruar asnjë herë. Për këtë vendosni (ti e SN). Sa i përket N. Dibranit, para një muaji Kameri (SN) i ka dërguar 18 adresa të ndryshme, në mesin e të cilave e ka dërguar edhe të N. Dibranit me nënvizimin se në këto adresa mund ta dërgoni revistën. Më tepër unë nuk di për te. E kemi edhe adresën e djalit të Metushit dhe më duket se me te mban korrespondencë Kamberi (SN.)

Në lidhje me çështjen e artikullit të Ademit unë them se ai duhet të botohet duke u nisur nga ky numër pasi e kemi paralajmëruar lexuesin për vazhdimin e tij dhe mendoj se ai artikull është vazhdim i artikujve të botuar më parë. Lexuesit e presin e nuk e di se a do të bëhet mirë me e lënë. Unë mendoj se ai shkrim duhet të ndahet në dy vazhdime. Sot fillova nga puna për radhitjen e revistës dhe besoj se së shpejti do t'i adaptohem një ritmi më të lartë të punës.

M'i dërgo disa kopje qekash për "Ndihma për Kosovën" që të bëjmë adaptime e kopje analoge për punëtorët në Gjermani. E angazhojmë në këtë drejtim, për adaptim A. Me udhëzime për adaptimin e tyre duhet t'u drejtohem edhe shqiptarëve në ShBA, Australi, Suedi, Francë, Austri etj.

(Xhafer Durmishi)

11. Procesverbali i rrethit të Shtutgartit, 26 shtator 1982

Procesverbal i mbajtur gjatë takimit (të datës 26 shtator 1982) të thirrur nga ana e një grupi punëtorësh më aktivist të rrethit të Shtutgartit

Rendi i ditës:

Çështja e Nuhi Sylejmanit dhe pasojat e fjalëve të tij,
Situata momentale

Të dymbëdhjetë të pranishmit e aprovuan rendin e ditës. Në këtë tubim para të gjithëve ka qenë i thirrur Nuhiu (Nuhi Sylejmani) dhe Halimi (Osman Osmani). Tubimi u mbajt 5 km larg banesës së Nuhiut në fshatin D. në pjesën më të madhe në një lokal të qetë, në dhomën e veçuar të një kafeneje.

Nuhiu ftohet dy herë që të vjen në tubim. Në radhën e parë për ta marrë shkojnë Abdurrahman Sadiku, Qemal Haxhillari dhe Murat Kryeziu. Në banesën e tij kishte hyrë vetëm Abdurrahmani, i cili ishte i bindur thellësisht se do t'i përgjigjet thirrjes dhe do të vij, por nuk pati sukses. Pas një ore diskutimi më të lirë duke e parë nevojën shkojnë për ta marrë: Murat Kryeziu, Qemal Haxhillari dhe Nami Ramadani. Të tretë hyjnë në banesë dhe ia shpjegojnë çështjen. Lidhur me shpjegimin e Nuhiut për mosardhjen e tij ata që kishin shkuar me e marrë deklaruan:

Nami Ramadani: Nuhiu tha unë nuk vij sepse e kam drejtimin tim, jam i lidhur me tjetër kend, unë i kam principet e mia. Nuk vij pasi nuk qenka Naimi (Haradinaj). Kur i thash se Naimin ta sjell për dy orë Nuhiu u tërhoq dhe tha prapë se nuk vij.

Murat Kryeziu: Nuhiu më tha se unë nuk përzihem më në politikë, ju vazhdone rrugën pa mua.

Hasan Veselaj: (mysafir i Nuhiut në atë moment i cili kohëve të fundit është shoqërua me Nuhiun dhe Halimin, të cilin e kishin marrë këta të tre): Unë i thash Nuhiut

disa herë se duhet me ardhë e me u takua pasi të gjithë po e shohin të arsyeshme, por ai nuk pranoi kurrësi.

Pasi ai në asnjë mënyrë nuk pranoi me ardhë u vendosë që mbledhja të filloj edhe pa te. I pari nga të pranishmit e mori fjalën Mejdi Rexhaj, i cili duke qenë shumë më afër situatës (shokë i celulës dhe i punës me Nuhiun) e shtroj çështjen se pse Nuhiu veproj kësi soji në këtë kohë duke kërkuar edhe faktor të jashtëm. Meqenëse kjo temë u hap që në fillim, të pranishmit qenë të mendimit që i pari ta merr fjalën Skënderi i cili foli në mënyrë të përgjithësuar.

Skënderi: Së pari e shohë të arsyeshme t'u flas në lidhje me bashkimin duke ju referuar edhe Komunikatës të botuar në revistë (ZK) në qershor 1982. Lidhur me aq sa jam i njoftuar nga shokët mund t'u them se ZK ka mbetur si organ qendror i LRSZHJ me kërkesën e disa shokëve mu për hir të Jusuf Gërvallës. Ky qëndrim është aprovuar plotësisht nga ana e OMLK-së edhe pse me këtë veprim mund t'ju ketë hapur goja ndonjë fjalamani në stilin: a e shifni, kjo më e mirë e ajo mbaroi etj. Kjo nga ana jonë kurrë nuk është lejuar në asnjë moment sepse për shkaqe që dihen veprimi në këtë drejtim ka qenë absurd. Shokët e OMLK-së kanë qenë të mendimit që ZK të mos pësoj asnjë ndryshim, por ndryshimet që janë bërë kanë qenë për të plotësuar disa kërkesa të PKMLSHJ. Halimi është një prej personave më kryesor të kësaj ish-organizate dhe ai ka ardhur me mua nga Turqia për ta ndihmuar çështjen. Me te nuk kemi pasur mosmarrëveshje derisa kemi filluar me përgatitjen e numrit 1 të ZK. Aty na kanë dalur mosmarrëveshje rreth çështjes kërkesës për republikë dhe bashkimit, e sidomos rreth citatit e gjithashtu edhe rreth nënshkrimit të artikujve të Jusufit duke thënë se ata duhet të nënshkruhen me pseudonime. Në Turqi ka shkuar pa u konsultuar me asnjërin nga ne dhe atje ka filluar të gënjej por kur nuk ju kanë shitur ka ndërrua qëndrim. Për shkak të kritikave me të cilat është nënvlerësuar puna e mëparshme dhe e tanishme i është thënë që të punojmë të pavarur në pikëpamje organizative, e raportimi të bëhet në qendër dhe vetëm atëherë të shikohet se çka është për t'u lavdëruar e çka për t'u kritikuar. Insistimin për heqjen e citatit të JG e ka bërë me arsyetimin se nuk ka luftuar vetëm Jusufi dhe me përmendjen e tij (përsëritjen e citatit) u hyjmë në hak luftëtarëve tjerë. Me shokët në Zvicër puna është duke shkuar mirë. Ata janë duke bërë punë të madhe.

Hasan Veselaj: Kur është problemi i revistës? Pse po del kaq rrallë?

Skënderi: Kryesorja është tek çështja financiare. Shokët e kanë pa të arsyeshme që edhe në lexofshim më rrallë, familjet e shokëve të burgosur mos t'i lëmë anash.

Hasan Veselaj: Pse ne në rrethin e Shtutgartit nuk e marrin këtë problem me dhënë të holla se unë nuk jam i informuar?

Nami Ramadani: Ne për këtë punë kemi mbledhur të holla, por në këtë kohë na humbën shokët dhe kemi pasur shpenzime të mëdha, e gjithashtu kemi qenë shumë të zënë. Kur ke qenë ti Hasan tek Nuhiu ne e kemi rrahur këtë problem. Tash është edhe më lehtë sepse ka dalë kontoja në ZK e fundit. Unë i kam tre dëshmitarë që Nuhiu ka dalë sivjet dhe ka bërë propagandë kundër luftës, duke u thënë se sikur t'i kisha këmbët me zift do të shkelsha nëpër pare e në këtë konto nuk do t'i qoja e ata njerëz prapë se prapë kanë ardhur dhe kanë dhënë të holla. Ai ka thënë se të gjitha ato të holla që janë mbledhur vjet janë humbë. Për këtë fjalë kam dëshmitarë dhe kërkoj të del para të dyle e ta thotë të vërtetën.

Hasan Veselaj: Pse një shokë i afërt me u lejua me propagandua kundër organizatës?



Abdurrahman Sadiku majtas dhe Faridin Tafallari (Shtutgart 2012)

Abdurrahman Sadiku: Është vështirë me u përgjigj. Ne një ideal na ka bashkuar. Për patriot e kemi njoft. Kohëve të fundit u largua prej shoqërisë sonë. Së pari qëndroi shumë tek familja Gërvalla e thoshte se nuk po kam kohë me ardhë tek ju. E në anën tjetër ai u distancua sidomos pasi i erdhi gruaja dhe fëmija e vetë. Prandaj shënonte se sot është dita e fundit kur ai u largua përfundimisht më 26 shtator 1982.

Nami Ramadani: E kam një shoqëri që ka pasur besim në Nuhiun. I kam tregua që nëntë muaj që të shkoj dhe kërkoj ndihma se ata më kanë thënë se Nuhiut i besojmë sepse e kemi edhe të afërm por ai kurrë nuk ka ardhur.

Hasan Veselaj: Pse para ca kohe mos me u bashkua me Nuhiun e me bisedua?

Nami Ramadani: Ne kemi pasë takime dhe në të gjitha takimet na thoshte: Kështu thotë Skënderbeu e ashtu Hafiz Pasha e veten gjithmonë të kristaltë.

Skënderi: Të holla tubohen për familje të burgosurish e të tjera edhe për gazetë.

H. Veselaj: Unë propozoj që në çdo shtet të hapen konto numra!

Skënderi: Një organizatë e ka vetëm një njeri më përgjegjës, ajo e ka vetëm një konto numër e në faqet e fundit falenderohen edhe ata që kanë dhënë të holla nga të gjitha shtetet.

H. Veselaj: Unë mendoj që në çdo shtet të ishin botuar qekat.

Skënderi: gazeta jonë nuk e ka për qëllim reklamën. Ne po na mbesin artikuj të fortë pa u botuar për shkak të vendit.

Murat Kryeziu: Unë e kam lanë mysafirin vetëm. Desha të jem këtu për këtë çështje e ai nuk erdh. Unë jam punëtorë e nuk po di shumë se kush është i mirë e kush jo, por po e di se dikush është mundua me e shkatërrue këtë punë. Nuhiu më ka thënë se pas atyre të Zvicrës duhet të çelim konto edhe ne të Gjermanisë.

Faridin Tafallari: Kemi pasur biseda për shtypin. Është thënë prej Jahir Jahirit (Jahiri dhe rrethanat rreth shokëve të tij meritojnë një letër të veçantë-vërejtje e Skënderit), se ZK pas 17 janarit është edhe më i mirë se sa ka dalë më parë dhe, këtë të fundit e pohuan edhe Murat Kryeziu (MK), Abdurrahman Sadiku e Ismet Klaiqi. Jahiri është ai i cili më së shumti e ka kërkuar këtë takim. Tani ai thotë se po e qesin fotografinë e Jusufit tepër në ZK, se ZK më duket që 10 vjet e ka qitur Riza Salihu e mandej ia ka marrë Jusufi. Pse nuk po e qesin Adem Demaçin në faqe të parë. Pse e kanë qitë Hydajetin kur ai ende është gjallë? Pse nuk po shkruajnë edhe për Ferizaj por

vetëm për Pejë, pse nuk e qesin Fazli Graiqevcin etj. etj. Unë i kam thënë mblidhë artikuj, adresën e ke dhe dërgoj. Por më duket se këto fjalë nuk janë tuajat.

H. Veselaj: E kam dëgjuar një rast kur isha tek Nuhiu e Ismet Klaiqi, dhe se është folë nga këta dy të fundit për qitë Hafizin se në Augsburg ka thënë se unë jam ai që po e udhëheqi këtë revolucion, e kur këto fjalë dëgjohen për një shok nuk janë të mira.

Ismet Klaiqi: Unë kam telefonua në Augsburg, e ata më thanë ti (Hafiz) na ke dërgue njerëz që po bëkan kushedi se çfarë pune revolucionare, e atëherë unë kam shkua atje. Ata më thanë se Hafizi na ka kritikuar duke thënë se nuk po punoni, dhe na tha se unë ju kam treguar demonstruesve në Bon së bashku me një gjerman se kah me ecë.

Hafiz Gagica: Unë kam qenë me Faridinin. Nga ai në asnjë moment nuk jam nda, prandaj le të flas ai vetë.

F. Tafallari: Kemi qenë në Ingolshat, kemi shfaq filma e kemi shpërnda libra dhe gazeta. Shumë në rregull ka qenë. Kah jemi kthye u ndalëm në Augsburg me propozim të Hafizit. Shkuam aty dhe na prit një shok i mirë. Filluam bisedën për Shaban (Klaiqin) (i burgosur në dhjetor të vitit të kaluar, është dënuar me tri vite burg së bashku me Islam Rafunën). Janë zënë në kufi duke e futur numrin e parë të ZK, nëntor 1981.) Tregoi se po mbahet shume krenar. Për Ismetin (Klaiqin) tha se është i mirë por nxehet shpejt. Sa u përket filmave tha se ka njerëz që frikohen, por të gjithë duan të ndihmojnë dhe janë të mirë. Zëra kemi mjaft. Dhe në fund na thanë; djema keni kujdes, se prej pakujdesie i humbëm shokët. Unë i thash se ne duhet me ec, e ne kurkushi nuk jemi.

Murat Kryeziu: Nuhiu më ka thënë se Hafizi në Frankfurt ka kërkuar ndihma në emrin e Familjes Gärvalla, se atyre djemve nuk u ka mbetur kush në Sindelfingen përpos Selim Koca. Unë due me e ditë se kush po i bënë këto punë?

F. Tafallari: Nuhiu ka banua tek unë. Qemal Haxhillari ka qenë taksist i tij. Në lidhje me shfaqjen e filmave Nuhiu më ka thënë se pse po i shfaqni. Kemi metoda tjera të luftës. Kur i thoja tregomi ato metoda ai përgjigjej; ti po e shef unë i kam problemet e mia, e në anën tjetër fliste se po udhëtojnë e shfaqin filma duke i harxhuar të hollat e familjes Gärvalla. Më ka thënë se po shkoni e po i prishni shoqëritë duke shkua e duke ju shfaq filma. Unë i kam thënë, baca Nuhi po gabon se unë e kam rrogën time e më mjafton me jetua e bile edhe me u shetit parqeve ditëve të vikendit, e po të isha me i këqyrë problemet e mia nuk do të ishte nevoja me ecë çdo javë nëpër shoqëri.

Ismet Klaiqi: Unë e përkrahu dhe e quaj shumë të drejtë shfaqjen e filmave.

H. Veselaj: A keni qenë në Bon (i drejtohet Skënderit) ti Skënder, Naimi e Nuhiu?

Skënderi: Me Nuhiun kurrë nuk kam qenë në Bon. Vetëm me Nuhiun e pa Naimin kemi qenë në klubin Emin Duraku të Dyseldorfit dhe atë të thirrur nga udhëheqja e klubit.

H. Veselaj: Nuhiu më ka thënë se me shkua në Dyseldorf ka qenë ideja e Skënderit dhe në atë javë kur keni shkua, ata (të klubit) e kishin pasë ndërmend me ardhë e me pa në Untergruppenbach, por pas asaj vizite ata ishin tërhequr nga ai mendim i tyre, çka do të thotë se ne kemi prishë punë. H. Veselaj vazhdoi gjithashtu se Nuhiu i ka thënë se kur Faridini i ka thirrë njerëzit për ne demonstrata, një punëtor ju ka ankua F. se për shkak të familjes po frigohem, ky ia ka thyer atij se sa për mua nuk ka problem se unë jam i garantuar në Shqipëri.

Qemal Haxhillari: Kemi qenë tek F. me vëllaun e tij (F.) e se kemi gjetë. Jahir Jahiri na ka thënë se nuk keni çka e lypni se ai ka shkua në Shqipëri me familje. Në realitet ai kishte qenë tek familja Gërvalla.

Faridini: Në ato ditë i kam marrë dy ditë pushim e kemi shkuar në Vjenë për punë të demonstratës. Kemi shkuar me kerrin tim unë Hafizi dhe Haxhi Berisha. Kur shkua në Vjenë shkua tek një njeri i cili na priti mirë. Ky njeri quhet Sylë Neziri, si duket i vetmi shqiptar në këtë qytet që ka kafene të veten. Adresën e tij e ka marrë në Augsburg Murat Kryeziu nga një mik i tij me rekomandim se është njeri i mirë. Me këtë njeri, Haxhi Berisha dhe Nexhati (Osman Osmani) janë takuar edhe para këtij rasti, janë takuar kur ka shkua Suzana në Shqipëri. Haxhiu i ka pyetur disa njerëz kur iu ka afrua kafenesë se a e njihni Sylë Nezirin. Disa punëtorë i kanë thënë se Sylë e shpërndan ZK në Vjenë. Në atë rast kanë bisedua HB e Halimi (Osman Osmani) duke ia përkujtuar atë se nëse bëhet diç këndeje (ndonjë aktivitet) do të drejtohem tek ti. Kur u ndamë prej tij shkua tek bashkëfshatarët e mijë pasi ishte e diel e nuk mundeshim me krye kurrfarë pune. Tek bashkëfshatarët e mijë e kemi takua edhe një student (jo Milaim Zekën, megjithëse me rastin e atij udhëtimi e kemi takuar edhe atë). Edhe të hënën nuk kryem punë pasi kishte qëlluar një festë religjioze. Por gjatë kësaj dite u angazhuam që ta gjejmë një person me shtetësi austriake i cili do të garantonte për demonstratën. Në këtë drejtim na ndihmoi një taksist nga Gostivari duke e angazhuar një femër që e kishte të afërme. Njëkohësisht ky taksist na ka vozitur shumë gratis. Të martën në mëngjes shkua në sekretariatën e Vjenës së bashku me shtetasen austriake dhe taksistin. U dashke të gjej një arsye se çka e shtynë atë ta bëjë këtë pune. U vendosë që ajo të thotë se e në një kohë e ka njohur Ali Lajqin e burgosur, e njëherit ka edhe simpati për shqiptarët dhe don t'u ndihmoj në këtë mënyrë. Në polici na thanë se nuk ka problem a do të bëhet apo jo demonstrata, por ne na intereson me na tregua karakterin e demonstratës dhe sa njerëz do të mbledhen. Ata në Vjenë na thanë se me u thënë se bëhen shumë është më vështirë të jepet leja. Ju thamë se do të bëhen 500 veta por disiplina do të jetë e madhe. Unë nesër kisha me qenë në punë dhe kështu rreth orës tre pasdite u kthyem me Hafizin. Në fillim të rrugës i kishim 700 DM. Haxhi Berishës ia lamë 260 DM e vetë për këndeje i muarëm 180, se kishim frikë se mos po na priset kerri i cili kishte ca defekte dhe nuk i punonte nxemja. Haxhiu mbet deri në të enjten ku do të mbledhej një mbledhje, ku policia do të njoftohej me shkrim dhe me gojë për karakterin dhe numrin e demonstruesve.

Kërkesa me shkrim u bë të mërkurën. Të martën në mbrëmje (tani fletë vetëm Haxhi Berisha në lidhje me përgatitjet për demonstratë me kërkesë për informim sa më të hollësishëm nga të pranishmit) kam qëndruar në kafenenë e Sylës deri në ora 24.00 se ishim marrë veshë se do ta bëja natën tek ai. Kah ora 24.00 ai më tha (Sylë) a nuk ke ku me fjetë a? Nga mënyra e pyetjes së tij unë e kuptova se aty po prisja kot dhe shkova në hotel. Të nesërmen ditë e mërkurë, kemi ecur tërë ditën me taksistin, në një masë të madhe.

Taksisti dikur më tha më tha: do të ishte mirë me ma pague ditën e gjithashtu me më pague diçka extra se ju keni buxhete të mëdha. Juve ju paguan Shqipëria apo Amerika dhe për këtë nuk kishte fije dyshimi. Kur e nënshkroi kërkesën për demonstratë austriakja i kërkoi 2000 shilinga. Ata aty duke thënë jo ju paguan ai, jo ai tjetri, jo po shkojmë në kafe e po i mbledhim ndër shqiptarë, i nxora 1800 shilingat e fundit dhe ia dhashë. 200 shilinga tjerë ia dha një bashkatdhetarë tjetër. Përmes telefoni kam treguar se në Vjenë kam mbetur pa të holla. Më janë dërgua 200 DM tjera (kanë qenë të hollat e Hysen Spahiut). Të enjten në polici më kanë thënë se mbledhja nuk do të mbahet sot por tri ditë para demonstratës. E njerëzit lirisht mund t'i thirrni. Jam kthyer të enjten me tren. Në Vjenë ua kam lënë telefonin tonë. Jam kthyer duke e konsideruar si

punë të kryer. Të mërkurën më ka lajmëruar taksisti dhe tha se nuk është puna mirë. Jam que të enjten vetëm në mëngjes dhe kam shkua në Vjenë. Në polici më thanë se leja është refuzua. Nëse e gjen atë femrën mund t'ua lejojmë. E kam kërkuar atë shtetasen së bashku me taksistin deri në ora 15.30. Në 15.30 jam largua nga policia me të cilët pata këtë bisedë:

-Ju na keni thënë (premtuar) ne njerëzit i kemi thirrë, nga gjithë Evropa nesër këtu do të jenë. Demonstrata do të bëhet me hatër ose me zor. Krye shefi më tha se për kësi njerëzish ne kemi burgjet. Atëherë lironi 1000 vende për nesër ia prita.

-Kemi vende të mjaftueshme. I tha një tjetrit se duhet lajmëruar kufiri që të mos pranohen. Unë i thash se veç pjesa më e madhe kanë hy në Austri. Atëherë më tha se nëse e gjen një austriak e ma sjell deri në ora 18.00 demonstratën do ta keni të lejuar me një ndryshim se do të niseni një orë më vonë, pra në ora 12.00 dhe jo në 11.00. Kam shkua në Universitetin e Vjenës, Fakultetin Ekonomik dhe kam gjetur dy të rinj që pranuan të vijnë dhe në ora 17.00 kam shkua me njërin në polici. Me këtë krye shefi na tha se çdo gjë është në rregull. Të nesërmen në ora 9.00 policia kish pas shkua tek ai djali dhe i kishin thënë se lutja jote është refuzua dhe të kesh kujdes se për çdo gjë që të ndodhë ti do të përgjigjesh. Në ora 10.00 jam takuar me studentin dhe mi ka tregue fjalët e mësipërme. Kemi shkua me te në polici dhe e kemi kërkuar krye shefin. Kujdestarët na thanë se ai sot është në pushim. Ju i keni punët tuaja por ne e kemi për detyrë mos me ju lënë.

Taksisti më ka thënë ruajuni Sylës se ai ka qenë në Ambasadën Jugosllave dhe u ka tregua për demonstratën me qëllim që ta tregoj “pastërtinë” e vetë.

Më tej se si u zhvillua situata e keni pa vetë.

Abdurrahman Sadiku: Unë kam dëgjuar prej Nuhiut se ti kur je kthye prej Vjene ke qëndrua me Misinin (Mavrajn) në diskotekë. Gjithashtu është faji yt se nuk ishe asajde kur erdh policia e na tha se nuk keni leje.

Haxhi Berisha: Ndoshta nuk më ke parë njëherë se ishim e e kërkuam krye shefin, se tërë kohën kam qenë në bisedime me polici.

H. Veselaj: Nuhiu më ka thënë se ti ke pasur të holla të mjaftueshme. Ai t'i ka dhënë 2000 dollarë që i ka thye në bankën e stacionit të trenit të Shtutgartit.

Ismet Klaiqi: Mua N. Më ka thënë se H. Berisha i ka pasur me vete 7000 dollarë.

Nami Ramadani: Mua Nuhiu më ka thënë: As nuk më kanë pyetë, as nuk ju kam dhënë të holla, por kanë shkue e kanë ndejtë dy javë bareve të Vjenës me të holla të Familjes Gërvalla.

H. Veselaj: Është propagandue se H. Berisha nuk e ka shkaktue demonstratën në Vjenë por Ibrahim Kelmendi.

Haxhi Berisha: Sa i përket demonstratës atë e ka bërë masa. Merita e Ibrahimit nuk mohohet. Ajo ka ardhë në shprehje tek një fjalim gjatë rrugës dhe në fund në gjuhën gjermane. Se ky aspekt nuk është i rëndësishëm për diskutim u pa në Bern ku Ibrahim i ka udhëhequr demonstratën.

Mejdi Rexhaj: Hasan Veselaj, çka të shtyri me iu mvësh Nexhatit (Osman Osmanit) dhe si e vlerëson punën e tij?

Hasan Veselaj: Me Nexhatin jam shoqëruar më shumë dhe jam ndarë për një kohë por unë nuk kam dashtë me u largua prej rrethi. Njëherë H. G. e Nexhati janë kap në fjalë për imtësinë (në lidhje me atë se a duhet thye fotoja e Titos apo jo – thyerjen Nexhati e ka quajtur plan udbeje- vërejtje e Skënd.), ndërsa kanë qarkullua fjalë se unë jam largua.

Haxhi Berisha: Në një kohë jemi takua shpesh herë ‘rastësisht’ e kohëve të fundit ‘rastësisht’ je takua më shpesh me tjetër kend. Se Nexhati kur mua më ka folë

keq për Skënderin e atë tjetrin edhe ty HV të ka folë keq për mua e Skënderin, dhe në këtë drejtim tek ti ka pasur sukses.

H. Veselaj: Mua nuk është mundua me më kthye dhe me te nuk kam pasur biseda të gjana.

Murat Kryeziu (MK): Tek unë kanë ardhë Nuhiu dhe Hasan Veselaj dhe më kanë thënë se Nexhatin e kemi organizatorë më të fortë dhe dil e tregoj shokëve se prej tyre më nuk ka asgjë. Nuhiu gjithashtu më ka thënë se Nexhati ka qenë në Turqi e mezi e kanë lëshua me ardhë, di me shkrua me makinë. Ata i kanë thënë shko e mos ja le ata punëtorë gjithkujt në dorë. Se Nexhati është më i aftë se Skënderi. Unë ju thash se nuk dua t'i besoj askujt për pa u mbledhë së bashku. Ata (Nu e HV) më thanë se jemi të gatshëm me u ballafaque.

H. Veselaj: E kam një pyetje për Skënderin, se kur ishim tek Nuhiu ke thënë tek Ismet Klaiqi se HV na tha po shkoj në Esslingen e shkoj tjetërkund dhe se i ke thënë Qemal Haxhillarit që ky ta ndjek Faridinin e mos të shikoj gjithfarë mbështjellaqësh.

Skënderi: Të parën e kam thënë se ashtu është, e për të dytën nuk po më kujtohet.

Remzi Ademaj: Ky person që na e kërkua dhe e thirrëm dy herë me ardhë. Si me ia bërë? Nuhiu nuk pranoi me ardhë kur atë e thirrën 12 vetë. Të gjithë folën për te, prandaj çfarë masash duhet të merren ndaj tij? Duke shkua në Bern, në autobus Nuhiu më ka thënë merre mikrofonin e folë diçka. Për ta marrë fjalën në autobus në rrugë për demonstrata ka qenë punë që është praktikuar më parë. Kur unë ia kam nisur me folë ai i ka fshi lotët. E kjo po kuptohet pse. Kjo më ka hidhërua shumë. Ishim duke u kthye nga Berni. Më tha se tash duhet të bisedojmë për punën e ardhshme, e si po thua me ia bërë. Unë i tregova se je drejtuar në adresë të gabueshme. Atëherë ai më tha se ti si më inteligjent je kap mbas karrieristave. Ti nuk di sa je kanë afër me Jusuf Gërvallën. Nëse donë me e ditë sa unë jam kanë afër eja tek unë e ti tregoj letrat.

Ismet Klaiqi: Nuhiu më ka thënë se pas rastit (17 janarit) i ka ardhur një letër nga një kriminel i udhës.

H. Veselaj: Faridin, në banesën tënde është lidhë besa që Demë Demaj me u largua prej shoqërisë. Atë natë kur janë vra shokët Dema ka qenë në banesën tënde më ka thënë Nuhiu.

Faridini: Në banesën time nuk është vendosur me u largua Demë Demaj. (Demë Demaj është një shok i Ibrahim Kelmendit dhe Sadik Blakaj ka ardhë përmes shoqërisë së tij në rrethin e Shtutgartit prej nga e ka marrë Hysen Gegën dhe me kurth e ka futur në burg.) Por pas rastit JG ka kërkuar që shoqërinë me Demën ta rriti edhe më tepër. Sa që edhe kur jam hidhërua me te, Jusufi ka ardhë në banesën time dhe më ka ndreq dhe më ka thënë: Faridin unë sonte jam këtu i zoti i shtëpisë. E sa i përket atij rastit në banesën time, në një tubim kur Jusufi i fliste butë Demës dhe ia nxirrte fjalët dalëngadalë, Nuhiu ndërhyri duke i thënë Demës: Demë na trego a ke rrëshqitë në tradhti, ndërhyrje e cila e prishi bisedën dhe krejt mundin e bacit Jusuf. Dema u nxehtë dhe i tha se me këtë (Nuhiun) as që dua të flas. Edhe pas këtij rasti Jusufi më ka urdhërua me u shoqërua me Demën. Fjalët e këqija më kanë shtyrë me shkua tek Jusufi e me i tregua. Ai më ka thënë: Prej meje a ke dëgjua diçka? Ec ti e punoje punën tënde dhe më ka tregua qëllimin e afërsisë time me Demën. Se deri sa më ka tregua mua nuk më është kujtua. Natën e ngjarjes së këtij viti Dema ka qenë tek unë me grue dhe ka qëndrua gjer në ora 22.00. Për këtë i kam tregua Nuhiut dhe e ka ditë ashtu siç e ka ditë se nuk ka qenë marrëveshja me u përjashtua. Në katund kur ka ardhë me pa më kanë thënë me e qitë prej konakut por nuk kam pranua për shkak të fjalëve të JG. Por prej asaj dite nuk kam kurrfarë kontakti me te dhe kah jemi kthye prej katuni (Untergruppenbachu) e kam qitë prej kerri.

Qemal Haxhillari: Si përfundim po më duket se shkaktari më kryesor Nuhiu, por unë që kam qenë më afër kohëve të fundit e di se Nexhati (Osman Osmani) e ka kryer punën (minuese) më të madhe në këtë drejtim. Nexhati është shumë i lidhur me Nuhiun. Ky i fundit i ka premtuar atij se do ta ketë masën me veti, siç më ka thënë edhe mua.

Në përfundim mbetet që sjelljet e Nexhatit me i zgjedhë shokët më përgjegjës.

Abdurrahman Sadiku: Unë kam edhe disa vërejtje lidhur me një material që na ka ardhur nga Nuhiu me titull “Kosova u sulmua për t’u kthyer rankoviqizmi” ku potencohet se vdekja e Titos është një datë e ligë për shqiptarët, pasi prej asaj dite fillon keqësimi i gjendjes së shqiptarëve.

Skënderi: Materiali i tillë nuk ka kaluar nëpër dorën e kryeredaktorit të ZK. Kjo çështje do të zgjidhet në një tjetër vend.

Në pyetjen a e dënoni këtë veprimtari të pranishmit dhanë këto përgjigje (mendime):

Abdurrahman Sadiku (më i vjetri): Kjo është veprimtari përçarëse dhe e dënueshme.

Ismet Klaiqi: Vetë mos përgjigjja e tij dëshmon mjaft për fajësinë e vetë. Për këtë takim kam qenë i lajmëruar që 4 ditë. Unë shumë gjëra nuk kam mundur me i thënë e që do t’ia thosha po të ishte këtu. E dënoj këtë veprimtari.

Skënderi: E quaj përçarëse dhe të dënueshme.

Mejdi Rexhaj: Veprimtaria e tij nuk ka të bëjë me organizimin revolucionar e patriotik.

Remzi Ademaj: Pajtohem me mendimin e shokëve dhe veprimtarinë e tij e quaj armiqësore dhe jam të dënohet me dënimin e merituar.

Qemal Haxhillari: Unë isha dy herë me e marrë. Të dytën herë hyra brenda dhe ia numërova të gjithë me emër se kush janë. Ai më tha se do të përgjigjem me shkrim, e nëse e meritoj para gjyqit të popullit kanë të drejtë edhe varrin me ma prishë. Këtë punë e quaj përçarëse dhe e dënoj.

Murat Kryeziu: E quaj përçarëse dhe e dënoj. Më ka premtua se do të vij në takim sa herë të paraqitet nevoja e sot isha dy herë tek ai e nuk erdhi.

Haxhi Berisha: Sipas fjalëve të mëparshme po duket se tërë veprimtaria e tij kohëve të fundit është përçarëse dhe prej tij ne duhet pritur më të keqen. Ky duhet dënuar.

Hasan Veselaj: Kur i dëgjova të gjitha bisedat me fakte deri në dy tri pika që duhet me i vërtetua më vonë, më tronditi shumë veprimtaria e tij, dhe këtë e quaj punë përçarëse teknike.

Mejdi Rexhaj: E dënoj këtë veprimtari shkatërruese sepse çdo kujt është mundua t’i ngjes diçka. Edhe vetë isha me e thirrë e nuk pranoi. Tha se do të përgjigjet më lart me shkrim.

F. Tafallari: Unë Nuhiun e njoh prej një kohe të hershme dhe shumë besim kisha tek ai. E kam nderuar si një njeri më të vjetër që për një kohë iu ka kushtue çështjes. Kohët e fundit e kam pa se është i interesuar për përçarje. Tri herë kemi qenë vetëm unë dhe ai, ia kam tërheqë vërejtjen, që të mos shkoj kah shkatërimi por ai vazhdoi me të veten duke u mundua për një përçarje sa më të madhe por nuk mundi ta realizoj planin e tij të ndytë për shkak të qëndrimit të shokëve që qëndruan besnikërisht. Përflijtjet e tij të përlyera e të poshtra i dënoj me dënimin më të rëndë, për këto gjëra me këtë dënim do ta dënoja edhe vëllaun tim.

Hafiz Gagica: Është vështirë për mua të flasë pasi një pjesë e madhe e shpifjeve (akuzave) të tij kanë qenë të drejtuara kundër meje. Por po shifet se unë nuk paskam qenë objekti i vetëm i tij. E dënoj këtë veprimtari.

Duke pasur parasysh ndonjë pyetje që mund të lindë më vonë Haxhi Berisha pyeti:

-Shokë, a ia merr mendja ndokujt se ky tubim ishte një montim i dikujt apo a i është thënë ndonjërit folë kështu për këtë e ashtu për atë? Njëzëri të gjithë pohuan se këtu nuk kishte erë montimi.

Skënderi u shpjegoi në lidhje me pikën dy të rendit të ditës se puna e gurëve të varrezave për tre të rënë është vonuar për shkakun se prej ngjarjes e gjer në gjysmën e qershorit, janë kërkuar gur të kuq. Prej gjysmës së qershorit janë porositur gur të bardhë, të cilët kanë qenë të gatshëm prej 29 korrikut e këtej. Tërë muajin gusht na e ka humbë Ahmet Sadiku nga Frankfurti, lidhur me përkthimet. Gjatë muajit shtator janë duke u krye punët në mes komunës, avokatit dhe shoqeve të shokëve, të cilave iu janë dërguar dokumentet për nënshkrimet e tyre.

Shënimet e mbledhjes i mbajti Remzi Ademaj.

12. Letër e Xhafer Durmishit në emër të KVG, 1 tetor 1982

MENDIMI I KVG (Komitetit "Vëllezërit Gërvalla") NË LIDHJE ME LETËRPËRGJIGJEN E KRAHUT TË ish-PKMLSHJ NË LIDHJE ME PËRGJIGJEN E TYRE NDAJ PIKËPAMJEVE TË SHOKUT LL (Xhafer Shatri)

Letra në të hyrë fillon me komplimente të merituar në adresë të shokut LL. (Xhafer Shatri- shën i Xh.D.). Lidhur me këto komplimente do të ndalem pak më poshtë.

Çështja jonë me rëndësi, organi është preokupim i hyrjes së përgjigjes. Ajo që thirret teorikisht nga autorët nga të tjerët kjo është realizuar me kohë praktikisht. Këtë e vërtetojnë faktet ashtu siç e vërtetojnë faktet edhe atë se kjo thirrje ka mbetur vetëm në letër nga nënshkruesit e saj. Nga ana tjetër në mbledhjen e fundit të KVG, Halimi (Osman Osmani-shin i Xh.D.) kur ishte pyetja e vendosjes së makinës dhe vazhdimit të punës rreth organit, ai për ta arsyetuar planin e vet rreth shkuarjes në Turqi, para të gjithë shokëve tha: (duke mu drejtuar mua), organi është preokupim i imi (pra i Xhafer Durmishit-shën im). Sipas marrëveshjes së 15 majit kjo përgjegjësi i ka mbetur Skënderit. Unë kam detyrën të preokupohem për çështjet e LRSHJ-së brenda dhe në këtë drejtim i kam filluar punimet.

Unë i kam thënë: Ashtu kemi thënë, por këtë punë e di dikush më mirë se unë edhe se ti, dhe kësaj fjale unë iu kam përmbytur. Për këto fjalë të neve të dyve në atë mbledhje mund të japin deklaratat katër vet. Gjatë përgatitjes së numrit të ZK të qershorit unë me Halimin kemi pasur disa mosmarrëveshje. Këto i kam shprehur në dy letra të mëparshme që ua kam dërguar U. (Xhafer Shatrit-shën im), dhe M (Sabri Novosellës-shën im) dhe të tjerëve jo, në mungesë të adresës. Duke u nisë nga këto mosmarrëveshje ai në një rast në zyrat e shokëve gjerman më tha: Në të ardhmen, njëri për organin duhet t'i ketë kompetencat e plota dhe duart e lira. Si variant për këtë e ka marrë veten dhe mua. Në asnjë rast U. (Xhafer Shatrin). Nga kjo rrjedh se fjalët në hyrje të letrës, janë përshtatje sipas realitetit, përshtatje e atillë që në zhargonin popullor njihet dhe shprehet si "kthim kah të frynë era", dhe në bazë të asaj çka kemi vërejtur unë dhe shokët këtu, kjo ishte karakteristika themelore në veprimtarinë politike (s'po guxojmë me thënë patriotike se mund të jemi borgjez të rrezikshëm) të këtyre njerëzve.

KVG e mbron pikëpamjen se LRSHJ-ja është përfaqësuesja e vetme e popullit shqiptar në Jugosllavi. Kjo është shprehur edhe në Komunikatën e botuar në numrin 1 të

ZK e e potencuar sidomos në fjalimin e mbajtur në Bern. Deri më tani ne nuk jemi të njoftuar në asnjë reagim kundër këtij mendimi, apo pikëpamje.

"Njëherë e mirë për disa që ende po bredhin në hapësirë"

Shoku KK (Kushtrim Kosova = Abdullah Prapashtica-shën im) si njeri me përgjegjësi, në letrën e tij vëmendje të madhe, gjë që është shumë e natyrshme, i kushton vijës politike duke e përmendur këtë fjali shtatë herë në letrën e tij dhe të bashkëmendimtarëve të vet. Në lidhje me vijën politike që i pëlqen aq shumë ta përmend orë e çast ai tërheq vërejtjen KD (Komitetit Drejtues) të LRSNJ-së se si duhet ndërtuar strategjia e LRSNJ-së: se a duhet të preokupohemi pas nacionales apo klasores por meqë këto janë edhe të pazgjidhshme siç e di edhe vet KK donë të na sqaroi se cila duhet të vij në radhë të parë. Për shumicën kjo veç është e qartë, por ai do ta shpjegoi "njëherë e mirë për disa që ende po bredhin në hapësirë..." (faqe 1 e letrës, rreshtat 35-36, vërejtjet dhe citatat tjera me faqe e rresht janë nga kjo letër) se përndryshe sipas tij kjo çështje as që ka nevojë të shtrohet për diskutim. Duhet në radhë të parë të bëjmë luftë klasore arsyeton Kushtrim Kosova sepse:

- po të përmendet nacionalja atëherë bëjmë vetëm luftë klasike (definicion modern),

- duhet të dominoj klasorja sepse kjo është në përputhje me ideologjinë e popullit tonë në pjesën më të madhe të tij.

- duhet të potencohet klasorja në radhë të parë sepse ky vlim më i ri është i frymëzuar nga kjo ideologji (pa i përmendur askund idolet e asaj ideologjie e as ideologjinë në fjalë).

Nuk duhet të vijë në radhë të parë nacionalja sepse:

- armiku nga akuzon për nacionalizëm e irredentizëm.

- se lufta jonë "klasike" patriotike donë të thotë shi në misër të rankoviqizmit (faqe 2, rreshti 31).

- se potencimi i nacionales të vë firmën e nacionalizmit (faqe 5, rreshti 6).

- ata që janë përkrahës të kësaj pikëpamje donë ta fusin LRSNJ-në në binar borgjez dhe jo vetëm të dyshimtë por edhe shumë të rrezikshëm (f. 5 rreshtat 7,8).

- potencimi i nacionales d.m.th. kthim prapa, në ideologji nacionale (?) dhe kundër internacionalizmit socialist (po ta kishin shfletuar marksizmin apo çfarëdo veprë të kësaj natyre do t'u binte ndërmend se duhet thënë internacionalizmit proletar).

- Sipas kësaj logjike gjërat do të duhet të shikoheshin kështu:

- se një arsimitar në një shkollë fillore së pari duhet të protestoj pse nuk i rritet rroga e pastaj të vij në protestat për atë se: pse nga muret e korridorit të shkollës së tij janë hequr të gjitha fotografitë e rilindësve përveç njërit, nëse emrin e rilindasit apo të heroit e mban shkolla në fjalë.

- se ai së pari duhet protestuar pse nuk i rriten shtesat e fëmijëve para se të interesohet se pse janë censuruar të gjitha vjershat nga librat e leximit dhe abetareve që po atyre fëmijëve ato vjersha ua ndiznin shpirtin flakë me dashuri për atdheun.

- se punëtori në Obiliq apo në Trepçë së pari duhet kërkuar përmirësimin e kushteve të punës para se të kërkoj llogari për grabitjen koloniale të qymyrit, rrymës e mineraleve.

Duhet luftë klasore sepse kjo është në përputhje me ideologjinë e popullit tonë në pjesën më të madhe të tij. Por ajo pjesë e madhe e popullit tonë që sot e ka preokupim ideologjinë, në një kohë siç e ka thënë edhe vet PPSH dhe Akademia e Shkencave e atij shteti, në një kohë para dyzet vitesh PKSH ka bërë vetëm luftë "klasike" nacionalçlirimtare. PKSH në Konferencën e Pezës ka ftuar të gjitha partitë

politike (edhe pse parti politike përveç PKSH nuk kishte) në luftë të përbashkët kundër fashizmit. Fitorja e LNÇI në pjesën e stome të atdheut tonë, çoi në fitoren e revolucionit demokratik i cili me punën e vazhdueshme të partisë revolucionari demokratik u shndërrua në një revolucion socialist.

LNÇKVSHJ-ja e ka komprometuar PPSH dhe gjithë shtetin shqiptar

Në lidhje me atë se po nuk u shprehëm së pari për klasoren do të jemi në kundërshtim me ideologjinë dhe me popullin tonë të lirë, sipas mendimit të Kushtrim Kosovës unë po përmendi një fragment të kam pasur me bashkëmendimtarin e KK, Halimin (Osman Osmanin). Ai gjatë një bisede se cila organizatë çka ka punuar e si ka punuar më ka deklaruar: LNÇKVSHJ-ja e ka komprometuar PPSH dhe gjithë shtetin shqiptar duke e shpërndarë literaturën e saj, të ligjësuar këtë veprim edhe me statut, duke e lavdëruar veten se ata nuk kanë pasur nevojë t'i referohen PPSH pasi që e kanë formuar PKMLSHJ e cila është origjinale dhe nuk është në kundërshtim me vetëqeverisjen e Titon por vetëm me rankoviqizmin dhe forcat regresive në LKJ.

Kjo është idioteske, të kapesh pas disa gjërave pa kurrfarë parimi, por vetëm si ta kërkon rasti për të realizuar qëllimet e tua.

Të flasësh për klasore në cilësinë e një njeriu që do ta trasosh një lëvizje përfaqësuese të një populli dy milionësh në rrugën ml (vërejtje e Skënderit, pasi ml nuk potencohet nga Kushtrim Kosova dhe dy shokët e tij) e të mos i referohesh për asnjë rast qoftë edhe sa për formalitet klasikëve të ml dhe veprave të shokut E. do të thotë se veprat e klasikëve të ml as nuk i ke shfletuar ndonjëherë por vetëm mundohesh të gënjesh të tjerët se je ml e k (marksist-leninist e komunist-shën im).

Veprat e ml asnjë nga ne nuk i kemi studiuar për shkak të kushteve por nga disa shfletime kemi mund me vërejt se ato ku t'i hapësh do të gjesh diçka të afërt, të vlershme dhe të aplikueshme në çdo kohë për ty. Ato janë si një lëmshe i madh përçuesish elektrik që për t'ia gjetur fijet të ndihmojnë treguesit e shumtë të veprave të tyre dhe se ku t'i prekësh ato fije, tregojnë rrymë.

Të thërrasësh deri në kupë të qiellit për luftë klasore si në kushtet tona, si në çfarëdo kushtesh, së pari duhet ta kesh studiuar mirë zbulimin e madh të Marksit se: "... esenca e luftës së klasës nuk qëndron në ndërrimin e një aparati me një tjetër por esenca e luftës së klasës qëndron pikërisht në thyerjen e plotë të këtij aparati dhe zëvendësimin e një klase të tërë shtypëse me një klasë shumë më të madhe në masë, me klasën e të shtypurve..."

Të bërtasësh deri në kupë të qiellit e pas shpine të mbash mburojën për vetëqeverisjen e në anën tjetër të thuash se këtë ma mëson Marksi siç po e sheh KK dhe bashkëmendimtarët e tij, nuk shkon.

Nga ana tjetër nga shteti ynë dhe avangarda e tij dhe udhëheqësi i kësaj avangarde është botuar një libër i njohur me rëndësi të madhe teorike e praktike, i cili ia çjerr maskën socializmit vetëqeverisës, që KK me shokë e kanë ndërmend t'ua marrin burokratëve e me ua kthye punëtorëve, tregon esencën e tij kapitaliste. Pra ne konsiderojmë se vetëqeverisja e kapitalizmi për shqiptarët janë një, ashtu siç janë Titoja dhe Rankoviqi një, dhe për këto nuk kemi çka të flasim as për "hir të politikës së madhe" sepse bëhemi për të qeshur edhe nga armiqtë tanë e lere më nga populli ynë. Një dallim në mes Titos dhe Rankoviqit kundrejt shqiptarëve është munduar me çdo kusht ta bëjë LKJ dhe sidomos UDB-a pas Plenumit të Brionëve. Për shqiptarët Tito dhe Rankoviqi janë të lidhur si mishi e kocka, dhe s'ka fuqi që i ndan. Këtë e di më së miri populli i Kosovës që e ka provuar në kurrizin e tij, e di shteti ynë që këto procese i ka parë më mirë edhe se ne, këtë vazhdon ta pohoj çdo ditë edhe shtypi botëror. Dihet sa

ka ndryshue e sa s'ka ndryshue gjendja e shqiptarëve pas brioneve. Titoja është ai që e ka shkelë të drejtën e vetëvendosjes, që ka shkelur marrëveshjet e luftës, është ai që ua mohoi më 1968 republikën shqiptarëve që çuditërisht i kishte rënë ndërmend popullit edhe kur nuk ishte aq aktiv në këtë drejtim KK me shokë, dhe që i burgosi e torturoi deri sa i rrahu fryma.

- Duhet luftë klasore në radhë të parë sepse edhe ky vlim është frymëzuar nga kjo ideologji.

Nga është frymëzuar ky vlim në planin më të përgjithshëm dhe shkencor e ka dhënë artikulli i Zëri të Popullit i datës 8 prill 1981. Nga këndi ynë ne mund të flasim më ndryshe dhe të koncentrohemi në atë se pse tha rinia "kështu më nuk durohet". Së pari mendojmë se ky ishte një zgjim i ndjenjës kombëtare deri në atë shkallë sa populli mbarë ta kuptoj se ka ardhur koha e ndryshimeve të mëdha revolucionare. Këtë zgjim para së gjithash e kushtëzoi 100 - Vjetori i Lidhjes "klasike" të Prizrenit, ashtu siç ndikoi më së shumti 500-Vjetori i vdekjes së Skënderbeut në ngjarjet e vitit 1968. Se forcat e organizuara u brumosën me leximin e veprave të shokut E. dhe fituan një ndjenjë shumë të madhe të krenarisë kombëtare nga veprat e I. Kadaresë i cili në Prishtinë u prit si kryetar shteti, ai u dashurua në historinë e tij më të re sidomos nga dy librat e Ajet Haxhiut, të Hasan Prishtinës dhe Shote e Azem Galicës, se e tërë ajo gjenerate vajzash të shkollave të mesme nuk kishin arritur të studionin veprat e Marksit, Engelsit, Leninit, Stalinit e të shokut Enver, por që u frymëzuan aq shumë nga këngët "nacionaliste" të Shyhrete Behlulit e Shkurte Fejzës. Programi i televizionit shqiptar për një vit e gjysmë qe katalizatori më efektiv dhe vendimtar që të shpejtësohet një zgjim i tillë në atë shkallë si e kemi sot. ...

Gjatë gjithë kësaj kohe në programin e televizionit shqiptar nuk qe as aludimi më i vogël r. (republikë), për b. (bashkim) me qindra herë. Kur shfaqej drama Shote e A. Galica nëpër Kosovë e sidomos në Drenicë nuk pushonin krismat tërë natën. Kush nuk e di këtë nuk e ka përcjellë televizionin shqiptar. Me një fjalë, nga programet e televizionit shqiptar, sidomos nga emisionet për fëmijë populli i Kosovës e pa se çka do me thënë me qenë i lirë. Kjo ndjenjë e qoi peshë më 1981.

Ai u frymëzua edhe nga shtypi ilegal revolucionar dhe atë nga revistat: Bashkimi, Lajmëtari i lirisë dhe Liria.

Kjo është ajo që e shtyri popullin tonë të thotë mjaft, sipas mendimit tonë.

-Në lidhje me atë se a do t' na etiketojnë si nationalist armiqtë tanë, për luftën tonë, këtë më së miri e ka shpjeguar me shembull mjaft të mirë shoku Ll. duke u shërbyer me proverbin e gjuhës së Krishtit. Pra këtu s'kemi pse me u kthye mbrapa dhe me diskutue rreth saj. Kur Sylejman Vokshit që në fillim i përmendin vdekjen ai u thotë i kënaqur se "përderisa ma përmendni vdekjen kjo do të thotë se ma paskeni pas frikën, dhe të vjetrit tanë na kanë thënë se në luftë kur armiku ta dëshiron vdekjen d.m.th. ia ke arritur qëllimit". (nga drama Epoka para gjyqit).

Armiku po ushtron presion mbi familjet e kuadrove tona

Letra prek edhe një temë të rëndësishme. Udhëzimin për gjakftohtësi ndaj presioneve që po ushtron armiku mbi familjet e kuadrove tona duke e përmendur rastin e familjes së tij (Abdullah Prapashticës-shën im), dhe kjo nuk është hera e parë që me dorë të vet ia nisë me na tregua se si në një letër më parë "... se nga burime të sigurta ka informata se për kokën time (të Abdullah Prapashticës -shën im) është ndarë një shumë e madhe të hollave...".

Tani në këtë letër përmend prapë vetë presionin që po iu bëka në familje. KK dhe shokët e llojit të vet duhet ta dijë se nga ky mes janë përmendur dhe janë bërë

presione ndaj disa njerëzve të cilët kurrë nuk i zmadhuan e as si përmendën kurrë me gojë e tyre. Prandaj shoqërisht po u themi lej këto marrina se njerëzit tanë kanë një respekt të madh për ata që luftojnë dhe rrezikohen, prandaj nëse ti s'e ke parë ende këtë të vërtetë, përvishju punës nëse dëshiron ta shohësh ndonjëherë. Me këtë rrugë e me përmendje të vetes nuk do ta sheh askushi.

Sipas kësaj logjike ne jemi "...duke e sulmuar LKJ, me RSFJ me sistem e me Titon e tyre..." (f. 7, rreshti 22) vetëm kur paskan filluar presionet ndaj disa familjeve të disa kuadrove tona. Me këtë fjalor udhëheqësve të lëvizjeve të Kosovës u janë drejtuar qysh prej kohësh Turqia dhe Serbia. Ata e kanë fryrë variantin se udhëheqësit e lëvizjeve të ndryshme çlirimtare të Kosovës janë njerëz shpirtërisht të dëshpëruar apo edhe siç i drejtohet edhe Mexhid beu Sylejman Vokshit në dramën Epoka para gjyqit: "... ç'tu deshtë jeta e malit Sylejman, ti ashtu edhe derfikt nuk ishe...". Pra Turqia dhe Serbia janë munduar që udhëheqësit e lëvizjeve t'i paraqesin si njerëz pa influencë, të dëshpëruar që u ka humbë qetësia personale, prandaj u ka humb arsyeja dhe nuk duan të pyesin për të përgjithshmen. Por kjo kurrë s'ka qenë kështu. I tillë nuk ishte H. Prishtina, B. Curri, A. Galica etj. I tillë siç donë me na thënë të kuptojmë KK nuk është M. (Mërgimi=Sabri Novosella) i cili ende nuk na e shtroi si çështje se kaq të holla nga burime të sigurt u njoftova se u paguan për kokën time. I tillë nuk është as U. për presionin që bëhet ndaj familjes së tij, me traditë di sot gjithë Kosova, e i cili nuk u kujtua ende të na thotë se shokë shikoni çfarë presioni, urra kundër LKJ e Titos së tyre. Me e lavdërua veten na duket punë e ulët edhe nëse thua të vërtetën. S'ke q' i bënë, kështu kish pas qëllue karakteri i shqiptarit shoku KK (Abdullah Prapashtica).

Ç'ideologji e ç'punë kanë bërë tri organizatat më përpara KVG pajtohet plotësisht me vlerësimet e dhëna në kryeartikullin e numrit 2 të ZK. Këtu po kthehem te fjala opozitë e përmendur në letrën e shokut L.. i ka shërbyer KK jo për të kuptuar të vërtetën se logjikisht kur ne jemi opozitë e LKJ atëherë sipas të gjitha rregullave edhe LKJ është njëherit opozitë e LRSHJ. Fjala opozitë e përmendur në letrën e 10 korrikut i ka shërbyer KK për një frymëzim që t'i hyj një pune që të nxjerr "dokumente me rëndësi" duke hapur në këtë drejtim edhe perspektiva të mëdha për shkencat historike. Sipas kësaj opozitat e LRSHJ qenkan me zanafillë më të re, nga koha e Lidhjes së Prizrenit e pasojat dhe rrjedhimet e saj po e dëmtojnë aktualisht LRSHJ, përfaqësuesit e të cilës janë ca kuadro të ish-LNÇKVVSHJ dhe OMLK. Se a paraqet Lidhja e Prizrenit fillet opozitare të LRSHJ e tema të ngjashme ne nuk po mund të hyjmë duke konsideruar se në lidhje me këtë shkencë shqiptare e ka dhënë fjalën e fundit. Në çështje me Lidhjen e Prizrenit, në maj 1978 në Zërin e rinisë ka qenë i paralajmëruar një studim voluminoz i punës 20 vjeçare të prof. dr. Ali Hadrit se do të botohej, por sot e asaj dite se pa dritën me sy. Mos botimi i tij na jep të drejtën të mendojmë se as në atë studim nuk ka ndonjë fjalë se Lidhja e Prizrenit ishte klasike, se paraqet fillet e opozitës së LRSHJ, dhe se aktualisht idolet e kësaj lidhje po të potencohen aq shumë janë shërbyesit më të mirë të rankoviqizmit. E quaj veten të papërgatitur që t'u hyj këtyre temave që aq lehtë i përmend KK dhe i studion me një fjali si me pas qenë baba i Herodotit.

Në lidhje me diskutimet e më parme rreth çështjes se a duhet të organizohemi në p. (parti) apo në Lëvizje, KK na drejtohej me receta të gatshme: duhet të organizohemi në parti sepse ajo do të jetë parti i e shqiptarëve në Jugosllavi. Pra shumë e qartë, kështu thotë edhe plakuri (Bujar Hoxha-shën im). Qëndrimin e tij në Ankara afër plakut (Bujar Hoxhës) KK (Abdullah Prapashtica) ne e ofron ashtu siç ua ofronte Koço Tashkoja grupeve komuniste qëndrimin e tij në Moskë duke thënë se unë jam i pranuar dhe mua më njeh Kominterni.

Të kapesh aq shumë pas ideologjisë e të mos i referohesh asnjëherë asaj do të thotë të jesh një Mao Ce D. i vockël, i cili më 3 shkurt 1967 i kishte deklaruar një delegacioni shqiptar të PPSH: "... për veten time, unë jam një njeri që nuk i dëgjoj radiot, as ato të huajat dhe as ato të Kinës, por vetëm transmetoi." Ai ka pohuar gjithashtu: "Kam deklaruar hapur se nuk do ta lexoj gazetën Zhenminzhibao. Këtë ia thash kryeredaktorit të saj. Unë nuk e lexoj gazetën tënde."

Të kapesh për klasoren me fjalë e në anën tjetër të jesh për ruajtjen e rendit do të thotë të jesh një Mao Ce që kanë nisur me të dalë "gecat". Këtë e vërtetojnë më së miri thirrjet e shpeshhta për qeverinë provizore. Maoja ka deklaruar: "... ne dhe Guomindani qankaishist në themel jemi të kundërt me njëri-tjetrin. Si rrjedhim i luftës dhe i përjashtimit reciprok të të dy aspekteve ne me Guomindanin ndërruam vendet..." (Ma Ce Dun, Vepra të zgjedhura, vëll. 5, bot. frengj. f. 479, Pekin 1977).

Faza e tretë

Një komponentë më vete është edhe tërheqja e vërejtjes se dikush po dashka me e hedh popullin në luftë "vetëvrasëse" duke e bërë në këtë mënyrë "mish për top."

Që në fillim këta njerëz kanë deklaruar se strategjia e tyre ka qenë të kërkohet republikë me paqe (me telegrame e letra, faza e parë), faza e dytë me dasma masive që edhe ajo u krye. Faza e tyre e tretë thoshin se është revolucioni i armatosur. Sipas shpjegimit të Halimit (Osman Osmanit) që të mos jepet as shenja më e vogël jashtë kërkesës për republikë ka qenë se ndoshta ky do të jetë numri i fundit (i Zërit të Kosovës qershor 1982-shën i Xh.D.), se do të kalohet në kërkesën e b. (bashkimit) duke i thënë LKJ se p. (partia jonë) boll të luti e tash ke me pas se çka ka me te gjetë. F., pas Kongresit XII (të LKJ-shën i Xh.D.) tha në një rast në praninë time dhe të Halimit: "Tash s'kemi çka e përmendim republikën, pasi nuk na e dhanë kësaj radhe. Halimi ndërhyri duke i thënë se ke shumë të drejtë. Unë jo njëherë e kam kundërshtuar Halimin se këtu nuk mund të luajmë orë e çast. Më 15 maj (1982) Halimi (Osman Osmani) na ka folë mua dhe U. (Xhafer Shatrit) për ZONËN E LIRË duke na e tërhequr vëmendjen mua dhe U. se çka kemi thënë deri më tash (ne PKMLSHJ-ja-shën i Xh.D.) është bërë si kemi thënë edhe pse thënie tona nuk janë bazuar në mundësit reale, prandaj është mirë të përpiqemi e të vazhdojmë me atë tempo. Prandaj KK (Abdullah Prapashtica) mos u lodh aq shumë me ua tërhequr vërejtjen të tjerëve për gjëra që ende vet nuk i ke të qarta. Ti me bashkëmendimtarë, me propozimet tuaja je ai që po të kesh mundësi e bënë popullin mish për top kur thua të lidhemi me b. (Bullgarinë) dhe me udbën e Kosovës e ta shpallim republikën.

Të tëra këto në lidhje me këto sjellje e pikëpamje tregojnë për një pragmatizëm të rrezikshëm që s'ka asnjë fije lidhje me elasticitetin komunist.

Jo KK recetat e gatshme në ideologji nuk hahen. Nëse ke menduar kështu do ta shohësh se ke gabuar. Po më vjen keq që thua të mos bëjmë polemikë, por më duhet të tregoj se polemika në luftën ideologjike është "A". Nëse merr mundimin e me i shfletuar veprat e Marksit, Engelsit e Leninit do të shohësh se 80% e vëllimit të tyre është polemikë. E njëjta është shumë e dëmshme të ndodhë kur kemi të bëjmë me luftë nacionalçlirimtare. Te luftërat nacionalçlirimtare jo vetëm që nuk bëhet polemikë brenda së njëjtës parti por edhe të ndryshmet bëjnë kompromise me njëra tjetrën kundër armikut të kombit. Dhe këto kompromise nuk bëhen duke i fshehur ato me çjerrjen qesharake të unitetit të kristaltë. Pra na u dashtë të bëjmë pak polemikë. Si po e shef, mospajtimet tona nuk janë administrative por qëndrojnë në themel të çështjes. Nuk mund të veprohet me pikëpamje të kundërta në emër të së njëjtës. ...

KVG i përkrah pa asnjë ndryshim më të vogël pikëpamjet e shokut Ll. (Xhafer Shatrit-shën i Xh. D.) të shprehura në letrën e tij të datës 10 korrik 1982.

Komiteti Vëllezërit Gërvalla 1 tetor 1982

Në emrin e tij Shpendi (Xhafer Durmishi)

(Në emër të Komitetit "Vëllezërit Gërvalla" letra e mësipërme u shkrua nga Xhafer Durmishi)

13. Letër Xhafer Shatrit, 14 tetor 1982

Shoku Llesh, 14 tetor 1982

Sot e mora letrën e datës 9 tetor dhe e kuptova. Unë s'kam pas se pse me të keqkuptua sepse e di se mund të ndodhesh në pozitë të keqe. Nesër do ta ndërroj banesën dhe ndërrimi i banesave me të thënë të drejtën deri më të tani ma ka shkaktuar lodhjen më të madhe. Duke u nisur nga ky shkak më duhet të them se nuk e di se a do të kem kohë me e përshkrua letrën dhe me e bërë korrektimin e saj. Fjalën idioteske e kam përmendë e aty dihet se pse e kam përmendë. Unë nuk e di se në çfarë mase je i njoftuar por edhe kryetari i Shoqatës së miqësisë Gjermani-Shqipëri" Peter Platzman e solli bisedën rreth Lëvizjes. Unë e pash se për çka po ka dëshirë me i folë dhe nuk e lash të flasë por i thash se rrugën që na e kanë lënë shokët do të vazhdohet pa asnjë ndryshim dhe se ne për çështjet kapitale nuk kemi as dilemat më të vogla. Kur i dëgjoji këto nga unë i erdhi mirë dhe më rrahu krahët. Merre me mend se çka mund të ketë pasur në ato momente koka e tij. Në letrën e kaluar të fola se pata edhe takimin e shkurtë me Engjëll Kolanecin. Në panair më duket se kam bërë mirë që shkova sepse u takova me Peterin i cili më ftoi ta vizitoja edhe në shtëpi, dhe me njerëz të tjerë. U takova me një djalë nga Kërçova i cili ka kërkuar strehim në Ludvigshaven, i cili është shumë djalë i mirë, të cilit ia dhashë një adresë që të jemi në kontakt. Për disa momente rreth shtandeve të ndryshme pa dashtë unë më shoqëroi një përfaqësues i "Vëllaut të madh" (diplomati shqiptar nga Vjena-Skënder Dushi). Gjatë gjithë shëtitjes me te më foli vetëm për IK dhe e sillte bisedën se me te nuk bënë të bisedojmë por as ta luftojmë.

Unë me diplomatët shqiptarë jam sjellur si mund të merret me mend se si mund të sillet një idealist. Po kur ia kam dhënë adresën e br (Brukselit) kam bindjen se nuk kam gabuar sepse siç do ta shohësh më vonë atë djalë adresën e të cilit ua kam dhënë e njohin shumë më duket ata të Francës. Këtu nuk po zgjatem por po të them se ky shoku që më shoqëroi më jepte me gjykue se na duhet të sillemi si papagaj e të dimë të themi vetëm Kosova-Republikë! Mund të vërtetohen paramendimet që t'i kam thënë në Bern. Pesë ditë para panairit ia kam dërgua një fletë për ta mbushur Drita në lidhje me gurët e sonte në telefon shoqja e tij më tha se sot e mora letrën nga posta e shoqi që sa shkoi në punë.

Shaqiri mendoj se është njeri i punës, unë kështu e kam bindjen. Është mirë që kishit biseduar me te, por mos të ngutet lidhur me Nuhiun, shoku Llesh sepse ti nuk e di a je duke e kuptue sjelljen e tij. Ai shkurt nuk din çka është nderi e fjala e burrit. Sido që të jetë unë i përmbahem qëndrimit tim dhe nuk do ta kthej fjalën ashtu sikurse Kamberit (SN). Por për Nuhiun më tepër ka vlej të një intrigë a premtim i Halimit (Osman Osmanit) se sa korrektësia e Kamberit. Drejtë me të thënë po më vjen inati me të ra rasti edhe ty e me e lutë e me e pyetë Nuhiun se çka po donë. Kjo po më duket dobësi e jona. Thuaja edhe këtë Shaqir (Shabanit) që t'i thotë Nuhiut se ai duhet t'i kthej të gjitha adresat që ia kam dhënë unë që i ka pas përgatit Sokoli (Jusufi) dhe llogarit e plota për tubimin e të hollave që i ka mbledhur (i janë dhënë) në Untergruppenbach, si dhe ndihma për Kosovën. Këto të fundit i kërkojnë shokët e vet.

Lidhur me një takim të mundshëm që mund të thirret në vendin tuaj unë momentalisht nuk mund t'i përgjigjem e sidomos jo për punë të Nuhiut, sepse siç e di, dy herat që kam qenë tek ti kam udhëtuar me letër (pasaportë) të huaj, pasi pasaporta ime është e pavlefshme sepse e kam të ndaluar të hyj në Zvicër për dy vite (nga 20 prilli 1982 deri më 20 prill 1984 -shën i Xh.D.). Po që se do mund ta dërgoj edhe fotokopjen e ndalesës. Nuhiu duhet gjithashtu të m'i kthej disa artikuj të mi në dorëshkrim që i kam shkruar në ato ditë janari. Për të mos u lodhë me ardhë këtej, le të vjen ai atje. Shokët e vet i flasim privatisht, por me e pranua si më parë, jo se ai nuk është sjellë mirë me ta por nuk i ka bërë hesap për njerëz.

Naimi do ta paraqet kërkesën për azil në një vend larg nga këtu. Në atë vend veç ka shkua. (Është fjala për qytetin Hamburg, në këtë kohë, por pas qëndrimit disa mujor në këtë qytet vendosë të shkoj në Suedi, punë të cilën e bënë në pranverë 1983-shën i Xh.D.)

Dërgomi artikujt që i ke të gatshëm se do të filloi nga puna për numrin e ri të revistës. Ty po ti dërgoi këta. Kisha me të thënë se e meriton të botohet edhe artikulli Politika dhe lufta i cili më duket se ka dalë i mirë. Unë me e përmirësue më tepër nuk mundem sepse e kam rishkruar tri herë. Në vazhdim mos më shkruaj në adresë të Faridinit se e kam shumë larg por më shkruan në këtë adresë:

Buchhandlung, Hausmanstr. 107, 7000 Stuttgart, BRD (Xhafer Durmishi)

14. Letër Faridin Tafallarit, vjeshtë 1982

Shoku F.

Unë jam vendos te ai shoku dhe jam mirë. Namiu ma pruni edhe makinën. Ai mundet me të tregue më gjërë se unë në këtë letër. Uka (Xhafer Shatri) letrat le ti dërgoj edhe më tutje në adresë tënde edhe artikujt për organin. Ti ua heq zarfat e Zvicrës dhe i shtinë në postë në adresën që do ta shënoj në fund.

Tani po më mundon tepër problemi pse s'u kthye kurrë prej Tushës. Merre Mehdiun e dilni, apo thirrne Haxhiun e diskutone. Le te lyp ai dike në shtëpi në telefon, e nëse paraqitet nevoja do të duhet me e çue diken në Kosovë, sepse koha po ecë, e dimri erdh. Do të shkruaj prapë.

Shkruam në adresën:

Mathilde Roos

Josefstr. 60

6630 Saar Louis - Roden

Unë do ta dërgoj sot një letër në të gjitha drejtimet dhe do ta jap mendimin e punëtorëve të Shtutgartit në lidhje me festën e 28 Nëntorit.

Në Belgjikë ka nisë përgatitja e dramës.

Të fala S. (Xhafer Durmishi)

15. Letër Faridin Tafallarit, vjeshtë 1982

Shoku F. (Faridin)

Adresat që t'i dërgova më parë i fotokopjon e këtë origjinalin që po ta dërgoj ua jep atyre që të porosita.

I thuaj Meh. (Mejdi Rexhës) apo shiko edhe ti vet se mua traka e makinës mu harxhua. Unë pa te nuk mundem. Këqyrë në kofer, në një zarf është artikulli i një

komunisti slloven France Klllopçiç me titull "Thuajeni të vërtetën e plotë" që e ka botuar Rilindja. Ma dërgon.

Këto adresa momentalisht janë për ty e Qe. por i mban ti.

Shoku F. këtë shtojcë po ta shkruaj më pas. Po më vjen keq, por e di se edhe ti këtë mundesh me e marrë me mend. Sot mua m'u harxhuan të hollat. Do të më nevojiten për disa letra milimetrike që të radhitet organi (revista) dhe për pulla postale të letrave e telefon. Sipas mundësive m'i dërgon 100 DM. Dërgoi në adresën Ismail Hoxha etj., e din ti adresën. Edhe kasetat i dërgon.

Të fala S. (Xhafer Durmishi)

16. Letër Faridin Tafallarit, vjeshtë 1982

Shoku Faridin,

Rrotullat e kauçukut (shiritat e makinës së shkrimit-shën i Xh.D.) me vija e kanë këtë formë. (Vizatim në dorëshkrim) Vija e zezë, ngjitës për me i rrethua artikujt me vija të zeza. Tani po më nevojiten. Janë të gjana 5-10 mm. Mund të ndodh që të jenë te Remziu, vetëm më duket se nuk janë, por në kofer.

Po e pres artikullin e 28 Nëntorit dhe letrën e lexuesve, se përndryshe unë sot do ta kisha dërguar.

Adresa e Muharrem Gjocajt është: Klara str. 9-72, 8 München 19. Ia dërgon një letër, le të thirrë në telefon dhe i thua për kasetat. I tregon se kur mundet me të gjetë, sepse nuk bën ato me nejtë. Ky shoku i ka dy video dhe po incizoka në shumë ekzemplarë.

Këto rrotullar (shiritat) m'i dërgon po që se i gjen se janë shumë shtrenjtë (15 marka copa) dhe në librari duhet me i porositë.

Të fala S. (Xhafer Durmishi)

PS. Në Belgjikë thuaju në atë adresë se festa është vendosë të bëhet veçmas, që pjesëmarrja në çdo rreth të jetë më e madhe.

17. Letër Faridin Tafallarit, vjeshtë 1982

Shoku Faridin,

Para dy ditësh ta lëshova një letër në post, ku të thash me i mbledhë ata shokët. Në anën tjetër me Muratin e lamë që të shkojmë në Augsburg. Kështu, po që se i ke njoftuar shokët për takimin atë duhet edhe me e mbajtë. Kështu për Augsburg jam i mendimit le të shkojnë Remziu, nëse ka kohë, Murati dhe Hafizi. Unë do të shikoj me të marrë në telefon e i qartësojmë senet më mirë. Deri të shtunën gjendet kësajde edhe Ahmeti. Do t'ia japi projektstatutin. Gjithashtu duhet me ia dhënë edhe kasetën.

Me kaq mirë u pafshim.

Gjithashtu edhe këtë kambialin (çekun) me dy mijë dollar e merr me ia dhënë Ahmetit.
(Xhafer Durmishi)

18. Letër Faridin Tafallarit, fillim i Nëntorit 1982

Mendimi i punëtorëve të rrethit të Shtutgartit lidhur me organizimin e kremtimit të Festave të Nëntorit

Në lidhje me organizimin për 28 Nëntorin punëtorët e rrethit të Shtutgartit janë të mendimit që të bëhet një organizim qendror i cili nuk do t'u humbte vlerën

manifestimeve lokale. Kemi bindjen se një organizimi i tillë do të ishte në rregull. Nuk e shohim të rrugës të hyjmë në arsyetime.

Për këtë çështje kërkojmë mendimin e rretheve të:

- Dyseldorfit, Brukselit, Bernit, Gjenevës, Zurichut dhe Hamburgut.

Mendimi për këtë, punëtorëve të rrethit të Shtutgartit mund t'u dërgohet në adresën:

Buchandlung, Hausmanstr.107, 7000 Stuttgart

* * *

Faridin, dërgojua këtyre njerëzve:

1. Hyzri Rekaj, Mintorpstr. 27, 4000 Dyseldorf
2. Muhamet Ramiqi, Dorf Gaze 14, Horgen, ZH, Suisse
3. Frau Rubin, Inbrand 3852, Riegenburg
4. Dhe në adresën e Brukselit.
5. Ukës po ia dërgoj unë.

(Xhafer Durmishi)

19. Letër Faridin Tafallarit, 25 nëntor 1982

Shoku Faridin

25 nëntor 1982

Ja po ta dërgoj edhe fjalimin të cilit duhet ta lexoni ndonjëri prej jush tek varrezat. Nuk e shkrova aq të gjatë po besoj se është i fuqishëm, përndryshe jam edhe pak i lodhur nga puna me revistën. Gjithashtu më mori pak kohë fjalimi për Shaqirin të cilin e shkrova në tri faqe. Unë me këtë shokun do të nisemi të shtunën heret në mëngjes, sepse ky është në ndërrimin e dytë. Ky do të marrë edhe familjen me vete, ka shoqen dhe dy fëmijë; djalin gjashtë vjeç dhe vajzë një vit e gjysmë. Për revistën shikoni gjatë shpërndarjes kur ta merrni, megjithëse se besoj se edhe unë do të jem atje, që të shpërndahet me marrëveshje, ta dimë se cili rreth sa do të marrë, sepse jemi marrëvesh se ajo në të ardhmen do të shitet nga tri marka e gjysmë ose tre franga të Zvicrës.

Gjithashtu edhe nëse vendosim me e shpërnda në sallë, këtë punë ia lëmë një rrethi tjetër. Le të duket sikur ata e kanë sjellë me vete.

Tash nuk po di se si keni biseduar atje në Hamburg, por nëse është marrëveshja që dikush prej rrethit tonë të shkoj të shtunën në mbrëmje në Dyseldorf, atëherë cakto njerëzit që duhet të shkojnë, por jo nga ata që na vyejnë shumë. Namiun po mendoj me e lënë që ta shoqëroj këtë shokun gjatë qëndrimit të tij atje. Sa i përket referatit tek varrezat shiko a mund ta bëjë këtë Haxhiu. Unë mendoj bile do të ishte mirë ta lexonte Ismet Klaiqi. Posa ta marrësh, dërgoja dhe diskutoje se a mundet ta bëjë këtë. I thuaj se ky është mendimi im.

Të fala Skënderi (Xhafer Durmishi)

(Faridin Tafallari, T-Dhimbje-Qëndresë, Tiranë 1997, f. 436)

20. Letër Faridin Tafallarit, 29 nëntor 1982

Shoku F. (Faridin)

29 nëntor 1982

Me manifestimin jam shumë i kënaqur, sidomos për pjesën në sallë. Përndryshe jam frikësuar shumë dhe për këtë nuk mund të jemi të kënaqur për pjesën e programit tek varrezat. Përndryshe edhe Nam. e lexoi mirë. Njoftimet nuk ishin bërë mirë dhe në masë të mjaftueshme, sidomos në Sindelfingen.

Abdurrahman (Sadikun) nuk e pashë dhe kjo më çuditi, më intereson me e ditë a ishte në pushim apo jo. Këtë pjesë është dashur ta realizoni mirë.

I thuj (Hafiz Gagicës) të marrë informata të hollësishme për atë njeriun i cili na informoi për Cyrihun dhe le të ma dërgojë emrin e tij, ku punon dhe s'ka nevojë më tepër. I thuj gjithashtu Hafizit që të takohet me Kolë Mërturin e nëse e sheh të arsyeshme edhe me Kolë Palokën, por më së pari vetëm me Kolë Mërturin dhe ta pyesë se a kanë qenë ndonjë natë kush te ata, se më duket do të ketë qenë Hasan Veselaj, apo ndonjë i tyre dhe t'u ketë folur ashtu si i kanë folë Murat Kryeziut në Bernhausen.

Me Mehdi (Mejdi) Rexhën e Ismet Klaiqin takohu rregullisht ti dhe mundësisht çdo javë, bile në telefon dhe ata duhet t'i angazhojmë se do ta ndiejnë veten më mirë. Unë isha bërë merak shumë pse nuk ishin treguar më aktivë në njoftim të kësaj ngjarjeje, por më erdhi mirë që posa janë kthyer nga Dyseldorf qenkan takuar me ty dhe qenkan ndarë të kënaqur. Gjithashtu edhe unë jam i mendimit se duhet ta kemi një vend publik apo rrethi ynë, ku mund të takohemi sa të duam dhe kur të duam. Për video që të bleni mos u ngutni, sidomos mos bleni sistemin VCC 2000 ose të ngjashëm, por shumë më të mirë se po dalin sistemi FHS (VHS) katër orësh. Këndej paska shumë video të tillë dhe qenkan më të mirë. Kasetat e gjata po u prishkan më shpejt dhe po e munduakan videon, ashtu siç e mundon magnetofonin p.sh. traka e 90 minutave. Gjithashtu ne tani e tutje të gjitha incizimet dhe shumëzimet do t'i bëjmë pa të holla, sepse e kemi një mundësi të tillë. Kur jemi tek kasetat e kam edhe këtë porosi: Ia dërgon Qazim Malës (në Troisdorf) kasetën që ta dhashë e që e kemi pasur këtu, me porosi, duke i treguar se ai është origjinali dhe që ta bëjë një kopje të saj me shokët e tij, me shpenzimet e tyre, sepse ne momentalisht nuk po mundemi. Gjithashtu thuaju se nëse në të ardhmen mendojnë të blejnë ndonjë video, të mos e blejnë të tipit VCC, duke ia përcjellë fjalët që t'i thash ty.

Nuk pata shumë rast të bisedoj me Sahit Tofajn e Hasan Veselajn. Me ata ngadalë, por nuk bënë me i këputë takimet me ta. Kur të takohesh me ta çojë bisedën në atë mënyrë që mos i le aq shumë të flasin për mua, Mërgimin (Sabri Novosellën) etj., duke u thënë se njerëzit nuk janë me rëndësi, me rëndësi është që puna le të shkojë mbarë e se do të shkojë mbarë për atë që ka sy me pa e vesh me dëgjue. Haxhi (Berisha) ndoshta nuk është aq shumë i përshtatshëm, por edhe për të mos diskuto shumë me ta, sepse po duket se ata po sillen sikur në rreth, herë te njëri e herë te tjetri. Kur ta marrësh organin, thërrite Hasan (Veselajn) në telefon dhe e njofto nëse do me ardhë me i marrë. Tregoj se është vendosur që të shitet në të ardhmen. Nëse ka mundësi le t'i paguaj të hollat që të shitet ky numër, por edhe me këtë numër pagimin s'do ta bëjmë të domosdoshëm. Ia përkujto se me ty janë konsultuar edhe kur u bë shitja e tij në Bon. Ia jep vetëm 15 copë sepse nuk kemi më shumë, sepse vërtetë nuk kemi më tepër. Unë kah fundi i mbrëmjes e pyeta: "Si je dhe si e ke familjen?" Dhe e pash se i luajti gjaku në fytyrë çka d.m.th. se ai në brendësinë e tij gjendet në mes dy zjarresh. E pikërisht për këtë duhet të jemi më të durueshëm me ta. Ti nuk ju thua se për këto çështje mund të më drejtoheni vetëm mua, sepse ata unë pres, se edhe në të ardhmen do të takohen me Haxhi (Berishën) sidomos Qazimi. Punën e Jahirit ta shpjegoja detalisht. Këtë ua shpjegon edhe Mehdiut (Rexhës) dhe Ismetit (Klaiqit) e gjithashtu në emrin tim i kërko të falur dhe bisedo pak me Bacën Selim (Kocin)se isha i detyruar të sillesha në atë mënyrë. E sa i përket asaj që tha ai: "Mos të më thirrni më se kurrë nuk vij!", për këtë thuaju shokëve të ngushtë se ne kurrkund nuk kemi dalë për hatër të dikujt por pse e kemi ndier borxh. Prandaj ajo s'është ndonjë problem i madh. Nëse thotë: "Mua më ka besuar Jusuf Gërvalla!", i thuj se atëherë nuk i ke thënë J. Gërvallës pse ia more "Zërin" Riza Salihut etj. siç po thua tash dhe mos e zgjatni shumë me të.

Edhe punën e Nuhi (Sylejmanit) mos e përmendni me askënd dhe mos e bëni hesap që ekziston., kështu është më mirë. Edhe Uka (Xhafer Shatri) e ka pa se prej tyre s'ka asgjë, përkundër përpjekjeve të mëdha të tij. Këta kanë tentua me bërë plane edhe me IK (Ibrahim Kelmendin). Në këtë drejtim sot mora vesh se Uka ka bërë një propozim, të cilin do ta pranojmë për shkak të situatës. Programojeni punën sa më tepër që më 10 dhjetor të jeni sa më shumë të lirë, se i keni dy javë afat, që të organizoheni sa më mirë. Kur të takohesh me Hasanin dhe Sahitin, punën e Nexhatit (Osman Osmanit) mos e zërë fare në gojë, as për mirë as për keq. Nëse duan me folë le të flasin vetë ata. "Zëra" në Adapazar mos dërgo asnjë, e në Stamboll më shumë. I thuaj edhe Hafiz (Gagicës).

Të fala, S. (Skënderi=Xhafer Durmishi)

P.S. Hafizi le të marrë informata prej Neuburgu për atë Komunikatën, se a u ka ardhë me postë, a nën derë, le të tregojnë nëse me postë, prej cilit vend. Atyre mos t'u thuhet se është me rëndësi, se përndryshe është me rëndësi.

Remziu (Ademaj) le të ta jap referatin që e lexoi dhe dërgoma menjëherë.

(Faridin Tafallari, T-Dhimbje-Qëndresë, Tiranë 1997, f. 436-438)

21. Letër Engjëll Kolanecit, nëntor 1982

Shoku Engjëll (Kolaneci-diplomat në Ambasadën e Shqipërisë në Vjenë)

Në prag të festës Faridini më njoftoi për bisedën telefonike që paska pasur me ju. Me këtë rast më tregoi se tek ju paskan ardhur letrat e Suzanës. Siç ju pata thënë edhe më parë, neve na u deshtë që gurët t'i rregullojmë me çdo kusht para festës, dhe siç mund t'ju ketë treguar shoku Faridin, ata (gurët) u vendosën e me sa duket janë të punuar mirë. Edhe njerëzit kanë dhënë vlerësime të mira, por ndonjë fotografi ende nuk ma kanë sjellë shokët. Ne huazuam një shumë të hollash për këtë rast dhe paguam një pjesë për të cilën të kam pas treguar. Firma e gurëve, në të vërtetë më kompetentja, se këto rregulla këtu unë nuk i di, por si më kanë treguar e ka bërë punën në atë mënyrë që, kur të kthehet letra (autorizimi) i Suzanës do të na kthehen të hollat. Siç e dini, në atë letër Suzana autorizon një njeri që të përgjigjet në çdo rast për sigurimin e gurit të të shoqit, për arsye se ajo nuk ka banim të përhershëm në mërgim.

Përndryshe ne jemi mirë, edhe punët janë duke shkuar mirë.

Te fala S. (Xhafer Durmishi)

(Faridin Tafallari, Dhimbje krenare, Tiranë1998, f. 255)

22. Letër Faridin Tafallarit, 30 nëntor 1982

Shoku F. (Faridin) 30 nëntor 1982

Mbrëmë fola në telefon me U. (Ukën=Xhafer Shatrin). Ai më porositi që të angazhohemi maksimalisht që dasma e Gjenezës të ketë sukses sa më të madh, sepse kjo ka rëndësi të madhe. Pra, që tani shikoni e angazhohuni sa më shumë që për 10 dhjetor të jeni sa më shumë të lirë. Për këtë, punë me rëndësi do të kenë sidomos ata në Sindelfingen.

Në Austri gjithashtu dërgo bukur shumë thirrje të tilla dhe është mirë që edhe prej tyre të angazhohen sa më tepër për këtë rast. Thirrjet nuk do t'ju mjaftojnë, prandaj edhe shumëzoni disa dhe kur t'i dërgoni, porositni edhe ata që t'i shumëzojnë.

Negativat e numrit të fundit merrini, ndërsa të gjitha fotografitë e numrit të fundit ia dërgoni U. (Xhafer Shatrit). Gjithashtu merreni prej atij gjermanit në konvikt edhe fotografinë e Hydajetit dhe atë karikaturën që është botuar në numrin e kaluar e

gjithashtu dërgojani U., sepse kështu jam marrë vesh me të. U. në telefon i thash se nuk e di a do të mund të vijë pasi letrën time e kam dorëzuar. Sepse siç e din edhe ti, letra ime nuk vlen më për asgjë. Prandaj nuk e di se si me ia bërë, dhe po që se nuk gjej letër të përshtatshme për udhëtim, do të mbetem kësaj radhe pa ardhë.

Sa i përket Engjëll (Kolanecit) më njofto posa të marrësh letrat e Dritës (Suzana Gërvallës). Nëse ka diçka me rëndësi ai do të shkruajë, apo do t'ia thotë shokut tonë më përgjegjës, i cili është i caktuar për marrëdhënie me ta, sepse unë nuk mund ta thërrasë, sepse e tillë është marrëveshja me shokët.

Këto letra që po t'i dërgoj, gjithashtu lëshoji menjëherë në postë.

Të fala S. (Skënderi=Xhafer Durmishi)

P.S. Namiu (Ramadani) le t'i dërgoj 150 copa në Bruksel sa më parë që ta ketë rastin ose dërgoi me postë në adresën e vjetër.

(Faridin Tafallari, T-Dhimbje-Qëndresë, Tiranë 1997, f. 438-439)

23. Letër Xhafer Shatrit dhe Sabri Novosellës, 3 dhjetor 1982

Letër dërguar Sabri Novosellës e Xhafer Shatrit, 3 dhjetor 1982

Edhe këtë vit, në ditën e shtunë të panairit të librit ishim në Frankfurt.

Gjatë ditës brenda në Panair pothuaj kohën më të madhe më shoqëroi Skënder Dushi dhe bisedën më së shumti e solli tek Ibrahim Kelmendi me qëllim që të mbjellë dhe forcoj sa më shumë dyshimet në te.

Në mbrëmjen e asaj dite me Engjëll Kolanecin u takuam unë dhe Faridini. Ai ishte vetëm (dhe kështu ka qenë në të gjitha rastet). Që ta kemi këtë takim kësaj radhe kisha interes edhe unë, pasi desha ta shfrytëzoj rastin e kësaj dite dhe i thash se takimet tona në vazhdim janë të panevojshme.

Faridini i foli edhe për atë çka se prita, se çka i kanë thënë Jahir Jahirit gjatë vizitës së tij në Shqipëri. Engjëlli u përgjigj se atje iu kanë thënë gjëra që bënë me ju thënë, pra edhe ato që ua themi edhe ju, që të ruheni se keni në radhët e tuaja shumë njerëz të dyshimtë, dhe se serbët e dinë se kënd e lëshojnë nga burgu.

Jahir Jahiri është një punëtor, rreth 40 vjeçar, nga fshati Slivovë i komunës së Ferizajt. Ka të afërm në Shqipëri dhe kësaj vere përmes shokëve në Ambasadën e Vjenës, është i vetmi punëtor kosovar me sa di unë që e ka vizituar atdheun. Ka qëndruar një muaj ditë. Ka qenë një prej më aktivëve dhe iu është përgjigjur të gjitha manifestimeve, dhe nuk është dalluar në ndonjë mënyrë prej rrethit të vetë. Për ZK thoshte se po del edhe më i mirë se përpara. Pasi u kthye nga vizita në Shqipëri ka ndryshua për 180 shkallë. Ky ka qenë anëtar direkt i rrethit të Faridinit. Pas kthimit nga vizita u largua nga Faridini e rrethi i tij dhe iu afrua Halimit. Jahiri është iniciatori, ai që ka kërkuar me këmbëngulje takimin e aktivistëve kryesor të rrethit të Shtutgartit më 26 shtator 1982. Por si duket u befusua nga se si iu përgjigjën të gjithë këtij takimi dhe mungoi.

Me Jahirin u takova edhe në mbrëmjen e kremtimit të 28 nëntorit, pasi festa ishte organizuar në një sallë në fshatin ku ai banonte. Një punëtor më tha- a shkoj ta marrë, dhe unë i thash se do të ishte mirë nëse vjen. Ai erdhi. Kah mes i programit, ky shoku që e solli më tha se Jahiri po ka dëshirë me e marrë fjalën. I thash mirë por dua ta dijë se çka do të thotë. Jahiri, pasi kishte pi pak, më thotë se kjo është punë për mua. Unë nuk e lejova se nuk besoja se nuk do ta lëshoj ndonjë fjalë, duke e lutur që të mos na e prishë këtë mbrëmje. Ai u hidhërua si mora më vesh edhe më tepër duke thënë se JJ e njuhë krejt Shqipëria etj. etj. (Unë e pyeta Faridinin se si me ia bërë dhe ai tha që të mos ia jap fjalën).

Të fala (Xhafer Durmishi)

24. Letër Xhafer Shatrit, 5 dhjetor 1982

Shoku Llesh,

E mora letrën tënde për të cilën më fole në telefon dhe e kuptova në përgjithësi. Sa u përket gjërave në letrën time dhe përgjigjes, ne po kuptohemi, unë më nuk po e vazhdoj, ne do të ecim përpara e një ditë dikush që do të ketë kohë më shumë do ta analizoj punën tonë më ngadalë. Unë po përgjigjem vetëm pak në te:

Së pari po të them se këtë letër që ta kam dërguar, të mos e kuptosh se është shkruar nën ndikimin e ligjit të inercionit kur pas gjithë atyre diskutimeve të mëparshme në drejtimin tjetër nuk munda të ndalem menjëherë. Së dyti këtë letër nuk e kam shkruar as nën ndikimin më të vogël nga fjalët e Engjëllit, sepse vetë përmbajtja e të letrës dhe e të gjitha qëndrimeve të mia flasin për një besim të patundur i cili nuk do të lëkundet në asnjë moment prej anës tonë. Nuk është vështirë të kuptohet se përmbajtja e letrës së fundit ka të vetmin qëllim një besim e respekt pak më të madh prej anës tënde ndaj meje, të cilin besoj se kam të drejtë ta kërkoj së paku në masën e 50%-shit të qëndrimit tim.

Përndryshe në të ardhmen është mirë të flasim për disa gjëra më konkretisht, si p.sh. siç është rasti që thua: i Haf. për konton, shpërndarja e një materiali 9 faqesh nga ata të Brukselit, për përmbajtjen e letrave kritikuese në adresë të tyre (dhe nëse me të vërtetë ata kanë pasur kontakte me tjetër kenin, a qenka krim të kthehen në rrugë të drejtë, apo u bënë për çdo kritikë vetëm pas atij udhëtimit tim në Bruksel, në ndërkohë kur në Bern (më 26 qershor) u prezantuan me pompozitet nga IK. Pastaj po deshte edhe për ndonjë rast që pse ti, haku ynë të biesh në pozitë aq të keqe sa t'i lejosh njerëzit të të quajnë naiv. Kjo nuk është në interesin tonë që njerëzit t'i bëjmë të mendojnë ashtu. Kjo nuk ka ndodhë prej anës tonë. Unë e di se në mese të ndryshme jam quajtur gjithqysh, por në pyetjet e mundshme i kam sqaruar shokët këtu ashtu siç kam ditur më mirë, dhe sqarimet e mia kanë pasur efekt.

Më vjen mirë që kaluat me sukses me këto problemet shëndetësore dhe ju urojmë rregullimin në vendosje të re. Sa u përket rregullimit të lidhjeve tona në një nivel më të mirë ma merr mendja se aktualisht të dy palët jemi të kënaqura që për këtë punë ta përdorim Faridinin. Kështu që po e pe të arsyeshme të ndërrosh edhe vendin e adresës ku do të vijnë letrat prej anës time ku do të vijnë letrat prej anës sime e atë vend don ta kesh afër që ato të vijnë brenda ditës, atëherë unë të gjitha letrat mund t'i dërgoj të Faridini, ku prej meje e deri tek ai do të vonohen vetëm një ditë e ai t'i nisë menjëherë.

Sa i përket propozimit tënd, unë përgjigjen e tij e shënova në këtë letrën më të gjatë, si dhe për qëndrimin e Engjëllit, se çka i kam thënë unë pas atyre fjalëve të kam treguar më parë. Për qëllimin, nuk di çka të them, di aq sa din ti për këtë, në bazë të këtyre të dhënave që i kam shprehur tash dhe më parë. Unë e mora edhe letrën prej Kamberit (SN) në lidhje me propozimin tënd të cilin ai e aprovon dhe më thotë arsyetimin e vet.

Për dasmë (demonstratë) unë sipas të gjitha gjasave nuk do të mund të vij, sepse një pasaportë me të cilën kam bërë disa udhëtime më parë tani nuk vlen. Unë do të mundohem të gjej një tjetër por do të jetë e vështirë.

Faridinit ia dërgova një letër që ta dërgoj adresën e Seven Bebes sepse unë nuk e kam me vete. Siç të kam pas thënë pas atij rastit, Kamberi më pat thënë mos me i shkruar, e mua adresa që ma dërgoi më humbi. Në kohën kur ma dërgove ti adresën, ai

më udhëzoi t'i shkruaj në adresën e mëparshme, kështu që nuk më ra me e përdorë atë që ma dërgoi asnjëherë, andaj edhe nuk e përshkrova nga ajo letër që ma dërgove.

Të fala S. (Xhafer Durmishi) 5 dhjetor 1982

25. Letër Faridin Tafallarit, 8 dhjetor 1982

Shoku Faridin, 8 dhjetor 1982

Unë në dasmë (demonstratën e 10 dhjetorit 1982 në Gjenevë-shën i Xh. D.) nuk do të mund të vij. Kjo po ndodhë për shkak të mungesës së letrës së udhëtimit në radhë të parë. Dhe në anën tjetër këtij shokut do t'i kushtoj shumë materialisht e sa i përket këtij, ky e ka dhënë provimin e vetë, mjaft edhe me rastin tim. Edhe po të vija unë, nuk do të mund të ndalesha atje e të bisedonim së bashku edhe për ndonjë ditë, për të njëjtat shkaqe për të cilat nuk munda të ndalem as herën e fundit kur isha në Shtutgart për festë (të 28 Nëntorit-shën i Xh D), edhe pse do të ishte mirë të ndalesha më shumë.

Ti veç je i njoftuar prej letrës së fundit të U. (Ukës=Xhafer Shatrit-shën i Xh. D.) për një propozim të cilin e ka bërë, të cilin e ka pranuar Mër. (Mërgimi=Sabri Novosella-shën i Xh. D.). Unë në atë letër jam përgjigjur me mendimet e mia të cilat nuk kam mundur ty me të treguar ende. Do t'i dërgoj në këtë letër. Të njëjtën ia kam dërguar Ukës dhe Mërgimit të cilët deri të premtën sigurisht do t'i kenë në dorë. Ukës bëri të fala prej anës time. Nga ai merre që atë ditë fjalimin të cilin do ta lexoj dikush që ta përgatiti menjëherë (për botim në revistë-shën im) si dhe i thuaj nëse donë me t'i dhënë të gjitha materialet që janë të gatshme për numrin e ardhshëm. Unë ia kam dërguar një letër Ukës në të cilën i kam thënë edhe atë që ndoshta për të gjitha lidhjet në mes meje e atij do të bëhen përmes teje, kështu që ndoshta letrat në të ardhmen për te, do t'i dërgoj ty e ti ia përcjell. Unë me siguri të hënën do të paraqitem se e kam edhe terminin por këtë s'ke nevojë me ia thënë askujt, as në dasmë. Bisedoni për vendin e takimit dhe të takohemi sa më shpejt sido që të bëhet.

Dërgojani sa më shpejt i thua Mejdi Rexhës, organin (revistën) Peter Ptzmannit. Ia dërgon edhe të numrit të kaluar, nga dy copa për çdo numër.

Të fala S. (Xhafer Durmishi)

PS. Më shkruaj posa të kthehesh se si kaluat. Disa pyetje i kam bërë Hafizit e nuk mora përgjigje prej tij.

26. Letër Faridin Tafallarit, 10 dhjetor 1982

Shoku Faridin, 10 dhjetor 1982

E mora letrën tënde dhe të Hafizit. Këtë letër ia dërgo Hafizit menjëherë, e gjithashtu ti u flet për situatën e krijuar. Po e shoh të arsyeshme që Hafizit t'i shkruaj më shpesh, prandaj i thash që të ma dërgoj një adresë ku do t'ia shkruaj letrat më shpesh, pasi ai me tërë shpirtin angazhohet dhe depërton nëpër njerëz. Prandaj duhet konsultuar sa më shpesh. Edhe kontaktet me Nai. do t'i zhvilloj nëpërmjet tij. Numrin e telefonit të Hyzriut nuk ma kishe shkruar. Unë atij para do ditësh, në të vërtetë pas panairit ia kam pas dërguar një letër lidhur me ata në Bruksel por nuk ma ka kthye. Përndryshe kontaktet me ta do t'i bëjmë vetëm me dijeninë e Ukës, që të mos ketë ndonjë keqkuptim, derisa ta kuptojmë se jemi një.

Përndryshe siç i thash edhe Hafizit, tani mendoj se është krijuar një klimë e mirë dhe mendoj se është me baza mendimi që e kam dhënë edhe në letrën e gjatë. I thuaj Haxhiut dhe Hafizit, se ato 160 marka që na kanë mbetë në "Seel" të Heilbronit, le t'i marrin 10 shirita të makinës për shkrim, të cilën e kam, se më harxhohen shpesh se po e

rëndoj shumë e këtu po kushtojnë nga 10 marka, si dhe gjithë të tjerat merrni shirita të hollë tipex për këtë makinë. Hafizi e din se çfarë duhet. Këtë punë le ta bëjë menjëherë. Për këtë dhe për t'i marrë të gjitha gjërat që më nevojiten besoj se do të vij me këtë shokun.

Origjinalin e kësaj letre shtesë ia dërgon Ismailit e kopjen ndale vetë. Letrën dërgoje në këtë adresë: Ismail Abdiu, Postf. 101, 4003 Basel CH.

Këtë letër tjetër ia dërgon Qazim Malajt në Troisdorf. Gjithashtu merrni masat që ky numër të shpërndahet sa më tepër dhe të bëhet pagesa e tij dhe kam shpresë se shitja e tij do të na e zbutë mirë këtë krizën tonë.

Letrën tënde e kam marrë por siç po e sheh ky rasti do të na vonoj pak në këtë drejtim.

Për këtë po ia nisë një letër edhe Mejdiut, që ata të shikojnë në drejtimin e tyre me Remziun. E gjithashtu në këtë drejtim duhet të angazhohet Murat Kryeziu. Hafizi le t'i pyes ata të Neuburgut se sa ekzemplarë iu duhen.

Të fala, Skënderi (Xhafer Durmishi)

(Faridin Tafallari, T-Dhimbje-Qëndresë, Tiranë 1997, f. 439)

27. Letër Faridin Tafallarit, 11 dhjetor 1982

Shoku Faridin, 11 dhjetor 1982

Porosinë që ta bëra në lidhje me blerjen e 10 kasetave (shiritave) për makinë u thuaj Hafizit e Haxhiut që mos t'i porosisin (marrin) 10 kasete por 6 kasete, dhe po aq tipeksa, kurse me të hollat që do të mbesin, le t'i porosisin dy palë germa në gjuhën shqipe d.m.th. këto porositen e pas një kohe vijnë në atë mënyrë që në vend të germës ü e vendosin germën ë e në vend të germës ö germën ç por kjo presja përfundi germës c duhet të jetë sipas rregullave. Për të dy këta shembujt për me iu treguar më mirë atyre në librarinë "Seel" në Heilbronn mund ta marrin Zërin e fundit dhe ua krahasojnë. Pra:

ü-----ë
Ü-----Ë

ö-----ç
Ö-----Ç

Të fala S. (Xhafer Durmishi)

Marka e kësaj makine është Brother, Electronic 8300

(Kjo ka qenë makinë e rëndomtë shkrimi dhe nuk duhet ngatërruar me makinën radhitëse të Jusuf Gërvallës IBM Electronic Selectric Composer me të cilën kam punuar gjithashtu në këtë kohë, por atë e kam përdorur vetëm për radhitjen e artikujve të revistës Zëri i Kosovës, dhe jo për shkrimin e letrave me të cilat mbaja kontakt me shokët, sidomos me ata në Shtutgart- shën i Xhafer Durmishit)

28. Letër Faridin Tafallarit, 14 dhjetor 1982

Shoku F. (Faridin) 14 dhjetor 1982

Këtë letër sa më parë drejtoje te Qazim Malaj. Gjithashtu merrni masat që ky numër sa më tepër të shpërndahet dhe të bëhet pagesa e tij dhe kam shpresën se shitja e tij do na zbutë mirë këtë krizën tonë.

Letrën tënde e kam marrë, por siç po e sheh ky rasti do të na vonoj pak në atë drejtim. Pra detyra jonë e parë është që sa më shpejt të marrim masa dhe ky numër i "ZK" të shpërndahet në mënyrë sa më të organizuar.

Për këtë do t'ia nis një letër edhe Mehdiut që ata të shikojnë në drejtimin e tyre me Remzi (Ademin). E gjithashtu në këtë drejtim duhet të angazhohet edhe Murat (Kryeziu). Gjithashtu edhe Hafizi le të shikoj me ata të Nojburgut se sa iu duhen.

(Xhafer Durmishi)

(Faridin Tafallari, T-Dhimbje-Qëndresë, Tiranë 1997, f. 439-440)

29. Letër Faridin Tafallarit, 16 dhjetor 1982

Shoku F. (Faridin)

16 dhjetor 1982

Për dramën do të jetë pak e vështirë, se nuk e di si po ia bëjmë më 17 janar. Ti je i informuar për atë propozimin tim, të cilin ia kam dërguar U. (Xhafer Shatrit) dhe M. (Sabri Novosellës). Prej N. më ka ardhur një letër, e cila do të më vij nesër, ku do ta shoh edhe mendimin e tij për këtë çështje. E nëse edhe ai pajtohet me atë mendim, atëherë tërë forcën do të duhet ta përqendrojmë në përgatitjen e Kongresit që të dalë sa më i fortë, e kjo në këtë situatë është me rëndësi shumë të madhe. Nga ana tjetër, prej tij nuk kam marrë letër prej asaj në tri faqe, ndërsa unë ia kam dërguar tri letra. Momentalisht jam duke pritur një letër prej tij për shumë çështje, e njëherësh edhe ky takim i ne të pestëve duhet të jetë në nivel. Lidhur me dramën, Hafizi e Nax. (Remzi Ademi) të kanë folë për veti, sigurisht tue pas besimin tek unë. Si të thash në telefon letrën me 20 marka e mora. Do të shkruaj ndoshta nesër më gjatë dhe ndonjë letër tjetër, për atë që të kam paralajmëruar. Ti më trego se a u takove me Hasan (Veselajn) e Sahit (Tofajn) për ato që më paske shkruar dhe si u ndave me ta.

Të fala, S.(Skënderi=Xhafer Durmishi)

(Faridin Tafallari, T-Dhimbje-Qëndresë, Tiranë 1997, f.440)

30. Letër Faridin Tafallarit, 20 dhjetor 1982

Shoku F. (Faridin)

20 dhjetor 1982

Këto letra ia përcjell Mehdi (Rexhës) dhe Shaban (Bobajt). Mehdiut bënë pak edhe me i tregua se është në diskutim përgatitja e një Kongresi të Lëvizjes, por ende nuk është vendosur. Këtë, pra, ia thua vetëm atij, se po që se mbahet, nga rrethi ynë do të marrin pjesë disa veta ku do të jetë edhe Mehdiu. Angazhohu që këto porosi që ua dhashë, t'i kryeni pa u vonuar. Më njofto gjithashtu për çdo gjë të re. Natyrisht si edhe letrat të tjera lexoji edhe këto. Se për disa gjëra që ia thash Mehdiut, bëjnë edhe për ty. E për disa gjëra që do t'i bëni, sidomos tani e tutje aprovojnë ata, duke i pyetur më parë se kështu edhe do të zhvillohet te ata iniciative dhe do ta ndiejnë veten më mirë. Numri i telefonit të Amerikës që ia ke dërguar Muharrem (Gjocajt), nuk është i Sejdisë (Bytyqit) por i Nezir Sumajt, farefis i familjes Gërvalla. Mos u vono hiç, por gjeje kohën një ditë dhe duku te avokati me Hafizin dhe pyetni për pensionin e Tushës dhe ato të holla ia dërgoni Tushës nëpërmjet kushëririt të saj Miftarit, si dhe ia dërgoni ndonjë fotografi të gurëve. I thuj gjithashtu Namiut (Ramadanit) që disa fotografi i ka bërë shoku ynë ku po rri (Ismail Hoxha) për disa njerëz të cilëve ua ka marrë adresën atë ditë dhe u ka thënë se do t'ua dërgoj fotografitë. E unë i thash atë ditë që ato fotografi t'i bëjë me aparat të Namiut. Pra Namiu le t'i dërgoj këtu disa fotografi me disa njerëz që nuk i njeh e t'i shoh se edhe unë i njoh ata njerëz. Nëse E. të lajmërohet se m'u kthyen apo diçka tjetër, ktheja me të mirë se s'ke si bënë etj. Ai pasi e ka këtë punë në dorë, le të bëjë si t'ia merr mendja. Incizimi që e kemi bërë atë ditë me kamera ka dalë shumë i mirë.

Të fala, S.(Skënderi=Xhafer Durmishi)
(Faridin Tafallari, T-Dhimbje-Qëndresë, Tiranë 1997, f. 440-441)

31. Letër Faridin Tafallarit, 29 dhjetor 1982

Shoku Faridin, 29 dhjetor 1982

E mora letrën tënde me 50 marka. Ju falemnderit. Një letër ta shkrova edhe dje e besoj se do ta kesh marrë. Librat e shokut E. "Titistët" nuk më erdhën. Nuk e di se çka është bërë. Sot po t'i lëshoj në postë edhe dy videokaseta me dramën "Besëlidhja shqiptare", i cili është filmi më i mirë që e kam parë deri më sot. Organizohuni disi e merrni me qira ndonjë video për vitin e ri dhe shikojeni. Videoja duhet të jetë e tipit VHS. Në kasetë keni program prej gati 4 orësh. Bëje një fotografi të mirë të varrezave për numrin e ardhshëm, e gjithashtu shkoni në Untergruppenbach e fotografojeni shtëpinë prej pozitave të ndryshme e ta botojmë atë që del më së miri. Por kur ta fotografoni, mos rrini shumë aty e as mos e zgjidhni kushedi se sa pozën, por veproni shpejt që të mos vërehet ajo punë. Këtë letër me këtë porosi ia përcjellë Remziut. Edhe ti priti urimet më të përzemërta me rastin e vitit të ri.

Të fala, Skënderi (Xhafer Durmishi)
(Faridin Tafallari, T-Dhimbje-Qëndresë, Tiranë 1997, f. 441)

32. Letër Faridin Tafallarit, 30 dhjetor 1982

Shoku F. (Faridin) 30 dhjetor 1982

Letrën tënde me porosinë time e mora.

Ma dërgo edhe atë poezinë. Njëkohësisht dërgoni këtu edhe këta filmat shqiptarë së bashku me kasetën tjetër që e ke marrë në Zvicër, se edhe këndeje do t'ia shtjellim diqysh punën.

Këto letra lëshoi në postë. Adresat e Ahmetit (Sadikut), Besimit (Rexhës), e të Hajdarit (Sadriut), (Frau Rubin), mundësisht i shkruan me makinë. I telefonova menjëherë E. e ai më tha se atje janë, por ende këndeje nuk ka lëshue kush. Veç do ta thërras nesër e do të njoftoj. Letrat mundësisht është shumë mirë që të mos i lëshosh prej qytetit tënd, po dil më larg pak.

Letrat e Ahmetit dhe të Besimit fotokopjoji, sepse unë i kam shkruar pa kopje. Ata të Austrisë porositi që të gjithë çekat që të dërgojnë të holla le t'i japin ty. Hamburgut propozimin për festë çoja në ndonjë adresë për Isak Gutajn, nëse ta ka sjellë Hafizi. Me të vërtetë tani jemi në njëfarë krize materiale. Puna ime tani nuk është aq me rëndësi: me rëndësi është ajo se ne tani kemi edhe 1300 marka borxh për këtë numrin e "Z" e janë mbi emrin e Hafizit (Gagicës). E ai në këto momente nuk e ka punën mirë. Shokut larg ia dërgova një letër të gjatë lidhur me këto e gjithashtu me përmbajtjen e bisedimeve që i patëm te Uka (Xhafer Shatri) në H.

Te një gjerman në Shtutgart më vinë letra prej disa drejtimeve, Italie dhe Australie më së shumti. E ka këtë numër telefoni: 0711609021. E ka emrin Javorek. I prezantohesh si shok i Gagicës, dhe gjeja disi metodën me i marrë, dhe më thuaj a ke ndonjë ide se si me ia bërë disi që të gjitha letrat të më vijnë në një vend e prej atij vendi që të gjitha të m'i nisësh. Do të ishte shumë mirë me u gjetë ndonjë gjerman apo ndonjë plakë në qytetin tënd.

Unë do t'i përgatisë edhe adresat e nevojshme që do t'ia japësh Mehdiut i cili së bashku me Ismetin (Klajiqin) do ta përcjellin organin nëpër vende të ndryshme. Shaqës (Shaqir Shabanit) do t'i them që vazhdimisht për çdo rast të drejtohet tek ti. Edhe ky

kontakt që do të vendoset me këta dy vëllezërit në Bern, besoj se do të jetë i mirë. Me Mehdiun takohu e ai le të komunikoj edhe me Remziun (Ademin).

Të lajmërohem prapë.

Të fala, S.(Skënderi=Xhafer Durmishi)

(Faridin Tafallari, T-Dhimbje-Qëndresë, Tiranë 1997, f. 441-442)

33. Letër e Xhafer Durmishit për Faridin Tafallarit, dhjetor 1982

Shoku F. (fondi i dhjetorit 1982)

Pas bisedës po ta shkruaj këtë letër.

Si do që të bëhet kësaj radhe I.K. (Ibrahim Kelmendi) le të vjen kësaj radhe te ti. Vet fakti se ai dëshiron të vij tregon se pa marrë parasysh qëllimin, kjo ka rëndësi. Ti prite si gjithmonë. Pyete për përmbajtjen, por sigurisht ai do të jep edhe në shqipe. Për këtë takim e paramenduar nga Uka mos fol ti i pari. Ai sigurisht do të flet. Atij do t'i intereson se çfarë disponimi ekziston në Shtutgart për te. Po që se bien biseda te unë i thuaj se në rrethinë të Shtutgartit është, apo mos i jep kurrfarë shpjegimi, por mund t'i thuash se po kontaktoj me te, se përndryshe do të ishte një rrenë në erë. Për të tjerat bë si ta merr mendja. Traktin shpërndane kohë pas kohe, shumë lenua njerëzve nëpër xhama të kerreve. Bisedo me te edhe për sallë. Edhe për Brukselin mos u zgjat. Pyete edhe ti për atë kushërinin magistrin etj. Pyete se ka pa dynja me sy (si për shaka) se si kalove nëpër Amerikë etj.

Të fala S. (Xhafer Durmishi)

PS. Të bëhej takimi kësaj jave mendojsha të vij e të dukem pak. Tash nuk e di. Për vit të ri sigurisht do të rri në banesë. Shoku do të shkon në Francë se e kanë thirrë. Unë më 22 dhjetor isha në Sozialamt. Për 9 ditë më takuan 90 marka. Por si edhe më parë, edhe në këto ditë dy herë kam qëndruar në banesë se më shumë kam nejt tek shoku. Mesatarisht në ditë po më shkojnë 5-7 marka letra e telefon. Përveç teje, tjerat krejt ky shoku i ka paguar. Siç të thash në tel. është mirë ta kemi një bazë tjetër këndeje ku do të lenim letra e sende të ndryshme për të cilat nuk do të dinte kush hiq. Përndryshe një ardhje e ime atje do të ishte me rëndësi edhe për t'i marrë shumë sende teknike e edhe shumë libra që po më nevojiten, sepse kam kohë të merrem me to, dhe ajo është e domosdoshme.

34. Letër Faridin Tafallarit, 2 janar 1983

Shoku F. (Faridin) 2 janar 1983

Të gjitha fotografitë që janë botuar në organin e fundit, i merr prej Hafizit apo i keni lënë dhe ia dërgon U. (Xhafer Shatrit). Atij ia dërgon gjithashtu të gjitha fotografitë që janë botuar në Zërin e muajit shtator, përveç asaj të dasmës (demonstratës) në Bern, e cila është e jotja. Një fotografi e vogël e Hydajetit është te Remzi (Ademi). Është në një kapak të tavolinës që është atje. Çelësin e ka ai, prandaj le të ma dërgoj menjëherë se ajo foto do të botohet në këtë numër, si e vogël. Për leje ndoshta nuk do të ketë aq problem. Ju popullarizojeni sa më shumë. Shkruaji letër Halitit në Hamburg, pastaj Çazës në Bon (Troisdorf). Çka bëri ai me kasetën? Sa i keni borxh atij për organin. Për këto do t'i shkruaj Qazimit e të na ndihmojë pak me rrethin e tij. Por nga ana tjetër ky numër besoj se do ta paguaj veten dhe të parin. Porositi 3 mijë ekzemplarë. Posa ta marrësh këtë letër, porosite Hafizin që ta rezervoni rendin. Unë të hënën, sipas të gjitha gjasave do ta lëshoj në postë. Organi do të shitet në sallë, e do t'u jepet me sasi të madhe klubeve, të cilat pastaj do t'i dërgojnë të hollat.

Të fala, S.(Skënderi=Xhafer Durmishi)
(Faridin Tafallari, T-Dhimbje-Qëndresë, Tiranë 1997, f. 442)

35. Letër Faridin Tafallarit, shkurt 1983

Shoku F. (Faridin) 1 shkurt 1983 (datë e përafërt)

Tash si shpesh do t'i drejtohem edhe Mehdiut e ta shohim si do të përgjigjet e si do të shkoj puna. Në Hamburg gjithsesi na duhet me dalë, se njëherit një dalje e tillë në prag të tubimit tonë do të më ndihmonte shumë, e pastaj kah të kthehem unë do të ndalem në Bilefeld, Dyseldorf dhe Bon.

Ti studioi ato të dhëna që m'i dha Mehdiu në lidhje me ndihmat e vitit të kaluar e unë do t'i dërgoj edhe të tjerat që do të më dërgojë. Ti gjithashtu përgatiti shënimet e deritanishme lidhur me shpenzimet, e unë gjithashtu në bazë të asaj çka kemi parë do të përgatisë edhe shënimet mbi shpenzimet në Untergruppenbach, kështu që ti do të mbash raportin mbi çështjet materiale.

Të fala, S.(Skënderi=Xhafer Durmishi)

Shikoni e merrni ato librat që janë te gjermanët dhe merri ca ti ose ti me Namiun. Bisedoni me Muratin (Kryeziu) dhe Hysenin (Gërvallën) dhe i çoni te ata. Kur të vini këndeje për Hamburg, unë ndoshta do t'ju pres në Trier. Ju e merrni një tubë libra e broshura të ndryshme, por sidomos këto:

- Konferenca e Pezës-broshurë e shokut Enver,
- Më mirë pak por saktë - Lenin
- Ç'të bëjmë-Lenin
- Kapitali-Marks
- Veprat e Leninit, Marksit e Engelsit

Si dhe shumë broshura tjera.

- Shteti dhe Revolucioni-Lenin.

(Faridin Tafallari, T-Dhimbje-Qëndresë, Tiranë 1997, f. 443)

36. Shkrim i Xhafer Durmishit si material për mbledhjen e parë të Qendrës Ekzekutive në mesin e marsit 1983 në Gjenevë

PROBLEME TË NDRYSHME RRETH ÇËSHTJEVE ORGANIZATIVE TË LRSHTJ NË EVROPËN PERËNDIMORE

Si një prej detyrave të para tek bashkimi sa më masiv i të gjithë shqiptarëve kudo që të gjenden është organizimi i tyre nëpër të ashtuquajturat "Klube të punëtorëve shqiptarë nga Jugosllavia". Sa më shpejt të gjitha klubet të vihen nën mbikëqyrjen dhe drejtimin e Lëvizjes. Lëvizja të dijë gjer në hollësitë më të vogla gjithçka që ka të bëjë me to dhe mirëvajtjen e tyre. Tani për tani të studiohen në detale dhe me klube të këtij lloji të intensifikohet puna sidomos në RFGJ, në Zvicër dhe të bëhen hapa të nevojshëm aq sa lejojnë mundësitë në këtë drejtim, pa u vonuar edhe në Austri. Në Belgjikë të veprohet gjithashtu për masivizimin e rretheve në përshtatje me kushtet e vendit dhe çka është bërë gjer më tani në këtë drejtim. Të shikohet puna nëpër shtetet tjera perëndimore dhe të studiohen mirë mundësitë në këtë drejtim. ... Të shikohet konkretisht se çka është bërë dhe çka na duhet të ndërmarim në të ardhmen për të shikuar situatën në Francë, Suedi, Danimarkë dhe Holandë.

Sa i përket RFGJ duhet shikuar punën sidomos që të krijohen kushtet që nën kontrollin e Lëvizjes të kthehen klube të mëdha në radhë të parë në Frankfurt, Shtutgart

dhe München; Në Hamburg dhe Berlin të qohet puna e filluar gjer në fund. Për këtë nuk ka rëndësi që për ndërrime të thella të mos zgjedhen data vjetore kur bëhet riorganizimi i tyre nën kujdesin e konsullatave dhe të deleguarve nga Krahina siç gjendemi tani në prag të rizgjedhjeve në Berlin dhe Hamburg.

Nga ana e Lëvizjes të shtohet agjitacioni dhe të popullarizohen të gjitha klubet pa dallim se në duar të kujt gjenden momentalisht, dhe të sqarohen të gjithë mërgimtarët që sa më shumë të bëhen anëtarë të këtyre klubeve. Nga këto mjedise njerëzish Lëvizja do të ketë përfitime të pallogaritshme dhe nuk do ta ketë fare vështirë që në mesin e këtyre masave të gjej ato shtyllat kryesore që në momentin e nevojshëm këto masa do t'i orientojnë drejt dhe me shpejtësi. Të qërohen sa më shpejt të gjitha klubet nga njerëzit e etiketuar (publikisht si armiq Jugosllavisë nga mjetet e informimit të Jugosllavisë) dhe nga ata që në të ardhmen e afërt ka mundësi të etiketohen.

Të rregullohet mirë relacioni Lëvizje-masë, dhe të studiohen mirë situatat dhe qarkullimi i informatave të ndryshme si dhe të shikohet mirë momenti kur Lëvizja don t'i komunikoj diçka masës, se në çfarë rruge dhe mënyre ta bëjë këtë. Të studiohet mirë popullariteti i Lëvizjes, dhe në raport me këtë të kuptohen sa më seriozisht përgjegjësitë si dhe të analizohen qëndrimet e ndryshme të individëve si deri më tani, si dhe në të ardhmen dhe të jepen shpjegime të nevojshme për sjellje të ndryshme. Me çfarë goje flet Lëvizja, të shikohet se a flet apo a ka folur deri më sot ajo gjithkund me të njëjtën gjuhë, dhe të merren masat e menjëhershme që nëse ajo nuk është arritur gjer më sot në nivel të kënaqshëm, të arrihet menjëherë. Si të realizohet kjo praktikisht?

Praktikisht kjo ma merr mendja se arrihet kur t'i rregullojmë mirë relacionet Zvicër – Gjermani si dhe njerëzit kryesor që do kryesojnë këshillat, grupet apo komitetet udhëheqëse të secilit vend dhe për çdo lëshim më të vogël në këtë drejtim të dimë se kujt t'i drejtohem. E njëjta të veprohet në të ardhmen edhe me të gjitha shtetet tjera ku do të ndihet fort dora e Lëvizjes.

Rregullimi i shumë çështjeve administrative dhe evidentimi i shumë gjërave si dhe nga përgjegjësi kryesor të dihet mirë efektiviteti i Lëvizjes.

ÇËSHTJE TË NDRYSHME RRETH PROBLEMEVE PROPAGANDISTIKE TË LRSHJ NË EVROPËN PERËNDIMORE

Sot LRSHJ identifikohet me ZK (Zërin e Kosovës), d.m.th. ky aktualisht edhe në një të ardhme të gjatë do të jetë mjete kryesore propagandistik i LRSHJ.

Detyrë në këtë drejtim del që sa më shpejt të dimë me saktësi numrin e të abonuarëve, në mënyrë që të përcaktojmë mirë numrin edhe të ekzemplarëve rezervë.

Rregullimi i rrjetit të shpërndarjes: Caktimi i atyre që do të bëjnë në radhë të parë shpërndarjen me postë të pjesës dërmuese të ekzemplarëve dhe shpërndarja e pjesës tjetër me anë të rrugëve tjera të drejtpërdrejta. Ndikim të madh po ka ajo se si po të shpërndahet në mënyrë të drejtpërdrejtë sa që njeriu që është afër e i preokupuar se si ta qes në dritë atë punë, disa probleme që po dalin me rastin e shpërndarjes vështirë e ka t'i përfytyroj. Tubimi dhe rregullimi i të gjitha adresave dhe përgjigja pedante dhe me kohë për kërkesat e reja. Rregullimi i çështjes së vendit se ku do të bëhet në të ardhmen shumëzimi i tij. Një vend shumë i mirë deri më tani na u ka gjetur në Gjermani, i cili na u ka përgjigj mirë sidomos kur ka qenë në pyetje koha e shkurtë siç e kishim situatën në Bon, Bern, më 28 Nëntor etj. Edhe çmimi ka qenë i arsyeshëm. Kjo është në pika të shkurta sa i përket planit organizativ rreth ZK.

Puna kryesore rreth ZK na paraqitet tek përmbajtja dhe karakteri i tij, me një fjalë çka do të zen vend, në të ardhmen, në faqet e ZK. Në këtë drejtim duhet të thellohen sidomos përgjegjësit. Ndarja e rubrikave është një hap që duhet të bëhet

patjetër, ndarje e tillë që në të ardhmen do të ndikoj që ZK të merr ato vijat kryesore. Duhet të bëhet ndarja e rubrikave për situatën politike brenda dhe jashtë, ekonominë brenda dhe rrjedhimet e jashtme, rubrika rreth çështjeve në shtypin shqiptar në përgjithësi dhe atë botëror. Natyrisht do të ketë vend edhe për rubrikën e lirë, si dhe të bëhet analiza e të gjitha letrave që kanë ardhur gjer më sot në redaksi dhe të nxirren konkluzione në këtë drejtim.

Mjete tjera me rëndësi propagandistike që kanë dhënë efekte të mira janë sidomos shfaqja e filmave si me kinoprojektor ashtu edhe me sistemin video. Për këtë duhet të bëhet tubimi i të dhënave të sakta se me çfarë mjetesh disponojmë aktualisht dhe çfarë duhet të bëjmë në të ardhmen. Të aplikohet një sistem unik, që do të krijonte lehtësi të madhe në shpërndarje. Të bëhen sa më shumë edhe shfaqje të ndryshme të filmave me anë të kinoprojektorëve. Sa të tillë kemi dhe sa filma për këto aparate disponojmë, rezultatet e gjertanishme në këtë drejtim.

Kush janë ata që po e përballojnë më së shumti me forcat tona programet muzikore, pjesët dramatike dhe recitalet e ndryshme, sa janë dhe sa janë të organizuar në mënyrë të mirëfilltë nga Lëvizja? Çfarë shume (vlere) materiale kap ky inventar?

Evidentimi i parullave të ndryshme nga të gjitha rrethet dhe tekstet e tyre.

Të përgatiten raporte në këtë drejtim se çfarë pune është bërë gjer më tani me të holla. Etapat kryesore: Funksonimi i kontos në Biel gjer më 17 janar 1982, çështjet materiale me rastin e 17 janarit, dhe prej 17 janarit e gjer më sot. Detyrë për të ardhmen: Tubimi i të gjitha gjërave materiale duke përfshirë edhe anëtarësinë e LRSNJ të dërgohen në Biel. Në çfarë drejtimesh janë bërë shpenzime më së shumti gjer më sot? Sa ka marrë në këtë drejtim shtypi? Nga çfarë burimesh kemi përballuar kërkesat gjer më sot? Borxhet e LRSNJ? Caktimi edhe i një arkatari apo dy vetave që do t'ia përcillnin të hollat arkatarit kryesor të LRSNJ. Çfarë duhet ndërmarrë konkrete dhe të bëjmë me çdo kusht që në këtë drejtim idetë të mos mbesin vetëm në letër, që burimet materiale të LRSNJ të shtohen, për të përballuar kërkesat që do të shtohen me progresion gjeometrik.

Detyrë: Të bëhet sa më shpejt aplikimi i çekave për të gjitha shtetet përkatëse, si dhe të studiohet mirë forma e organizimit të fushatave. Të aplikohen rregulla që njihen në formën legale të kësaj natyre. Kjo d.m.th. çdo individ i interesuar që të ndihmoj çështjen duhet të bindet se të hollat e tij kanë shkuar në Biel e nuk kanë mbetur rrugës, sepse kur kanë shkuar në Biel atëherë kanë shkuar në ZK e ata Zërit të Kosovës po i besojnë. Shumë njerëzve t'u kryhet edhe krejt puna, në mënyrë që të interesuarit t'i mbetet rruga vetëm gjer në postë. Kopjen e pjesës së çekut, ai që ndihmon ia jep udhëzuesit të vet ndërsa origjinalin e ndalë për vete. Fushatat të ndërmerren nga njerëzit më autoritativ dhe më të vjetër, të cilët ne do t'i kemi afër me këshillat dhe udhëzimet tona.

QËNDRIMI I LRSNJ ME TË JASHTMIT DHE PËRVOJA E GJERTANISHME

Për këtë pikë delikate të raportoj (ai që është përgjegjës) se çka ka bërë në këtë drejtim. Kjo është një prej detyrave më me rëndësi sidomos për ne jashtë. Në këtë drejtim duhet shikuar punën në disa ndarje të cilat mendoj se duhet të jenë dy ndarje kryesore: E para në shqiptar dhe joshqiptarë dhe ndarja tjetër në: komunistë dhe jo komunistë.

Me organizatat komuniste shqiptare në radhë të parë me PPSH, kjo çështje diskutohet në një nivel tjetër dhe nuk na takon ta shtrojmë fare në rend të ditës. Me shoqëritë tjera simpatizuese të komunizmit, si BKSJ "Bajram Curri" në Australi merret

vet LRSNJ dhe këto nuk i konsiderojmë organizata të jashtme. Në këtë kontest futen edhe grupet e mërgimtarëve shqiptarë në Turqi dhe vende të tjera.

Në organizatat shqiptare jo komunistë si; Rinia Kosovare në SHBA dhe me ndonjë organizatë tjetër që nuk është e mbytur me gjakun e popullit duhet të kontaktohet dhe që ka origjinë kosovare. Gjithashtu në këtë drejtim duhet të intensifikohet puna me arbëreshët e Italisë kur të kihet kontributi i tyre i madh në Rilindjen Kombëtare. Të shohim se kush i drejton revistat; "Katundi ynë" dhe "Zjarri". Të studiojmë situatën në klubin e arbëreshëve të Ludwigsburgut. Të shikohet mundësia e kontaktit me çamët, prej të cilëve ka shumë me punë të përkohshme në Gjermani si shtetas grek, të cilët do të na bënin ndihma shumë të mëdha.

Për të gjitha këto të mendoj shumë më tepër përgjegjësi kryesor për këtë punë.

Në organizata të huaja komuniste duhet të shikojmë kontaktet me PK të Zvicrës, PK të Gjermanisë, PK të Turqisë, PK të Spanjës dhe me grupet komuniste të Greqisë. Këtu ka mjaft shumë çka të thuhet dhe për këtë punë ndihet një nevojë për kuadro mjaft të përgatitura. Puna duhet drejtuar në atë mënyrë që përgjegjësi për këtë çështje të ndërtoj një ekip të tërë për këtë punë dhe për secilën organizatë të caktoj nga një njeri.

Me organizata të jashtme jo komunistë më së shumti vëmendje duhet t'u kushtojmë relacionit me kroatë, ku kryesisht do të bëhej punë koordinimi dhe të tjera të ngjashme me dobi reciproke. Mundësitë janë të mëdha në këtë drejtim.

Redaksia e ZK duhet të bëjë kërkesën për organet (gazetat) e të gjitha organizatave të lartpërmendura apo për botimet e ndryshme të tyre që të jemi në korent me punën e tyre si dhe t'u dërgohet të gjithëve "Zëri i Kosovës" për aq sa ta kanë interesim dhe nevojë.

LIDHJET ME KOSOVËN TË LRSNJ NGA EVROPA

Lidhur me këtë të bëhet shqyrtimi i shfrytëzimit të të gjitha mundësive në bashkëpunim me përgjegjësin për këtë punë. Në këtë drejtim të mos kursehet që puna të shkoj mbarë bile në këtë drejtim për intensifikim pune po ka shumë presion edhe nga baza e LRSNJ si jashtë ashtu edhe brenda. ...

PËRFUNDIM

Nga tubimi të dilet me detyra tepër të qarta. Të raportohet nga secili shkurtimisht se çfarë ka bërë prej ditës që ka hyr në fuqi puna e pesëshit (Qendrës Ekzekutive të formuar më 15 janar 1983 në Ludwigsburg). Të vendoset për përpilimin e një materiale që do të shpërndahej nëpër anëtarë. Të dilet me qëndrime konkrete lidhur me të jashtmit dhe në frymën e vendimeve që do të marrim t'u dërgohen organizatave të lartpërmendura letra lidhur me qëndrimin e Lëvizjes ndaj problemeve të ndryshme e sidomos mundësinë për punë të përbashkëta në ato pika që mund të na lidhin. Në fakt kjo praktikisht do të ishte edhe njohje e Lëvizjes nga ana e tyre.

Të vendoset për intervalet e takimeve dhe për mënyrën e komunikimit. Të ngushtohet fortë e ashtuquajtura hapësirë e tolerimeve të ndryshme për hir të unitetit dhe për gabime sistematike nuk kemi pse e kursejmë njëri-tjetrin. Bashkarisht të shqyrtohet ajo që është gabim dhe të shikojmë qëllimin e vërtetë. Për shumë gjëra të jepen bashkarisht mendime me shkrim dhe sa më tepër besoj me këtë do të bien (zvogëlohen) problemet që kanë mundësi zgjedhjeje në dy a më shumë variante dhe do të mbetet vetëm një; ajo më e drejta.

37. Letër e Xhavit Ramabajës për Xhafer Durmishin, mars 1983

Shumë i nderuari shok,

Pikësëpari ju kërkoj falje për vonesën e kësaj letre por, arsyeja e kësaj vonese është se, unë kohëve të fundit isha i zënë rreth një banese të re dhe kështu shpërngulja u bë shkaktare që nuk munda të përgjigjem me kohë ashtu siç është dashur.

Tani me mundësitë e mia po përpiqem t'ua bëjë me dija gjendjen në përgjithësi që i përket çështjes së rrethit në të cilin marrë pjesë edhe vet.

Bielefeldi, qytet me rreth 300 mijë banorë vendas, i përket krahinës së Vestfalisë (Nordrheinwestfalen), gjendet në mesin e Gjermanisë Veriore ndërmjet qyteteve Dortmund dhe Hanover, Kasel dhe Bremen e Hamburg. Numri i punëtorëve shqiptarë nuk është i madh në krahasim me qytetet tjera ku janë formuar klube dhe grupe në të cilat marrin pjesë shokët përparimtarë ku bëjnë punë dhe aktivitete në të mirë të çështjes kombëtare.

Pos në Bielefeld me rrethinë siç janë qytetet Gütersloh, Paderborn, Löhne etj. i kemi kaluar edhe vështirësitë gjeografike dhe kemi formuar lidhje të ngushta edhe me shokët e qyteteve më të largëta siç janë: Hanoveri, Hamburgu, Bremeni, qyteti i Peinit afër kufirit gjermano lindor etj.

Nga këto qytete neve na kanë ardhur shokë sa herë që kemi pasur mbërme të organizuara. Duhet ta cekim se shokët që vizitojnë klubin tonë vijnë pothuajse nga të gjitha rrethet e Kosovës, por, gjithashtu edhe nga vise të tjera si Maqedonia, Serbia.

Për hapjen e klubit "Kosova" ishte iniciator shoku X. dhe hapet për të parën herë në vitin 1979, por meqë në këtë vit meremetohej ndërtesa ku e kishim sallën tonë, na u deshtë të pushojmë disa muaj dhe pas kësaj zgjatjeje të meremetimit ne filluam punën nga fillimi i vitit 1980 dhe rregullisht tuboheshim një herë në javë ditëve të shtunë.

Që nga fillimi i punës në klub qëllimet ishin të karta: punë patriotike, atdhedashuri, qëndresë burrërore.

Dhe puna që bëhej të shtunave mbrëma në klub dha rezultatin e vet në prag të shpërthimit të demonstratave në Kosovë. Tani për çdo anëtarë të klubit ishte e qartë situata në Kosovë dhe ngjarja në tërësi. Ata e kishin pritur këtë ditë pasi e njihnin mirë gjendjen e vështirë ekonomike, të vendlindjes së tyre, viktimitë e të cilës ishin edhe ata.

Pas ngjarjeve në Kosovë në mars e prill 1981, organet e konsullatës së Dortmundit nuk pushuan duke dërguar "ekspert politik" të tyre çdo javë që t'i shuanin ndjenjat kombëtare të punëtorëve tanë, por qëllimet dhe dredhitë e tyre të poshtra i pamë edhe gjatë vitit 1980 kur ne bënim kërkesa për të na e njohur klubin zyrtarisht dhe, sa herë që kam shkuar unë personalisht në konsullatën e Dortmundit dhe kam bërë kërkesë të ligjshme në lidhje me klubin, përgjigja e tyre ishte: "E keni një klub jugosllav "Domovinën" a nuk ju mjafton". Unë këto fjalë të thëna nga pozitat e tyre shoviniste i mbajta në mend dhe i shënova. Llogaria më doli mirë kur filluan të vijnë pas një viti. Unë këto fjalë i bëra armë të fortë kundër tyre duke ua thënë haptas se ne nuk jemi përfillur fare nga ana e tyre si nënshtetas jugosllav e tani vini me qëllimet e juaja të caktuara kurse neve na e bëni kinse për të na ofruar "ndihmë" si p.sh. për televizor, video etj., vetëm e vetëm që ne të bëjmë punë sipas oreksit të tyre. Ata nuk kursyen as fjalë të mira për të na lavdëruar, e kur i dëgjonin fjalët tona ata ranë në kundërthënie të rëndë me ato të para një viti.

Ndihmat e tyre që i ceka më lartë i përdornin si një ryshfet sikur thua se neve gjendeshim në Anadollin e para 100 vjetëve. Provonin që të paktën punëtorët të rrinë anash e për më tepër edhe t'i dënojnë vëllezërit e motrat e tyre në Kosovë, por, çë do,

punëtorët le që i përkrahnin demonstratat në Kosovë por ishin të gatshëm edhe këta të bëjnë çdo sakrificë për vëllezërit dhe Kosovën tonë.

Sa për gënjeshttrat e organeve konsullore të Dortmundit se gjoja klubi jonë dënon demonstratat në Kosovë neve iu përgjigjëm me pjesëmarrjen direkte tonën nëpër demonstratat dhe protestat e ndryshme këtu në Perëndim mbasi që konsullata e Dortmundit kishte dërguar telegrame falso në emër të klubit tonë.

Në punëtorët me qëllim mbanim qëndrim të urtë e korrekt ndaj emisarëve konzular, nuk përdornim fjalët e mjetet që ata meritonin. Ky qëndrim i urtë u jepte atyre shpresë dhe s'mungonin të vinin prapë por sa herë që vinin strajca u mbetej bosh. Endacaku më i papritueshëm ishte njëfarë Hadi Kerragjiu.

Për të gjitha këto nuk po zgjatëm më tepër kësaj radhe, këto i kam të shënuara në letër dhe e di se meritojnë vëmendje, por nëse e kërkon nevoja dhe rrethanat atëherë do t'i shpalojë më gjerësisht.

Pasi çdo gjë është e lidhur me Kosovën dhe ngjarjet rreth saj gjatë vitit 1981 e shoh të rrugës ta cekim se gjatë këtyre ngjarjeve organet konsullore jugosllave të Dortmundit, pra që nga fillimi i marsit 1981 e gjer në mesin e vitit 1982 ata vizituan tetë herë klubin tonë. Qëllimi i tyre ishte: të ndërrohet kryesia "irredentiste" e klubit në krye me shoku X në krye, por edhe me ndërrimin e udhëheqësisë u zhgënjyen. Për këtë ndërhyrje kanë bërë përpjekje të mëdha. Ia vlen të cekim dy data ku ata falimentuan me shokët e tyre.

Më 10 tetor 1981 dhe më 17 tetor 1981.

Ditën e shtunë me 10 tetor 1981, salla ishte e mbushur sa s'kishte ku veje majën e gjilpërës. 160 punëtor pritnin përfaqësuesit e konsullatës Jugosllave të shoqëruar nga njëfarë Jetullah Gashi, sot kryetar i komunës së Podujevës, Zija Novobërdalija, kryetari i rinisë së Kosovës, emrin e të cilit nuk ia mbajta mend. Me ta ishte edhe Mitalip Qoqa një gazetar i Rilindjes, i akredituar në Bon, një fotograf i cili thoshte se ishte i Rilindjes, e me siguri ishte ardhur që të fotografonte për qëllimet e Udbës. Ishin të shoqëruar edhe nga tre persona tjerë që me siguri u shërbenin si roje në rast nevoje, por për roje ata kishin siguruar edhe dy policë gjerman nën pretekstin se rrezikoheshin fizikisht nga punëtorët tanë. Por edhe unë ua njihja mirë dredhitë e tyre dhe e dija se dëshironin të bënin tollovi e të na e hudhnin fajin neve dhe unë sigurova një polic gjerman jo për të na ndihmuar por për të qenë si dëshmitar në rast nevoje. Policin ia bëra të qartë se ne nuk duam të sqarohemi fizikisht por duam të diskutojmë haptazi mbi problemet tona para përfaqësuesve Jugosllav, dhe nëse papritmas ndodhë ndonjë aksident fizik kjo ndodhë ngase është kurdisur nga organet e konsullatës Ju. veglave të U.ës.

Dua të them me sinqeritet se unë nuk doja asnjë ndihmë nga polici gjerman përveç dëshmimeve që mund të merrte ai në rast nevoje.

Për sigurinë tonë ishim përgatitur mirë, çdo i deleguar e kishte të drejtuar në ballë.

Kështu filloi diskutimi në mbrëmjen e datës 10 tetor 1981. Duhet ndërruar udhëheqjen thanë ata. Udhëheqja e këtij klubi është "irredentiste" në krye me shokun X. thanë. Për diskutimet dredhake të mjeshtërisë dinake shquhej punëtori i lartpërmendur nga konsullata e Dortmundit Hadi Kerragjiu dhe i deleguari nga Kosova, Zija Novobërdalija, por punëtorët tanë nuk donin tjetër udhëheqësi. Përgjigja e tyre ishte jo dhe vetëm jo.

Për këtë datë të 10 tetorit 1981 nuk po e zgjasë më shumë. E them se kjo natë ishte për ta një dështim, por ata do të vinin prapë. Ece e pajtoju me fatin, erdhën me i lyp veshët e i lanë edhe brinat.

Pasi delegatët kishin kaluar javën këtu në Bielefeld, ku edhe banonin me shpresa se do t'u ndihmonte terreni i afërt me klubin dhe, pasi kishin bërë plane të reja për heqjen

e udhëheqësisë, për dënimin e saj si armiqësore, antijugosllave, "irredentiste" dhe domosdo edhe një provë për dënimin e studentëve e demonstratave në Kosovë, arritën në krye të javës për të dështuar prapë ditën e shtunë të datës 17 tetor 1981.

Për këtë natë punëtorët ishin të informuar mirë dhe e dinin se këta emisar po provonin për herë të fundit që të hiqnin udhëheqësinë me shokun X të cilin ata e kishin cekur me emër – punëtorët e dinin se për këtë qëllim ata kishin qëndruar një javë në Bielefeld. Këto fjalë i dëgjova në sallë pak para ardhjes së emisarëve, dhe këto ishin të vërteta.

Gjatë qëndrimit në Bielefeld emisarët s'kishin ndejtur duar-kryq, ata kishin arritur të bënin për vete veglën, tradhtarin e njohur me emër Jetullah Nazifi. Ky kishte pranuar të bëhej kryetar i klubit "Kosova" për hir të interesit të emisarëve jugosllav dhe u kishte premtuar se me marrjen e mandatit do t'i dënoj demonstratat në Kosovë në emrin e vet dhe të klubit "Kosova". Këtij tradhtari iu kishin bashkangjitur edhe 12 punëtor të cilët emisarët krahinor i kishin përvetësuar nëpër kafenetë e Bielefeldit gjatë javës që kishin qëndruar këtu. Këta për herë të parë hynin në klubin "Kosova" si zagari pas të zotit.

Kjo mbrëmje e 17 tetorit 1981 e gjet klubin tonë ashtu si një javë më parë, plot e përplot. Punëtorët prisnin emisarët e javës së kaluar. Në fytyrat e tyre vërejtja se diçka që të bënte me dije se janë të merakosur, andaj edhe u afrova t'i pyes se çka mendonin? Pas kësaj pyetjeje e mora përgjigjen e dëshiruar dhe zemra m'u bë mal kur dëgjova fjalët e tyre: "Ti shoku X mos lako, vepro si shqiptar i vërtetë, neve na ke pas shpine, jemi të gatshëm, ipu përgjigjen e merituar agjentëve, qëndrimi ynë nuk ndërron më thoshin punëtorët.

Roja që ruante në oborrin e klubit lajmëroj ardhjen e emisarëve dhe nuk harroj të cek edhe numrin e tyre 20. Roja, një shok yni ishte i shqetësuar, (numri-shën i Xh D) i dukej i madh, por unë e qetësova duke thënë: edhe 200 më duken pak dhe menjëherë vërejtja një lehtësim në fytyrën e tij.

I pari që hyri në derë ishte shefi i konsullatës së Dortmundit Shime Jeliq, disa nëpunës të konsullatës, emisarët e javës së kaluar, Jetullah Gashi, Zija Novobërdalija etj. Këta i shoqëronte edhe tradhtari i njohur i këtushëm Jetullah Nazifi që karakterizohej me mendjemadhësinë e tij prej bajraktari dhe kjo nuk na befasonte mbasi ne e njihnim mirë edhe para ngjarjeve.

Këta prapë ishin siguruar me polic dhe agjentë përreth kurse ne, siç e kam cekur më parë, ishim siguruar me mjete tjera.

Posa hyjnë në sallë këta "politikan" jugosllav punëtorët i "përsëndetën" me parullën "Kosova–Republikë". Thirrjet e parullave ishin me zë të lartë, ishin këto bomba mbi emisarët qëllimkeq që hynin në sallën e klubit "Kosova" dhe vërtetë kjo atmosferë luftarake i hutoj mund të them akoma pa u ulur pendoheshin për ardhjen e tyre.

Por prapë qenerit nuk i largoheshin pa lëpirë ndonjë kockë të hedhur. Shefi i konsullatës u ngrit në këmbë dhe u tha punëtorëve: Ne ua kemi sjellë udhëheqësinë e re të cilën do t'ua prezentojmë!"

Një punëtor u ngrit e e pyeti: "Në cilën kafene e keni zgjedhur këtë udhëheqësi, tek i cili çetnik më drejt, se këtu në Bielefeld të gjitha kafenetë u takojnë emigrantëve çetnik dhe ju aty e kaluat kohën gjatë kësaj jave.

Konsulli i hutuar nga kjo pyetje e papritur heshti për një moment dhe prapë vazhdoi avazin, tha se shoku X është armik i Jugosllavisë, është politikan profesionalist dhe ju këtë mos e dëgjoni se ju futë në rrugë të rrezikshme, do t'u merr në qafë, e sa e sa "këshilla" dhe sugjerime dhe u ul. Për të mos u ftohur muhabeti u ngrit në këmbë Zija Novobërdalija ku i "vërtetoi" fjalët e Shime Jeliqit, bile ia kaloi atij në këtë drejtim.

Pastaj m'u lut që të bisedojmë në një dhomë të veçuar në një dhomë po aty në klub. Unë pranova pa kundërshtuar dhe hymë në dhomë. Pasi u ulëm ai filloi të lutej për të "mirën" time. Unë ty -më tha- ta njoh familjen... Ti edhe ata po i rrezikon, pendohu, është për të "mirën" tënde. Thuaju shokëve publikisht këtu në sallë, kam gabuar, nuk do të bëjmë më demonstrata dhe fund!

Po i thash në çast, po pendohem!

Këtij renegati i qeshi fytyra, mendoi se "triumfoi", por "triumfi" nuk i zgjati më shumë se pesë minuta, aq kohë sa bëra unë për të dalë para punëtorëve, kjo dha sihariqin Zija i afrohet Shime Jeliqit dhe e njoftonte për "bindjen" që bëri në mua. Shima u nxitua dhe ja tha tjetrit që kishte pranë dhe të gjithë me fytyra të qeshura pritnin dorëzimin tim.

Zija u ngrit në këmbë e tha: "Shokë fjalën po ia japim shokut X!" Në atë çast mendova: Këta armiq nuk e njohin bindjen time, nuk e dinë se para e përqafoj vdekjen se sa t'i bëj fytyrat e tyre të qeshura, tani ata prapë do të zhgënjehen nga unë, siç u zhgënjyen një orë më parë nga punëtorët! U nguta e thash: Shokë, në demonstrata kemi qenë e do të shkojmë prapë, kërkesa për Kosovën Republikë është e drejtë! Rroftë RSFJ! Rroftë Republika e Kosovës!

Nga kjo ligjëratë e shkurtër emisarët u tërbuan dhe u djersitën, ata i fshinin djersët me mindila kurse punëtorët thërrisnin: Kosova Republikë! Dhe prapë atmosfera qetësohet, punëtorëve u qeshet fytyra nga gëzimi, ndezin nga një cigare e më përshëndesin me grusht.

Tani Shime Jeliqi ngritet e thotë: "Ja ku është udhëheqësija e re" pasi e prezentoj me emër si kryetar Jetullah Nazifin, vegël e njohur, i urryer nga punëtorët tanë i shpërndau fletët që zgjedhja të bëhet e msheht. Çdo punëtori i dha nga një fletë votimi, por asnjë punëtor nuk pranoi të votojë për udhëheqësinë e kafeterive në krye me tradhtarin Jetullah Nazifin.

Vetëm 12 veta kishin votuar për ta, ata që i kishin shoqëruar gjatë kësaj jave.

Kështu edhe kjo mbrëmje përfundoj me fitoren tonë dhe kjo që një mbrëmje të cilën unë nuk do ta harroj kurrë, si një natë ku u pa qëndresa heroike e punëtorëve tanë. Me këtë ngjarje kuptova edhe më mirë se populli ynë është i vendosur në luftën e tij të drejtë. Kjo ngjarje, edhe pse e vogël në krahasim me ngjarjet në Kosovë, kam vërejtur qëndresa që janë identike me të kaluarën shekullore të historisë sonë luftarake. Të gjitha këto më bënë edhe më të fortë e të bindshëm se gjatë tërë jetës duhet shërbyer këtij populli trim e liridashës.

Shoku L!!!

Due të ndalem këtu mbasi më duket se, pak a shumë ju shkrova për natyrën e frontit që ka ekzistuar në klubin tonë.

GRUPI FOLKLORIK

Si një grup me vazhdimësi në punë është formuar më 1982. Puna tani për tani është e mbështetur në bazat vullnetare kurse si anëtarë të rregullt të grupit janë vetëm 5 veta.

FILM

Jemi të furnizuar mirë me filma shqiptar, siç vijon më poshtë:

- | | |
|-------------------|------------|
| 1. AVNI RRUSTEMI | Dokumentar |
| 2. ALI KELMENDI | " " |
| 3. LUIGJ GURAKUQI | " " |

4. FIERZA 78 Motive pune mbi lumin Drin (hidrocentrali)
 5. VALLËZIMI I SHQIPEVE Valle popullore nga vise të ndryshme të Shqipërisë
 6. KËSHILLTARËT Nga Lufta e Dytë Botërore
 7. GUNAT PËRMBI TELA Si nalt, u pëlqye shumë mirë nga publiku

Të gjithë filmat në 16 mm për projektor

VEGLA TEKNIKE

- | | | |
|------------------------|-------|-------|
| 1. Projektor | 16 mm | BAUER |
| 2. Altoparlanta | 2 | |
| 3. Zmadhues | | |
| 4. Mikroфона | 3 | |
| 5. Video | | |
| 6. Televizor me ngjyra | | |

Vlera monetare e tyre arrin rreth 6-8 mijë Marka Gjermane.

ANËTARËSIJA

Në fillim kishim 180 anëtarë, kurse sot siç mësova nga sekretari i klubit tonë për këtë vit kishin paguar anëtarësi 45 veta, prej të cilëve 20 veta paguajnë 50 DM në muaj.

PARULLA

Parulla kemi për shokët e vranë, për ngjarjet në Kosovë në gjermanisht e shqip. Formulimet dhe dimensionet nuk mund t'i shkruaj mbasi janë të shpërndara nëpër punëtorë.

Flamuj të klubit janë dy.

Shoku L

Nëse kjo letër nuk u përgjigjet kërkesave unë e kompensoj me ndonjë letër tjetër.

Me përshëndetje vëllazërore Shoku X (Xhavit Ramabaja për Xhafer Durmishin, mars 1983)

38. Letër Ibrahim Kelmendit dhe Qendrës Ekzekutive, 24 prill 1983

Shoku I. 24 prill 1983

..Unë mora vesh nga Xhema kur ishim së bashku atje herën e fundit. ... Morali i dobët dhe patriotizmi mund të bashkudhëtojnë por me bashkjetuar nuk mundën dhe ky është një lixh i vërtetuar me mijëra herë dhe që vlen për çdo kend. Pra si për fillim dhe që është hera e parë që po të drejtohem me letër nuk po mund të zgjatem më shumë në këtë drejtim. Po shfrytëzoj nga rasti që të drejtohem për disa probleme si të përgjithshme ashtu edhe konkrete.

Nuk është nevoja që shumë gjëra t'i përsëris apo të shkruaj siç thua ti, fraza rasti. Në bazë të kontakteve dhe vendeve që jemi takuar mund të them se relativisht njihemi mirë. Kemi vendosur me luftuar se bashku dhe këtë do ta bëjmë. Ku kanë qenë punët para një viti dhe ku janë sot e ke ditur e edhe sot e dinë se ku janë qoftë në planin e përgjithshëm qoftë në atë konkret të relacioneve në mes kuadrove. Është mirë edhe me e

paramenduar se në çfarë situatë do të ndodhemi pas një ose dy vitesh. Kjo mvaret në masën më të madhe prej nesh.

Ne njihemi vetëm sa na ka kontaktuar puna dhe vetëm puna e asgjë tjetër. Në bazë të saj do të njihemi edhe në të ardhmen. Këto kohët e fundit më ka rënë rasti të vizitohesh pothuaj të gjitha rrethet kryesore në RFGJ. ... Opinioneve të ndryshme u intereson lidhja jote me Lëvizjen e mjaft të tjera. Prandaj me aq sa mund të gjykoj është me një rëndësi tejet të madhe studimi i rrethanave sepse sot operacione të ndryshme po zhvillohen shumë shpejt. Në këtë letër po të flas më poshtë më konkretisht mbi mbresat që kam gjatë takimit ... në rrethin e Dyseldorfit ku isha para disa ditësh, ku në mes të tjerëve ishte edhe vëllau yt... Ti e dinë se çfarë na intereson ne për çdo mjedis dhe nga ky qëllim e zhvillova bisedën sidomos fillimin e saj në Dyseldorf. Tonin ia prishi mjaft Mustafa me pyetje të ndryshme se kjo nuk duhet t'ju interesoj juve, se unë vetëm ia paguaj qiranë klubit, pastaj a e ke pyet Ibrahimin etj. Është mirë me i sugjeruar se kam të drejt të takohem me një rreth në çfarëdo kohe që duket e nevojshme. F. më patë treguar se ke shkuar atje ku je dhe unë nuk kisha mundësi me të takuar. Është mirë të ndikosh te ai sepse me të tilla pyetje në radhë të parë të dëmton ty. ... Qëllimi kryesor ishte të dija sa më shumë për klubin, pastaj përgatitje e terrenit për koncertin. Ne diskutuam qartë në Gjenevë për statusin e tyre, andaj në atë rreth të ngushtë e shtrova edhe problemin e anëtarësimit me njerëz të rinj e së bashku me këtë problem të qonte edhe te fotoja e satrapit. Diskutuam në atë rreth të ngushtë prej pesë vetash....

Të fala S. (Xhafer Durmishi)

39. Letër Faridin Tafallarit, 26 prill 1983

Shoku F. (Faridin)

26 prill 1983

Po ta dërgoj këtë letër me porosi:

1. Broshurat e Leninit që i pata lënë te ti m'i dërgo.
2. Një libër "Shota dhe Azem Galica"
3. Materialin "Detyra të ngutshme" dhe projekt statutin.
4. Kasetën me filmin "Lepuri me pesë këmbë" dhe program muzikor nga televizioni i Prishtinës.
5. Adresën e Sejdi Biticit (Bytyqit) (nga Nju Jorku, është te turku).
6. Materialin që unë ta pata dërguar dhe që ta kërkoja para disa ditësh ma dërgo menjëherë. (Xhafer Durmishi)

(Faridin Tafallari, T-Dhimbje-Qëndresë, Tiranë 1997, f. 443)

40. Letër Qendrës Ekzekutive, 4 maj 1983

Të dashur shok të Qendrës Ekzekutive,

4 maj 1983

Kaloi një kohë e gjatë e ngjarje të reja po zhvillohen vazhdimisht, kurse ne nuk po jemi në korent në mes veti jo vetëm nëpërmes ndonjë takimi po këtë nuk po e bëjmë as në nivelin më minimal përmes letrave. Andaj me anë të kësaj letre u propozoj që pa u vonuar të mendoni për ndonjë datë takimi të mundshëm ku do të shikonim se si jemi duke ecur dhe çfarë është duke ndodhur.

Në takimin e fundit u diskutua edhe përpilimi i Programit Politik të LRSNJ me rastin e njëvjetorit të formimit. Deri më sot, kur jam duke e shkruar këtë letër, për diçka më shumë në këtë drejtim nuk jam i informuar. Po ashtu mendoj që përmes letrash të vendoset se kush do ta bëjë një projekt program i cili në rrethet e ngushta duhet të lëshohet në diskutim së bashku me projektstatutin. Përndryshe çdo hap tjetër në këtë drejtim është joserioz dhe mund të ketë pasoja të këqija.

Pra unë mendoj se koha është që të takohemi mundësisht sa më shpejt. Mendoni në këtë drejtim, programojeni kohën dhe shikojmë se në cilën ditë e në cilin vend mund të takohemi. Kjo shtrohet më problematike për mua dhe Ilazin (I. Kelmendin), por unë për vete jam i gatshëm të vij në Zvicër, ndërsa për herë të tjera si dhe për rendin e takimeve dhe mënyrës së mbajtjes së kontaktit do të vendosim në takim. Ju përshëndet S. (Xhafer Durmishi)

41. Letër Xhafer Shatrit, 4 maj 1983

Shoku Llesh 4 maj 1983

Së bashku me letrën e mësipërme po të dërgoj edhe këtë letër që sot ua dërgova dy shokëve tjerë të grupit përgjegjës për Gjermaninë. Lexoje dhe çfarë më propozon tjetër që të bisedoj e si të shkoj puna me ta. Pasi letrat nga Zvicra po vonohen, po që se gjer në takim do të më mungoj fjala jote do të jem i detyruar të flas si ma merr mendja mua e në këtë drejtim janë serioze sidomos problemet rreth temës mbi fraksionizmin në radhët e Lëvizjes. Kjo është e rëndësishme kur të kihet parasysh se tani në Stuttgart që të tretë e firmës së tretë (ish-PKMLSHJ) të cilët përbëjnë kapitullin e veçantë të fraksionizmit në mes fraksionizmave tona. Për arsye të një kontakti të mundshëm me ta, ne duhet t'i informojmë shokët aq sa është e nevojshme sepse këtë e kemi për detyrë.

(Xhafer Durmishi)

42. Letër Xhafer Shatrit, 13 qershor 1983

Shoku Ll. 13 qershor 1983

... Lidhur me fraksionistët mendoj që përgjigja duhet t'u bëhet por jo në ZK sepse në këtë mënyrë mund t'u bëjmë shërbim, dhe kësaj t'i japim përmasa sepse aty ku shkon ZK, këtyre do t'u nevojiten vite të tana me mbërri, gjë që s'do të mbërrijnë kurrë. Kështu që përgjigja të dërgohet tani për tani vetëm në ato vende ku mbërrijnë ata. Në këtë drejtim unë kam menduar me e përgatitë një libër të tërë skeletin e të cilit e kam bërë dhe do ta dërgoj e nëse të duket i arsyeshëm e thellojmë punën në atë drejtim. Kjo s'do të thotë që mos me ua bërë edhe një përgjigje në një trakt dy faqesh, kurse në libër mendoj të jenë të rrahura shumë probleme më gjerë, dhe me llojet e tjera të fraksionizmit. Unë jam i kënaqur me atë skelet.

Lidhur me takimin rregullojeni si ta gjeni më të përshtatshme. Unë në të ardhmen sigurisht nuk do të mund ta bëjë atë që së paku është thënë teorikisht ta bëjë. Andaj se çfarë taktike do të përdoret dhe si është më mirë të zhvillohet lufta diskutoje më shumë me ata që e ke ndërmend të mbështetesh më shumë. Unë do ta bëjë edhe në të ardhmen atë që më thuhet por jo, me hy deri në atë shkallë sa me i ngritë punëtorët grushtet kundër njëri-tjetrit siç ka ndodhë me vëllaun e Ilazit dhe Musa Dakën.

Të fala S. (Xhafer Durmishi)

43. Letër e Xhafer Durmishit për Faridin Tafallarin, vjeshtë 1983

Shoku Faridin, (vjeshtë 1983)

Ma dërgon atë Statutin të cilin e kam rishikuar. E ke në tubën e materialeve të mia të fundit që ta ka dhënë Hafizi. Ma dërgon edhe atë projekt programin në gjashtë faqe. Statutin e korrigjuar nga unë ua dërgon edhe atyre që duhet me ua dërgua në Zvicër, e Ukës dhe Ilazit. Edhe një letër timen si përgjigje në ato të Ilazit ua përcjell ti.

Të fala S. (Xhafer Durmishi)

44. Letër Bashkësisë së klubeve

**Letër dërguar delegatëve të Bashkësisë së Klubeve dhe Rretheve Shqiptare
në Evropën Perëndimore** 1 nëntor 1983

Siç jeni në dijeni, Bashkësia e klubeve, më 16 tetor 1983 thirri mbledhjen e vet të parë, në të cilën pos të tjerash u miratua Statuti i Bashkësisë dhe u zgjodh organi udhëheqës i saj.

Në vazhden e vendimeve u vendos që organi udhëheqës i Bashkësisë të mblidhet një herë në tre muaj. Në bazë të këtij vendimi Këshilli Drejtues i Punës së Bashkësisë së bashku me këshilltarët e vet do të mblidhet më 14 janar 1984 e do të diskutoj e marrë vendime mbi aktivitetin e mëtejshëm të klubeve dhe rretheve shqiptare në Evropën Perëndimore.

Duke pasur parasysh këto rrethana, Bashkësia e klubeve përmes delegatëve të vet u bënë me dije klubeve shqiptare dhe rretheve të ndryshme që gjatë muajit nëntor të këtij viti të mblidhen udhëheqësitë dhe anëtarët e klubeve për të përpiluar programet e tyre njëvjeçare. Në këtë drejtim ata duhet që në pika të ndryshme të ndalen rreth aktivitetit të tyre të gjertanishëm, të vërejnë sukseset dhe dobësitë dhe në këtë bazë të përpunojnë planet e tyre të punës se ku është qëllimi ynë që të arrijmë pas një viti. Si udhërrëfyes, gjatë përpilimit të plan programeve, të shërbej Statuti i Bashkësisë në të cilin Bashkësia ka treguar qëllimin e vet. Si rrjedhim i kësaj, vendimet që merren duhet të jenë në frymën e Statutit të Bashkësisë, i cili u miratua në mbledhjen e parë të saj.

Qëllimi kryesor gjatë përpilimit të planeve njëvjeçare duhet të jetë masivizimi i klubeve me sa më shumë anëtarë, si dhe krijimi i lidhjeve sa më të shumta me grupe të ndryshme punëtorësh, të cilët edhe nëse nuk mund të bëhen anëtarë për arsye të ndryshme, ta propagandojnë klubin dhe ta ndihmojnë atë materialisht. Rëndësi të madhe, më të madhe se gjer më tani t'u kushtohet kontakteve me organizata të jashtme të vendeve në të cilat punojmë.

Rëndësi t'i kushtojmë konsolidimit të grupeve muzikore, mbledhjes sa më të mirë të materialit filmik.

Njoftoni Bashkësinë me të gjitha vendimet që merrni, të cilës sipas një vendimi, duhet t'i dërgohen raporte të rregullta mbi punën e klubeve dhe për çështje diskutabile kur nevojitet mendimi i Bashkësisë. Në bazë të plan programeve të secilit klub, Këshilli Drejtues i Punës (KDP) do të përpunojë planin njëvjeçar të Bashkësisë në tërësi, në mbledhjen e vet më 14 janar 1984.

Të dashur shokë delegatë, të dashur shokë të udhëheqësive të klubeve!

T'i përvishemi punës me të gjitha forcat, të shkundemi nga përtacia e të mos lejojmë që asnjë minutë të na shkoj kot.

Bashkësia e klubeve i shikon me sy jo të mirë disa dukuri në disa klube të reja për të cilat u angazhuam me sa e sa mundime që t'i krijojmë, kur ende pa u konsoliduar mirë klubet, ngrihen thirrje nga individ të ndryshëm që të ndërrohen udhëheqja e ndonjë klubi, apo e ndonjë anëtari të kryesisë, thujse se klubet na kanë munguar vetëm e vetëm pse nuk kemi pasur njerëz për t'i caktuar për kryetar.

Të dashur shokë, klubet në disa vende na kanë munguar dhe na janë minuar nga shovinist të ndryshëm dhe vegla të tyre që janë armiq të përbetuar të popullit tonë, të cilët nuk kanë dëshirë t'i shohin edhe dy shqiptarë së bashku. Në të gjithë veprimtarinë tonë, në të mirën e popullit, duhet të punojmë për atë që të shfrytëzojmë në maksimum mundësitë legale dhe t'i bashkojmë njerëzit e jo të ngremë çështje që nuk shkojnë në

interesin e përgjithshëm. Pa sakrifikuar nuk mund t'i ndihmojmë interesit të përgjithshëm, e në grupin e sakrificave hynë edhe ajo ndjenjë e durimit për zgjidhjen e problemeve.

Deri në rregullimin e çështjes së adresës së përhershme të Bashkësisë, të cilën së shpejti do ta zgjedhim dhe për këtë do t'ju njoftojmë, raportet i dërgoni në adresën e kryetarit të Bashkësisë.

Ju dëshirojmë punë të mbarë.

Bashkësia e klubeve dhe e rretheve shqiptare në Evropën Perëndimore (Xhafer Durmishi) (Faridin Tafallari, T-Dhimbje-Qëndresë, Tiranë 1997, f. 229-230)

45. Letër shokëve në Saar-Louis, nëntor 1983

Të dashur shokë në Saar-Louis, nëntor 1983

Jam në dijeni të aktivitetit tuaj në përgjithësi përmes shokut që e njihni. Iniciativën tuaj për t'u organizuar e kemi përshëndetur dhe e quajmë jashtëzakonisht të mirë. Por kjo do të thotë edhe një obligim më të madh në të ardhmen për punë të mëtejme. Kësaj radhe po iu drejtohem me këtë letër pasi që të vij nuk mundem edhe pak. Edhe për një kohë jam shumë i zanun në rrethin ku gjendem këtu sot në mbrëmje jemi duke u përgatitur që ta presim siç duhet një koncert të një trupe që ka ardhur nga Kosova. Ne i kemi marrë masat tona dhe shpresojmë se do të realizohet plani ynë që përdërisa nuk na jepen të drejtat elementare të mos lejojmë asnjë koncert të zhvillohet i qetë (në heshtje) në Evropën Perëndimore. Gjithashtu në këtë rreth më 19 nëntor 1983 do të hapet klubi shqiptar që ka emrin e plotë "Klubi i punëtorëve shqiptarë nga Jugosllavia 'Isa Boletini'", për të cilin ekziston interesim i madh tek shqiptarët e këtij rrethi. Po iu tregoj se tash për tash nëpër të gjitha qytetet e mëdha në Evropë, ku ka shqiptarë po bëhen përpjekje që të hapen sa më shumë klube, sepse në praktikë u pa se përmes një klubi ishte e mundur të bëhet një punë e madhe.

Për në rrethin tuaj ku nuk ka shumë shqiptarë, më e suksesshmja mënyrë është ajo të cilën e keni zgjedhë ju. Po ju njoftoj gjithashtu se më 26 nëntor 1983 në rrethin e Shtutgartit po bëhet një përgatitje e madhe për të pritur festat e Nëntorit të cilat në këtë rreth organizohen që tri vite më radhë. Është siguruar qysh tani një sallë e mirë, të cilën e kemi pas edhe më 1981. Për këtë festë do t'u vijnë thirrjet e posaçme, të cilat do t'i merrni me kohë dhe do të ishte mirë nëse mundeni me ardhë. Pas këtyre festave do të gjej rastin për t'u takuar me ju. Për këtë arsye qysh tani po ua propozoj këtë takim të cilin mendoj ta mbajmë më 3 dhjetor 1983 me fillim në ora 16.00.

Lidhur me vendin e takimit vendosni ju. Ku të vendosni ju unë do të vij. Në atë takim ne do të shqyrtojmë disa gjëra, por më së shumti do të ndalemi në përpilimin e planit të vitit 1984. Shoku i juaj më ka thënë se lidhur me një porosi që të mblidhen informata për bashkatdhetarët që gjenden në rrethin tuaj është kryer. Detyra e kryer është punë me rëndësi. Deri në takimin e ardhshëm që do ta keni me mua po u lë për detyrë që ta studioni mirë këtë material që po ua dërgoj, pasi lidhur me te do të diskutojmë. Shkruani të gjitha pyetjet eventuale që dëshironi me i parashtrua, në mënyrë që të mos i harroni në momentet e takimit.

Të fala të përzemërta, (Xhafer Durmishi)

46. Letër Qendrës Ekzekutive, 3 janar 1984 (pjesë)

Sa i përket Statutit të përgatitur nga ana ime kam këto vërejtje; duhet shtuar definimin e saktë se kush është, mund të quhet anëtarë i Lëvizjes, dhe një nen të ri që ka të bëjë me sjelljet e anëtarëve të Lëvizjes që veprojnë në shtetet e ndryshme, të cilët nuk guxojnë të bien në kundërshtim me ligjet e vendeve në të cilat veprojnë. Pastaj vërejtjen tjetër, në kapitullin e parë që ka të bëjë me datën e formimit të LRSHJ. Më 10 korrik 1983, Uka më tha se do të ishte shumë mirë në Komunikatë ta kishim shënuar vetëm 15 majin, pasi fraksionistët e PKMLSHJ nuk do të mund të qëndronin shumë, pasi kryesisht ata po thirren në 17 shkurtin. Duke u nisur vetëm nga ai qëllim dhe sidomos kur ka qenë në pyetje fraksioni që u shërbye me metoda shumë të ulëta mua më është dukur e arsyeshme dhe ky ka qenë shkaku kryesor që unë në atë statut e kam shënuar datën e 15 majit. Tani Mërgimi thirret në të njëjtën mënyrë si Uka se qëllimi të shënohet 15 maji ka për qëllim ta devijoj vijën për Republikë për të cilën kemi vendosur më 17 shkurt. Unë nuk ju kam kushtuar vëmendje të duhur këtyre gjërave, sepse për natyrën time nuk më janë dukur gjëra të dorës së parë. Pasi çështja është shtruar kësi soji, atëherë pavarësisht se si do të shprehem as 17 shkurti nuk mund të fshihet pasi është një fakt, kur janë bërë bisedime dhe është vendosur, çka është më kryesorja, emri i organizatës të cilës më 15 maj nuk iu ndryshua asnjë pikë dhe asnjë presje. Sido që të jetë unë nuk jam për atë që të bëhet objekt diskutimi kjo çështje. Faktet historike mbeten fakte, unë jam për atë që me ato të merret historia.

S. (Xhafer Durmishi)

47. Letër e Xhafer Durmishit për Faridin Tafallarin, mars 1984

Shoku Faridin, (mars 1984)

Po të lajmërohem shkurtimisht.

- Atë materialin që e kishte Ilazi dhe që u vendos me na e dërguar le ta përcjell ty e ti mua. Çështja se atë material ta përcjellim dorë më dorë nuk ka baza pasi ne kemi shkruar në letra gjëra edhe më me rëndësi.

- Ma dërgon atë artikullin që ta pata shkruar ty e që nuk u lexua në Sant Gallen me rastin e dyvjetorit të rënies së shokëve se po më nevojitet.

Këtu në Paris punët me klubin janë duke shkruar mirë. Se në cilën ditë do të hapet të tregoj radhën tjetër.

Të fala S. (Xhafer Durmishi)

48. Letër delegatëve të Bashkësisë së klubeve, mars 1984

Të dashur shokë, delegatë pranë Bashkësisë së Klubeve Shqiptare në Mërgim,

Në bazë të vendimit të aktivistëve më të dalluar të klubeve të ndryshme shqiptare në Evropën Perëndimore, që u bë në një tubim më 9 korrik 1983, mi formimin e Bashkësisë së klubeve, kjo Bashkësi thirri mbledhjen e vetë të parë më 16 tetor 1983 në Gjenevë, në të cilën pos të tjerash u aprovua Statuti i Bashkësisë dhe një Rezolutë me anë të së cilës klubet marrin përgjegjësi që për organin udhëheqës të Bashkësisë (Këshillin Drejtues të Punës KDP) të përgatisin raporte mbi aktivitetin e tyre.

Puna në këtë drejtim filloi. Disa klube në këtë drejtim u dalluan më shumë se të tjerat.

Disa shokë janë përpjekur në çdo rast që iu është dhënë mundësia të japin sugjerimet e tyre lidhur me atë se në çfarë binarësh të orientojmë aktivitetin nëpër klubet megjithëse Bashkësia filloi nga puna duke pasur në gjirin e vetë një

heterogjenitet sipërfaqësor, por jo edhe të parëndësishëm në çështje praktike. Bashkësia me disa aktivitete të saj është përpjekur sidomos t'ia ndalë hovin veprimeve spontane nëpër klube.

Siç jeni në korrent në bazë të letrave, mbledhja e dytë e Bashkësisë së Klubeve ka qenë e planifikuar për datën 14 prill 1984, por me që ra kjo mbrëmje (e 7 prillit) u pa e arsyeshme që ta shfrytëzojmë këtë rast për mbledhjen e dytë të Bashkësisë së klubeve në këtë vit.

Ne besojmë se ju aktivistë të klubeve keni pasur kohë të mendoni dhe vendosni për ato çështje që doni të shtroni në këtë mbledhje. Në këtë mbledhje do të diskutojmë e marrim qëndrime për;

- organizimin e festës së 1 Majit,
- planifikimin e pikave, në të cilat mendojmë të hapim klube të reja gjatë këtij viti,
- angazhimin e disa shokëve për marrjen e kontakteve dhe informatave nga organizata të ndryshme për çështje të emigrantëve, kontakte këto që do të na nevojiten për shokët të cilëve nuk do t'ju vazhdohet viza nga konsullatat jugosllave dhe për çështje tjera që tani janë të njohura në praktikën e punën tonë.

Në këtë takim do të ishte me rëndësi që të sillni me vete edhe Statutet e Klubeve. Kjo shtrohet e rëndësishme pasi Bashkësisë i kanë ardhur vërejtje se një klub në Statutin e tij e paska një nen të atillë në të cilin po u thoka se për t'u bërë anëtarë duhet të shkruar një lutje me shkrim.

Aktualisht udhëheqësitë e klubeve duhet ta ruajnë unitetin e tyre.

Një aktivist i Bashkësisë (Xhafer Durmishi)

49. Shokëve të Shtutgartit, 14 maj 1984

Nëntitujt e kësaj letre janë vendosur për këtë përmbledhje.

Shokëve të Shtutgartit e me rrethinë, 14 maj 1984

Po e filloj këtë letër pa ndonjë hyrje të veçantë. Kohë pas kohe jemi ndër informuar lidhur me punët rreth klubit e për disa çështje tjera me disa shokë përmes telefonit. Unë në këtë letër do të mundohem që me disa fjalë të them mendimet e mia lidhur me momentet nëpër të cilat po kalon LRSSHJ, si dhe rrethi i Shtutgartit në veçanti dhe për atë se si mendoj se çfarë qëndrimi duhet mbajtur në këtë situatë. Por para se të vij në përshkrimin e situatës prej mbledhjes sonë të fundit e deri më sot, unë në pika të shkurta do të jap disa shpjegime lidhur me funksionimin dhe raportin e njerëzve në udhëheqjen e LRSHJ në Evropën Perëndimore dhe më gjerë (në përgjithësi në botën e jashtme).

Kjo shtrohet e domosdoshme paraprakisht sepse kur është në pyetje njollosja e ndonjë shoku nuk është qarë koka për konspiracion, ndërsa kur është në pyetje çështja për t'ia qitë fëlliqësitat dikujt në lëndinë po thirret me të madhe që të mos hyjmë andej, se po dekonspirohen gjërat, se ato i takojnë një rrethi më të ngushtë e profka të ngjashme si këto. Këto që do t'i numëroj, shumicën prej tyre ua them për herë të parë. Këtë veprim e bëjë i bindur se është i drejtë, sepse përgjegjësitë që na i ka besuar populli (apo thënë më drejtë, që ia kemi besuar vetes) nuk i përmbushëm ne pesë (5) veta për të cilët do të flasë më poshtë.

Formimi i Qendrës Ekzekutive

1. Më 15 janar 1983, pas marshit protestues që u mbajt më 15 janar, u mblodhën në banesën e Hafizit (Hafiz Gagicës); unë, Ibrahim (Kelmendi), Uka (Xhafer Shatri), Plaku (Hasan Mala). Ishte parashikuar që në atë tubim të merrte pjesë edhe Faridini por ai nuk mori pjesë për shkak se ishte në spital. U mblodhën në një përbërje të tillë me propozimin e Ukës (Xhafer Shatrit) e gjithashtu me propozim të tij u vendos që ai forum të jetë përgjegjës për botën e jashtme, të quhet Qendër Ekzekutive dhe prapë me propozim të Xhafer Shatrit të cilave ne nuk ua bëmë asnjë ndryshim u caktuan këto detyra: Xh. Shatri përgjegjës për propagandë, unë për çështje të organizimit në botën e jashtme, Faridini arkatar i Lëvizjes dhe Ibrahim Kelmendi për çështje me organizatat e jashtme. Hasan Mala përgjegjës për lidhjet brenda. D.m.th. siç po shihet me propozim të Xh. Shatrit u vendos që të jemi shokët më të afërt në bashkëpunim. Unë besova në fjalët e tij siç kanë besuar shumë të tjerë. Në anën tjetër siç e dini pas atij marshi protestues për disa ditë në Shtutgart qëndroi Ganiu (Milaim Zeka), i cili siç po vërtetohet sot është lënë me porosi të Xh. Shatrit, në mënyrë që me aftësitë e tij t'ia "ftofë" Skënderit, Hafizit e Haxhiut. Këtë e dëshmon "spiuni i Shqipërisë" Milaim Zeka. Siç po shihet mjeshtri i madh Xh. Shatri në njërin anë e shtrinte dorën për luftë të përbashkët e në anën tjetër luante me sinjeritetin e shokëve duke i manipuluar me fjalët se "jemi anëtar të një organizate" (pra OMLK-së), për t'i përdorur kundër atyre që u thoshte se po i bënë shokë.

Diskutimi rreth makinës së Jusuf Gërvallës

2. Pasi dolëm prej banesës së Hafizit (Gagicës) më 15 janar, vetëm unë dhe Xh. Sh. biseduam për makinën (e shkrimit) me të cilën nxirrej "Zëri i Kosovës", të cilin për shkak të mungesës së kuadrove deri në numrin 2 të vitit 1983 e nxora unë dhe jam unë ai prej të cilit në lidhje me gazeta, jo vetëm në çështje grafike ka mësuar shumë Xh. Sh. dhe jo unë prej tij, pavarësisht se ... e paska qitë Zërin e Kosovës para 10 vitesh me ata bashkëpunëtor që i ka përmendur në ZK numër 1 të këtij viti.

Kjo (10 vjetori i ZiK) është një temë më e gjerë e cila nuk i takon kësaj letre e të shqyrtohet më gjerësisht këtu pasi kjo punë mund të bëhet në një rast tjetër. Po kthehemi tek makina e shkrimit. Uka (Xh. Sh.) tha: "Është mirë me e pas makinën unë pran vetit, pasi në një letër që na ka ardhë prej postës së Bernit, përmban shumë kritika dhe se dyshoj se në te ka shumë mendime të Engjëllit (Kolaneçit)." Unë pa e biseduar as me Faridinin, as me IK, i cili saktësisht nuk e dinte se kush është duke e qitur ZiK-un, e as me ndonjë shok tjetër rashë dakord, gjë për të cilën kurrë nuk pendohej. e gjithashtu në bazë të luftës që do ta shohim nuk do të luaj rolin e një fëmije që fillon me qajtë kur i marrin ndonjë send nga dora. Ju do të thoni se kërkesa e tij është në përputhje të plotë me vendimet e po asaj dite. Kjo pyetje është e pranueshme në dukje të parë, por këtu lindin edhe disa të tjera në bazë të të cilave mund të bëhen shumë vërejtje po ashtu shumë të drejta ndaj kërkesës së Ukës, si p.sh. Pse ai këtë pyetje në mënyrë direkte nuk e shtroi gjatë mbledhjes, apo pasi u ndan detyrat pse në mënyrë adekuate nuk u veprua edhe në raport me arkatarin e me çështjet materiale. Këto janë pyetje për përgjigjen e të cilave duhet të mendoj Uka.

Mbrëmje përkujtimore në Hamburg

3. Pasi marshit protestues në Shtutgart, Isak Gutaj, për interesa personale, kishte vendosur të përkujtohen dëshmorët Jusuf, Kadri e Bardhosh me rastin e ditës së

njëvetorit të varrimit, në mënyrë të ngjashme siç veproi IK në një mënyrë shumë më egoiste për përkujtimin e trevjetorit të demonstratave sivjet, apo Uka për katër mujorin e rënies së Rexhepit e Nuhiut. Të shohim se çfarë xhemati, çfarë ylemash e çfarë myezinësh do të thërras Xh. Sh. për 6 mujorin, 8 mujorin, 12 mujorin e kështu me radhë. Kështu, Isakut, për hir të xhirit filmik, i kishte hy në zemër edhe përkujtimi i rënies. Për hatër të egoizmit e të poshtërsisë së vetë, IK për të treguar se kush qon peshë të madhe në Lëvizje e kishte shtruar aq kontestuese se në emër të kujt duhet të thirret kjo mbrëmje. Kështu Xh. Sh. për t'u mbrojtur nga diskreditimi e për t'u ç'fajësuar nga fjalët e mbrëmjes në Weinfeldën se ua kemi dërguar "armët më moderne të Evropës", në vend të dërgimit të një pasaporte, dhe për të tjerat, deshti edhe njëherë të thotë se nuk mban as fijen e përgjegjësisë për vrasjen e dy heronjve e as për burgosjen e dhjetërave të tjerëve, si dhe për uljen e autoritetit të Lëvizjes e cila Republikën është duke e kërkuar edhe me armë zjarri të llojeve nga më të ndryshmet. Natyrisht në këtë mbrëmje nuk mungoi as porosia që të këndohet fuqishëm për shokun Enver, duke tentuar t'ia tërhjek vëmendjen PPSH-së se dyshimet për atë se Xh. Sh. është një djathtistë i mykur janë të pabaza.

Po kthehem tek Hamburgu. Në bazë të marrëveshjes së mbledhjes së 15 janarit unë vetë deshta ta shfrytëzoj rastin dhe të shkoj në Hamburg. Ishte kjo hera e parë që shkoja në këtë qytet. Kjo rrugë për në Hamburg m'u mundësua duke iu falenderuar biletës së lirë në grup, dhe për kthim ato 150 DM që m'i dha nga ju Remziu (Ademaj). Për ndërmarrjen e hapit të Isakut ne ishim në dijeni. Xh.SH. na kishte thënë vendosni si të është më e drejtë duke anuar më shumë nga pikëpamja se nuk bënë të bëhet xhirimi, kurse në anën tjetër, siç e zbuloi vetë në mbledhjen e fundit në Gjenevë pas demonstratës, më 3 mars të këtij viti, ai i kishte thënë Isakut se bënë ta xhiroshe atëfarë biçim filmi. Komentet për këto veprime më duken të tepërta. Një ballafaqim i organizuar i pikëpamjeve të ndryshme. Mua në telefon më thotë fol në emër të Lëvizjes (kjo u shtrua e nevojshme edhe për faktin se Isaku thoshte se për hapin e vetë e kishte aprovimin e Lëvizjes), dhe përfundoni në ndonjë marrëveshje, duke i propozuar Isakut një realizim të këtij lloji më vonë, propozim të cilin ai e hodhi poshtë. Për këtë arsye e vetmja zgjidhje që t'i paguhen shpenzimet e kontraktimit me gjerman e shpenzime të tjera që ai i vlerësoi 1500 DM, shumë të cilën e pranua. Vepruam asi soji e në marrëveshje me të gjithë shokët e sidomos me Faridinin që të forconim autoritetin e Lëvizjes duke treguar se ajo është mbi të gjithë ne. Unë pa e përfunduar mirë atë kompromis i tregova Xh. Sh. e gjithashtu pas pak ditësh ia kam dërguar adresën e Isakut. Qëllimet e ulëta të Xh. Sh. nuk do t'ua falshin ndonjë qëllimi të mirë që mund ta ketë pasur në kokën e tij, se si i shpëtoj goja atë natë e me më thanë mua fol në emër të Lëvizjes, pasi me këtë do të shtohet pesha e fjalës sime, andaj për ta anuluar këtë vendosi që të mos ia dërgoi të hollat Isakut, i cili ishte tallur edhe me Lëvizjen edhe me mua për atë se pse nuk e mbajtëm fjalën. Xh. Sh. më thoshte se i janë dërguar të hollat por janë kthyer, bile konkretisht nga posta e Baselit dhe se e kemi vërtetimin e postës. Gënjeshtër dhe vetëm gënjeshtër. Pas dy-tre muajësh Isaku i ka marrë të hollat nga Xhavit Ramabaja. Më vonë Xhavitit i kanë ardhë të hollat nga Zvicra.

Për gabimin e parë do ta bëjmë fuz

4. Kah gjysma e muajit shkurt 1983, makina (e shkrimit) u dërgua në Zvicër. Meqë ata që e kishin marrë përsipër nuk kishin haber nga puna me te, dhe me radhitjen (punën grafike) në përgjithësi në fillim të muajit mars shkova në Zvicër, ku e kalova kufirin me Faridinin (me pasaportë të H.R.) i cili më la në Basel. Në Gjenevë më priti

Uka në Stacion. Tek ai qëndrova gjer më 13 mars 1983 kur u bë edhe mbledhja e parë e QE në përbërje të plotë. Por para se të takohemi të gjithë së bashku, u takuam në banesën e Ukës; Unë, Faridini, Plaku (Hasan Mala) dhe Uka ku biseduam për shumë çështje në mes të cilave më e rëndësishme qe puna e arkatarit. Faridini i dorëzoi Ukës një regjistër mbi shënimet e plota lidhur me të gjitha shpenzimet duke u nisur prej asaj dite që e ka marrë punën e çështjeve materiale nga Nuhiu e gjer në atë ditë. Plaku dhe Uka as për afërsisht nuk qenë në gjendje të bëjnë ndonjë shpjegim të saktë lidhur me shpenzimet e ndryshme, e të mos flasim për të hollat të cilat janë mbledhur në konton "Ndihma për Kosovën". Sa kanë qenë gjallë shokët ka pasur një marrëveshje (gojore) të precizuar në këtë çështje se ato do të jenë të përbashkëta, respektivisht do të ndahen në mënyrë të barabartë, pasi të dy palët kanë pasur njerëz të burgosur në Kosovë.

Biseduam edhe në lidhje me Ibrahimin, me të cilin unë gjithmonë i kam pas kartat e hapura dhe çka i kam thënë ia kam thënë gjithmonë parasysht, kurse Uka e ka quajtur shok para syve, ia ka dhënë megafonin në demonstrata dhe gojë më gojë me te (nga i njëjti megafon) kanë brohoritur parulla të ndryshme, si herën e fundit në Gjenevë, kurse prapa shpina nuk ka lënë gjë të zezë pa thënë kundër tij. Këtë e dëshmojnë disa letra. Këtë e dëshmon edhe sjellja e tij në atë mbrëmje, kur ende pa u takuar me Ibrahimin, thoshte se këtë punë (afrimin e tij në QE pra) e kam bërë me dy mendje, dhe se për gabimin e tij të parë do ta bëjmë "fuz". Këtë fjalën "fuz" e përsëriti disa herë para se të takoheshim.

Gjatë takimit unë e kritikova për disa çështje Ibrahimin, sidomos për disa pika që kishin të bënin me klubet. Si duket ai toni im i kritikës dhe mënyra ime e argumentimit e frikësoi Ukën se mos ndonjë ditë do të ndodhet vetëm para meje, kështu që për të ruajtur veten e për të mbajtur ekuilibrin, në fund të mbledhjes tha se me Ibrahimin duhet të sillemi më mirë, të jemi më korrekt se ka punuar shumë.

Mua jeta më ka mësuar që të mos i besoj askujt

Gjatë qëndrimit tim prej më tepër se 10 ditë në banesë të Ukës patëm rastin të këmbejmë mendime për shumë çështje. Tek ai (në adresën e gazetës) kishin ardhur disa letra për mua që nuk m'i kishte dërguar. Duke e parë se që në fillim ra në sy një atmosferë joshoqërore më tha: "Mua jeta më ka mësuar që të mos i besoj askujt."

Në ato ditë punuam për "ZiK" nr.2 të vitit 1983. Në atë tubim unë lexova të vetmin material që ishte përgatitur në atë mbledhje, në mënyrë më të qartë e që kishte të bënte me punën e aktivitetin që do ta zhvillojmë në mërgim. Sa u përket klubeve unë shpreha disa ide si këto:

- se ne që kemi rënë më shumë në sy me aktivitete të mos dukemi fare nëpër klube,
- t'u sugjerojmë bashkatdhetarëve të shkojnë në të gjitha klubet pa marrë parasysht se kush është në udhëheqjen e tyre,
- që në aktivitetin tonë të orientohemi për të hapur sa më shumë klube, por pasi në to mund të hyj kush të dojë të respektohen rigorozisht simbolet e RSFJ dhe të ndiqet një politikë e tillë që të mos rrezikojmë punëtorë.

Të gjitha këto pikëpamje të miat u aprovuan, me përjashtim të pikës që ne të rënë në sy, të mos dukemi nëpër klube. Këtë pikë e kundërshtuan Uka e Ibrahimimi.

5. I mbështetur në këto orientime e vendime për të cilat Ibrahimimi e Uka patën fytyrë të betohen edhe para fotografive të tre shokëve të përgatitura në forme fasciklle të

Sh.B.K. "Bajram Curri" në Australi, se vendimeve të marrura në të gjithë veprimtarinë do t'iu përmbahen, unë qëndrova disa ditë ndër bashkatdhetarë në Munchen, ku të gjithëve u fola për këto orientime që kemi marrë, prej aty shkova në Bielefeld (gjatë muajit maj e në fillim të qershorit 1983) ku edhe aktivistëve kryesor të klubit "Kosova" u fola për orientimet e marrura, të cilat të gjithëve u pëlqyen. Unë atyre u fola edhe për mundësinë apo ta kenë në perspektivë vënien e fotografisë së Titos në klub. Ky ishte si me thanë vetëm një mendim lidhur me klubet që e kanë hequr apo se kanë vu kurrë. Të gjithë e quanin të drejtë me përjashtim të ndonjërit që kishin frikë se mos po i përçan konsullata jugosllave. Këtë mendim ua thash edhe pesë vetave të klubit "Emin Duraku" (Hyzriut, Zymer Kryeziut, Avdi Begishollit, Mustafë Kelmendit dhe Musa Dakës). Me mua në këtë takim ishte edhe Xhavit Ramabaja. Përveç punës së fotografisë ne diskutuam edhe shumë çështje tjera. Ata më thanë se është vështirë për t'u realizuar kjo ide tek ne, përndryshe është bërë një gabim i madh kur është heq, gabim për të cilin na e kanë tërhequr vërejtjen Jusufi. Yrysh të madh kanë pas marrë "patriotët e mëdhenj me vulë e adresë" kundër meje duke thënë se si ka guxua ai me e diskutuar atë punë, se për ç'arsye kam shkuar atje, se a kam shkuar aty për ndonjë punë private apo çfare. Me një fjalë, një fushatë e tërbuar e vume në praktikë prej njerëzve të padjallëzuar në Dyseldorf dhe e aprovuar me kënaqësi prej Gjeneve, e cila dështoi në mënyrë të turpshme, duke i përbirë secili fëlliqësirat që kishte qitur nga goja e vetë, fushatë që i ka ngjarë shumë kësaj të fundit të mbrëmjes së 7 prillit e cila do të përfundoj në mënyrë shumë më të turpshme për kreatorët e saj se sa e para.

Të lumtë se na e zbardhe fytyrën

6. Më 9 korrik 1983 u mbajt takimi i shumicës së rretheve në Zvicër, ku u vendos themelimi i Bashkësisë së Klubeve, si dhe u demaskua fuqishëm veprimtaria përçarëse e Abdullah Prapashticës me kompani. Siç dihet në atë tubim e pata marrë edhe unë fjalën. Se si kam folur e çfarë ndikimi ka bërë ajo fjalë e kanë gjykuar dhe le të gjykojnë të tjerët. Por me sa më kujtohet referat tjetër me shkrim nuk u lexua, përkundër asaj që ishte përgatitur një, por pasi e lexova unë, u vendos vetëm të flitet (d.m.th. spontanisht) e jo të lexohet. Pas dolëm, (pas mbarimit të fjalimit tim) Faridini më thotë: Të lumtë se na e zbardhe fytyrën dhe aq mirë e ke thënë sa po më duket se Ukës nuk i ka ardhë mirë (nga frika kuptohet). Kjo ishte shumë e vërtetë. Pas atij takimi të gjerë, unë dhe Faridini u ndalëm. Do të takoheshim ne të pestët e QE. Në këtë tubim Uka kishte mjaftë çka për të na kritikuar mua dhe Ibrahimin. Mua pse nuk kam punuar mjaft për demaskimin e fraksionit. Kjo ishte një mënyrë e poshtër sjelljeje sipas devizës "mbrojtja më e mirë është sulmi". Ai kishte arsye të mbrohej për kleçkat e tija në drejtim timin si në Hamburg e Dyseldorf, si dhe për atë që kurrë për asnjë çast të vetëm nuk më kishte pyetur se a kam të holla me udhëtua për të përmbushur detyrën që kisha marrë përsipër, respektivisht që më ishte ngarkuar.

Sa i përket Ibrahimit atë do ta akuzonte si agjent të "shërbimit informativ shqiptar", se e ka dekonspiruar Qendrën Ekzekutive para Shefkate Sherollit, e cila këto të dhëna dhe disa të tjera ia paska dorëzuar Ambasadës Shqiptare në Suedi, në Stockholm.

Në bazë të poshtërsive që ishin bërë në drejtim timin unë kërkova dorëheqje nga një Qendër e tillë. Kërkesa ime për dorëheqje nuk u aprovua. Në atë takim u vendos që të organizohet një demonstratë në Strasbourg. Uka na tha se nuk prishë punë që t'i thërras miqtë e mi kroat që edhe ata të dalin me flamujt e tyre. Kështu na propozoi shoku i Hydajet Hysenit e i Kadri Zekës, përndryshe "armik i dogmatizmit". Natyrisht që propozimi i tillë nuk u aprovua. Kuptohet edhe kësaj here për çështjet materiale

përveç ndonjë britme se nga Dyseldorfi po na vijnë shumë pak të holla nuk u fol më tepër. Demonstrata e Strasburgut me përjashtim të gënjeshtërs se është siguruar një sallë e mirë ku do të na argëtojnë aktivitet e Lëvizjes, përfundoi me sukses.

7. Në fillim të muajit nëntor të vitit të kaluar, në Gjenevë erdhi Mërgimi (SN). Pas një jave ata i prishën marrëdhëniet për një varg çështjes si p.sh. lidhur me etiketimet e Xh. Shatrit për shumë aktivist si "spijuj të Shqipërisë apo vegla të Engjëll Kolanecit", lidhur me devijimet në ZiK si dhe mosgatishmëria e Xh SH për korrigjimin e tyre, lidhur me çështje të organizimit të brendshëm të kohëve të sotit dhe më të hershëm, i cili duke pas për bazë akuzat nga një "burim me rëndësi". Mërgimi bashkohet plotësisht me ato akuza që janë bërë.

Për mbrëmjen e 11 nëntorit 1983 ka qenë i thirrur një takim, por nga rasti që ndodhi në Shtuttgart, ky takim u mbajt më 13 nëntor. Në atë takim ku ishim ne të pestit ishte edhe Mërgimi (SN). Në atë takim ne shumica vlerësuam se nuk mund të themi akoma se Uka është një njeri në shërbim të udbës, ashtu siç e kishte akuzuar Mërgimi dhe disa individ të tjerë, por vlerësoi se gabimet e tij në Zëri janë më se evidente dhe për atë u vendos formimi i një komisioni i cili do të diskutoj për devijimet e vërejtura, dhe ai komision i studioi e shprehu ato devijime në një mbledhje më 18 dhjetor 1983. Përkundër vërejtjeve të këtij komisioni nga KQ i LRSNJ, Uka vazhdoi me shprehjet e sharjet e tij në nr. 7 të ZK, 1983.

Ide rreth Komitetit Qendror

Në atë tubim u vendos që të riformohet KQ i LRSNJ prej 15 vetash. Në përbërjen e tij do të hynin, në bazë të organizatave të mëparshme 7 nga krahu i ish-LNCKVSHJ dhe 7 nga ish-OMLK dhe IK. Lidhur me këtë u la një takim për natën e vitit të ri. Vendtakimi nuk u caktua. Për arsye se në të **gjitha** takimet e vitit 1983, përveç atij të janarit që u bë pas demonstratës, unë në të gjitha rastet kisha dalë në Zvicër, kësaj radhe nuk kisha mund me siguria dokument (huazua pasaportë), kisha të drejtë të thosha se edhe ata (të Zvicrës) bënë me dalë në Gjermani. Megjithatë u tentua të organizohet ai takim por nuk pati sukses. Atë natë Faridini u nervozua, pasi vet doli në Zvicër dhe Uka i kishte thënë se nuk mund të vjen gjer në St. Gallen, por e lëmë për një herë tjetër.

Me kalimin e ditëve të para të janarit u hap klubi "Isa Boletini" si dhe një javë më vonë u organizua mbrëmja në Weinfeldën, me ç'rast disa prej jush shkuan edhe në të pame për rastin e Nuhiut e të Rexhepit. Lidhur me marifetllëqet në Weinfeldën nuk po zgjatëm. Pas pak ditësh, kah 23 janari, unë u largova nga Gjermania, për shkak të zhagitjes së çështjes së dokumenteve, pasi kisha gjasa më të mira që këtë punë shpejt ta rregulloj në Francë.

Në ndërkohë kishte dalë "Zëri" nr.7 i vitit 1983 me ato shprehjet kundër sarhoshave, dhe se ne "nuk jemi bisht i kurrkujt", (duke iu drejtuar PPSH, Shtetit Shqiptarë, që i ka quajtur në tubime me emra të ulët, epitete të cilat nuk po e shoh të arsyeshme t'i shkruaj në letër por që janë të incizuara në shirit magnetofoni. Në anën tjetër dërgoheshin letra me nga 10 faqe, se kështu m'u kanë bërë padrejtësitë (gruaja e Kadriut) si dhe "Qarkoret e Sqarimet" e Mërgimit (SN) kundër devijimeve të vazhdueshme të Ukës.

Demonstratat e organizuara pa Xhafer Shatrin kanë qenë punë fëmijësh

Demonstratën e Gjenevës, të fundit, siç e patë edhe në takimin e fundit, pa u konsultuar me asnjë shok të vetëm Uka e thirri pra këtë demonstratë. Sipas logjikës së tij të sëmurë kjo do të thoshte: Kur të gjithë merreshin me fjalë unë merresha me punë të mëdha dhe organizoja demonstrata. Sa për konsulta, ajo çështje nuk ishte diskutabile pasi nuk kisha me kend të konsultohesha e me kend të merresha vesh për arsye se të tjerët për mua ishin fëmijë, siç më ka pas thënë mua pas demonstratës së Bonit të 3 prillit 1982. Për këto thoshte se është merakosur shumë se mos nuk po shkon puna mirë gjatë demonstratës së Bonit pasi ajo ka qenë si punë fëmijësh. Në frymën e këtij stili ofshante gjatë takimit të fundit pas demonstratës së Gjenevës "se me kend më ka qitë puna me luftua së bashku", thuase ai paska qenë më parë duke luftua në këto mjedise dhe dikush nga jashtë paska ardhë me ia përzije dorëzat, në kohën kur është pikërisht e kundërta se ai ka ardhë nga jashtë dhe e ka gjetë një punë që është në vazhdim.

Kur jemi duke folur për këtë, nga sjelljet, tani kuptohet se ai me çdo kusht ka dashtë që të thotë se: "Tre shokët u vranë, dhe sikur të mos kisha qenë unë, aktivitet në botën e jashtme nuk kishte me pas një kohë të gjatë, për të mos thënë nuk kishte me pas fare. Këtë e dëshmojnë edhe fjalët e ulëta të tij që kanë të bëjnë me bisedimet e bashkimit me më 14 e 15 maj 1982, ku disa shokëve që kanë ardhë tek ai nga Kosova u ka thënë se sikur të mos kisha qenë unë nuk ishte bërë bashkimi, por më 14 maj këtu unë atyre që kanë ardhë për bisedime ua kam thyer dhëmbët. Këto poshtërsi të tij nuk kanë nevojë për koment. Unë dua të theksoj se sa mund të arrij ta konsolidoj veten politikisht njeriu me këto gënjeshtër. Dhe tani i erdhi radha atij të organizoj demonstrata të mira, të organizuara me fotografist, të cilët do ta futin në objektiv çdo njeri që ua bënë me sy ai...

Mbledhja e 3 marsit 1984 në Gjenevë

Mbledhja filloi. Në te u diskutua për shumë çështje. Në mes tjerash në tavolinë iu bë e ditur se Xh Sh nuk është zot i Lëvizjes dhe se në emër të saj i ka takuar edhe tjetërkujt të flet. Në atë tubim u aprovua një dokument, u vendos të formohet redaksia e përbashkët, që të veprohet me organ (gazetën qendrore) ashtu siç u vendos me KQ, të botohet një shkrim në formë autokritike për devijimet e shfaqura në faqet e Zërit, etj. Për çështjet materiale edhe kësaj radhe nuk u diskutua, sepse mungonte Plaku (Hasan Mala), e Uka nuk paska pas mundësi me ardhë gjer tek ato shënime, kështu që kjo temë nuk u shqyrtua fare. Në mungesë kohe, pika për planifikimin e punës në të ardhmen mbeti pa u diskutuar. Kjo mbledhje u karakterizua edhe nga lajkat e ulëta të Ukës në momentet kur do të kritikohej nga unë duke më thënë: "Se unë nuk di çka mëshihet nën flokët e tua, dhe se ti një ditë mund të kontribuosh më shumë se Jusuf Gërvalla, pasi ne kemi letra të Jusufit ku ai pas festës së 28 nëntorit 1981 është shprehur se së shpejti me Shpendin (unë e kisha me te pseudonimin Shpendi) do t'i ndajmë punët.

Në ndërkohë ishte përgatitur fletushka "Republika e Kosovës" para se ne të bëjmë mbledhjen e Gjenevës, nga përkrahësit e pikëpamjes se degët e LRSNJ kanë të drejtë të nxjerrin gazetën e veta, në mesin e të cilëve qëndronte SN (Sabri Novosella). Unë kam qenë dhe mbetem një kundërshtar i vendosur i një pikëpamjeje të tillë. Por SN e të tjerë duke e parë se ne në përgjithësi dhe Uka në veçanti e ka zhagitur tej mase aprovimin e Statutit të Lëvizjes, i cili në një variant më pak të përshtatshëm e jo të plot ka pas ardhur menjëherë pas bashkimit dhe një tjetër variant i shkruar në fillim të tetorit 1983, i shkruar nga unë e që është quajtur shumë i përshtatshëm nga të gjithë dhe me

ndonjë plotësim minimal në një mbledhje ka mund të aprovohet. Por Uka vazhdonte me të veten duke thënë se për këtë punë duhet të gjenden "tre veta që e duan atdheun më shumë se sa veten", pasi ne të gjithë më shumë po e dashkemi veten se atdheun, kurse Uka vetë dhe dy të tjerë që po i njohka vetëm ai po e dashkan atdheun më shumë se sa veten. D.m.th. pasi ai që na u frynte se në emër të Lëvizjes i shkruante nga 40 letra në ditë, për vite e pezullonte aprovimin e një statuti pa të cilin nuk mund të mendohet funksionimi i asnjë shoqate më të thjeshtë.

Disa aktivist, në mesin e të cilëve edhe anëtarë të KQ e aprovojnë krejtësisht variantin e Statutit të shkruar nga unë, duke i shtuar një pikë tejet delikate se degët e LRSNJ kanë të drejtë të nxjerrin gazetat e veta, dhe nëpër disa vende e shpërndajnë në fund të dhjetorit dhe fillim të muajit janar. Të mbështetur në një Statut të tillë Komiteti i degës së LRSNJ "Murat Mehmeti" (në Bruksel) nxori fletushkën e vet. Unë u shpreha menjëherë kundër një veprimi të tillë, por jo me shkua deri në atë masë sa përgjegjësinë për mos punën tonë tua hedhim me tërë peshën të tjerëve. Kjo d.m.th. se KQ në përbërje të plotë nuk e ka aprovuar një Statut qoftë edhe të përkohshëm në të cilin thuhet se degët e LRSNJ kanë të drejtë të nxjerrin gazeta dhe as një Statut të atillë në të cilin thuhet se "Zëri i Kosovës" është i vetmi organ, (e vetmja gazetë) e Lëvizjes, përmes të cilit bëhen të gjitha njoftimet dhe qëndrimet e saj. Sipas kësaj pikëpamjeje, të gjitha traktet që po u bëkan në Kosovë, parullat e ndryshme nëse nuk janë bekuar e aprovuar nga papa i patriotizmit shqiptar Xh. Shatri nuk po u bëkan kabull tek zoti i plotfuqishëm.

Për rastin e fundit (7 prillit) në Dyseldorf si temë më vete nuk po flas, por do të kthehem sipas rastit në disa çështje.

Në bazë të atyre që parashtrova, ... Namiu (Nami Ramadani) tha se nuk është mirë t'i thuash të gjitha këto sepse kjo punë qenka, a mund të bëhet ashtu siç thonë: "Prishe shtëpinë për me e ndërtua avllinë."

Ju si rreth, si punëtor, Remzi, Nami, Mejdi, Faridin ishit të mendimit se nuk është mirë me u ngutë por me u ulë e me bisedua edhe njëherë, apo sa herë të jetë nevoja,.... Pra në një situatë të tillë unë e kisha për detyrë ta them mendimin tim në ato mjedise që m'u dha rasti të ndodhem. Në atë mbledhje u arrit në përfundimin që të thirret një tubim i gjer nga aktivist të rretheve më të dalluara, kurse për rrethin tonë u vendos që të mos marrim hapa të ndryshëm pa u konsultuar me njëri tjetrin. ...

Dyert për një takim, nga ana jonë, mbeten të hapura në çdo situatë....

Në përfundim kam këtë kërkesë për shokun Faridin që të m'i dërgoj në adresën e mëposhtme materialet që i lash herën e fundit tek ai, para se të nisesha në Francë.

Në rastin e parë, posa ta marrë pasaportën besoj se do të shihemi.

Pranoni përshëndetjet e mia të përzemërta.

Adresa ime është: Ali Bitic (Xhafer Durmishi)
 6 Rue des Cailles
 94450 Limeil Brevannes
 France

50. Letër J.M., 14 gusht 1984

Shoku J., 14 gusht 1984

Këtu në Stockholm arrita më 1 gusht 1984. Në përgjithësi tani gjendem mirë. Sa i përket banesë, përkohësisht më kanë vendosur në një hotel që quhet "Gustav Vasa". Gjatë muajit të ardhshëm besoj se do të më vendosin në një banesë afër shokëve. Punës ia kemi filluar, por edhe me këtë numër mund të vonohemi pak, pasi të gjitha mjetet e

nevojshme në një vend të ri nuk mund të sigurohen menjëherë. Mund të them se këtu jemi më afër Kosovës pasi momentalisht kemi më shume kohë të mendojmë për te. Aktualisht kisha me të porositë që të përqendrohesh në këto punë:

1. Gjeje ndokund një telefon ku mund të rrish dhe të presësh me të thirrë ndokush. Këtë po ta them pasi Xh. e ka mundësinë së paku edhe për një kohë me të thirrë gratis, e ti këtë duhet shfrytëzuar që të jesh më shumë në kontakt me shokët dhe me ne. E njëjta do të vlente edhe për H.

2. Shiko me Ali Ademin dhe çeleni një postfach në Hamburg, sepse do të ishte shumë i sigurt dhe do të na shërbente si adresë e përhershme në atë qytet.

Më shkruaj se si kanë kaluar shokët e rrethit tuaj për pushimet dhe për të tjera: Adresa është kjo: Xhafer Durmishi, Björkhagsplan 9, 12152 Johanneshov, Stockholm, Sweden

Të fala të përzemërta nga Skënderi (Xhafer Durmishi)

51. Letër Remzi Ademit, 18 gusht 1984

Shoku Remzi, 18 gusht 1984

Unë tani jam mirë. Më mbajtën nja 5 ditë për ta vërtetuar se a jam me të vërtetë unë. Mos të kishte qenë intervenimi i avokatit patën me më ngarkue në aeroplan. Por edhe ky rast përfundoi mirë. Tani jam vendosë në një hotel ku nuk jam larg prej F e G dhe pothuaj kohën më të madhe jemi së bashku dhe po kalojmë mirë. Këtu kushtet për të gjitha janë shumë të mira dhe ne do të përpiqemi që t'i shfrytëzojmë. Kah fundi i muajit besoj se edhe me banesë do të jemi të tre së bashku. Këtë të hënë do t'ia filloj kursit të gjuhës.

Kam edhe këtë porosi të ngutshme: kur kam qenë tek ti në vjeshtë të 82-it e kam parë se e ke librin e Dr Hivzi Islamit "Popullsia e Kosovës". Të lutem t'ma dërgosh se është një libër që na nevojitet shumë.

Kësaj radhe nuk po zgjatem më shumë. Po e lë për herën tjetër.

Shkruaj në këtë adresë: Björkhagsplan 9/403, 121 52 Johanneshov-Stockholm, Sweden.

Të fala S. (Xhafer Durmishi)

52. Letër Imer Berishës, 24 shkurt 1985

Shoku M. (Imer Berisha) 24 shkurt 1985

Revista e muajit shkurt u dorëzua në shtyp. Tjetër diçka të re nuk ka, përveç që jemi duke planifikuar një demonstratë në Malmö për katër vjetorin e demonstratave në Kosovë. Për këtë se si do të kemi sukses të marrim lejen do të duket pas dy ditësh.

Lidhur me rastin që e kam pas me Sabriun unë nuk po ndalem gjatë, pasi nuk kisha me të thënë diçka të re që ti nuk e di. Është fakt i pamohueshëm, që e ke të qartë edhe ti, ato fjalët në organ nuk janë shkaku i vërtetë i veprimit të tij në atë ditë. Por për shkaqet dhe të gjitha të ngjashmet kemi kohë, dhe unë do të jem aty kudo që të shtrohet nevoja me u ulë, por diskutimet të përcillen me shkrim. Lidhur me këtë rast unë nuk i kam shkruar askujt përveç H. në një letër të shkurt i tregova se diçka nuk është në rregull. Siç duket unë përfundimisht i kam shkëputë relacionet me atë person dhe nuk mund të punojmë së bashku.

Unë nuk e kam lexuar atë letër që ua ka dërguar ju, por fare shkurtimisht po ndalem vetëm në një pikë të problemit që mund ta marrë me mend nga biseda telefonike, se si e keni pasur në shqyrtim. Ju mund t'ju jetë dukur nuk po mund të merremi vesh për shkak se "duami të komandojmë njëri tjetrin", por këtë ua demanton

vetë Sabriu, kur u thotë se gjoja unë nuk qenkam për luftë, për punë, se qenkam pendue që jam angazhues në politikë etj. ”Me këtë duket e qartë se në aktin e tij (Xhafer Durmishit) nuk ka erë karriere”.

Unë nuk po ndalem të numëroj asnjë shkak se çka e shtynë atë në veprim, por duhet ta keni të qartë se unë dhe ai kemi ndryshime rrënjësore në idetë politike që në fund të fundit janë aq larg me njëra tjetrën, sa janë edhe të papajtueshme. Unë këtë e kam ditur edhe më parë, por gjithashtu e di se në fazën e sotme të luftës nuk është e domosdoshme të qiten në shesh. Dhe unë nuk do të qitsha as tani, pra do të isha në gjendje t’i shtyj për të ardhmen, për një kohë të pacaktuar. Dalja në sipërfaqe e këtyre divergjencave mund t’ju duket e tepërt në këtë kohë. Kjo mund të jetë e tepërt për një apo disa shokë të bazës, por kur janë në pyetje dy veta që punojnë në një gazetë kjo gjë nganjëherë bëhet e pamundur.

Sa i përket atij mendimit tënd se a po luan dikush me ne, kjo është një pyetje aq e gjerë, për të cilën nevojitet aq kohë, sa është shumë e vështirë përgjigja në këtë. Unë jam i mendimit se përkundër të gjitha vështirësive, revista në mërgim ashtu siç është shtypur më parë duhet të vazhdojë me daljen e saj, ndërsa lufta për çdo ditë do të na qetë në situata të reja ndaj të cilave (sipas aftësive) do të merren qëndrime përkatëse.

Kishte qen mirë të na njoftosh se ç’ke mundur të marrësh vesh ndonjë të re, këto ditë nga Kosova gjatë kontakteve që kishe. Më trego gjithashtu se a e gjete letërnjoftimin tim francez, dhe nëse po, atëherë duhet të merremi vesh me letra që përmes ndonjë shoku të gjendet një njeri i cili të paraqitet në vendin tim dhe të bëjë shpërnguljen time, e për ku (a tek Ibushi a në një vend tjetër të tregoj pas disa ditësh). Pastaj, a erdhi një pasaportë nga Zvicra me mbiemrin ”R”. Atë pasaportë po që se ka ardhur ia jep S. R.

Gjithashtu po që se e ke aty librin ”Materializmi dialektik dhe historik II”, kishte me qenë mirë me ma dërguar. Pjesa I është tek unë.

Të fala Skënderi (Xhafer Durmishi)

53. Letër shokëve në Gjermani e Zvicër, 22 mars 1985

Të dashur shokë në Gjermani e Zvicër, 22 mars 1985

Numrin 3 të revistës filluam ta përgatisim këtu. Këtë po e bëjmë në mënyrë që të mos humbim kohë në te, pasi në këtej momentalisht nuk kemi mundësi materiale për të përballuar shpenzimet e rrugës, e gjithashtu mua do të më duhet të lajmërohem në organet e shtetit më 10 prill 1985. Kështu nisjen për andej e shikova më të drejtë ta bëjë pas 10 prillit, dhe shpresoj se do të kem mundësi të rri më shumë në qoftë se në ndërkohë nuk më prishë planin ndonjë thirrje e avokatit apo diçka e paparashikuar që do të më ndërprej qëndrimin atje poshtë para kohe. Gjithashtu për shkak të gjendjes materiale po mendojmë që këtë numër ta nxjerrim si numër të dyfishitë pra 3-4, i cili do të dal në 12 faqe A3. Numrin e ri do ta shumëzojmë në më pak ekzemplarë, si dhe të ardhshmit. Më së tepërmi njëmijë dhe t’ua shpërndajmë vetëm atyre që me të vërtetë janë të interesuar e një pjesë të vogël për ta shpërndarë për qëllime tona edhe aty ku nuk na paguhet në dukje të parë.

Tash ne iu kemi afruar këtij kufiri: Përpara kemi qenë të bërë merak se a mund ta botojmë një numër reviste në muaj apo më shpesh, se a do të kemi forca intelektuale për këtë, dhe në radhë të dytë a kemi mundësi financiare për këtë. Tani çështja shtrohet kështu: Forca për botim kemi, sidomos me bartjen e teknikës në Zvicër, ku besoj se do të kem mundësi të punoj më tepër, por si do të jemi të zotët me i përballua çështjet

materiale. Edhe për këtë forca kemi, edhe njerëzit janë, adresat ua dimë por nuk kemi mund t'u shkruajmë dhe as të mbajmë takime të rregullta.

Gjithashtu do të ishte mirë që të na e dërgoni me shkrim (një propozim që do ta drejtonit në adresën e Shukri Demirit, me nënvizim për mua, ku do t'i numëronit arsyet e propozimit për vendosjen e teknikës së shtypit në Zvicër, ku do të potenconit faktin vendimtarë se atje janë mbledhur një grumbull i ri forcash, energjitë e të cilëve nuk po mund të futen në shërbim mirë. E kjo do të bëhej po t'i aktivizojmë në punën teknike të revistës.) Ky sipas meje është edhe shkaku themelor, që ne do të na krijonte më shumë mundësi të merremi me punë krijuese. Një propozim me shkrim do të ishte një çështje e mirë për këta shokët këtu.

Këtu po u shënoj një citat të letrës së Engelsit, dërguar Marksit më 19 nëntor 1844 ku në mes tjerash shkruan:

"...Jungu dhe shumë të tjerë nuk duan ta kuptojnë se midis nesh dhe Ruges ka divergjenca parimore, dhe vazhdojnë të mendojnë se këto janë vetëm zënka personale. Kur u thua se Rugeja nuk është fare komunist, ata prapë nuk e besojnë dhe mendojnë se është një veprim i nxituar që një "autoritet letrar" si Rugeja të flaket tutje. Ç'tu bësh? Na duhet të presim përderisa Rugeja të bëjë përsëri ndonjë budallallëk shumë të madh që të bëhet e qartë ad oculos (sheshit) gjithë këtyre njerëzve." (Marks-Engels, Letra të zgjedhura, faqe 11).

Besoj se kjo letër është e mirë për disa shokë tanët të ngushtë, kur janë në pyetje çështjet tona të brendshme, por që vlen edhe për të gjithë..

Përsëritje revolucionare, Skënderi (Xhafer Durmishi)

54. Letër Remzi Ademit, korrik 1985

Shoku Remzi, korrik 1985

Është letra e parë që po ia shkruaj dikujt prej shokëve pas mbarimit të numrit të fundit të revistës. Ti disa herë më ke kritikuar për letra të shkurtra. Për mua edhe kjo letër do të jetë e shkurtë. Është letra që më me kënaqësi ia kam nisur dikujt. Më në fund unë e kuptova të gjithë fillin e punëve që kanë shkuar në mërgim, duke u nisë prej vrasjes më 17 janar e gjer më tani. Unë e kuptova se të gjitha këto janë bërë në bazë të një rregulli të caktuar dhe në bazë të ligjeve të caktuara të cilat ne tani i mësuam, i zbuluam edhe për kushtet tona. Tani për ne më nuk ka kurrfarë krize. Po ta përsëris se jam jashtëzakonisht i lumtur për atë se e qartësova veten në të gjithë këtë amulli që tri vite në mërgim.

Të them të drejtën gjithmonë e kam pasur një siguri në vete se nuk jam shtrembër dhe kurrë nuk jam udhëhequr prej qëllimeve të errëta. Por në anën tjetër para gjithë atyre intrigave, thashethemeve, fjalëve, pas gjithë asaj xhelozie pas daljes së "Zërit.." menjëherë pas vrasjes në Shtutgart, kur sa e sa vetave u është thënë: "Pse ishit në Shtutgart?! Çka keni me ta? Mos kini punë me ta! e kështu me radhë, më ka ardhë shumë keq, se thosha se këtyre njerëzve po u nxirren telashe edhe për shkak të një pjese të punës sime. Kam menduar se drejt e kemi, por forca, energjia e fuqishme argumentuese edhe për më kokëtrashët më ka munguar. Dhe tani kjo energji më në fund erdhi, dhe për shkak të kësaj energjie e qartësie që më erdhi në muajin e fundit jam shumë i kënaqur. Tani unë po e kuptoj se njeriu mundet me qenë çelik, që nuk mundet me e thye asgjë. Truni jonë u kthjellua dhe kjo do të jetë fitorja më e madhe, fitorja e të

gjitha fitoreve. Pas trurit njeriut po i çliroheshin muskujt dhe gjithë trupi, dhe ndien një nevojë edhe për ushtrime fizike.

Tani unë po e kuptoj se me çfarë qëllimi m'u afruan Nuhiu e ndonjë si ai menjëherë pas vrasjes. Atëherë pas vrasjes ai e dinte në bazë të ditëve të mëparshme se unë mund të bëjë diçka. Probleme tjera pos pritjes së njerëzve nuk kishte. Qëllimi i tij ishte i ulët. Ai arsyetonte kështu: ky i penës unë i masës, ky i pari unë i dyti, ky drejtori unë shoferi e marrina tjera mikroborgjeze në këtë formë deri në pakufi. Unë nuk e pranova një shoqëri të tillë dhe ndarja u bë kur erdhi Osman Osmani. Kur erdhi Osmani atëherë i dyti e gjeti të parin, harmi e gjeti thesin.

Në krizën më të rëndë, në situatën më të vështirë ishe ti, që mendove bashkë me mua se ne shokët që do të mblihdeshim rreth revistës me adresë në Suedi se ishim në rrugë të drejtë. Prandaj në disponimin e kënaqësinë time se tani po e ndiej veten çelik dhe të gjithë shokët do të çelikosemi, duke pasur pikëpamje të përafërta për thelbin e problemeve kryesore, si pjesëtarë i asaj klase që në fabrikë punon në tri ndërrime, por që edhe në ditët të njohjes të varrezat i kemi kryqë bashkë fjalët në fjalimin e rastit mbi varre, këtë kënaqësi gëzim të madh deshta së pari ta ndaj me ty.

Tani për artikuj nuk do të kemi kurrfarë problemesh. Qysh tani mund të them se janë të bëra materialet e gatshme dhe po të duami ky numër mund të dal në 28 faqe të formatit A3. Ndërsa lexuesit duhet të mësohen se tani do të ndeshen vazhdimisht me artikuj të gjatë. Po të siguroj se do të kënaqemi duke luftuar në këtë terren që kemi ra. Tani më duket një fuqi të atillë argumentuese sa fjala jonë e vërtetë ka me ra mbi kokën e serbomëdhënjeve dhe të të gjithë demagogëve më e fuqishme se njëqind plumba. Në fund të fundit me këtë letër desha të ta bëjë me dije se tek unë ka ndodhur një ndryshim i madh sa i përket plotësimit të mënyrës së të menduarit dhe pastrimit prej shumë mbeturinave mikroborgjeze.

Mund të më shkruash në adresën që e ke.

Të fala të përzemërta Skënderi (Xhafer Durmishi)

55. Letër Hysen Gërvallës, 22 korrik 1985

Përgjigje në letrën e Hysen Gërvallës

22 korrik 1985

Nga ti, Hysen Gërvalla e kemi marrë një letër të datës 12 korrik 1985. Ne e analizuam atë me kujdes, e lexuam disa herë, dhe këtu më poshtë po të japim përgjigjen tonë në letrën tuaj të datës së lartpërmendur.

Ne e dimë se jeni vëllau i dy vëllezërve që u vranë më 17 janar 1982 pranë Shtutgartit. Ky është një fakt shumë domethënës dhe i mirë për ne të gjithë, por për shkak të luftës sonë, karakterit të saj, fazave të zhvillimit të saj, vetëm kjo e dhënë nuk mjafton që ne të merremi vesh në të gjitha pikat. Prandaj prej teje kërkojmë:

1. Që të na tregosh për platformën tënde politike, pasi letra është shkruar në emrin personal, pasi ato nuk na janë të njohura plotësisht.

2. Të na tregosh se ne që na e ke dërguar këtë letër, si për kend na e ke dërguar? Sipas pikëpamjeve tuaja kush jemi ne në këtë rast para teje: A jemi grup, organizatë, dinasti, hordë, rreth familjar, bajraktarë, injorantë, grup i përkatësive primitive, komunistë, ballistë, liberal, fashistë, demokratë apo nuk po e dimë as

vetë kush jemi e nuk po e shohim veten. Për këtë arsye ne kërkojmë ta dimë se çka jemi para teje. Çka din ti për programin e statutin tonë dhe si qëndron në raport me to? Çka mendon për gazetën tonë dhe kujt i shërben ajo?

3. Të na tregosh se kush janë dy grupet tjera, që ua ke dërguar letrën dhe që je optimist se do t'i bashkosh të gjithë në një vend? çfarë pikëpamjesh politike kanë, çfarë interesash mbrohen pas fjalëve dhe deklaratave të tyre nëpër gazeta? Cili është programi e statuti i tyre, pasi ne këto nuk i dimë?

Të gjitha këto pika të ndryshimeve, të gjitha pikat e përbashkëta duhet t'i ketë të qarta një njeri që donë të bashkoj dikend, duhet t'i ketë të qarta një grup i cili donë të bashkohet me një tjetër.

Në të gjitha këto pika duami paraprakisht të sqarohemi më shumë nga ti para se nga ana jonë, të japim ty personalisht çfarëdo mendimi të mëtejshëm në lidhur me(iniciativën) letrën tënde të hapur. Në vartësi nga ajo nga ajo se si do të na sqarosh në pikat që shënuam më lartë do të mvaret edhe qëndrimi e përgjigjja jonë në të ardhshmen.

22 korrik 1985 Stockholm (Xhafer Durmishi)

Letra nga Faridin Tafallari për Xhafer Durmishin

Letrat nr. 1, 2, 12 e 20 nuk janë të Faridinit por i kam vendosur këtu, në vendin më të përshtatshëm në këtë përmbledhje. Letra nr. 22 është për Shaqir Shabanin, ndërsa të tjerat për Xh. D.

1. Letër e Shaqir Salihut për gratë e Vëllezërve Gërvalla, janar 1982
2. Shënim i Hafiz Gagicës për Faridin Tafallarin, 30 prill 1982
3. Letër e Faridin Tafallarit për Xhafer Durmishin, 28 tetor 1982
4. Letër, nëntor 1982
5. Letër, nëntor 1982
6. Letër, nëntor 1982
7. Letër, nëntor 1982
8. Letra e 2 dhjetorit 1982
9. Letra e 7 dhjetorit 1982
10. Letra e 9 dhjetorit 1982
11. Letra e 10 dhjetorit 1982
12. Letër e Mejdi Rexhës për Xhafer Durmishin, disa ditë pas 10 dhjetorit 1982
13. Letër e Faridin Tafallarit për Xhafer Durmishin, 14 dhjetor 1982
14. Letra e 20 dhjetorit 1982
15. Letra e 5 janarit 1983
16. Letra e 19 janarit 1983
17. Letra nga fillimi i gushtit 1983
18. Letra e 10 qershorit 1983
19. Letër e Faridin Tafallarit për Qendrën Ekzekutive, 6 shtator 1983
20. Letër e Xhavit Ramabajës për Faridin Tafallarin (dhjetor 1983)
21. Letra e Faridin Tafallarit për Xhafer Durmishin, fillim i janarit 1984
22. Letër e Faridin Tafallarit për Shaqir Shabanin

1. Letër e Shaqir Salihut për gratë e Vëllezërve Gërvalla, janar 1982

Të dashtuna motra e Vëllezër Gërvalla,

Na kanë tronditur lajmet mbi vrasjet e Jusufit dhe Bardhoshit. Ju lutem pranoni ngushëllimet tona më të singërta, bëhuni të forta e qëndroni edhe pse nuk është lehtë. Këtu në Amerikë kemi dëgjuar mbi ato ngjarje e gjindemi ashtu si ju të mërzhitur për ato humbje aq të mëdha.

Emnin e kam Shaqir Salihu e jam prej Prishtine. As Jusufin as Bardhoshin e as shokun e tyre nga Zvicra që u vra me ta nuk i kam njoft. Unë e kam njoft dhe e kam dashtë shumë një Idriz Gërvallën që është avokat diku në Kosovë. Tani 12 vjet që kam hik se dojshin me më burgos në Prishtinë më 1969.

Në Gazetën "Dielli" që del këtu n'Amerikë iu kam ba thirrje që të gjithë shqiptarët e Amerikës të japin kontributin e tyre me u ndihmue juve që tani keni mbetur vet. Atë fushatë po e bëjë Unë vet e nuk e di se sa pare kam me tubue por e dijë që kanë me dhanë. Ata do t'i nisin ke unë e Unë kur i tuboj të gjitha iu bëjë një çek në dollarë e iu nisi menjëherë. Por adresën e saktë të juajën nuk e kam. Këtë adresë e mora prej disa gazetave. Ju lutem nëse kjo letër iu bie në dorë ma shkruani adresën e Juaj menjëherë si dhe mbi shëndetin e fëmijëve e të Juajin dhe cila prej jush është me barrë dhe ndonjë fotografi të atyre që vdiqën për kombin tonë të varfur.

Ju lutem më shkruani se si Jeni dhe

Ju lutem qëndroni! Vuajtjet janë për ne shqiptarët. Durim.

Mbetshi me shëndet

Shaqir Salihu

nusja Ana dhe fëmijët

Iliri e Donika

Shkruani se nuk iu di adresën e sakët.

Qëndroni!

Shaqir Salihu

2. Shënim i Hafiz Gagicës për Faridin Tafallar, 30 prill 1982

Faredin, unë H. (Hafiz Gagica) isha këtu po ti ishe në punë. Far. nesër më 1 Maj na kanë thirrë gjermanët për festë në demonstratë. Takimi me gjermanët është ora 9.30 në mëngjes. E merr edhe megafonin me veti, dhe nëse don i merr edhe shokët, si ta pash të arsyeshme. Vetëm me ju tregue më mirë është. Ne takohemi ora 9.30 para stacionit të trenit në Königstrasse. Mirë u pafshim nesër në Shtuttgart.

Hafiz Gagica, ora 20.40, 30 prill 1982

3. Letër nga Faridin Tafallari për Xhafer Durmishin, 28 tetor 1982

Shoku S. 28 tetor 1982 Nagold

Letrat dhe materialin i mora sot. Materialin e dërgova menjëherë nëpër vendet e caktuara. Ja edhe ty po ta dërgoj atë material që të premtova se do ta dërgoj. Letrën e lexova dhe e kuptova. U gëzova që je mirë dhe se shoku te i cili gjendesh shumë mirë po tregon.

Kasetat e videos, nëse i marrë do t'i dërgoj menjëherë dhe për material si t'i marr t'i dërgoj, por deri më sot nuk kam marrë. Prej Ukës (Xhafer Shatrit) asgjë dhe as që u lajmëruet?

Në Austri shumë mirë kena kalua dhe shumë me interesim e kanë përcjellë programin-Filmat.

Mejdiu dhe Ismeti erdhën dhe ma morën përsëri dhe sot më lajmëruen se mbrëmë kishin pasur shumë (shikues të filmave - shën i Xh. D.) (Ata) e kanë në plan me dal kah Zvicra. Për ato të hollat, nesër do të bisedoj me Meh. (Mehdiun=Mejdi Rexhën nga Korisha) për (600 DM) dhe do t'i them për traka (shirita) të makinës. Do të interesohem për çdo gjë. Ti pe dinë se Tusha, shoqja e Bardhoshit, i ka dërgua letrat. Tani ka mbetur vetëm Suzana. Shif me ata bisedo e le t'i dërgojnë sa më parë. Haxhiu (Haxhi Berisha) më tha që ta marrësh në telefon, ka diçka me të pyet.

Në Bruksel do t'e dërgoj nesër kasetën por do t'ju them që të ma kthejnë e jo ta bëjnë për vete.

Merëm në telefon. Me të holla si je?

Të fala nga F. (Faridini)

4. Letër nga Faridin Tafallari për Xhafer Durmishin, nëntor 1982

Shoku S.

Të hollat për gurët i tubuam, 2500 DM. Por shumë me komplikime diçka edhe për me ju kthye. Tani ka mbetur që të paguhen edhe 800 DM firmës së gurëve. Po edhe kësaj do t'i përballojmë. Na ndihmuan edhe Meh. (Mejdi Rexha) dhe Ismeti (Ismet Klaiqi) kësaj radhe, edhe diçka kemi mbledhur për ndihma. Biseduam me avokatin që para 28 Nëntorit të vendosen (gurët në varret e Jusufit, Kadriut e Bardhoshit-shën i Xh. D.)

Ne e mbajtëm një mbledhje lidhur me kremtimin e festës dhe për sallën e të ndryshme. Salla ku kemi qenë vjet, vitin e kaluar, ishte e zanun më 27 të 11. Dhe tani jemi ende pa gjetur sallë. Po ti përgatiti ftesat dhe unë së shpejti do ta dërgoj edhe adresën e vendit ku do ta gjejmë.

1. Shaqa (Shaqir Shabani) bisedoj me mua dhe më porositi me bisedua me ty dhe me e njoftue se ku do të mbetet me e festua Shaqa 28 Nëntorin. Nëse duhet të vjen këtu, atëherë sipas mundësisë tha që ta caktojme me shkua në Vjenë.

2. Më bëri pyetje se a kam të drejtë me bërë ushtar (shokë) se si më njoftoj atje është shumë mirë duke shkuar puna. Unë i thash po bisedo me S. dhe S. të lajmërohet me letër. Pra nëse ke mundësi përgjigjiu në pyetjet që i ka shtrua.

Salla do të na duhet të jetë më e madhe, se si po shifet do të kena njerëz e mos të jetë tepër ngushtë. Ti a mendon me i ftue ata shokë atje dhe Ramitin.

I dhashë fund se po ngutem për në postë.

Të fala F. (Faridini)

5. Letër e Faridin Tafallarit për Xhafer Durmishin, nëntor 1982

Shoku S.

Uka më porositi që të lajmëroj sa më parë se "Komunikatën" e Ilirisë të Bel-Br. mos me e botuar, se Uka e kishte marrë një letër prej 8 faqe dhe se i kanë kritikua shumë ata njerëzit e Ilirisë.

Atë faqe të "Komunikatës" hiqe nga organi se Uka tha që duhet të bisedojmë me Kamerin (Sabri Novosellën), të konsultohem e çka po thotë Kameri.

Porosia e Ukës është që kësaj radhe të mos botohet "Komunikata" e Ilirisë.

Më pyeti se në sa faqe do të dalë dhe a është gati, dhe një artikull e kishte dërguar te unë javën e kaluar por unë nuk e kam marrë atë letër.

Po ta dërgoj këtë trakt të cilin e mora në Ingolshat te Neziri, të cilin e kishin shpërnda në atë rreth. Se kush nuk po e dinë njeriun. Në letër nuk po e zgjasim por mirë është që të më marrësh në telefon.

Ditën e mirë. Të fala F. (Faridini)

Kësaj jave jam në ndërrim të parë. Kohë nuk pata dhe nuk kam që t'ju shkruaj atyre në Belgjikë dhe Muhar remit në Munchen. Po lajmëroju ti se jemi të zanun me gurët dhe nuk e di a do të marri fund ... brenda një jave.

6. Letër e Faridin Tafallarit për Xhafer Durmishin, nëntor 1982

Shoku S.

Dje dhe sot i mora letrat tua së bashku me adresat. Meh. (Mejdi Rexhës) nuk ia kam dhënë se nuk jam takuar por duhet që të takohemi dhe të bisedojmë për një sallë apo lokal për festën e 28.

Nuk do të ketë problem, pasi që çdo rreth po e feston veç e veç, do ta kemi më lehtë për të gjetur sallë. Por sidoqoftë duhet të vendoset se ku dhe për t'i informuar shokët pak më herët.

Si po shifet, sa për letrat e Suzanës do t'i vonojnë ose nuk do t'i dërgojnë hiq, por neve na duhet që këtë punë (detyrë) ta kryejmë qoftë edhe me të holla se përndryshe njerëzit do të na keqkuptojnë. Unë bisedova me Namiun dhe me Hafizin që ta bëjmë një kontratë me ata njerëz që po i kërkojnë këto, një afat deri më të parin 12 (1 dhjetor 1982). Nëse nuk na vijnë letrat atëherë do t'ja paguajmë kurse gurët (e varreve të Jusufit, Kadriut e Bardhoshit) të vendosen sa më shpejt.

Bisedova me Ukën (Xhafer Shatrin) javën e kaluar në telefon. Ishte shkua në spital dhe ishte bërë merak për ne, sidomos për ty që e kishe kërkuar në telef. e nuk kishte qenë aty. Por unë ja sqarova se jena mirë dhe të tjera. E informova dhe për të holla se na duhen për Z. e nr. 2 dhe të tjera. Uka tha se do t'i dërgojnë 2000 Franga. Ende s'i kam marrë.

Të shtunën dhe të dielën ishim në vizitë te do shokë në Zvicër dhe mirë kaluam. Kishte djem të mirë por duhet që ndokush t'i informon, të shkon pak më shpesh. Unë ia qova një letër dhe faqen 7 të materialit Shaqës dhe i thash që të merr kontakt me tezakun tim se aty afër Shaqës ishin, 30-40 km larg tij. Pak e njoftova edhe tezakun se do të vjen një shok dhe me atë i thash mos kij kurrfarë frike. ...

Rrotullat (shiritat e makinës së shkrimit-shën i Xh D) e kauçikut unë nuk po i dijë se cilat janë. As letra të holla nuk ka në kofer. E di se ka pas më përpara por sot gjithkrah i kërkova dhe nuk i gjeta. ...

Të fala F. (Faridin Tafallari)

7. Letër e Faridin Tafallarit për Xhafer Durmishin, nëntor 1982

Shoku S.

Letrat me letra i mora dje sot ato që duheshin shpërnda i dërgova nëpër vendet e caktuara. Ti dërgova dy trakat (shiritat) e makinës dhe ja sot po t'i dërgoj edhe këto materiale që sot i mora. Kurse kasetat prej Munchenit si kam marrë. S. shih për letrat që duhet dërguar Suzana nga Shq. (Shqipëria). Mos t'i vonojnë se njerëzit janë tepër të interesuar se çka po bëhet me gurët (e varreve të Jusufit, Kadriut e Bardhoshit-shën i

Xh. D.) dhe kësaj pune duhet t'i japim fund bile para kremtimit të Festës së 28 Nëntorit të jenë të vendosur.

Po më vetin njerëzit edhe për Festën se ku do ta festojmë dhe për këtë duhet me u angazhua se koha po afrohet e ta dimë që të mos vjen kah fundi e mandej të bëhet për së nguturi.

Një ditë erdhi Has. (Hasan Veselaj) dhe Sahi. (Sahit Tofaj) te unë. Morën Z. (Zërin) Nr. 1-2 dhe hynë pak rreth situatës së N. (Nuhi Sylejmanit) dhe Nexh. (Nexhatit=Osman Osmanit). Me çfarë qëllimi e patën nuk po e di, por për ata të dy nuk folën mirë, sidomos për Nexh. (Osman Osmanin). Për N. (Nuhiun) e kritikuan me ca fjalë të ndyta dhe thanë se i kanë thënë N. (Nuhiut) se ato fjalë që i kam dëgjuar te ata shokët, nëse janë të vërteta, po të isha unë si ti do të mbytesha. I bana pyetje për Nexhatin (Osman Osmanin) se a po takohen. Jo tha Nexh. tha u hup si me mos pa qenë kurrë edhe e tija tha s'po merret vesh..

Sahiti tha unë nuk po di se si po shkon kjo punë. Kur e bëra atë udhëtim me Nexhatin më thoshin se është shok i mirë, kurse tash po thonë i keq. Pse të mos më tregojnë më parë..

Po unë tha jam që të gjithë të bashkohemi e t'i lamë thashethemet.

Hasani tha se Nuhiu me të vërtet në kohët e fundit filloj të përhap fjalë të këqija kundrejt disa shokëve dhe tjera e tjera.

U interesuan se a po takohem unë dhe ti dhe ku gjendesh. I thash se nuk di, po lajmërohet ndonjëherë në telefon ju thash...

Më shkruaj për të gjitha

Të fala F. (Faridini)

8. Letër e Faridin Tafallarit për Xhafer Durmishin, 2 dhjetor 1982

Shoku S.

2 dhjetor 1982

Unë dje isha në Ludwigsburg dhe u takova me Hafizin dhe Haxhiun. Biseduam pak rreth 28 Nëntorit dhe të ndryshme. I mora edhe një mijë copë Zëra të Kosovës dhe kah u ktheva shkova tek Mejdi Rexha. Aty takova edhe Selim Kocën dhe biseduam rreth kësaj dasme që po afrohet, si po dihet ditë pune. Por nuk po e di si do të bëhet, a do të dalin apo jo. Për disa po e di por pak. (Mejdiut) ia dhashë edhe 80 ZK (Zëra të Kosovës) dhe thirrjet dhe i porosita që t'i lajmërojnë çdo njeriu ashtu edhe Selimi.

Për Abdurr. (Abdurrahman Sadikun) edhe unë isha i habitur por ai kishte qenë tek shtëpia në pushim...

Sa për punë, shumë punë jam kah i bëjë me Hafizin se të tjerët jo aq të gatshëm. Lajmëroju njëherë në telefon zotit E. (Engjëll Kolanecit) se ai më tha se do t'i qoj letrat e Suzanës dhe nuk po i qon. Ti e di se i kemi edhe 1500 DM për ZK me i paga. Ismeti dhe Mejdiu e dinë se do t'ju kthehen të hollat.

Pasi Engjëlli më ka thënë se (letrat rreth çështjes së gurëve të varreve-shën i Xh. D.) se ne e kena borxh që kur të vinë letrat e Suzanës me ua kthye të hollat, se nuk janë pak, për ne janë mjaft 2500 DM. Apo ta marrë unë e t'i them se nuk jena asish të rrugëve që të bëjnë si të donë ata.

Sot e mora kryetarin e Klubit "Emin Duraku" dhe i thash se do t'i bije thirrjet dhe ZK, për nesër të premtën do t'ia qoj vet dhe do të kthehna menjëherë. Do të shkoj me tren se kështu më tha Uka. Dhe sigurisht shumë mirë do t'ju vjen...

Për në Turqi më trego sa copë me i dërgue dhe adresën. Thuaju se këtë e kërkon Mejdiu se kështu e bëmë dje. Për video u kuptuam. Në Troisdorf janë shpërnda kaseta dhe i shkruajta një letër Qazimit, si më the vet.

Për një klub apo dhomë jemi të interesuar për ta gjetë. Bile si të mundemi në Ludwigsburg me mirë. Kemi shpresa.

Murati në Bernhausen më tha që ta marrë videon dhe fëmijët e të shkoj të dielën e të bisedoj.

Të fala F. (Faridini)

Nëse e ke numrin e tel. ose adresën e Has. ma dërgo se nuk po e dijë.

9. Letër e Faridin Tafallarit për Xhafer Durmishin, 7 dhjetor 1982

Shoku S. 7 dhjetor 1982

Sot i mora letrat tuaja dhe i dërgova por pata pak vështirësi derisa e gjeta numrin e telefonit të S. Bytyçit dhe nuk jam i sigurt a është ky numër apo ndonjë tjetër. Por unë e shënova këtë numër: 21288802. Vetëm këtë e gjeta. Unë kalova shumë mirë në Dyseldorf. Biseduam me të dy Bacat, me Zymer Kryeziun dhe me B. Avdi (Abdyl Begishollin). Më pyetën për ty si je dhe të bënë të fala shumë. Dhe me Hyzriun (Hyzri Rekën) hymë lidhur me Nuhiun. Unë pak i njoftova se si ka qenë puna me sa mujta veçse edhe ata e kishin marrë në sy prej më përpara, ja kishin parë fytyrën e tij të shëmtuar. Mua më bëri pyetje edhe një tjetër por atina i tregova se është mirë dhe me familje mirë. Aty më kishte vërejt Baca Avdi dhe kur mbetëm unë dhe Baca me Hyzriun, më tha se ashtu duhet që të mos ta dinë të gjithë se çka ka ndodhë ose kush është Nuhiu, derisa ta shpallin të gjithë një zëri. Baca Avdi më pyeti për ty, tha a është me ju Skënderi apo me Nuhiun. Unë i thash me ne ka qenë dhe është dhe ne jena me ta.

Më porositën që të kena kontakte më shpesh dhe të bashkohemi që të mos na përçanë kush se këtu po flasim keq për ju..

Pra nëse ke ndonjëherë mundësi merre Hyzriun në tel. se e kishte në banesë dhe mua ma dha (numrin). Dhe nëse të pyet i thua se unë ta kam dhënë numrin. I thash Bacit Zymer dhe Bacit Avdi të dalin nga ne. Hyzriu dhe Baci Zymer kishin qenë në Bruksel për 28 Nëntorin dhe kishin kaluar shumë mirë. ...

Për leje me kalua për dasmë i tregova H. dhe ai e lajmëroi një ... (të afërm - shën i Xh. D.) të vetin dhe tha se do ta qon atë letër. Pra merre në telefon. Uka më tha thuaj Skënderit që e ka marrë letrën tënde.

Të fala F. (Faridini)

E kam shkrua shumë për së shpejti që mos ta vonoj.

10. Letër e Faridin Tafallarit për Xhafer Durmishin, 9 dhjetor 1982

Shoku S. 9 dhjetor 1982

Unë i lexova letrat tuaja dhe jam dakord me të gjitha. Për dasmë Uka tha që të vish mirë por pasi e ke të hanen me u lajmëruë atëherë nuk po e shoh të arsyeshme që të udhëton me letër të huaj, se edhe nuk po përngjan në ty. Letrave ju bëra një fotokopje dhe i ndala kur të tjerat po t'i dërgoj së shpejti. Mbrëmë më muar në telefon E. (Engjëll Kolaneci) dhe më tha se letrat t'i kam dërguar 2 herë dhe u janë kthye? I thash që t'i dërgon në emër të Besimit. Ndoshta thash do të vinë pra mirë ju pafshim.

Uka më tha se e kishte marrë letrën tënde me shumë fleta dhe tha jam dakord me pëlqimin e tij dhe sa më parë me u takue.

Të fala F.

11. Letër e Faridin Tafallarit për Xhafer Durmishin, ndonjë ditë pas 10 dhjetorit 1982

Shoku S.

Ramiti ishte edhe në dasmën (demonstratën e Gjenevës-10 dhjetor 1982) dhe ndejti nja dy ditë te unë.

Një letër ta kam postue së bashku me të Hafizit. A i more apo jo më shkruaj se ndoshta ka humb, se në atë letër i futa 20 DM e bën që i qelin për shkak të të hollave. Aty ka qenë një letër me më shumë fjalë. Sa i përket ZK (Zërit të Kosovës) edhe kësaj radhe e shpërndava unë, me anë të postës nëpër shumë vende në Turqi, Australi, në Gjermani, Argjentinë, po edhe Ahmetit (Ahmet Sadikut) e Besimit (Besim Rexhës) ua postova nga 20 copë. Në Australi (Shoqërisë Bajram Curri) 50 copë e kështu që më kanë mbetur edhe 30 copë dhe këto i lash për diku më me rëndësi. Për Zërin, me këtë numër shumë janë kah e lavdërojnë.

Për Shaqën, mbramë bisedova në tel. dhe e veta më konkret për atë material. Më tha se e kam përdorë nëpër shumë vende në biseda ku kam qenë nëpër shokë, kurse për 28 Nëntor tha se edhe ata që e kishin përgatitur ngjashëm me këtë me data e tjerë dhe nuk kishte pas nevojë ta lexon, kurse nëpër vende të ndryshme shumë kishte bisedua për përmbajtjen e tij. I thash që ta dërgon tek unë, tha ani dhe të bëri shumë të fala.

Shaqirit (Shaqir Shabanit) shkruaji se shumë bënë pyetje për ty sa herë që paraqitet në telefon. Edhe Meh. (Mejdi Rexhës) i shkruan po jo shumë dhe thuaj për ata çeka që të m'i jap mua. Këto ditë i ka vdekë një mixhë. Thuaj që për çdo rast le të paraqitet tek unë, dhe i thua se ti paraqitesh tek unë...

Të fala F. (Faridini)

12. Letër e Mejdi Rexhës për Xhafer Durmishin, disa ditë pas 10 dhjetorit 1982

Tungjat jeta shoku S.

S'pari po ju kërkoj falje që jua vonova përgjegjen, por më beso se s'e kam lan për nasgja, por kushtet kurbetqare s'po na lan asnjë punë ta kryejmë si duhet, po mendoj me kohë. Shoku S., ju falemnderit në ngushëllime, por do të mundohem të mahemi të fort pa tjetër, se e dimë që kështu e ka jeta.

Shoku S. unë deri diku u mundova që t'i kryej qato porosi që m'i kishe dhënë.

Sa i përket qëtyne të hollave që janë dërgu në konto të Kosovës, këto jam mundu, dhe deri diku i rregullova. Janë edhe 2 vende këtu në Sindelfingen të cilat janë kanë të autorizuar me i tubua të hollat, ku unë mendoj për së shpejti do t'i siguroj edhe ato e do t'i dërgoj ty, por me qata emna që Nuhia i ka tubua s'po di si t'ia bëjë. Më trego çka me ba.

Shoku S. ne të gjithë jemi mirë me shëndet, ashtu edhe me punë. Me thanë të vërtetën unë kam pas dëshirë të takohem dhe të bisedojmë kështu rrafsh për shumë gjëra se po kam frikë mos në të ardhmen do të na sjellin përsëri pasoja, pasi që edhe fjala popullore thotë se tesha qysh të vishet edhe shtirret. Për këtë arsye edhe është kanë më se e domosdoshme të bisedonim goja gojës, se ty të kujtohet qysh kur jeni kanë hala pa u prish me N. (Nuhion), t'i kam pas thanë do fjalë të te, e tash zavendësi i tij sa i përket për ne, disa na metodat e të përparshmit qysh në fillim po i përdor. Për këtë arsye pra është kanë ma mirë të ishim takua. Shoku S. nuk po e zgjati shumë se mos po bëhet e tepërt. Sa për të dhënat e Islamit dhe të Shabanit asht kanë më mirë t'i drejtohesh Ismetit

pasi që ai i njeh më mirë. Pra më lejo t'i përcjell përshëndetjet më të sinqerta, dhe mirë u pafshim. M. (Mejdi Rexha)

13. Letër e Faridin Tafallarit për Xhafer Durmishin, 14 dhjetor 1982

Shoku S. (Xhafer Durmishi)

14 dhjetor 1982

Po të informoj me disa gjëra ma konkrete. Organizimi i dasmës (demonstratës së 10 dhjetorit 1982 në Gjenevë-shën i Xh. D.) ka qenë në rregull edhe pse ishte ditë pune por mirë u tubuan me autobus. Ka qenë tridhjetë e dy pjesëmarrës. Kështu që gjatë udhëtimit mirë kena kaluar, edhe atje kur arritëm u mbledhën mjaft punëtor sa që s'kena pritë aq. U takova dhe me U. (Uka=Xhafer Shatri-shën i Xh. D.) qysh në fillim dhe më pyeti për ty. Unë i tregova se nuk ke pasur mundësi për shkak të letrës së udhëtimit dhe se ke pasur që të paraqitesh të hanen te avokati. Uka më tha u dashtë që të vije dhe për atë që duhet për bisedime se edhe e kishin siguru një vend për bisedime. Darsmën e filloi U. me pak dhe ashtu ka shkuar deri në mbarim. Shumë në rregull ka shkuar, dhe nga ana e Zvicrës janë shumë me sukses sa e pranuan. Pas demonstratës u kthyem në klub të Gjenevës dhe aty U. më muar në një dhomë dhe biseduam gjerësisht për Nuhi (Sylejmanin), bacën Ja (Jahir Jahirin), Has. (Hasan Veselin) dhe Sah. (Sahit Tofajn). Por Uka me plotë të drejt kishte që të thoshte se ne aspak mos të ngutemi dhe sa ma fort ta ruajmë gjakftohtësinë. Se si të kam shkruar edhe më parë se Hasan Veselaj dhe Sahit Tofaj janë munduar që të pengojnë organizimin tonë me autobus në shumë vende, mirëpo si më parë ashtu edhe kësaj radhe dhe në të ardhmen do t'ju dështoj. Unë si shumë herë që i kam informuar shokët edhe kësaj here (dhe herët tjera do t'i lajmëroj shokët) shkova te baca Jahir tri herë dhe në herën e mbramë, shkova dhe i thash se në sa ora po nisemi dhe i thash të bëhet gati në mëngjes pasi pat premtue se do të vjen me autobus. Më tha se unë nuk mund të vij se nuk po më lejon firma. Por kur pe shoh në Gjenevë para meje kishte mbërri me grupin e Nuhiut. Mua ajo aspak nuk më befasoi se atë edhe e pata mendua. Por edhe në darsëm janë mundua të bëjnë diçka po s'mujtën. Këto ia thash dhe Ukës, por U. thoshte që të mos ngutemi. Një natë para dasmës fola edhe me Hasan Veselin në telefon dhe me ca fjalë në fillim më të buta por më vonë dhe më të egra dhe ia thash atë që kërkonte. I thash se je përçarës i shoqërisë dhe asgjë tjetër dhe se nuk do t'ia arrin dot ... do të pengohesh nga ata vet të cilët mundohesh t'i gënjen. Mua më lypi një takim qysh atë natë në telefon dhe me këmbëngulje. Një gjë të pamundur. Ai mendonte se edhe unë do të pranoja një gjë të tillë, që kurdo që Hasan Veselit t'i tekej një mendim dhe ne menjëherë t'i marrim njerëzit të cilët janë të gatshëm për punë e jo për gjykim e thashetheme. Kur pash që ora (ishte) njëmbëdhjetë (23 i natës) atëherë edhe unë këmbëngulje i thash se jo dhe jo, pikë. Atëherë më kërkoi tjetër takim me tërë shoqërinë dhe me ata shokët e Vaiblingenit. Por edhe këtë e refuzova, e pash të paarsyeshme se aty kishin me qëllim që shoqërinë ta marrin nëpër gojë dhe të kenë e të bisedojnë me atë gojën e tyre të fëlliqur për asgjë tjetër vetëm të kenë të flasin ato që ne as që duhet me merremi... Ashtu edhe me një tubim të dielën që u takuam me shoqërinë tonë më të afërt i biseduam dhe mbeti që kjo të mos na brengos. Por nëse janë për punë le të urdhërojnë, e sa për fjalë jo. Se unë i thash Hasanit mos je kah flet në emër të kolegut tënd, dhe ai më bëri shumë pyetje se cili është kolegu im. Unë i thash Nuhiu. Mu përgjegj se s'e ka ai koleg por ne e kemi koleg, kurse në darsëm ai ka ardhur me te. Në darsëm më folën të dy Hasanat dhe Sahiti dhe unë ju fola. Sahiti më tha kemi dëshirë të bisedojmë me ty, se mos po të shtin dikush prej nesh që të mendon keq. Unë i thash se kurrë nuk mundet me më shti dikushi që të flas keq për ju, por unë e fola atë që u deshtë dhe se jam i gatshëm t'ju përgjigjem kur do që të doni me mua ose me ndonjë tjetër, me tërë shoqërinë jo.

Uka pasi që bisedoj me mua, bisedoi edhe me Hafizin (Gagicën) e Haxh. (Haxhi Berishën), por me këta shumë pak dhe mandej ka biseduar dhe me Nuhiun. Mua Shaqa (Shaqir Shabani) më tregoi se ishte takuar me Nuhiun.

Pas takimit (të Ukës) me Nuhiun unë nuk e takova Ukën. Për ... takim U. nuk ma caktoi kohën as përafërsisht vetëm që tha duhet sa më shpejt. Ja kërkova atë që më porosite (artikujt) nëse janë të gatshëm por nuk m'i dhanë dhe më porositi që të mos paraqitesh aty ku nuk e ke rrethin më të ngushtë (për azil). Organi kësaj here do të ketë më tepër për shokët e ramë dhe më tha më 15 janar me qenë i gatshëm që atë ditë të shpërndahet.

Ne Shoqëria e Shtutgartit kena vendos që ta përgatisim një gjysmë drame e cila do të bëhet prej 5-6 personave. Kjo dramë do të ketë përmbajtje përafërsisht; një udbash, një kriminel, një spiun, i cili do ta luan rolin herë të udbashit herë të revolucionarit, dy revolucionarë dhe një plak që do t'i përkrah revolucionarët dhe një milic që nuk do të flet hiq. Kjo mendojmë për 15 janar të jetë e gatshme por është pika kryesore që a do të mundesh me e përgatitë tekstin brenda kësaj jave ose tjetrën se nuk dije a do të munden Hafizi e Haxhiu ta përgatisin se nuk kishim kohë që të bisedojmë atë ditë të diell por ata garantuan që do të bëhet teksti po s'po e dije ende se (a do ta bëjnë ata vetë) apo folën në emrin tënd?...

Për takimin me Hasanin dhe Sahitin do të takohem sipas porosisë... se me ta nuk e kena prish që të mos takohemi, por me takime të shëndosha e jo të ndërhyrjeve pa lidhje. Sa për një takim ndoshta hiq më larg se nesër. Do të shkoj te të dy dhe do t'i falenderoj për ato që më ke shkruar.

Për këtë dramë që ne kena mendua për nder të vëllezërve, për kujtim të njëvjetorit bisedo ndash dhe me U. e si ta shikoni të arsyeshme ashtu vendosne, vetëm duhet sa më shpejt që të kemi kohë për ta ushtruar.

Më lajmëro çka bëre, a u lajmërove?

Këtu po ta shënoj adresën e Hyz. (Hyzri Rekës) dhe tel., po ashtu edhe adresën e Hafizit.

Të fala F. (Faridin Tafallari)

Adresa e Hafizit: Sinan Gagic
Karlstrasse 11
7140 Ludwigsburg

Adresa e Hyzriut: Hyzri Rekaj
Mintorpstrasse 27
4 D-dorf

Tel në punë: 0211 224006

Tel në banesë: 0211 329739

14. Letër e Faridin Tafallarit për Xhafer Durmishin, 20 dhjetor 1982

Shoku S. 20 dhjetor 1982

Këto që po t'i dërgoj janë të marruna nga Neziri i Neuburgut. Mua m'i dha Hafizi, dhe ja tek po t'i dërgoj të cilat janë edhe të shënueme se prej kujt janë. Unë me Hasanin (Veselin) dhe me Sahitin (Tofajn) nuk jam takua. Një ditë u mundova që të takohem por nuk ishin të pajtimit Haxhiu dhe Hafizi dhe unë prita që po më lajmërohet Hasani por ai s'u lajmërua dhe kështu mbeti.

Unë i largova nga banesa të gjitha ato që ishin më me rëndësi dhe i kam shumë në vend të sigurt ku askush s'e di. Deri sa të kalon kjo situatë para vitit 1982. Të kesh

kujdes edhe ti. Ti nuk më shkruajte se çka bëre për vete dhe U. (Uka) nuk u lajmruer. Unë e kam një numër që Uka ma dha në dasëm por nuk po e shoh që arsyeshme që unë ta marrë ne tel. para se ai të më merr, dhe unë s'kam çka t'i them.

Ne vendosëm që ta përgatisim një gjysmë dramë me afër 30 minuta. Me siguri tekstin do ta dërgon Hafizi. Më shkruaj diçka për përgatitjen e 15 janarit, për sallën që ta sigurojmë dhe a ta marrin atë të vitit të kaluar, ku e kremtuam 28 Nëntorin, që të mos bëhet vonë dhe të tjera.

Meh. (Mejdi Rexhës) i thash që të m'i dorëzon çeka, në (bazë) të porosisë tënde. Mejdiu i kishte dërgua edhe ato 600 DM në konto.

Haxhiu kishte mbërri mirë në Zvicër. Isa Demi po shkon te shpija më 23 dhjetor. Kishin ardhë nja 2 shokë te do shokë e i kishin thënë mos u ngut se do të bëhet diçka se ashtu po pritët dhe se kjo dasma e Gjenezës ka dhënë një jehonë të madhe në Kosovë, se ata janë ardhë para dy dite nga Kosova.

Sot i mora 10 libra nga Vjena të shokut E. H. me titull "Titistët" me 600 faqe. Këtu dhomën që e kena marrë po takohemi ... dhe po bisedojmë. Jena 10 anëtarë që po paguajmë nga 50 DM në muaj. Njëherë është kah shkon në rregull.

Të fala F.

15. Letër e Faridin Tafallarit për Xhafer Durmishin, 5 janar 1983

Shoku S. 5 janar 1983

Po të lajmërohem nga spitali. Në spital erdha se isha shumë keq prej barkut. Për herë të parë jam shtrua në këtë spital se kam dëgjuar shpesh fjalët e popullit kur thonë se as armikun mos e pasha këtu.

Tani jam mirë por si po shifet këta dojnë të më mbajnë më gjatë por unë do të lypj që më 14 janar 1983 të dal nga spitali. Sot po t'i dërgoj artikujt që i mora nga Uka, dhe po t'i dërgoj me postë të shpejtë. Sa i përket letrave që vinë nuk ka problem se pa humbje shoqja dhe unë po i dërgojmë menjëherë (në të vërtetë shoqes po ja jap).

S. për fotografinë e Hydajetit ndoshta është vonë me ta dërguar por ma mirë ti leja vendin dhe le ta merr Hafizi te Remziu dhe atë ditë që i qon atje e qon edhe ate. Për tjerat që duhet me ja dërgua U. nëse nuk është me shumë rëndësi le të mbeten kur të dal nga spitali se janë në tjetër vend. Thirrjet i shpërndava dhe shumë mirë ishin të shkruara.

Të fala F.

Sa për sallën është shumë e mirë dhe për leje nuk do të ketë problem. Edhe për gjërat tjera të gjitha në rregull.

16. Letër e Faridin Tafallarit për Xhafer Durmishin, 19 janar 1983

Shoku S. 19 janar 1983

Për bisedën që bëmë rreth Kp se me u çue pasi Abdyli nuk u ardhë, mundesh me e que edhe te R. se e para s'mund ta kupton se çka është dhe e kishte dhomën që nuk po i përzihej tjetër. Por ti bën si ta merr mendja. Unë të njoftova edhe për të hollat që i kena borxh. Se me të vërtetë janë shumë dhe duhet që t'i paguajmë patjetër dhe se nga rrethi ynë janë bërë tepër dhe s'keni kujt t'i drejtohem, kurse borxhilit po i lypin të vetat, të cilat do t'i radhit këtu ma poshtë. Por në anën tjetër nuk duhet që të na skuq kjo punë, se duhet të dihet se këtu ka qenë puna më tepër dhe sidomos me të hollat. Këto të gjitha janë të shënuara dhe do të shënohen edhe më tej:

Ja po i shënoj të gjitha me radhë:
1500 DM Për numrin e ZK (Zërin e Kosovës) nr. 3
2000 DM Për numrin e ZK (Zërin e Kosovës) nr. 4
1000 DM Për gurët (e varreve të Jusufit, Kadriut e Bardhoshit) që janë mbetë borxh qysh nga viti 1981
500 DM Për pllakat që i kanë qitë rretheve (të gurëve) dhe për pastrimin që i pastrojnë gjatë vitit,
500 DM Për avokatin, vetëm kësaj herës së fundit që na ka ndihmua për gurët që i vumë,
1000 DM Për Mejdi (Rexhën) dhe Ismet (Klaiqin) që i dhanë për autorizimin e Suzanës. Por për këto unë si të thash nuk ju kam garantue që ju kthehen (shumë më mirë me ju kthye)
Këto i kena për t'i paguar. Dhe unë jam i mendimit që këto t'i paguajmë dhe mos të na mbeten që të na tubohen shumë e mandej s'po kena aq pare që t'i paguajmë të gjitha.

Të fala F.

S. Shiqo me Ukën, bisedo për këto që të shkruajta e t'i heqim e të marrin drejtimin të dimë se çka me bërë.

Sqarim:

ZK = Zëri i Kosovës, që ka kushtuar botimi.

Gurë - është fjala për gurin e varrit të Jusuf Gërvallës. Për Jusufin është paguar në veçanti, se si azilant qyteti nuk e ka ndihmuar.

17. Letër e Faridin Tafallarit për Xhafer Durmishin, fillim i gushtit 1983

Shoku S.

Mbrëmë bisedova me shokun Xh. (Xhafer Shatri) dhe më porositi që të premtën me i njoftue shokët e Munchenit që edhe ata të tubojnë sa më shumë njerëz dhe të marrin pjesë na varrimin e atij kroatit (Stjepan Gjurekoviç-shën i Xh D.), Drejtor i INA-s. Dhe një shok prej tanëve me nja dy fjalë me i que ngushëllimet në emër të popullit shqiptar. ... Ky është një njeri që shkroi për demonstratat në Kosovë...

Të fala F.

Shoku S. edhe leximin tënd me e fotokopjue dhe me ua dërgue në Turqi shokëve. Kështu më tha Xhema (Xhafer Shatri).

18. Letër e Faridin Tafallarit për Xhafer Durmishin, 10 qershor 1983

Shoku S.

10 qershor 1983

Do të ishte mirë që në javën e ardhshme të dalësh nga ne, pasi që janë tri ditë pushim dhe ta shfrytëzojmë kohën që të dalim dikah nëpër punëtor. Sidomos në këtë situatë kur njerëz të tipave të ndryshëm apo t'i quajmë reaksionar që mundohen ditë e natë duke mos pushuar me propagandat e tyre të fëlliqura, kur neve na presin si shokë dhe vëllezër nëpër çdo vend dhe kanë dëshirë që të bisedojnë. Pra pse ne mos t'i vizitojmë që t'ja mbyllim rrugët armikut!

Ne para tri jave ishim në Ingolshat dhe aty na pritën shumë mirë dhe para se të ndaheshim na porositën që sa më shpejt t'i vizitojmë edhe njëherë dhe na thanë sipas mundësisë nga mesi i këtij muajit. Dhe na u lutën që sipas mundësisë t'ju qojmë edhe ca këngëtarë me vegla muzikore që ata t'i informojnë shokët për një mbrëmje dhe do të kish shumë sukses. Nëse kishe mund me Xhavitin të bisedoje që ai t'i kishte marrë ata të rrethit të Bielefeldit dhe t'ja kishim kushtuar asaj shoqërie, pasi që janë të gatshëm për çdo gjë edhe pse pak larg, do t'ju kushtoj rruga por në anën tjetër do të bëhet shumë mirë. Pra shif në këtë drejtim dhe na lajmëro sa më parë. Për këtë të ka shkruar edhe Hafizi, por ja edhe unë.

Tjetra, disa shokë në Augsburg edhe ata kanë shpreh dëshirën për një vizitë dhe aty do të ishte mirë për t'i vizituar dhe së bashku do të shkonim në Ingolshat. Unë isha javën e kaluar te Murati dhe ai më tha të shkojmë si të mujmë. Pra mendo në këtë drejtim më tepër. Mendoj që pikë e parë është që edhe këtu të rrish disa ditë nëpër shoqëri se është më se e nevojshme. Imerjahi i Dyseldorfit më muar në telefon dhe ai kërkoi që ne me shkua te ata për një vizitë pasi që edhe atje nuk janë mirë. Për ty i thash që njëherë është i zanun me punë, kurse për ne i thash të shohim me Remziun dhe Shabanin e një apo dy të tjerë me dalë, por vetëm në mënyrë shoqërore me bisedue dhe asgjë në emër të Lëvizjes. Edhe baca Zymer (Kryeziu) na ka thirrë për një vizitë si bashkëvendas para një kohe. Unë me Imerjahin kam biseduar për disa punë si arkatar i klubit dhe besoj se do të bëhet mirë. Pra më porositi që ti me e marrë në telefon. Numrin më tha se e ke, por qe ku po e shënoj: 0211784472.

Këtë të shtunë e kemi një takim me shokët, Mejdi (Rexha), Shaban (Bobaj), Hafiz (Gagica), Nami (Ramadani) dhe unë për ta lexuar Qarkoren e dërguar nga Redaksia e Zërit të Kosovës. Këtë takim do ta bëjmë tek Mejdi (Rexha).

Të fala F.

19. Letër e Faridin Tafallarit për Qendrën Ekzekutive, 6 shtator 1983

Shokëve të QE (Qendrës Ekzekutive)

Të dashur shokë,

Nuk po ndalem në atë që të kërkoj falje për mos shkruarjen e letrave, por unë në letrën e më parme të Xhemë ju përgjegja vetëm shokut Xh. me një letër të shkurt në disa pika të shkurta dhe ajo që shoku Xhemë i patë propozue unë isha plotësisht në pajtim në përgjithësi dhe ashtu mbetem. Më vonë mora dhe letrën nga shoku Il (Ilaz), një letër prej 9 faqesh dhe të cilën e lexova më ngadalë (se unë e kam si zakonisht që t'i lexoj nga dy apo tri herë por kësaj radhe vetëm njëherë se vërtetë ishte pak e gjatë dhe prandaj e lexova njëherë por ngadalë. Kurse unë nuk e mora makinën as në dy faqe, e kësaj çka me i thanë? Pra vet po i përgjigjem jo mirë e jo drejt dhe jo gatishmëri, por po e them atë të shokëve dhe ne duhet dhe duhet patjetër pak e jo aspak.

Me shokun Il (Ilaz-Ibrahim Kelmendi) kemi patur rastin që mbas ngjarjes së rënjeve të shokëve ku në ato qaste ishte nevoja që të tubojmë ndihma për familjet e shokëve (dhe tani) por nëpër disa rreth na premtonin shumë por me fjalë kurse me vepra hiç. Ashtu edhe sot në të tilla rrethe, kurse shokët aktiv që janë treguar si më parë ashtu edhe sot e kurdo që ka nevojë janë dhe do të jenë përherë që çdo gjë të ja falin atdheut. Por duhet ta kemi një gjë të kuart se çdo gjë që u kërkohet këtyre shokëve po ju bien e tërë ajo barrë, se shumë mirë e ka cekë shoku Xhemë, se edhe nuk po janë aspak të sigurt as për punë, por duke prit a sot a nesër po ja jep letrat.

ZK edhe kësaj radhe u shpërnda mirë dhe shumë mirë e kanë prit dhe ZK-së duhet të japim rëndësi që sa më fort të shpërndahet dhe nëpër disa rrethe ku shumë pak

po shkon. Po sidomos çështjes së organizimit, ajo është më se e domosdoshme, është fjala për anëtar, formimi i celulave aty është e tërë puna. Celula duhet të ketë në çdo qendër, rrethe të ndryshme e në çdo skaj, te çdo njeri i ndershëm. Se ka shokë ku kanë dëshirë të janë të organizuar dhe nuk janë. Kjo është dëm i madh për ne, që të na mbeten shokët kur është i gatshëm për çdo gjë, se nëpër disa rrethe kam vërejt se po kanë dëshirë dhe nuk nëpër celula. Sot është kjo kohë ku edhe shumë punëtorë e kanë po se nuk kanë rrugë tjetër pos që të bashkohen, për këto duhet të ketë më fort shoku Salih ai që duhet të gjej shokët më të besuar nëpër vende të ndryshme dhe t'i organizojë.

I mora dhe letrat e fundit të shokëve Xh. dhe Il. dhe i lexova me vëmendje. Shoku Il. bënte fjalë rreth disa fjalëve që nuk kanë skaj të sosen, thash e themet me të vërtetë janë të shumta por as që kanë për t'u zhduk ndonjëherë, por neve shumë pak duhet të na hynë në punë apo aspak. Këtu në rrethin e Shtutgartit ka pasur dhe do të ketë, por neve na mbetet për detyrë që me punë të përditshme t'i mundim. Ja kisha me hy vetëm pak në të kaluarën, të sotmen e të ardhshmen. Këtu te na e kena pasë dhe e kena Nuhiun, i cili nuk ka menduar gjë tjetër pos ka vepruar që me thash e theme do t'ia arrin qëllimit tij të poshtër. Ky farë Nuhiu dhe tipa të tillë të një brumi të mykur janë munduar që mbas ngjarjes (17 janarit 1982-shën i Xh D) të fusin një përçarje deri në palcë vetëm e vetëm për t'i përçarë që më vonë t'i plotëson detyrat e tija aq të poshtra sa që dy shokë mos të mbeten bashkë dhe vet të luaj si të donë. Por të gjitha i shkuan huq. Më kujtohen poshtërsinat e tij gjatë qëndrimit të tij në banesën e Vëllezërve Gërvalla ku mendohej të qes fjalë që as në letër nuk mund të shkruhen... duke menduar mendja e tij e prishur nga idiotizmi që mendonte se ka të bëjë me njerëz të rinj dhe se çfarëdo të thoshte do të besohej, sa aq shkoj, sa që edhe shoqes vet të jetës t'i qes fjalë që atë s'mund ta bëj as një ... Po do t'i vjen dita e do t'i thuhet të gjitha para syve të tij. Dhe sot shkon me shokun e vet R. Salihin që fort mirë e ka ditë se çfarë "shoku" i Sokolit (Jusuf Gërvallës) ka qenë ai R, dhe sot me gazetën Punëtorët del si hije e zezë dhe thotë se ata me ZK e kanë lanë rrugën e shokëve dhe janë lidhë me ballistët, kurse tjetër kund thotë se gazeta Punëtorët është shtylla e Lëvizjes. Por tani ka mbetur vetëm me disa njerëz të kafeneve që deri (para) disa ditësh thoshte vet se këta nuk bëjnë, kurse tani i ka shokë më të afërt. Por po e lëmë edhe këtë e po kaloj në vizitë që ishim në D-dorf. Aty kaluam mirë pos fjalimit të (Milaim Zekës) Ganiut, neve kësaj radhe na kanë nderuar shumë dhe në përgjithësi ka qenë shumë e suksesshme. Patëm takime me shumë shokë si me bacat, të dytë ashtu edhe me kryetarin e klubit dhe me I. Po sidomos edhe me Muhametin dhe kështu që përgjithësisht ka shkuar shumë mirë dhe besoj se në të ardhmen do të bëhet edhe më mirë. Të gjithë shokët tregonin gatishmërinë e tyre për çdo gjë që do të ketë nevojë.

Unë bisedova me bacin Zymer dhe e veta se si kishte kaluar në pushim (në Shqipëri-shën i Xh D); më tha shumë mirë, më tha dhe për Dritën (Suzana Gërvallën-shën i Xh D) dhe tërë familjen e Sokolit se ishin mirë dhe përgjithësisht mirë më tregoi. Edhe për një fjalë që e kishte dëgjuar por mua si më tregoi Baci Zymer (Zymer Kryeziu), se Sylja i Dyseldorfit që ka qenë në pushim në Shqipëri dhe e kishte vet shoqen e Sokolit e i kishte thënë se ti ke qitë fjalë se Ibrahim paska gisht në vrasjen e Jusufit, por këtë si më informoj mu gjoja se Drita vet nuk e kishte thanë, por këtë e kishte thënë Sylja i Dyseldorfit? Unë ndëgjova vetëm kaq dhe kështu por kisha me thënë se fjalët nuk ndalen. Sa për një letër unë ia kam dërguar Dritës por ende nuk kisha dëgjuar për këtë fjalë por me fjalët e shokut Jahir që ishte vitin e kaluar dhe ashtu ja shkruajta që njerëzit që po vijnë në pushim, mos të bisedon me çdonjërin se mërgimtarët

po i keqpërdorin fjalët, jo që po don ashtu por tani edhe janë mërzit dhe kështu po dalin fjalët.

Sa për organin ja kishte que baci Zymer dhe fort e kishte pëlqyer Drita, kurse gazetën Punëtorët, njëri i Münchenit e kishte marrë me vete dhe e kishte shpërnda nëpër kosovar. Atje këtë po i njihshin si njeri të udbes.

Shoku Iljaz po të pyeti për organin kësaj radhe, a e kanë dërguar prej Zvicre dhe a e kanë dërguar në disa vende. Ndoshta s'u dashtë por nuk e kanë ditë se mua në herën e fundit më ke shkrua që vetëm në një adresë me t'i dërgua, por në të ardhmen përsëri na lajmëro që ta dimë. Kësaj here ia dërgova edhe Naimit 10 numra se m'i kërkoj në telefon. Në të ardhmen edhe për këtë na shkruaj nëse e ke afër, mos t'ja postojmë se edhe posta po kushton. Për kasetat që të kam shkrua na i kena tjerat vetëm atë të paradës së ushtrisë nuk e kena, por si të mujsh na e dërgo. Përndryshe do ta gjejmë edhe këtu po ma vonë.

Pranoni përshëndetja vëllazërore F. 6 shtator 1983 Mërgimë,

20. Letër e Xhavit Ramabajës për Faridin Tafallarin (dhjetor 1983)

Shoku Faredin,

Që në fillim të kësaj letre të kërkoj falje që nuk munda të vijë në Shtutgart që të marrë pjesë në tubimin e caktuar (të Bashkësisë së Klubeve-shën i Xh D), por për mungesë do e njohtojë shokun Skendë më gjerësisht.

Tani shoku Faredin të njohtoj se unë sot po me këtë letër lëshova në postë edhe 2470 marka të tubuara nga disa shokë. Këto i adresova në adresën tënde. Para disa ditësh më thanë edhe tre shokë se kanë dërguar të holla po për këtë qëllim, vetëm se i paskan adresuar në Lëvizje. Këta të tre paskan dërguar njëri 130 DM, 150 dhe 250 DM. Nëse i llogaritim me këto që i dërgova unë sot, del një shumë prej 2970 DM.

Shoku Faredin,

Tani të shkruaj krejt për një tjetër temë dhe pikërisht rreth disa fjalëve të cilat i dëgjova në Shtutgart kur ishim në manifestimin e ditës së pavarësisë.

Unë Xhaviti, dola në bife të ulem me një shok nga Hamburgu për të biseduar disa gjëra. Pak më vonë erdhi edhe një shok i panjohur dhe m'u drejtua dhe më tha: A je ti Xhaviti? Po i thash! A vazhdoi duke më thënë se kishe paskëm shitur Zërin e Kosovës dhe parat i paskam mbajtur për veti! Më erdhi shumë keq që më thoshte kështu. Unë desha të bisedoj me te, por nuk premtonte koha sepse ishte shumë vonë dhe duhej të udhëtonim. Vërejtja se ishte i dehur nga alkoholi vetëm se këtë akuzë nuk ma tha rastësisht. Këtë me siguri e kishte dëgjuar dikund andej. Më intereson shoku Faredin mos din edhe ti për fjalë të tilla. Pas disa minutash diskutimi me këtë person ai më tha se quhet Tafallari. Mendova mos është i afërm me ty dhe kështu mund të dish edhe më mirë se që shtyni të flas kështu.

Me nderime shoqërore – Xhaviti (Xhavit Ramabaja)

21. Letër e Faridin Tafallarit për Xhafer Durmishin, fillim i janarit 1984

Shoku S.

Pasi ti po priton me shkrua po të shkruaj unë. Do të ishte shumë mirë që të jesh për këtë takim të BKSHM (Bashkësisë së Klubeve Shqiptare në Mërgim), se është me rëndësi dhe do të bëhej një punë e mirë. Unë e quaj më me rëndësi këtë takim se duhet të pritët prej klubeve shumë punë. Prandaj nëse ke mundësi eja dhe bisedojmë. Përndryshe përgatit ndonjë farë plani të punës që të mos kaloj koha vetëm me thash e thëna.

Kam shumë për të shkruar por e mallkoj kohën që nuk kam dhe po lodhem me punë, se nuk jam po them dembel si ti. Prej teje pritet shumë punë e jo fjalë apo serigji si thonë kah ne, dhe jo vetëm me u marrë me një klub apo një rreth, po me shumë e shumë punë të tjera. Po bisedojmë kur të ulemi në tavolinë.

Të fala F.

Për ato që i kam shkrua në letër unë i kam shkrua dhe ju qëndroj deri në fund, aspak nuk kam gabue dhe kam mendue kur i kam shkruar.

22. Letër e Faridin Tafallarit për Shaqir Shabanin

I dashur shok Shaqë,

u informuar se je i interesuar seriozisht për hapjen e një klubi në Nyon. Për këtë u konsultuam me disa shokë të Bashkësisë së Klubeve dhe pasi që i analizuam kushtet e atjeshme dhe situatën e përgjithshme ndër mërgimtarë erdhëm në përfundim se një hap i tillë në këto kushte do të ishte më tepër i dëmshëm se sa i dobishëm.

Prej shokëve të atij rrethi pritet me të drejtë që të kontribuojnë në rritjen e numrit të klubeve ekzistuese të Gjenevës dhe Llozanës, në forcimin e tyre dhe në zhvillimin e një aktiviteti të mirëfilltë revolucionar. Atje duhet të bëhet punë më e madhe, sepse ka mundësi. Prandaj kujdesuni që edhe ju të jepni kontributin tuaj.

Po që se ke ndonjë porosi apo sygjërim se si duhet të shkojnë punët andej, do të ishte mirë të shkruani detalisht dhe ne nga ana jonë do të japim kontributin tonë.

Bashkësia e Klubeve Shqiptare në Mërgim (BKSHM)

Faridin Tafallari, Postfach 2, 7271 Rohrdorf, BRD

Letra nga Sabri Novosella për Xhafer Durmishin

Mars 1982 - Mars 1984

1. Komitetit të Degës së LRSJH "Vëllezërit Gërvalla"
2. KRYESISË SË KD TË LRSJH PËR BOTËN E JASHTME
3. Letra e 12 korrikut 1981
4. Letra e 9 tetorit 1982
5. Letra e 15 tetorit 1982
6. Letra e 4 nëntorit 1982
7. Letër, (vjeshtë 1982)
8. Letra e 12 nëntorit 1982
9. Letra e 24 nëntorit 1982
10. Letra e 7 dhjetorit 1982
11. Letra e 23 dhjetorit 1982
12. Letra e 10 janarit 1983
13. Letra e 4 marsit 1983
14. Letra e 15 gushtit 1983
15. Letër F. T., 10 tetor 1983
16. Letër, vjeshtë 1983
17. Letër F.T., 25 dhjetor 1983
18. Letra e 16 janarit 1984
19. Letër Komitetit Qendror të LRSJH në Botën e Jashtme, 6 mars 1984
20. Letra e 23 marsit 1984
21. Përfaqësuesi i Leninistëve – armik i leninizmit

Në këtë kapitull letrat me numrin rendor 15 dhe 17 i janë dërguar Faridin Tafallarit.

1. Komitetit të Degës së LRSNJ "Vëllezërit Gërvalla"

Vëllezër të dashur

Letrën e juaj e muarëm dhe u njohtuam se e paskët riorganizuar Komitetin e Degës dhe e paskët zgjedhë udhëheqësinë e re. Shumë mirë paskët bërë. E shfrytëzojmë dhe me anën e kësaj letre u urojmë sukses të plotë në luftën e mëtejshme që po zhvillohet me plotë sukses si në Kosovën tonë shumë të vuajtur, si në mbarë botën ku gjinden shqiptarët e mërguar, dhe njëkohësisht dëshirojmë që punën që e lanë Herojtë të cilët ranë në ballë të detyrës, do ta vazhdoni me plot sukses duke i pasur udhëzimet e Tyre dhe duke u mbështetur në shembullin e tyre.

Punën që e keni bërë rreth shokut Xh. (Xhafer Shatri-shën i Xh. D.) për ta nxjerrë nga kampi i Romës keni bërë shumë mirë, pa marrë parasysh se atë nuk e keni gjetur në Romë.

Dalja e shokut Xh. (Xhafer Shatri-shën im) e shkuarja tek shokët që para shumë viteve i ka organizuar vet është bërë shumë mirë, bile më mirë se sa të kishte ardhë tek ju, pasi në atë organizatë motër Xh. gëzon besim shumë të madh, kurse nga ana tjetër me një shok që e kemi këtu ka afërsi shumë të madhe qysh nga koha e vuajtjes së dënimeve në kazamatet jugosllave para 13 viteve. Përveç kësaj ekziston edhe një histori tjetër që i lidhë këta dy shokë për lirinë e popullit tonë. Pasi edhe deri më tani është punuar në bashkimin e organizatave tona, nga ana tjetër nuk ekzistojnë kurrfarë divergjencash parimore, mund të themi se çështja e bashkimit mund të merret si punë e kryer.

U njoftuam që Organin e pasket dorëzuar në shtyp, mirë qenka bërë. Në shtojcën që e pasket vendosur ta botoni Komunikatën mirë është edhe kjo.

Agroni që i paska shprehur dofar "dyshimesh" është dashur t'i përgjigjeni prerë. Skënderin e njofin ata që e kanë dërguar të punoj pranë Sokolit e nuk ka nevojë të japi vlerësime për kuadrat e Lëvizjes. Nga ana tjetër edhe Skënderi ka gabuar që i është përgjigjur në pyetjet e tij, pasi edhe në mërgim duhet të mbretëroj konspiracioni i thellë.

Kushtrimi dhe Qemajli kanë vendosur me ardhë në Evropë. Janë të mendimit që të vendosen në Austri, por, mua vend jo i përshtatshëm për shumë arsye. Mendimi im është që të vendosen në Zvicër, bashkë me shokun tonë që vepron atje dhe me të ta formojnë Komitetin e Degës së LRSNJ. Fjalën e kam, me anëtarin e deritashëm të Lëvizjes. Për këtë duhet të na përgjigjeni sa më shpejt.

Të fala vëllazërore e revolucionare

Komiteti i Degës së LRSNJ "Hasan Prishtina"

KOSOVA-REPUBLIKË

2. KRYESISË SË KD TË LRSNJ PËR BOTËN E JASHTME

PROPOZIM

Ky propozim i bërë nga Kamberi, i përkrahur nga Kushtrimi dhe Qemajli i dërgohet Kryesisë gjegjësisht KD për shqyrtim.

1. Propozohet që të gjitha propozimet dhe mendimet mbi propozimet e të nëntë anëtarëve të KD të LRSNJ (për Botën e Jashtme) të ipen me shkrim dhe kryesia në bazë të shumicës përkrahëse të mendimeve bien mendimin përfundimtar.

Duke pasë parasysh se vetëm Kryesia njifet mes veti (kjo duhet te vlejë edhe për ata që njifen në mes veti) Kryesia të merr përgjegjësi gjegjësisht ndërmjet të çdo anëtari të kryesisë të zhvillohet komunikimi me anëtarët tjerë të KD të LRSNJ, kur është fjala

për propozimet dhe mendimet mbi to, respektivisht çdo propozim të dërgohet në kryesi si edhe propozime nga anëtarët e kryesisë të shumëzohet në 8 kopje dhe t'u dërgohet anëtarëve të KD të cilët japin përgjigjen – mendimin e tyre personal mbi propozimin, me shkrim dhe e dërgojnë në kryesi.

Pas arritjes të të gjitha (8) përgjegjeve-mendimeve me shkrim në lidhje me propozimin, propozimi aprovohet; nuk aprovohet ose aprovohet me ndryshime të caktuara në bazë të shumicës.

Të ndalohet shqyrtimi gjegjësisht prurja e vendimeve të ndonjë grupi jo formal nga ana e anëtarëve të KD.

2. Kryesia të marrë obligim mbi vete informimin e shpejt dhe racional të të gjithë anëtarëve të KD për informatat që vinë nga të gjitha drejtimet, dhe t'u bëhet me dije të gjithë anëtarëve të KD që çdo informatë të cilat vinë të njëjtat t'i përcjellin në kryesi dhe nga aty të njëjtat të dërgohen tek anëtarët tjerë të KD.

Të deleguarit në kryesi mbajnë komunikimin me bazën e cila i ka deleguar.

14 qershor 1982,

Kryetarët e KD të LRSNJ (PBJ=për Botën e Jashtme)
Kamberi (Sabri Novosella)
Kushtrimi (Abdullah Prapashtica)
Qemajli (Faton Topalli)

P.S. Propozimi nën pikën dy është bërë nga ana e Kushtrimit dhe është aprovuar nga Kamberi dhe Qemajli.

3. Letra e 12 korrikut 1981

I dashur Vëlla,

12 korrik 1982

Letrën tënde dërguar në adresën e fundit e mora. Edhe të tjerat do t'i marrë nesër pasi ende nuk mujta me shkua e me i marrë.

Bukur fort u mërzita për mos nxjerrjen e Hydajetit para gjyqit me shokë. Kjo bënë me kuptuar se, ose është i vdekur, ose është i shkatërruar në çdo pikëpamje.

Më së tepërmi po më mërzitin gabimet krejt të panevojshme. Të ngritet njeriu kryesor i një organizate dhe të hyj në mes të zjarrit pa pasur kurrfarë nevojë, është naivitet i madh. Kjo është mosnjohje e matematikës politike. Shumë lehtë ke mujtë me qenë edhe ti atje.

Rasti i Halimit po më brengos bukur fort, nuk po mundem me i kuptua këta njerëz. Nga një anë shokët që i kanë organizuar në mënyrë të çoroditur të gjithë i kanë në burg e nga ana tjetër bëjnë aso propozimesh, thua se e tërë Kosova është në duar të tyre. Tani lideri na ka dalë me një propozim të ri: Të shpallet formimi i Republikës së Kosovës. Që të mos zgjatëm më tepër, kam krijuar bindjen se, ky njeri është i krisur, sidomos pas propozimit të tij që të bashkohet Lëvizja me L. K. të Kosovës (LK=Lidhjen Komuniste-shën i Xh. D.) dhe propozimit të fundit që e ceka më lart.

Pa marrë parasysh të gjitha, duhet të jemi të matur, të bëjmë çmos që t'i largojmë nga paqartësitat e tyre e t'i kthejmë në rrugë që të bëhen sado pak të dobishëm për çështje. Nga ana tjetër, edhe me qenë të këqij s'kanë çka nga bëjnë, pasi për njerëzit tonë në Kosovë nuk dinë as imtësinë më të vogël, kurse për shokët përjashta, s'kanë çka të bëjnë. Fjalën e kam jo nga tradhtia por nga magarllëqet e tyre. Gjithsesi ruaje gjakftohtësinë, sillu sa më mirë me ta. Kam bindjen se sidomos i vogli mundet me u bërë kuadër i mirë. Edhe se ju kanë burgosur shokët kryesor, prapë se prapë ndonjë bisht ju ka mbetur e ata bishta munden një ditë të bëhen degë.

Besoj se të ka ardhur një letër me disa adresa nga e cila shifet se unë mbaj lidhje bukur të forta me Valon Kosovën i cili është njëri nga kryesorët të revistës së re "Iliria".

Ai për mua nuk din asgjë, bile as emrin tim. Ai më ka njohur si Omer me disa fjalë të mira mbrapa e asgjë më tepër. Nga një shok unë e njoh në hollësi. Tani më nuk ka si të bëhet i keq, pasi atë e presin vetëm plumbat nga Jug. e asgjë tjetër. Përndryshe e ka një rreth bukur të mirë. Jam duke u angazhuar që ta krijojmë një Degë të L. në Belgjikë.

Para sa kohës Uka më ka propozuar, që kur të piqen kushtet, ta nxjerrim një revistë letrare me titull "Iliria". Këtë propozim ia përcolla Valonit.

(Sabri Novosella)

4. Letra e 9 tetorit 1982

I dashur Vëlla,

9 tetor 1982

Sot i mora prej teje 4 zarfa me letra, pasi i lexova të gjitha mora me ta shkruar këtë letër si përgjegje në to.

Procesi i asaj mbledhje nuk tregon se a është fjala për ata 12 shokë të organizuar, apo ka në mesin e tyre edhe njerëz të paorganizuar?

Në atë mbledhje tehu paska qenë i drejtuar vetëm kundër Nuhiut e jo kundër Halimit. Duhet ta dimë se Nuhiu paraqet rrezik shumë të vogël në krahasim me Halimin. Shifet se çështja e Halimit paska mbetur të shqiptohet në nivelin më të lartë, por mua më duket se ka qenë e nevojshme t'e shfrytëzojsh rastin në atë mbledhje të japësh disa sqarime për të dhe barra kryesore ti mbesi Halimit pasi që është e tillë, kurse rasti i Nuhiut të paraqitet si i ndikuar nga ai.

Unë e kam përgatitur një letër t'ia dërgoj Hisenit, nëpërmes së cilës do të shifet fytyra e Halimit, por po pres një letër prej Ukës, të shofim si po e vlerëson qëndrimin e tij mbas mosardhjes në atë takim. Me K.K. u takova rastësisht (unë e thirra por ai nuk erdhi). E pyeta sa i ka pëlqyer Organi? Halimi nuk ia kishte dërguar, por ia kishte dërguar traktin, duke i thënë se paska bërë ndikim të madh. Organin e paska marrë atë ditë prej një shokut tonë. Kështu e vlerësoi: "Me gabime të vjetra nuk mund të bëhet lufta e re." Domethënë se gabimçarët e vjetër si A. Demaçi, J.G., H.Hys. e të tjerë nuk mundën të bëjnë luftën e re (apo në emër të tyre) që e ka filluar "teoricienti" K.K. Pra shifet se ata me L. nuk kanë asgjë të përbashkët. Çka po dëshirojnë këta njerëz nuk po dimë. Disa shokë këtu kanë filluar të dyshojnë në ta, sidomos në K.K. Pas tri ditësh do të bisedojmë me Plakun. Do ta bisedojmë edhe këtë çështje.

Letra e M. Vranicës kujna i ka ardhur? Me te mos e zgjatni. Ai është shumë i komprometuar.

Letra që ia paske dërguar ati shokut në Zvicër, në qoftë se nuk është i organizuar dhe me një rëndësi të posaçme, nuk është e arsyeshme, pasi që është shumë dekonspiruese. Në qoftë se miret vendimi të demaskohen e të kritikohen Halimi e të tjerët, duhet të demaskohen vetëm si persona e kurrsesi si P., pasiq bashkimi faktikisht është arritë. Pa marrë parasysh se këta janë ata që e kanë përfaqësuar atë organizatë. Kjo ka ndodh edhe kur janë bashkuar grupet K. dhe është formuar P. më 1941. Përfaqësuesit e një grupi menjëherë kanë tradhtuar, por grupi ka mbetur i bashkuar. Këtyre krejt shokët e organizuar ju kanë ra në burg nga organizimi i tyre i mbrapsht. Këta tani janë duke u munduar të organizojnë njerëz të ri, duke përdorur metodat e vjetra, duke u munduar të organizojnë edhe njerëz të organizuar.

Sa i përket intrigave se ZK qenka marrë nga Riza Salihu kjo nuk ka kurrfarë rëndësie, pasi që Zëri i Kosovës del që nga 1973-74 këtë e din më së miri Uka. Në qoftë se është munduar të e nxjerr edhe ndonjë Riza Salihu, s'ka kurrfarë rëndësie, pasi Organi nuk është lopë të cilën e ka njëri e ia merr tjetri, por e nxjerrin ata që kanë aftësi.

Edhe "Liria" është përsëritje e numrave të mëparshëm, por ato kanë qenë organe të tjera grupeve politike, kurse kjo e fundit e një organizate të veçantë.

Me të vërtetë po na humbin shumë kohë sqarimet e stërsqarimet rreth këtyre gjërave. T'ju kthehem punëve tona konkrete:

Nuk më kishe njoftuar se a kanë shkuar në rregull ZK në Vajzan? A kie ndonjë lajm prej Aliut dhe ai i ka shkuar ZK?

Të Mimosës po më shkruajnë rregullisht dhe po më thonë se çdo gjë është në rregull te ata. Më pyetën se si me ia bërë me "Ilirinë" pasi iu paskan arrijtë mjaft materiale, unë u thash t'i dërgojnë në adresën e ZK, kurse Ukës i shkrova që t'i korrigjon. Ti kishte qenë mirë t'i shtypësh. Për këtë punë duhet të kesh edhe ndonjë ndihmës, pasiq vështirë do ta kesh t'i përballojsh vetëm. Shumë i përshtatshëm do të ishte Iliri, por ai është në një shtet tjetër. Po të ishi ti dhe Uka në një vend do të ishte shumë mirë. Qysh moti unë e kam cekë këtë, prapë po e potenco. Me kenë e mundur të jeni në një vend do të bëhej shumë mirë.

Shefkati me të shoqin paskan qenë këtu, prapë paskan kërkuar prej një shokut të shkojë në Zvicër duke ia paguar ata rrugën, por së pari t'i lajmëroi ata e atëherë të shkoj atje. I paskan thanë se a din ndonjë familje që ka nevojë për ndihma, pasi qenka grumbulluar një sasi e madhe e të hollave në Lëvizje. Krejt këto fjalë të tyre na bëjnë që të bindemi se me ta nuk është në rregull. Gradualisht distancohu prej tyre. Ku kanë të drejtë të përzihen ata në këto punë derisa nuk janë anëtar.

Të fala vëllazërore M. (Mërgimi=Sabri Novosella)

5. Letra e 15 tetori 1982

Vëlla i dashur Shpend,

15 tetor 1982

Letrën tënde të shkruar më 7 tetor 1982 e mora dhe e kuptova në tërësi.

Për takimin që patët me Ukën nuk më kishe njoftuar në hollësi. Pasi ata paskan bujtur te ju, kuptohet se është biseduar diçka, pasi që edhe për bisedime jeni takuar.

Ti thua se Uka është i rezervuar ndaj teje. Unë nuk po e di në që drejtim po mendon? Po të njoftoj për disa gjëra: Uka për asnjë njeri timin këtu nuk dinë asgjë, ashtu edhe unë për asnjë njeri të tij atje nuk di asgjë (me përjashtim të H.M. për të cilin kam ditur edhe më parë). E kam njoftuar se e kam një rreth të mirë të sigurt, edhe ai më ka njoftuar se e ka një rreth të tillë. Më ka thënë se, p.sh. anëtar i udhëheqësisë së tyre nuk ka mund me ardhë në konsiderim pa i pasur disa vite përvojë në punë aktive dhe së pakur tri celula e asgjë tjetër nuk më ka njoftuar dhe as që kam kërkuar të di diçka më tepër. Krejt kjo është në vijën e udhëzimeve. Kështu është dashur të jetë edhe te ju, por te ju po më duket se edhe sa ka qenë gjallë Sokoli kështu nuk ka shkuar. Pasi ranë dëshmorët gjendja u keqësua edhe më tepër. Disi puna mori kahjen e veprimtarisë legale. Kjo është shumë e rrezikshme. Dera u hap të depërtoi shumë kush në atë mes. Këtë e bëri edhe rasti i vizitave për kryeshëndosh, por edhe rastet tjera, si për shembull përçarja e shokëve e të tjera.

Mua më ka munduar dhe po më mundon një problem jashtëzakonisht shumë: Si me u kthye prapë edhe në atë mes që veprimtaria të zhvillohet ilegalisht. Përndryshe veprimtaria në atë mes, në qoftë se armiku nuk do të arrijë me shkatërruar nëpërmjet spiujve me intriga e me gjithfarë kurthash, do të marrë edhe një sulm dhe do t'i likuidon edhe një ose dy vetë dhe puna në atë mes do të përfundon me pasoja për krejt çështjen.

Unë kërkova largimin tënd nga ai mes, gjegjësisht ilegalizimin tënd me çdo kusht. Në këtë mënyrë në qoftë se vazhdohet, puna jote është jetëshkurtë. Jo vetëm puna

jote, por e të gjithëve. Me siguri është dobësi e ime, por më duhet të them: Për ty brengosem më së tepërmi për shkaqe që i din edhe vetë.

Sot në atë mes, ashtu si po e shef, më tepër njerëzit po merren me intriga se me punë. Kjo duhet të ndërpritet gjithsesi. Krejt kjo është rezultat i veprimtarisë legale në atë mes. Shkuarja jote te Uka do të ishte shumë punë e mirë. Besoj se do ta merrni edhe makinën dhe do të grumbulloheshin kuadrat në një qendër që merren me organ. Ti do të mbajsh lidhjet vetëm me F. (Faridin Tafallarin) e ai me disa persona që janë të sprovuar dhe puna do të shkonte sipas udhëzimeve. Në qoftë se vendosesh aty, prapë në atë stil duhet të punojsh. Përndryshe të jesh i bindur se je shumë i rrezikuar. Armiku thotë: "Obezgllavi pa llako qemo." Sot përjashta janë koka ata që e nxjerrin organin. Goditja e parë po e shef çka bani. Goditja e dytë do të përfundoi punën përjashta ku me ditë për sa kohë.

Rasti i Nuhiut nuk po më brengos shumë edhe se nuk është dashur të vjen deri te kjo. Duke e shkruar këtë letër më erdhi prej tij një letër me fotokopjimin e dy qekave të zbrazët me dorëshkrim të tij ku thotë se S.S. i ka shkye 4000 copa kësi qekash, të cilët qenkan shtypur me vendimin e tre heronjve. Thotë se edhe 5000 copa pamflete të "Lirisë" i paske asgjësuar. Kjo ty nuk të rëndon pasi që s'keni pasur si të dërgoni ndihma në ata qeka derisa tre njerëzit që e kanë pasur atë punë përsipër, janë vra. Edhe pse nuk krye punë për një organizatë, atëherë tjetër, ti nuk je fajtor. Ti i ke pasur 3000 ZK me të cilët në dorë ka vdek Heroi me i shpërnda dhe me shumë punë tjera.

Këtë letër që e mora është përgjegje në një letër që po ta dërgoi. Në letrën e tij ju kam përgjegjur, por në te ende nuk kam marrë përgjegje. Edhe në këtë letër do t'i përgjigjem me pak fjalë. T'ia sqaroj punën e qekave dhe punën e mbledhjes. Do t'i them se mbledhjen se ka thirrur S.S. por punëtorët, shokët tu, të cilët e kanë parë se me ty diçka nuk është në rregull. Ai edhe në këtë letër ngulë këmbë se, nuk do të dërgoi ndihma në qekat e ri të Lëvizjes që dual nga bashkimi i organizatave të mëparshme, por gjoja po dojka me dërguar në ata qeka të mëparshëm. Ne do të mbajmë qëndrim ashtu si duhet, por prej ti po më duket se nuk ka kurgja.

Prej të Mimosës kam marrë shumë letra, ata po supozojnë se të ka folë dikush keq për ta që nuk ua ke dërguar sasinë tjetër të ZK që ta kanë kërkuar. Pasi unë i kam në lidhje me ta mos u zgjero. Të shofin se te ne ka disiplinë, gjë që pa disiplinë, konspiracion e sakrificë nuk ka as punë të mirëfilltë.

Edhe njëherë po e ceku, duhet të vendosesh dikund sa më shpejtë. Të ndërrosh pseudonimin, t'i kushtohesh me tërë qenien organit. Me shokë të mbajsh lidhje vetëm me Faridinin e me ndonjë tjetër shumë të sigurt. Me një fjalë veprimtaria jote në konspiracion të thellë është e domosdoshme. Më tepër bënë ndikim një numër i ZK se 100 fjalime.

Të fala vëllazërore K. (Sabri Novosella)

6. Letra e 4 nëntorit 1982

I dashur vëlla Ali,

4 nëntor 1982

Sot i mora dy zarfa me letra prej teje, pa datë të shkruara. Jam bukur shumë i brengosur për ty, pasi që nuk mu lajmërove prej asaj dite. Kështu i brengosur do të jem derisa të vendosesh dikund definitivisht. Te ai shok qenke mirë, me siguri edhe ai e merr kujdesin ndaj teje si obligim që i takon çdo shqiptari të ndershëm ndaj çështjes së madhe të popullit tonë e jo vetëm si ndihmë ndaj një shoku të zakonshëm.

Artikullin e Sokolit dhe shkresën tënde për pagesën e ZK po ia dërgoj U. me mendimin tim aprovues.

Iliri është shoku i Mimosës. Kjo ide e imja është më tepër dëshirë se sa mendim i bazuar në fakte. Gjithsesi duhet të studiohet mirë. Unë problem kryesor e kam vendosjen tënde. Të sjellet ndonjë shok te ti do të jetë punë më e lehtë.

U. më tha se e ka përgatitur materialin e duhur për ZK. Nuk më njoftove se a të ka ardhur? Ky numër gjithsesi kishte qenë mirë të dali për Festat e Nëntorit. Sa i përket manifestimit duhet të keni parasysh se njëvjetori duhet të shënohet gjithsesi. Këtë diskutoje mirë me U.

U. më propozoi që të hiqet stema e të vendoset ashtu si ka qenë përpara ZK. Unë iu përgjegja se deri sa luftojmë për Republikë nuk bënë të bëjmë kurrnjë ndryshim.

Jam i mendimit që numri i vitit të ardhshëm të filloi prapë me 1 (Nji) ashtu si praktikohet në "Përparimin", "Jetën e re" e të tjera. Unë numrin e parë të ZK (Zëri i Kosovës- shën im) e konsideroi të dalur në vitin 1973 ose 74. Këtë duhet ta dijë më mirë U.(Uka=Xhafer Shatri-shën im) Dallimin e bën viti, për shembull: (Nr. 1. 1983) .

Krejt materialet po ia dërgoj U. ashtu që të mos humbet kohë t'i dërgoi ty, ti atij e ai prapë ty. Unë prapë shokëve të Mimosës u thash që të gjitha materialet t'i dërgojnë në adresë të ZK. Nxjerrja e numrit tre të I. nuk më duket e arsyeshme, pasi që edhe dy të parët, përveç që shifën qëllimet e pastërta, nuk kanë kurrfarë vlere. L. i duhet një revistë letrare në kuptimin e plotë të fjalës e jo për të dalë diçka sa për të dalë, për t'u shkrua diçka sa për t'u shkrua.

Nuk më kishe njoftuar për vëllaun e korrierit se a kanë shkuar 460 copat dhe a i ka marrë të vetat Alia?

Më njofton për Naimin dhe për shokët tjerë që nuk i kanë të rregulluar dokumentet.

Nuhiut ja kam dërguar një letër të rrastë dhe besoj se më as që më shkruan. Ju këqyrni punët që na duhen e mos u merrni me te, thjeshtë injorone dhe mos e përmendni.

Të fala vëllazërore, K. (Sabri Novosella për Xhafer Durmishin)

7. Letër, (vjeshtë 1982)

I dashur vëlla Shpend, (vjeshtë 1982)

Letrën tënde me propozime e mora dhe do ta shqyrtojmë me shokë. Propozimet e juaja janë shumë të qëlluara, por frigothem se mos po i rëndojmë shumë anëtarët e Lëvizjes. Së dyti çështja e investimit që të sjellë fitime të mëdha nuk është aq e lehtë.

Këtë çështje duhet ta shqyrtojmë mirë me të gjithë. Shokët e juaj si ashtu edhe Uka duhet ta shqyrtojnë me shokët e vet. Unë këndeja. Sa u përket shokëve në Atdhe, ata me siguri nuk do të ken vërejtje. Në këtë drejtim pa u shqyrtuar puna mirë e mirë nuk guxojmë të ngutemi.

Shaqir Salihun, sa më duket kështu e ka mbiemrin e njof që nga viti 1968. Kam biseduar disa herë me te, pasiq ai u shoqërojke me I. (Idriz) Gërvallën. I.G. ka pasur mendime të mira për te. Në atë kohë pas demonstratave të 68 (jo për demonstrata por për çështje propagande) ka qenë dënuar dy vite burg. Atëherë ishte aso atmosfere që ata që nuk dënoheshin mbi dy vjet të liroheshin deri në vendimin e shkallës së dytë.

Shaqiri pasi u lirua që të mbrohet në liri, iku dhe prandaj kam dëgjuar se ka qenë në kampet e Italisë. Ashtu si më parë, në letrat e tij që m'i dërgove edhe në këtë letër shifet gatishmëria e tij që të kontribuoj për çështje. Ai me na dëmtuar nuk mundet asgjë pasi që nuk do të dekonspirohemi para tij. Ai mundet vetëm me i kontribua çështjes.

E pash të arsyeshme t'ia shkruaj këtë letër të cilën e adreson dhe ia dërgoni bashkë me të gjithë numrat e Zërit që nuk ja ke dërguar deri më tash. Mu duk e arsyeshme që ne të mbajmë korrespondencë me të, ashtu që të mos ngarkohesh edhe me këtë barrë. Halimi pasi po vjen këtu do të sqarojmë, të cilët pas tashit duhet të punojnë si degë e veçantë pa pas lidhje direkte me njerëzit e degës "V.G." Çdo gjë që kanë do t'i drejtohen K. Drejtues dhe aty do t'i thojnë krejt çka kanë dhe nëpërmes tij mbajnë lidhjet me degët tjera të Lëvizjes.

Përsëritetje vëllazërore

Mërgimi dhe Hasani (Mërgimi=Sabri Novosella)

8. Letra e 12 nëntorit 1982

I dashur vëlla,

12 nëntor 1982

Letrën tënde të shkruar në 6 faqe e mora dhe e kuptova në hollësi. Vërejtjet tuaja janë plotësisht të arsyeshme. Konspiracioni po i detyron njerëzit të gënjejnë, por edhe ajo duhet të ketë kufi. Është e vërtetë se (Xhafer Shatri-shën i Xh. D.) i ka disa gjeste nganjëherë jo të përshtatshme, sidomos njerëzit që nuk e njohin mirë mundën me e keqkuptuar. Duhet të jemi të vetëdijshëm se nuk ka njeri pa të meta dhe gabimi më i madh i njeriut është kur e idealizon dikend, pasi njeri ideal nuk ekziston dhe ata që e kanë princip t'i idealizojnë njerëzit, shpesh dëshpërohen kur i shohin të idealizuarit e vet se edhe ata janë njerëz me të mirat e të këqijat e veta. Është e rëndësishme që njeriu të mos jetë i poshtër si Osmani që çdo fjalë e tij është vetëm gënjeshtër e intrigë e sa për të meta të zakonshme na duhet t'ia durojmë njëri-tjetrit.

Me këtë letër për ty po e nisi edhe një letër për shokun ku je duke qëndruar dhe duke punuar, besoj se nuk do të ndikoj negativisht.

Po më duket se ai shok duhet të jetë një njeri shumë i mirë dhe kishte me qenë mirë të qëndrosh aty aq sa të jetë e mundur, bile edhe në qoftë se e merr lejen e qëndrimit. Në dhomën e punës mos lejo të hyj askush që të mos vjen te dekonspirimi i punës tënde, kuptohet në marrëveshje me shokun që të mos vij deri te ndonjë keqkuptim.

Të fala vëllazërore M. (M-Mërgimi=Sabri Novosella)

Pasi e shkrova këtë letër më erdhi një letër që i kishte ardhur Hasanit që është këtu, të cilën ia kishte dërguar Hiseni që është atje. Në atë letër, njëherë ma kishte shkruar mua si përgjigje në një bisedë telefonike që e patëm para sa kohësh. Në atë bisedë i pata thënë: Bisedoni me N. dhe bashkë me të tjerët distancohuni prej Halimit dhe për çdo gjë i drejtoheni L. në adresë të ZK.

Ai mu përgjigj: Bisedova me atë shokun (domethënë N.) dhe nuk u pajtua me mendimet tua, por edhe unë u pajtova me mendimet e tij." Dhe më udhëzon që të informohem edhe nga drejtime tjera e jo vetëm nga një drejtim. Me këtë u vërtetua se Halimi e ka formuar grupin e vet prej njerëzve që i kanë takuar atij grupi, domethënë gënjeshtër, intrigat e provokimet i kanë pasur sukses, kuptohet duke e keqpërdorur autoritetin tim, pasi unë e kam dërguar në atë mes dhe në bazë të fjalëve të mia ai mes i besoi dhe ai e keqpërdori besimin tim në mënyrë shumë të poshtër. Për këtë aspak mos u brengos. Çdo kujt fytyra i del në shesh. Ti kushtoj me tërë qenien Organit. Ai është arma më e fuqishme në duart tona në këtë etapë. Ata po e zhvillojnë teorinë "Tita i mirë

Rankoviqi i keq" për ne që të dy janë të njëjte. Kjo në këtë situatë mund të ketë edhe diçka pozitive, por më vonë do të bjerë dhe me te do të bien edhe ata që e zhvillojnë sot. Në çastin e duhur ne i demaskojmë dhe distancohemi prej tyre. Tani në ZK nuk ua lejojmë ato marrina.

9. Letra e 24 nëntorit 1982

I dashur vëlla

24 nëntor 1982

Letrën tënde e mora dhe e kuptova për ato që i thua. Duhet t'e praktikojmë, që posa t'e marrësh letrën time menjëherë të përgjigjesh, ashtu edhe unë të përgjigjem, pasi këtë unë e kam princip dhe e zbatoj rregullisht si me të gjithë të tjerët ashtu edhe me ty.

Vonimi i materialeve nga ana e Ukës, me siguri është shkaktuar nga arsyeja e shtrirjes së tij në spital. Nga spitali e kam marrë një letër prej tij. Në qoftë se nuk arrin të dali ZK para festave nuk do të bëhet mirë pasi që kaloi një kohë bukur e gjatë nga dalja e numrit të mëparshëm dhe vonimi i çdo numri po shkakton njëfarë pasiviteti dhe po u jep mundësi kundërshtarëve të bëjnë gjithfarë manipulimesh.

Atë material që i paska shkuar U. nga ata të Brx. nuk besoj se është i Hasanit, pasi para disa ditësh e mora një letër prej tij dhe nuk më tha asgjë për atë material, por më njoftoi për disa probleme që u paskan lindur atje. Ekziston mundësia që ata tjerët që ishin thye me te e kanë lëshuar ndonjë material që i paska ra në dorë U.

... Osmani e Fatoni paskan shkuar në Zvi. dhe i paskan krye do punë të "mëdha" por te U. nuk paskan shkuar se nuk paskan pasur të holla. Kështu tha Fatoni, i cili erdhi të shtunën te unë bashkë me liderin. I pyeta për O. dhe më thanë se ka mbetur në Gj. (Gjermani) me i krye do punë të "mëdha". Pas një bisede i pyeta se kush prej tyre ka qenë në Brx? Ata më thanë se këta nuk paskan qenë. Ua nxora dhe ua lexova një letër që më kishte ardhur atë ditë prej shokëve të Brx., ku thuhej: Erdhën 3 njerëz prej Gj. (Gjermanie) dhe i takova në kafenenë e Hysenit. U ula me pi një kafe sa për t'i nderuar mysafirët dhe ata aty për aty i nxuarën propozimet në mënyrë pompoze e me emra të mëdhenj na i shtruan: Të bashkohen me p. (Partinë) e tyre e të formojnë një komitet të përbashkët (në stilin që na e propozojshin ne në fillim). Dhe letra vazhdonte: Ju thash: Shkoni te shokët në Gj. e merrni vesh me ta për bashkim. Ata (Abdullahu, Osmani e Fatoni-red.) ju paskan përgjegj se LRSHJ-a dhe FK (Fronti i Kuq) e paskan lëshuar rrugën e JG. BG. KZ. dhe ia paskan shkruar IK tri letra, por nuk kanë hasur në mirëkuptim edhe te ata. ... Këta (Abdullahu e Fatoni), e mohuan se kanë qenë ata. Unë ju thash se ndoshta ka qenë Osmani... Ata ma kthyen Osmani është këtu, paska mbetur duke e pritur një telefon shumë të rëndësishëm. Do me thënë Osmani brenda minutave dual nga një kontinent në një kontinent tjetër. Pasi ishin kthye nga Brx. (Brukseli) me bisht nën këmbë, kishin vendosur të vinë te unë me më thënë, ashtu si më thanë: T'i lamë të gjitha ato që kanë ndodhur deri më tani e prej tashit t'ia fillojmë prej zeros. Unë ju thash: Ne ia kemi filluar para 20 vjetësh e ju si të doni.

Pasi u vërtetua se këta ia paskan filluar edhe në këtë mënyrë, ne këtu e përpiluam një QARKORE në emër të KQ të LRSHJ-s e cila do të vjen prej U. brenda një kohe të shkurtër e t'ua qesim fytyrën në shesh, pa ua përmendur emrat, pasi ata e mohuan se paskan qenë.

... K (Kushtrimi=Abdullah Prapashtica) më tha se i paska shkruar U. dhe propozimi i tij, me siguri ka për qëllim që të fitoj në kohë e të na qesi hi para syve, që mos t'i demaskojmë bile edhe për një kohë. Këtë ia thash edhe U., taktikat e tyre duhet të marrin fund njëherë e përgjithmonë.

Fjalimi i shokut E. (Enver Hoxha-shën i red.) sa i përket çështjes sonë është shumë i mirë, sa i përket për m.sh. (Mehmet Shehut-red.) ata e dinë vetë. Një gjë duhet

t'e kemi parasysh, prej m.sh. popullit tonë asnjë e mirë nuk kishte mujt me i ardhë dhe as që i ka ardhur ndonjëherë që nga koha që është ulur në atë kolltuk. Bashkë me te janë shkuar disa pisa që kanë pre shqiptarë qe 40 vjet.

Puna jote dhe e F. po më duket shumë më e mirë tani se më parë, pasi vetëm puna në konspiracion të thellë është e suksesshme, por duhet t'i marrim të gjitha masat që ZK të dali sa më shpesh. Kohën e lirë shfrytëzoje për shkrimin e artikujve.

I shkrova edhe U. Shokët në Atdhe dhe këta këtu thonë se K.Q. të quhet K.Q. e jo ashtu si dëshirojnë ata për qëllime djallëzore që Lëvizja të ketë K. e përgjithshëm, kurse p. (partia) e tyre të ketë K.Q. si udhëheqës i L. Besoi se edhe U. nuk do të kundërshtoi dhe të gjitha dokumentet të nënshkruhen me KQ të LRSNJ e jo si deri më tani vetëm në emër të L...

Të fala vëllazërore M. (M-Mërgimi=Sabri Novosella)

10. Letra e 7 dhjetorit 1982

I dashur vëlla

7 dhjetor 1982

Sot e mora një shkresë prej teje në tri faqe (faqet 3,4,5) Sa mujta me kuptuar, fjala është për njëfarë projekt programi të atyre që paskan vendosur të formojnë një udhëheqësi të punëtorëve në Evropën Perëndimore, me emër, sa munda me e kuptuar nga inicialet: Bashkësia e Klubeve të Punëtorëve Shqiptarë nga Jugosllavia, me organin qendror (Kurbetçiu).

Në lidhje me këtë me pata shkruar ti me pak fjalë, ashtu si edhe Uka. Sa pata mujt me kuptuar, U. paska kontakt me njeriun kryesor të kësaj iniciative. Në vërejtjet e mia se mos është ai njeri I.K. i cili mundet një ditë edhe t'i kundërvihet L. U. m'u përgjegj se nuk është I.K. por një shok i tij i ngushtë.

1. Në qoftë se themeluesit e kësaj Bashkësie janë anëtarë të L. dhe i hyjnë kësaj pune me qëllime të caktuara, që anëtarët e saj të jenë simpatizues të L. e të çështjes në përgjithësi, do të jetë shumë mirë.

2. Dalja e Organit, në qoftë se është nën udhëheqjen direkte të ZK edhe kjo do të jetë pozitive, pasi që në te munden të botohen edhe asi artikujsh që nuk mund të botoheshin në ZK. dhe do të bëjshin ndikim pozitiv.

3. Disa shprehje të ngjashme që janë thënë edhe në Komunikatë e në Projektstatut janë në rregull (në qoftë se është fjala për njerëz pozitiv).

4. Përpiluesi i këtij materiali është njeri që posedon aftësi intelektuale.

5. Në qoftë se ky (apo këta njerëz) nuk është njeri i L. kjo punë ka për qëllim t'i kundërvihet L. dhe do të luftoj më mbytjen e aktivitetit të saj.

Ashtu si është e ditur L. punon në konspiracion të thellë. Përveç anëtarëve që i ka (apo që duhet t'i ketë gjithsesi) të fortë, të ngritur në çdo pikëpamje dhe të sigurt, duhet t'i ketë edhe simpatizuesit e vet që veprojnë gjysmë legalisht, por edhe legalisht. Në qoftë se këta njerëz janë ashtu si po dëshirojmë të jenë, do të bëjshin punë shumë të mëdha që nuk do të kishin mundësi t'i kryejnë anëtarët më të mirë të L. Edhe një gjë duhet të kemi parasysh, me këtë material udha nuk mundet me qenë e kënaqur, por do të mundohet t'i fusë njerëzit e vet në kokën e kësaj pune. Pasi kjo punë do të jetë legale edhe mundësitë do t'i ketë.

Ju të jeni shumë të kujdesshëm, mos folni kundër tyne (gjërat me shumë rëndësi, përveç me F. me të tjerët mos i bisedo). Përndryshe, me ta mos u merrni, pasi U. paska kontakt me ta, ata t'e vazhdojnë këtë punë.

Nuk më lajmërove se a ka diçka të re rreth vendosjes dhe a je aty ende?

Prej shokëve të Mimosës a ke ndonjë lajm. Më kanë njoftuar për disa mosmarrëveshje që i paskan në mes veti. Unë i kam udhëzuar që t'i formojnë celulat

secili veç e veç dhe t'e vazhdojnë punën sipas udhëzimeve. Ata kërkuan që ti të shkojsh dhe të intervenojsh, por unë nuk e lejova një gjë të tillë, pasi e dimë nga përvoja se njerëzit po prishen mes veti, njëri e ka lëshuar rrugën e po kërkon hala në përpeq. Çdo tentim me i pajtuar po është i kotë, pasi që njërit as që i intereson pajtimi as puna, por në të vërtetë e kundërta po i intereson.

Letra që ja ke dërguar U. e ka idhnua pak, sa po duket. Unë i thash: Disa shprehje në disa letra tua të fundit, por edhe të Sahitit janë të pavend dhe nuk i shërbejnë çështjes, këtë ia kam thënë edhe Sahitit e po ta them edhe ty. Ne në njeri-tjetrin nuk guxojmë të kërkojmë njerëz ideal, por të metat e njëri-tjetrit duhet t'ia plotësojmë si vëllau-vëllaut e jo t'e kapim njëri-tjetrin për gjuhe, për çdo fjalë që e supozojmë se ka pasur këtë qëllim apo atë qëllim. Këto gjëra na duhet t'i pastrojmë njëherë e përgjithmonë. Në lidhje me këto, duhet të ndërpritet menjëherë ky dialog e të merremi me punë që na takojnë.

Këto fjalë t'i citova me qëllim që me të vërtetë mos të lejojmë gjëra të tilla të panevojshme të cilat na sjellin vetëm dam e asgjë tjetër.

Të fala vëllazërore, M. (M-Mërgimi=Sabri Novosella)

11. Letra e 23 dhjetorit 1982

I dashur vëlla, 23 dhjetor 1982

Ashtu si të njoftova me anë të telefonit, e pata një shok të Aliut me të cilin mbeta shumë i kënaqur. Ishte me profesion prof. në një shkollë të mesme, i përgatitur në çdo pikëpamje. Më njoftoi detalisht për çdo gjë dhe për ato që e kishte udhëzuar Aliu, për të cilin kishte respekt shumë të madh. Si çështje kryesore e kishte porositur Aliu t'i shqyrtojmë këto:

1. Çështjen e Sh. të cilin nuk e njifte, por vetëm me një pseudonim.
2. Çështjen e Organit.
3. Çështjen e Aliut, të largohet apo jo (nga shokët paska presion që të largohet).

Me Sh-n Aliu nuk qenka i kënaqur për këto arsye: Paska bindjen se është oportunist, se nuk është konspirativ sa duhet, po u idhnojka shumë lehtë dhe kur po u idhnojka po u bëjka nami. Më njoftoi se paska qenë te një shok prej të cilit qenka ndarë shumë i demoralizuar. (atë shok ky nuk e njifte).

Për Sh. unë thash këtë mendim: Aliu të mbaj kontakt me Sh. pasi që është patriot i mirë. Edhe se ka të meta, ka shumë të mira dhe ka kontribuar për çështje.

Për Organ i thash se, nuk ju ka dërguar nga friga që të mos rrezikohet Aliu e jo pse është lënë në harresë, ashtu si paska supozuar Aliu. Paskan pasur mundësi të marrin numra të ZK edhe prej të tjerëve, por pasi ti i paske thënë që të mos merr prej askujt. Unë i thash se ne në ndonjë rast ku nuk rrezikohet askush të e marrin numrin deri sa të vihet lidhja e sigurt.

Për largimin e Aliut i udhëzova kështu: Në burg mos të bie kurrsesi, deri sa të mos jetë i rrezikuar mos të largohet. U mundova që ta udhëzoj sa më në detale se si të kujdeset për këtë çështje.

Unë e propozova Aliun për kandidat të KQ me çka u pajtua plotësisht. Me këtë Aliu konsiderohet kandidat i KQ. Mua po më duket që ky njeri meriton të jetë anëtarë i KQ.

Jehonën që e bëri dasma e Gjenevës është fitore shumë e madhe për L. por njëkohësisht edhe rrezikim për kuadrat, për këtë të keni kujdes edhe më tepër. Në një mënyrë L. u njoft nga OKB.

Sot i mora dy letra prej Brx. thonë se I.K. (Ibrahim Kelmendi-shën i Xh. D.) paska qenë atje. Na duhet gjithsesi të e fusim në dorë, se për ndryshe do të na sjell probleme. Ma kanë dërguar edhe një libër të njëfarë Gani Azemit me poezi. A ju ka ardhur edhe juve. Ishte libër shumë i mirë. Kishte me qenë mirë ta botoni edhe në ZK., sidomos poezinë për A. Demaçin e cila më ka pëlqyer shumë.

Mundohu sa më parë t'e merrni lejen për ditën e shokëve. Edhe në qoftë se nuk merrni leje, gjithsesi duhet të tuboheni te varret, besoj se për këtë nuk do t'ju sjellin pengesa.

Të fala vëllazërore M. (M-Mërgimi=Sabri Novosella)

12. Letra e 10 janarit 1983

Të dashur vëllezër U., S., (Xhafer Shatrit dhe Xhafer Durmishit), 10 janar 1983
Mendimi ynë në lidhje me mbajtjen e Kongresit:

Teorikisht mbajtja e kongresit është plotësisht në rregull, por praktikisht mua më duket jo i arsyeshëm në këtë situatë, për këtë arsye:

Mbajtja e kongresit në këto situata bien te dekonspirimi i udhëheqësisë së Lëvizjes në botën e jashtme, gjë që do të jetë një fitore e madhe për armikun dhe katastrofë për Lëvizjen, për këto arsye:

1. Do të e ketë më lehtë me i likuiduar kuadrat fizikisht.
2. Do t'e ketë shumë lehtë me i komprometuar kuadrat me anën e qpfijeve e intrigave të llojllojshme.
3. Njerëzit nuk do ta konsiderojnë veten si njerëz që veprojnë për L. por për filanin e fistekun dhe me plot sukses do të përhapet parulla se, pasi është filani në udhëheqësi të L. unë nuk dua të jem aty, gjë që kjo fjalë po ndihet çdo kund ku po arrihet t'e njofin njerëzit njëri-tjetrin e që nuk kanë lidhje direkte, apo simpati për njëri-tjetrin.

Para do kohësh unë kam qenë i mendimit që Lleshin t'e popullarizojmë e te dekonspirojmë, por mendimi i tij që të mos popullarizohen personat, por vetëm L. me të vërtetë është shumë i qëlluar e kjo po vërtetohet për çdo ditë ashtu si po e shofim të gjithë.

Ditët e para pas bashkimit të Organizatave, armiku filloi të lëshoi parulla se gjoja L. e ka kokën në Beograd, udhëheqësit e L. janë të dyshimtë e të tjera. Kjo shumë shpejt u tregua e pasuksesshme dhe ju dashtë të dali haptas dhe e sulmoi L., ashtu si veprimi pas Demonstratës së Gjenevës, duke trulluar gjithfarë qpfijesh, por njëkohësisht edhe e popullarizoi L. aq shumë saqë, sipas informatave që po na vijnë, si nga anët e Botës, ashtu edhe nga Kosova, sot më tepër flitet për Lëvizjen se sa për PPSH-në. Njerëzit shprehin supozimet se në udhëheqësi është edhe Prof. Dr. Ali Hadri dhe kjo është një fitore e madhe për L. e për çështjen në përgjithësi. Ndoshta mundeni me thënë se kjo e rrezikon Aliun e të tjerët që do të flitet për ta, kjo mos t'ju brengosë aspak, pasi që edhe kjo është fitore jona dhe e çështjes në përgjithësi bile edhe në qoftë se burgosen, apo edhe në qoftë se pushkatoen njerëzit e tillë. Të gjitha këto duhet t'i shfrytëzojmë me shumë kujdes, në këto drejtime: Të mbahet L. e sidomos udhëheqësia e L. në konspiracion sa më të thellë, të dali organi sa më i fuqishëm e sa më shpesh, të formohet një Këshill Ekzekutiv për Evropë e më vonë edhe në vende të tjera ku do të jetë e mundur.

Propozimi i Ll. duhet të realizohet sa më shpejt dhe të formohet Këshilli Ekzekutiv i cili faktikisht ekziston. Tani do të plotësohet me I. (Ibrahim Kelmendin-

red.) e më vonë edhe me kuadra të tjera të afta e të sprovuara, të vazhdohet me aksione si në Vajazan ashtu edhe në botën e jashtme.

Në emër të K. të Degës të L. "Hasan Prishtina", M. (Sabri Novosella)

13. Letra e 4 marsit 1983

I dashur vëlla, 4 mars 1983

Letrën tënde e mora dje (pa datë). Sa i përket fushatës së gripit që e paski anena, mos u qofshim falë se, edhe ne me bollëk e kemi. Sa për letra që nuk po më shkruan nuk po më vjen bash mirë, pasi që unë posa ta marrë letrën tënde të shkruaj, gjegjësisht të përgjigjem ne letër, se, në qoftë se nuk të shkruaj menjëherë, as që mundem më vonë të përgjigjem, pasi edhe s'di çka me të shkrua por posa ta marrë letrën tënde (ashtu si të të gjithë shokëve) menjëherë të përgjigjem, duke e mbajtur letrën (në të cilën përgjigjem) para vetit. Kësaj gjithnjë ju kam përmbajtë me të gjithë shokët, por edhe prej tyre kam kërkuar që t'i përmbahen, gjë që edhe i përmbahen. Detyra që t'u paska caktuar prej shokëve të K. Ekzekutiv për b. j. na bënë që pas tashit të kemi korrespondencë të rregulltë, pasi edhe unë nga ana e KQ jam i ngarkuar me këtë detyrë (në çështje të organizimit kam qenë i ngarkuar të punoj që nga viti 1962 kur është formuar L. nga A.D. Po i japi vetes të drejtë të them se në këtë drejtim kam pak përvojë. Si po shifet barra kryesore po na bien ty e mua dhe kjo na obligon që vazhdimisht të jemi në korrespondencë dhe të konsultohemi e ta koordinojmë aktivitetin sa më mirë që puna të ketë sukses sa më të madh. Sa i përket asaj se, mendimet tona ndryshojnë në mënyrën e organizimit në b.j. (botën e jashtme-red) unë për veprimtari sa më konspirative, kurse ti për një veprimtari sa më të gjerë e cila më lehtë i dekonspiron kuadrat, por L. masovizohet). Për mënyrën që e mendoj unë, në Vajazan dhe këtu, është plotësisht e arsyeshme dhe në çdo mënyrë tjetër është katastrofë, kurse për atje ku jeni duke vepruar, unë mundem mos me e ditur, pasi unë atje nuk jam dhe me siguri edhe kushtet nuk i njof në kurrnjë pikëpamje. Këtë çështje duhet ta analizoni ju në K.E. dhe të bini vendim se si është më së miri të veprohet dhe ashtu të veprohet.

Jam i bindur se, punën në ZK, sidomos përgatitjen teknike që ke mujtë me e bërë ti, tjetër kush edhe për një kohë të gjatë nuk mundet me e bërë. Këtë ia kam thënë edhe U. edhe këto ju i dini më së miri dhe veproni si është më së miri. U. po më thotë se ekipi i ZK është kompletuar bukur mirë dhe do të plotësohet në të ardhmen edhe më mirë. Më ka njoftuar se është formuar Dega e L. në Malmö (Suedi-red). Këtë njoftim e kemi marrë edhe nga një anëtar (i anëtarit të KQ e vepron këtu) i L. nga Stokholmi dhe kishte thënë se, edhe në atë qytet po bëhesh përgatitjet për formimin e Degës së L.

Para disa muajsh kam ra në lidhje me G. Azemin nga Brx. Ai mua më një vetëm me një pseudonim e asgjë tjetër. Ia kam bërë të mundur të kontribuoj për L. por kurrsesi edhe të na dëmtoj, në qoftë se nuk ka qëllime të pastërta. Që ta kesh më të kjart qëndrimin e tij të tanishëm, po ta dërgoj një letër të tij që më erdhi para sa ditësh. Nuk më kishe njoftuar se, a të ka ardhur një përmbledhje e poezive të tij e cila më ka pëlqyer bukur shumë, të cilën i kam thënë Hasanit me ta dërguar? Edhe me Hasanin jam në korrespondencë të përhershme, edhe se ai ma ka dërguar librin e G.A. ai nuk dinë gjë për korrespondencën time me G.A. Edhe në qoftë se kontakton me te, nuk është e nevojshme të dijë asgjë tani për tani.

Të fala vëllazërore, M (Sabri Novosella)

P.S. Tre ekzemplarë të ZK. i dërgon rregullisht në adresën: Seven Bebe, Fevzi Pasa Cad. NO. 47, Fatih-Istanbul

14. Letra e 15 gushtit 1983

Vëlla i dashur S. 15 gusht 1983

Letrën tuaj të shkruar më 3 gusht 1983 L. të njëjtën dërguar edhe M. e lexuam shumë herë, e analizuam dhe erdhëm në përfundim me ta shkruar këtë letër. Shumë kohë pritëm letër prej teje por letra nuk erdhi. Pasi na the nëpërmes telefonit që mos të shkruajmë letër pa marrë adresë të re, nuk dinim ku të shkruajmë dhe vendosëm ta shkruajmë në adresë të U., e ai me ta dërgua ty kurse ti në përgjegje që është mirë të na e kthejsh sa më parë, të na tregosh edhe adresën ku mund të shkruajmë.

.... Për aktivitetin tuaj pranë heroit Sokol nuk e shohim të nevojshme të zgjatemi, pasi që ekzistojnë dokumentet, gjegjësisht letrat e shkruara me dorën e Sokolit, ku për ty shprehen mendimet më të mira.

Pas rënies së shokëve, kontributi yt është i madh në vazhdimin e aktivitetit të L. në atë mes, por edhe pse puna juaj dhe atyre që mbetën aty, e sulmuar vazhdimisht nga agjenti Osman Osmani, jemi të bindur se puna juaj pas ngjarjes e këndeje duhej të ishte më konkrete, më e frytshme sidomos në çështje të organizimit.

Pas rënies së shokëve, i more udhëzimet e duhura, e riorganizove Komitetin e Degës, i cili dual me emër të ri "KVG". Ai Komitet edhe pse filloi punën mirë nuk funksionoi ashtu si duhet dhe sipas gjasave tani më as që ekziston, ashtu si duhej të ekzistonte. Ky është gabim i madh që nuk ka guxuar kursesi të ndodh. Në vend që "KVG" sot të ishte një degë e fuqishme e L. me celulata e veta në shumë vende.

Ngjarjet e zhvilluan ashtu si u zhvilluan. Erdhi te formimi i KE (QE-shën i Xh. D.) për botën e jashtme dhe ti u ngarkove me detyrën e S. Or. kurse ti në vend që të formojsh sekretariatit prej tre ose pesë anëtarësh, prej shokëve më të sigurt, më të mirë dhe nëpërmjet tyre të punosh në formimin e celulave në të gjitha ato vende ku ekziston mundësia për një gjë të tillë, ti vazhdove të veprosh në popullarizimin e L. duke ia shtuar L. ndonjë anëtar apo simpatizant (gjë që nuk është për t'u nënvleftësuar) punë që më tepër i takon ta kryej një anëtar i thjeshtë i L. se sa një kuadër me një përvojë jo të vogël në radhët e forcave që janë të organizuara.

Në qoftë se puna juaj në formimin e sek. org. dhe degëve e celulave të tij është ende në zero, atëherë duhet t'ia fillosh nga zeroja:

-Në konsultim me shokët e KE, në një afat sa më të shkurtër t'i zgjedhësh dy a katër shokë më të besuar dhe me një përvojë të duhur dhe të formosh sekretariatit organizativ, prej tre ose pesë anëtarësh.

- Çdo aktivist të ngarkohet me detyrë të caktuar, e jo me detyra të përgjithësuara, e puna të marrë kahjen e stihisë.

- Të mbani mbledhjet e rregullta të KE dhe korrespondencën me ne këndeje, e jo si gjer më sot, pasi që është i domosdoshëm takimi, konsultimi dhe marrëveshja për punë të mirëfilltë dhe të suksesshme....

:"Sa i përket letrës për vëllaun e madh edhe ne kemi qenë të mendimit të shkruhet derisa kemi supozuar se është punë e ndonjë diplomati, por tani kur çdo gjë është e qartë, se kjo nuk është punë e ndonjë personi por qëndrim i dikujt që shqiptarët që jetojnë në trojet e veta në Jugosllavi kursesi të mos kenë një organizatë të fuqishme e cila do të jetë e aftë t'i prijë popullit dhe ta përfaqësojë para shteteve të botës dhe para forumeve ndërkombëtare. Shkruarja e letrave është e kotë. Ne na duhet ta bëjmë punën tonë e ata punën e vetë por gjithnjë duke e ruajtur gjakftohtësinë. Sa i përket asaj që thua se ata luajnë rolin e referit të njëanshëm ajo nuk është e vërtetë pasi referi është i dyanshëm. Kolegu i Plakut (Bujar Hoxhës) që është këtu dhe që kemi kontakte të vazhdueshme me te, na ka thënë tekstualisht: Bujar Hoxha dhe Engjëll Kolaneci kanë hëngër dajak për sjelljet dhe gabimet që i paskan bërë ndaj nesh, kurse ky mundohet të paraqitet si person

që mbron krahun e L., por na këshillon që të jemi të matur ndaj Abdullah Prapashticës në qoftë se nuk dyshojmë në te, por nëse dyshojmë ajo është çështje tjetër.

Në pyetjen tonë se çka t'u themi shokëve (njerëzve) për poshtërsitë e A.P. të cilat ia përsëritëm edhe njëherë, ne tre anëtarë të KQ, na u përgjegj:

-U thoni ato që m'i thatë mua!

Kjo tregon se ata nuk janë të interesuar ta përkrahin njërën apo tjetrën, por janë të interesuar që kurrsesi dy milion shqiptar në Jugosllavi të mos e ken një përfaqësues të vetëm në plotë kuptimin e fjalës, por të vazhdoj dhe të zhvillohet vazhdimisht një aktivitet më tepër spontan se sa i organizuar mirë. Çka duan me arritur me këtë do të shifet më vonë.

Të fala vëllazërore Mërgimi e Aliu (Sabri Novosella dhe Asllan Muharremi)

15. Letër Faridin Tafallarit, 10 tetor 1983

Vëlla i dashur F. (Faridin)

10 tetor 1983

Letrën tënde të shkruar më 29 shtator 1983 e mora dhe e lexova me vëmendje të madhe. Edhe kjo letër ma forcoi bindjen se me largimin e Nuhiut nuk është bërë kurrë një humbje për Lëvizjen, por të kundërtën, është bërë një pastrim i radhëve të Lëvizjes edhe nga një element i keq, kurse për agentin Osman as të mos flasim. Njerëzit e tillë janë vetëm mikrob të këqij që e brejnë Lëvizjen nga brenda e asgjë tjetër. Atyre ju intereson vetëm me i qitë za vedit e asgjë tjetër edhe nëse i marrim si jo të përgatitur nga vetë armiku për të na goditur nga brenda. Puna e njerëzve të tillë është jetëshkurtë dhe nuk kalon shumë e i dalin në shesh të gjitha poshtërsitë çdo kujt që është i tillë.

Ata e kishin shpërndarë edhe një kumtesë, gjoja për të vërtetuar të kundërtën e asaj që është thënë në Komunikatën e bashkimit, por ata e kishin vërtetuar atë që është thënë e asgjë tjetër. Aty ishte shtuar vetëm fjala- Socialiste. Kjo fjalë nuk është e rëndësishme, por e vërteta është se nuk është thënë në Vendimin e Bashkimit dhe se me Lëvizjen udhëheq Komiteti Drejtues, gjë që nuk është e vërtetë, por është thënë se me Lëvizjen udhëheq KQ i përbërë nga të tri KQ të tri ish organizatave. Edhe këtu nuk është thelbi kryesor i problemit. Çështja kryesore është se janë bashkuar tri ish organizatat në një të re e të vetme me emrin LRSHJ. Këtë e vërteton edhe kjo farë kumtese e tyre, ku nuk shifet askund se L. e paska formuar p. e tyre. gjë që është e vërtetë, kurse gënjeshtria e tyre ishte vërtetuar edhe me fjalët e tyre në atë kumtesë, pasi që LRSHJ nuk e ka formuar askush si person apo si organizatë e mëparshme, po është formuar me vullnetin e të gjithëve dhe atë punë e kanë krye përfaqësuesit e autorizuar nga të tri ish organizatat. Sa i përket asaj se kush ka dhënë iniciativë për bashkim, këtë e vërteton vetë fakti se gjatë tërë vitit 1982 (ndoshta mund të jetë gabim e është menduar të thuhet 1981-shën i Xh D) është punuar për çështjen e bashkimit dhe gjatë asaj kohe është bërë bashkimi i ish FKP me OMLK dhe kanë qenë në përfundim e sipër bisedime për bashkimin e këtyre të dyjave me Lëvizjen, kurse ata kanë qenë të fundit që janë inkuadruar në punën rreth bashkimit.

Ju jeni duke punuar shumë mirë sipas fakteve që i kemi në dorë, kjo është kryesorja. Çka thonë provokatorët e agentët e ndryshëm, nuk është aspak e rëndësishme. Atje tani e keni edhe Aliun (Asllan Muharremi-shën i Xh D) i cili është shumë i përgatitur, sidomos në çështje të organizimit dhe disa të tjerë që janë shumë djema të mirë dhe puna e tyre do të rezultoi me siguri shumë mirë në shumë drejtime.

Është mirë që për çdo gjë të konsultohesh me Aliun, pasi që ai është ekonomist dhe merr vesh nga çështjet me të cilën je ngarkuar, si sekretar për çështje financiare.

Formimi i celulave që do të veprojnë në konspiracion të thellë është e domosdoshme, për këtë me siguri keni biseduar edhe me Aliun. Këtë çështje merre me seriozitetin më të madh, se pa organizim, gjegjësisht pa i ngarkuar aktivistët me detyra konkrete, në konspiracion të thellë, nuk është e mundur të ketë punë të frytshme konkrete.

Të fala vëllazërore e revolucionare, M. (Mërgimi=Sabri Novosella)

16. Letër, vjeshtë 1983

(Diplomatët shqiptar në Turqi-shën i Xh. D.) - Thojnë Programi duhet të jetë i shkurtë, i kuartë dhe i nënshkruar nga KQ. Edhe në STATUT të ceket që LRSNJ është formuar më 17 shkurt ashtu si është e vërteta e jo më 15 maj, por më 15 maj ju kanë bashkuar edhe të tjerët. Dhe kurrësi ndryshe. Kush nuk e pranon këtë datë është armik i LRSNJ dhe donë me shkatërruar si të tillë.... STATUT duhet të jetë ky që e ke përpiluar ti - Skënder. (Sabri Novosella)

17. Letër Faridin Tafallarit, 25 dhjetor 1983

I nderuari vëlla F. 25 dhjetor 1983

Posa u ktheva nga udhëtimi, pata dëshirë me të shkruar, por nuk pata adresën tënde. Posa e sigurova mora me të shkruar. Me ty nuk më ra me ndejt shumë kohë, por për atë kohë që ndejtëm, më duhet të them se u binda në fjalët e Skënderit që i thotë vazhdimisht për ty. Është keq me ia thënë shokut në sy, por me të vërtetë u ndava prej teje e përshtypjet më të mira. Këso mendimesh ka pasur për ty edhe Sokoli.

Duke mos pasur kohë më të gjatë për t'i sqaruar disa gjëra, ndoshta ke mbetur me disa dilema për rastin e Ukës (Xhafer Shatrit-shën i Xh D). Ti mendon se ndoshta është fjala për ndonjë komplot të atyre të Vjenës. Është e vërtetë se ata na kanë thënë vazhdimisht të ruhem prej Ukës, ashtu si ju kanë thënë juve, ty e Skënderit, por fjalët e tyre u vërtetuan me fakte: Uka koka "ikur" prej burgut me luftue kundër atyne të Vjenës. Ti e shef se çfarë fryme kundër tyne është krijue atje. A ka qenë një këso fryme kundër tyne sa ka qenë gjallë Sokoli (Jusuf Gërvalla-shën i Xh D)? Jo me siguri, pasi që Sokoli nuk ka qenë njeri si Uka dhe ka pasur tjetër bindje dhe lufta e Sokolit ka qenë e drejtë e jo si e Ukës i cili qëllim të parë e kishte me luftua kundër atyre. Kjo shkon vetëm në interes të serbomëdhenjve e jo në interesin e popullit shqiptar. Ata na thanë për Ukën se është agjent, fjalë të ngjashme na kanë thënë edhe për IK (Ibrahim Kelmendin-shën i Xh D). Ato fjalë ia kanë thënë edhe Sokolit për IK, por për tjetërkend nuk kanë thënë kurrë. Pse nuk thanë për ty, për Skenderin, për Haxhiun apo ndokend tjetër që nuk është i dyshimtë. Gjërat duhet t'i kemi të kuarta e jo të bahen gabime. Ne nuk mundemi me luftuar kundër tyre. Ata që lufton kundër tyre kanë me përfunduar me turp dhe nuk kanë me i njoftë as familjet e veta. Ata kanë me mbetë rrugëve të botës ashtu si ka mbetur Emil Kastrioti që nuk e ka ihtararin e qenit.

Pasandej si është e mundur që të gjithë shqiptarët të kërkojnë Republikë dhe vetëm Uka të kërkoj shkatërrimin e Jugosllavisë? Lëvizja është formue për me luftue për Republikë në kuadrin e Jugosllavisë. Si është e mundur me luftue për Republikë e me kërkue shkatërrimin e Jugosllavisë?

Ato që janë kanë përpara nuk bën më me u përmend, pasi tash luftohet vetëm për Republikë. Serbomëdhenjtë na thonë se ne nuk po luftojna për Republikë, por për shkatërrimin e Jugosllavisë. Të njëjtat fjalë po i thotë edhe Uka. Pse me u përputh fjalët e serbomëdhenjve me të Ukës? Qëllimi i serbomëdhenjve është me e shtremrue rrugën e

drejtë të Lëvizjes dhe me e humbë drejtimin e vetë Lëvizja, pasi që kërkesën për Republikë po e përkrahë tërë populli shqiptar dhe popujt e mbarë botës. Serbomëdhenjtë po mundohen me na larguar prej kësaj rruge të drejtë e me ne shti me luftua, për çka po dëshirojnë serbomëdhenjtë. Serbomëdhenjtë dëshirojnë me luftue për me e shkatërrue Jugosllavinë, pasi e dinë se një punë të tillë nuk mundemi me e arrijtë por vetëm e vetëm me na shkatrrue më lehtë, kurse nga ana tjetër po don me na shti me luftue kundër atyre të Vjenës (diplomatëve të Shqipërisë-shën i Xh D) dhe udhëheqësve të tyre e me na bë mish për top. Të gjithë ata që ia hyjnë asaj pune kanë me përfundue ashtu si ka përfundua mërgata e qyqeve dhe puna e tyre ka me përfundua me turp.

Pra i nderuari vëlla, duhet ta kemi të kuart; të gjithë ata që në këtë etapë luftojnë me e shkatrrue Jugosllavinë e jo për Republikë janë agjenta të serbëve dhe qëllimi i tyre është me e shkatrrue Lëvizjen. Ne nuk do të lejojmë Ukën me u marrë me punë të tilla kurrsesi, pasi që ajo punë shkon vetëm në interes të serbëve e jo të popullit shqiptar.

Ti duhet të jesh vazhdimisht në kontakt me Skenderin e me Aliun, se vetëm ata e kanë të kuartë se si duhet me punue dhe puna e tyre është e drejtë.

U njoftova se shokët që janë kanë në burg, qenka lëshue, shumë u gëzova.

Edhe një gjë duhet me e ditë se Komiteti Qendror i Lëvizjes është në Kosovë të cilin Uka po don me e shkelë dhe me u bë vet kryetar e me e que Lëvizjen kah po dojnë ata që janë mbrapa Ukës. Anëtarë të Komitetit Qendror të Lëvizjes janë shokët e Sokolit të cilët Uka i urren për vdekje dhe don me shkelë mbi ta. Këtë punë nuk e kam ditur deri sa e kam parë vet se çfarë njeriu është Uka. Edhe udha e din se Komiteti Qendror është në Kosovë por kurrsesi nuk po mundet me e zbulue dhe nuk ka me zbulua kurrnjëherë, pas që ata janë njerëz të dijsëm dhe të fortë e jo si IK apo si Uka, që e urrejnë njëri-tjetrin për vdekje. Lëvizja është në Kosovë e në viset tjera shqiptare në Jugosllavi bashkë me Komitetin Qendror, kurse përjashta është vetëm një pjesë e vogël e Lëvizjes dhe ne na duhet me ba çka thonë ata që janë në Kosovë e jo çka thotë Uka.

Të fala vëllazërore, M. (Mërgimi=Sabri Novosella)

PS. Ne jemi bashkuar dhe prapë do të jemi të bashkuar, por nuk do të bëhet ashtu si thotë Uka, por si thotë Komiteti Qendror e jo si deri më tash; ne ia dërgojshim Ukës e Uka i mshefke, nuk ua jepte juve dhe nuk i botonte në Organ.

18. Letra e 16 janarit 1984

(Letër e Sabri Novosellës për Xhafer Durmishin dhe Faridin Tafallarin)

Vëllazër të nderuar S. e F.

16 janar 1984

Sot më ra në dorë proqesi i komisionit të mbajtur për rastin e U. (Xhafer Shatrit) i cili ishte i shkruar me dorë të I. (Ibrahim Kelmendit). Së pari po kërkoj falje për këto që do t'i them, pasi që ndoshta fjalët e shënuara në te nuk janë të juajat por të shkruara me kokë të vetë nga Ibrahimit. Nëqoftëse janë të thanuna nga S. (Xhaferi) e F. Faridini pak po habitem. **S. (Xhafer Durmishi) thotë se nuk jam për ate që të bazuar në Shq (Shqipërinë) të akuzohen shokët dhe vazhdon se Mërgimi ka qenë i ndikuar nga diplomacia lidhur me sjelljet e tij.**

Unë jo vetëm se kam qenë i ndikuar nga ata, por fjalët e tyre kanë qene fakti i parë në të cilin jam bazuar, kurse fakti i dytë ka qenë ajo kur e pash me sy të mij, kur ju tha të tjerëve: A i pe shpijunat e Shqipërisë dhe duhet të ruhemi nga shpijunat e tyre.

Për çdo kend që i ka dy kokrra mend në kokë, njeriu që i thotë tjetrit shpijun i Shqipërisë, duhet ta dij se vetë është shpijun i UDB-së. Vjen pyetja; nëqoftëse dikush e

akuzon tjetrin se është shprijun i Shqipërisë, vetë shprijun i kujt është. Pasi këto fjalë i tha U. Para syve të mij dhe i kisha faktet që m'i kishte thënë Profesori dhe m'i kishi përcjellë edhe ju fjalët e E. Engjëll Kolanecit, gjë që plotësisht u përputhshin, për mua nuk patë më kurrfarë dyshimi se U. Është i tillë. Këtë fakt e pa çdo kush në tryezë dhe në dorë. U. është njeri i mërgatës së qyqeve dhe të gjithë ata që janë të mërgatës së qyqeve, janë shprijuna të UDB-së, gjegjësisht të gjithë ata që janë kundër Tiranës, janë në shërbim të Beogradit në një mënyrë ose në një tjetër. Përndryshe unë aty e pash një frymë antiShqipëri e cila më tmerroj.

Zoti U. më tha me gojë të vetë se, nëqoftëse do të del në botën e jashtme Rexhep Mala, së pari do ta urdhëron vëllaun e tij me bisedua me te dhe me ia largua frymën që e ka, pasi që të gjithë ata që po vijnë prej mbrendshmit, po vijnë me frymë të atjehit; me dashuri për Shqipërinë dhe për udhëheqësit e saj. Pasi t'ia mbushë mendjen Rexhepit vëllaun i vetë, atëherë edhe ne i ndihmojmë e e kthejmë kundër tyre. Se ka vepruar kështu edhe me të tjerët e pash edhe vet ashtu si e keni parë edhe ju; kishte përgatitur njerëzit dhe i kishte bërë ashtu si ishte vet dhe faktikisht aty e kishte formuar bandën antiShqipëri. Do të shifni se ku do ta qoj zotin U. ajo veprimtari e poshtër e tij. Për gjakun e dëshmorëve, sa m'u ka dhimbt Rexhep Mala, aq edhe ia pata lakmi që e dha jetën si patriotë e me atë frymë që e ka pasur deri në çastet e fundit të jetës, dhe nuk doli rrugëve të botës me manipuluar gjithfarë njerëzish të poshtër me te dhe me ia turbulluar mendjen dhe ndjenjat e pastërta.

Jo U., por edhe Adem Demaçi do t'i thojsha se është shprijun i UDB-së, po t'i thoshte ato fjalë, pasi ato fjalë e vërtetojnë më së miri se kush është i udbës e kush kundër. Luftëtarët e lirisë i lidhë ideali, jo kumaria e akraballëku. Luftëtarët e lirisë janë të lidhur në mes veti deri sa i kanë të njëjta idealet, por kur idealet e tyre ndahen, edhe ata ndahen e shndërrohen në armiq të përbetuar....

Sa i përket asaj se unë paskam folur keq për Zeqën, kjo ka qenë kështu: Më pyeti Uka se pse janë prishë Jusufi me Zeqën kohëve të fundit? Ju përgjegja ashtu si ka qenë. Pas bisedimeve në Stamboll, Zeqa ia kishte dërguar një vendim të rrejshëm se gjoja ishte formuar "Fronti për Republikën e Kosovës", gjë që Sokoli ishte hidhëruar së tepërmi dhe i kishte thanun në një letër: Çdo gjë që e ka fillimin në gënjeshtër është e gjykuar në dështim që në fillim. Në lidhje me bisedimet e Stambollit ia pata dërguar një letër të Sokolit Ukës e cila ia kishte luajtur mendjen dhe tash po mundohet me qipifë diçka kundër meje në atë drejtim, por atë letër po ua dërgoj edhe juve. IK e ka edhe ai një hall tjetër: i kishte thënë dikujt se gjoja unë e paskna "prishë" me Sokolin dhe ia dërgova një letër të Sokolit që ma ka dërguar me kohë dhe ajo ia kishte luajtur mendjen, pasi Heroi Sokol e ka treguar me fakte se kush është IK dhe unë jam ai që kam bërë çmos që Sokoli mos ta largoj krejtësisht IK-në.

Sa i përket asaj që nuk jam konsultuar me shokë para se ta akuzoj zotin U., unë zotin U. nuk e kam akuzuar në emër të shokëve, por në emër tim personal. Unë nuk kam dashtur me akuzuar U. në emër të shokëve, pasi që e kam pasur parasysh se ndoshta dikush pajtohet me qëndrimet e tij dhe nuk kam dashtur askujt me ju imponuar dhe me qenë i detyruar me vepruar ashtu si i them unë, por të vendos ashtu si t'ia merr mendja dhe si gjykon vetë më së miri. Unë i kam pasur dy rrugë ose të ndahem me U. ashtu si u ndava, ose me i marrë të gjitha marrinat e tij mbi vedi dhe me u marrë me oportunitizëm ashtu si qesh i detyruar me u marrë qysh prej fillimit që U. depërtoj në radhët tona.

Në këtë proces pash edhe këso faktesh ku ishin thënë edhe nga IK dhe ju të tjerët të cilat bazoheshin në fakte të pamohuara: Redaksi ka qenë një person, udhëheqësi e Lëvizjes ka qenë një person. Do me thënë ai person është njeri me emrin "Ujkan". Këto

nuk i ka bërë pa qëllim zoti U. por me qëllime të poshtra. Si egocentrist i sëmurë ka dashtur me iu imponuar të tjerëve si "autoritet" dhe me manipuluar me ta ashtu si i teket, apo ashtu si e urdhëron dikush.

Kurse për korrespondencën më Nuhiun, Abdullahun e Osmanin, Uka vazhdimisht ka mbajtur një korrespondencë të poshtë, ku është munduar vazhdimisht me e ruajtur njëfarë "miqësie" me ta dhe me e rritë konfliktin në mes nesh dhe atyre dhe me ia bërë ashtu si më tha në mbledhjen e parë dhe ato fjalë janë inçizuar në magnetofon: Ju me Abdullahun jeni munduar me ia hedhë njëri tjetrit, kurse vetëm ne kemi punuar, d.m.th. të gjithë qenkan marrë me punë të kota dhe vetëm Uka paska punuar.

Ajo që thuhet se ZK del duke pasur si busullë Nova Hrvatskën është plotësisht e vërtet, do me thënë ZK nuk e ka busullë Komunikatën e bashkimit dhe artikujt e Z. Popu. të cilët bëjnë fjalë për çështje të Kosovës që janë në të vërtetë busullë për të gjithë dhe për ZK, por organet e hrvatve, kroatëve me të cilët kishte kontakte të vazhdueshme pa u konsultuar me askend, por edhe me do fashista bullgar të cilët i erdhën në shtëpi derisa isha unë në shtëpi të tij. ... Për numrin e 7 njerëzit kanë vërejtje, por edhe ata të Sh.A. (Shqipërisë). Aty ku thuhet: "Lëvizja nuk është bisht as instrument i askujt." Këto fjalë janë të drejtuara në adresë të Sh.A. i ka të kjartha çdo kush kush e sidomos ata që ju drejtohen ato fjalë. Unë ju thash atyre se, ato fjalë janë të thanuna prej U. në kokë të vetë e jo qëndrime të Lëvizjes.

E përfundoj këtë letër duke ju përcjellë ngushëllimet e të gjithëve për vdekjen heroike të dy shokëve në Kosovë.

M. (Sabri Novosella)

PS. në atë proces mungonte faqja 10.

19. Letër Komitetit Qendror të LRSNJ në Botën e Jashtme, 6 mars 1984

Shokëve të KQ në BJ (Komitetit Qendror në Botën e Jashtme)

U njoftova për vendimet e marura në mbledhjen e fundit (të 3 marsit 1984 në Gjenevë-shën i Xh D), me të cilat pajtohëm duke shpresuar se nuk do të bëhen më shkelje e vendimeve të shpallura me Komunikatën e Bashkimit, por gjëja më me rëndësi kishte mbetur pa u zgjidhur në atë mbledhje; çështja e redaksisë. Për këtë arsye dalë me këto propozime:

–Të formohet sa më parë Redaksia prej 5 anëtarësh. Nga krahu ynë të caktohen Aliu dhe S. (Asllan Muharremi dhe Xhafer Durmishi-shën i Xh D). Aliu të inkuadrohet menjëherë në detyrë të caktuar, kurse S. më vonë, sipas nevoje. Për anëtarët tjerë të vendosin shokët e krahut tjetër.

–Të vendoset dhe të nxirret Organi rregullisht për çdo muaj, pasi që ekzistojnë mundësitë kadrovike, materiale etj. pasi që kërkesat janë shumë të mëdha, ku shifet edhe nga një poezi, të botuar kohëve të fundit në Rilindje, ku i bëhet thirrje masës nëpërmes vargjeve që të informohet nga "Shtypi ilegal", për ngjarjet e vërteta.

–Të bëhet një autokritikë, për disa lëshime të vogla në disa numra të mëparshëm të cilat më nuk do të përsëriten.

6 mars 1984 Përshëndetje revolucionare, M. (Mërgimi=Sabri Novosella)

PS. Shoku F. ju lutem e shumëzoni në disa kopje dhe ua dërgoni të gjithë shokëve të KQ në BJ nga një kopje.

20. Letra e 23 marsit 1984

SHOKVE TË KQ NË BOTËN E JASHTME

Shokë të nderuar,

Më ra në dorë një letër e shokut IK e cila ishte shkruar para sa kohësh, por nuk kishte ekzistuar mundësia me më ardhur më heret dhe më erdhi me një vonesë mjaft të madhe.

Pas marrëveshjes që u arrijt në mbledhjen e fundit, gjë që dëshiroj të jetë marrëveshje e suksesshme dhe mos të kemi më nevojë të ulemi dhe të analizojmë punën e kaluar dhe të marrim vendime për punët që i kemi përpara, nuk e shof të arsyeshme të mabjmë korrespondencë veç e veç, por të gjithë çka të kemi për të thënë, t'i themi para forumit të caktuar, apo t'i shkruajmë atij forumi edhe kur kemi me i thënë diçka vetëm njëri-tjetrit, ashtu që të jenë në dijeni të gjithë shokët e KQ në BJ për çdo gjë.

Njëkohësisht më nuk guxojmë të merremi me poltronizëm dhe t'i mshefim njëri-tjetrit gabime që të mos i mbetet hatri dhe të mos priset jariana që ekziston në mes personave të caktuar, por të thuhet të gjitha ato se sa të vij puna ashtu si erdhi kohëve të fundit. Ku disa shokë më thonë se jam ngut, por qenka dashur këto punë me i lanë që kadal-kadal me dalë në shesh më vonë. Ky do të ishte gabimi i madh i dytë që do të bëhej, pasi që gabimi i parë është bërë qysh më para, kur i kemi vërejt të gjitha gabimet e Ukës, por kemi heshtur, apo i kemi thënë në mënyrë të tërthortë që të mos bëhet ndonjë thyerje e ky gabim na ka kushtuar edhe pas tashit, pasi që gabimet që janë bërë nga ana e Ukës, ato nuk janë gabime por fajet të rënda që e qojnë njeriun në tradhti të hapët.

Shoku I.K. në letër, në mes tjerash më thotë: -Ti po ma mohojsh se kam qenë anëtar i QE. Unë prapë po them se, jo vetëm IK, por edhe F. dhe S. kanë qenë anëtarë të atij forumi de jure, por jo de fakto. Do me thënë se kanë qenë anëtar formal e jo anëtar me plotkuptimin e fjalës. Po nëse paskeni qenë anëtar me plotkuptimin e fjalës, atëherë mbani përgjegjësi për fajet e Ukës, që i bëri me vetëdije të plotë kundër Lëvizjes dhe kundër popullit shqiptar. Ne kemi bindjen se Uka, në kokë të vetë i mori vendimet me të cilat e goditi dhe e komprometoi aq shumë Lëvizjen e jo duke u konsultuar me ju dhe duke e marrur aprovimin e juaj për ato veprime. Nëse nuk është kështu urdhëroni dhe folni.

Kemi bindjen se Uka nuk është konsultuar me ju dhe nuk e ka marrë aprovimin e juaj kur e privatizoi Organin dhe e shndërroi në fletushkë private në të cilën shkruante çka i tekej, apo çka e dirigjonte dikush. Uka bënte thirrje hysterike nëpërmes të Organit që të shkatërrohet e sëmura e Ballkanit, kurse në të vërtetë ato thirrje i paska shoqëruar me punë praktike e konkrete: Uka vetë e vërtetoi para më se 400 vetëve në tubimin me rastin e shënimit të dyvjetorit të ramjes së shokëve, kur tha se, Rexhepi dhe Nuhiu paskan pasur armët më të përsosura që i ka sot Evropa. Ky ishte një fakt i vërtetuar me gojë të vet nga ana e Ukës, se me të hollat e tubuara për familjet e dëmtuara nga goditjet e serbomëdhenjve të cilave nuk ju ka dërguar kurrë njëherë e për këtë Uka as që na pyeti ndonjëherë, ne që ishim më të afërmit e tij se, a ka ndokush që është në gjendje të mjeruar që t'i dërgohet ndonjë ndihmë, por me ato të holla paska blerë armë dhe i paska dërguar atje që me to me "fitue" Republikën. Këtë tashti e vërtetoi edhe burgosja e shokëve që u nxunë duke dërguar armë atje dhe ju dha në dorë ajo që e dëshirojshin

qysh me kohë serbomëdhenjtë dhe dualën me fakte para opinionit botëror se, gjoja LRSSHJ na qenka organizatë terroriste dhe jo Organizatë e cila lufton me mjete demokratike, për fitoren e një të drejte që e kanë të gjithë popujt e Jugosllavisë, ashti si është në të vërtetë Lëvizja e cila është Organizatë që lufton me mjete demokratike, pa e përdorur dhunën dhe terrorin, lufton me realizuar kërkesën për formimin e një republike si janë gjashtë të tjerat.

Vjen pyetja, a u pyet shoku IK, apo F. dhe S. kur Uka vendosi dhe muar këso aksionesh anti Lëvizje dhe anti shqiptare në këto situata kaq të ndërlikuara ku menxi që presin të tjerët që Kosova të shndërrohet në një Liban të dytë? Në qoftë se shoku IK, F. dhe S. i keni aprovuar këto punë të Ukës, duhet të jeni të sigurtë dhe të mos i vihen të gjitha fajet në qafë vetëm Ukës. Unë them me ndërgjegje të plotë se, mua kurrnjëherë nuk më ka pyetur dhe nuk kam qenë në dijeni për punë të tilla dhe për këtë arsye kërkoj llogari nga Uka për këto veprime të tij.

Pas dërgimit të materialeve të KQ disa aktivistëve të Lëvizjes që të sqarohen shokët dhe njerëzit e ndershëm, pas sulmeve që filloi me i bë Uka, duke e keqpërdorur si zakonisht Organin e duke i quajtur të gjithë ata që ju kundërvihen punëve të tij anti Lëvizje dhe anti shqiptare, fantosha dhe sarhosha, shoku IK i shpalli ato materiale anti Ukë dhe ju tha njerëzve se, janë të shpërndara nga një lahper dhe se janë të dyshimtë. Kuptohet, njerëzit nuk han bari, por kokën e kanë me veti dhe materialet i kuptuan drejtë dhe ato materiale e bënë efektin e vetë në atë situatë të vështirë. Ato fjalë që i tha IK, por jo edhe Uka, së pakut haptasi, pasi që Uka e dinte se kush është autor i atyre materialeve.

Sa zakonisht, për çdo gjë isha konklutua me njeriun kompetent, ashtu si u konsultova me rastin që na pyetën disa shokë në lidhje me nxjerrjen e një Organi lokal. Edhe për këtë rast m'u dha përgjegjja tekstualisht: -Të gjithë ata që punojnë, shkruajnë çfarëdo materialesh, parulla, trakte, por edhe organe, në qoftë se bëjnë fjalë për Republikë, jo se nuk guxon askush me i luftuar, por duhet me i ndihmuar me çdo drejtim që është e mundur. Të gjithë ata që i pengojnë, apo i luftojnë janë armiq të Lëvizjes. Në qoftë se del edhe një udbash dhe kërkon Republikë me gojë ose me shkrim, nuk duhet të luftohet, por duhet të ndihmohet e të përkrahet, kurse sot detyrë mbi detyrat është që të rregullohet çështja e ZK i cili aktualisht është duke i shërbyer armikut dhe jo Lëvizjes, Organ i së cilës është.

Që të konsultohem me këtë shok, ju vet më keni autorizuar dhe deri më sot, nuk kam marrur kurrnjë vendim që më ndalohej të konsultohem me të. Për këtë kam autorizim edhe nga të tjerët...

Shoku S. paska thënë se mos të bëjë edhe unë gabime se nuk po mujka me më mbrojtë. Në qoftë se vetëm me një fjalë më ka mbrojtë si person ka bërë gabim shumë të madh. Në qoftë se e mbrojmë njëri-tjetrin, apo e sulmojmë si person e jo si luftëtar të një çështje, është poshtërsia më e madhe. Ne nuk na lidh kurrnjë akroballëk, apo kumari, por na lidh vetëm e vetëm ideali i përbashkët. Vetëm në këto baza duhet me kritikuar, sulmuar dhe me mbrojtur njëri-tjetrin. Ne të gjithëve na duhet t'e mbrojmë Lëvizjen, t'i luftojmë ata që e godasin Atë.

23 mars 1984

Përsëndetje, Mërgimi (Sabri Novosella)

P.S. Ju lutem shoku F., e shumëzoni këtë letër dhe ua dërgoni të gjithë shokëve nga një kopje, kuptohet shokëve të KQ në botën e jashtme. Besoj se edhe letrën e mëparshme me të njëjtën porosi ua ke dërguar shokëve.

(Faridin Tafallari, T-Dhimbje-Qëndresë, Tiranë 1997, f. 455-457)

21. Përfaqësuesi i Leninistëve – armik i leninizmit

Sabri Novosella: "Ndërkohë më njoftuan se Xhafer Shatri gjendej në kampin e refugjatëve në Romë. Menjëherë i porosita shokët që të shkojnë e ta marrin. Kishin shkuar katër shokë me një veturë dhe me një dokument të udhëtimit, por Xhafer Shatrin nuk e kishin gjetur atje. Pak ditë më parë kishin shkuar disa aktivistë të OMLK-së nga Zvicra dhe e kishin marrë. Posa kishte arritë në Zvicër kishte kërkuar që të marrë kontakt me mua dhe e kishte dërguar Hasan Malën në Shtutgart që të marrë adresën time dhe numrin e telefonit. Pas marrjes së adresës dhe numrit tim të telefonit menjëherë u vumë në kontakt dhe ishim në lidhje të rregullta me letra apo telefon.

U morëm vesh dhe më 15 maj 1982 u mbajt një takim në mes të Xhafer Shatrit si përfaqësues i OMLK-së dhe Xhafer Durmishit e Osman Osmanit si përfaqësues të LRSNJ-së. Atë ditë u mor vendimi dhe OMLK u bashkua në LRSNJ. Së shpejti u botua numri i parë i organit të LRSNJ-së – "Zëri i Kosovës", në të cilin u botua edhe Komunikata e bashkimit.

Me bashkimin e OMLK-së në LRSNJ në ballë të aktivitetit në Evropën Perëndimore u vu Xhafer Shatri. Përkundër shumë viteve të kaluara në burgjet jugosllave, Xhafer Shatri kishte një energji dhe vullnet të jashtëzakonshëm për punë dhe si punëtor i madh që ishte i dha hov të madh gjithë LRSNJ dhe kështu kjo organizatë u popullarizua shumë si në Kosovë ashtu edhe në botën e jashtme.

Xhafer Shatri, i liruar krejtësisht nga dogmat staliniste-bolshevike, (edhe pse ende nuk kishte guxim të dilte haptas), me shumë aktivistë të dalluar demokratë në Belgjikë, SHBA, Gjermani etj. Kjo e bëri si të çmendur PPSH dhe menjëherë ia filloi nga kurthat shumë perfide." (SI E THEMELUEM LËVIZJEN PËR REPUBLIKËN SHQIPTARE NË JUGOSLLAVI - LRSNJ, Zëri, 28 mars - 4 prill 1992)

LETRA NGA XHAFER SHATRI

Për periudhën 16 maj 1982 - 29 tetor 1984

1. Letër Xhafer Durmishit dhe Osman Osmanit, 16 maj 1982
2. Letër Xhafer Durmishit dhe Osman Osmanit, pas 16 majit 1982
3. Letër Xhafer Durmishit, korrik 1982
4. Letër e Xhafer Shatrit për Xhafer Durmishin, 10 korrik 1982
5. Letër Xhafer Durmishit, 25 korrik 1982
6. Letër Xhafer Durmishit, 31 korrik 1982
7. Letër Xhafer Durmishit, verë 1982
8. Letër Xhafer Durmishit, 9 gusht 1982
9. Letër Sabri Novosellës, 16 gusht 1982

10. Letër Xhafer Durmishit, 24 gusht 1982
11. Letër Xhafer Durmishit, 8 shtator 1982
12. Letër Xhafer Durmishit, 11 shtator 1982
13. Letër Xhafer Durmishit, 20 shtator 1982
14. Letër Xhafer Durmishit, 26 shtator 1982
15. Letër Xhafer Durmishit, 9 tetor 1982
16. Letër Xhafer Durmishit, 10 tetor 1982
17. Letër Sabri Novosellës, 12 tetor 1982
18. Letër Xhafer Durmishit, 18 tetor 1982
19. Letër Xhafer Durmishit, 1 nëntor 1982
20. Letër Xhafer Durmishit, 14 nëntor 1982
21. Letër Xhafer Durmishit, dhjetor 1982
22. Letër Xhafer Durmishit, 19 dhjetor 1982
23. Letër Xhafer Durmishit, dimër 1982
24. Letër Xhafer Durmishit, 26 dhjetor 1982
25. Letër Remzi Ademit, janar 1982
26. Letër Xhafer Durmishit, 4 janar 1983
27. Letër Xhafer Durmishit, 31 janar 1983
28. Letër Xhafer Durmishit, shkurt 1983
29. Letër-Qarkore, mars 1983
30. Letër Xhafer Durmishit, 5 prill 1983
31. Letër për Remzi Ademin, 28 prill 1983
32. Letër Xhafer Durmishit, 28 prill 1983
33. Letër Remzi Ademit, 9 maj 1983
34. Letër Qendrës Ekzekutive, 1 qershor 1983
35. Letër në emër të Qendrës Ekzekutive, 7 qershor 1983
35. Letër Remzi Ademit, 10 qershor 1983
37. Qarkore në emër të Redaksisë së Zërit të Kosovës, qershor 1983
38. Letër Sabri Novosellës, verë 1983
39. Letër Remzi Ademit, 7 korrik 1983
40. Letër Qendrës Ekzekutive, 26 korrik 1983
41. Letër Remzi Ademit, 27 korrik 1983
42. Letër Qendrës Ekzekutive, 31 korrik 1983
43. Letër Xhafer Durmishit, gusht 1983
44. Letër QE, apo në emër të Qendrës Ekzekutive, 31 gusht 1983
45. Letër në emër të Qendrës Ekzekutive, shtator 1983
46. Letër në emër të Qendrës Ekzekutive, tetor 1983
47. Letër Asllan Muharremit, Faridin Tafallarit e Xhafer Durmishit, 18 tetor 1983
48. Letër Asllan Muharremit, 24 tetor 1983
49. Letër Asllan Muharremit, tetor 1983
50. Letër Remzi Ademit, 3 nëntor 1983
51. Letër Remzi Ademit, 7 nëntor 1983
52. Letër Asllan Muharremit, 22 nëntor 1983
53. Letër Shokëve të Komitetit Qendror (me përjashtim të Xhafer Durmishit), 19 prill 1984
54. Letër shokëve të Shtutgartit, 1 maj 1984
55. Letër dërguar Ibrahim Kelmendit, 1 maj 1984
56. Letër e shokëve nga Zvicra, 29 qershor 1984
57. Letër Faridin Tafallarit, 29 tetor 1984
58. NJOFTIM I SHOKËVE NGA ZVICRA

Faridin Tafallari: "Me organizatën Marksiste Leniniste të Kosovës (OMLK), që e kishte qendrën e vetë në Zvicër u vu në lidhje edhe Hysen Gegaj. Ky na tregoi se ishte takuar me përfaqësuesit e kësaj organizate. Hyseni foli shumë mire për ta. Por shtoi se për t'u bashkuar pranonin **vetëm me kushtin që të udhëhiqnin ata.**" (Terror-Dhimbje-Qëndresë, Tiranë 1997, f. 28)

Vlerësimet e mëposhtme të Hasan Malës e Xhafer Shatrit janë për librin "Terror-Dhimbje-Qëndresë të Faridin Tafallarit.

Hasan Mala: "Nga zemra të uroj shumë sinqerisht dhe sukses, se është shkruar ashtu si është, si ka qenë. Të lumtë, të lumtë se aty është e vërteta dhe vetëm e vërteta." (Faridin Tafallari, Dhimbje Krenare, f.382)

dhe
Xhafer Shatri: "Libri është një realitet dhe i paanshëm. Ky libër është si një lis i natyrshëm...Andaj, të lumtë dhe të uroj nga zemra suksese që iu kushtove këtij libri madhor të kohës..." (Faridin Tafallari, Dhimbje Krenare, f.382)

Mehmet Hajrizi: "Fillimisht duhet thënë se organizimi në Shqipëri i Luftës Nacionalçlirimtare, që për veprimtarët e kohës, në saje të literaturës që vinte nga Shqipëria, ishte në detaje i njohur, u bë modeli më i afërt, për ta zbatuar në kushtet e çlirimit të Kosovës. Atje ka pasur një Front Nacionalçlirimtar, që bashkonte forcat antifashiste të bindjeve të ndryshme, por Partia Komuniste në të **RUANTE ROLIN HEGJEMON.**" (Histori e një Organizate politike dhe demonstratat e vitit 1981, Tiranë 2008, f. 97)

Më 14 e 15 maj, në Zvicër u bë një takim në mes Xhafer Shatrit, Osman Osmanit dhe Xhafer Durmishit. Në atë takim, me propozim të Xhafer Shatrit u ndanë këto pseudonime:

Xhafer Shatri-	Lleshi
Osman Osmani-	Nika
Xhafer Durmishi -	Gjergji

Sqarimi kësaj çështje e lehtëson orientimin në këtë korrespondencë.

Në letrën e parë dhe të dytë e kam përdorë apo vendosur në kllapa fjalinë "**Të dyshimit provokoni në atë drejtim që ta dini se si po reagojnë**" të Xhafer Shatrit nga letra e tij e majit (e dyta sipas numrit rendor në këtë listë) e cila më duket se ndihmon për t'i ilustruar më mirë mendimet e vetë autorit të saj (pra Xh. Sh.)

1. Letër Xhafer Durmishit dhe Osman Osmanit, 16 maj 1982

Të dashur shokë!

Edhe pse jemi parë dje, po ju drejtohem sërish me këto rreshta në mënyrë që t'i konkretizoj disa gjëra. Komenti do të zgjatet ndoshta edhe më tepër se ç'ju kam thënë për arsyen e thjeshtë se ai duhet të jetë i gjatë, së paku katër faqe të organit dhe se në të do të jenë konturet e programit politik të LRSJ-së, i cili më vonë duhet të përkthehet në disa gjuhë dhe t'u dërgohet gazetave, institucioneve dhe shteteve të ndryshme. Prej artikujve që përmenda me këtë rast duhet ta botojmë (po mendon në artikujt që më keni dhënë). "Letrën e një mërgimtari" dhe letrën dërguar Kryetarit të Komisionit për të

Drejtat e Njeriut të OKB-së dhe Sekretarit të Përgjithshëm të OKB-së, prandaj ju lutem që në këtë drejtim të punoni ndonjë artikull dhe të ma dërgoni sa më parë.

Edhe përsa i përket punimit që u kam thënë do t'ua dërgoj me një vonesë të vogël, për shkak të përmirësimeve që duhet t'i bëhen në mënyrë që t'i përshtatet plotësisht kushteve të reja.

Do të ishte shumë e rëndësishme që të punoni edhe në përgatitjen e terrenit për dërgimin e organit të ardhshëm në Vajazan, kuptohet se kjo gjë duhet të bëhet në fshehtësinë më të thellë DHE ME PJEKURINË MË TË MADHE dhe për këtë të jeni në korrent vetëm ju të dy dhe askush tjetër, absolutisht askush tjetër. Gjithashtu ju lutem që në të ardhmen të përgatitni që të dy nga një referat për punën e deritashme duke hyrë në imtësitë më të vogla, qoftë të punës në kurbet, qoftë të punës në Vajazan, sepse i kam disa ide origjinale dhe një njohuri e tillë do të më ndihmonte shumë që t'ua konkretizoj sa më mirë atë që më duket shumë e domosdoshme ta bëjmë në këtë kohë.

Çështjen e statusit tuaj është shumë e rëndësishme ta rregulloni sa më parë, sidomos Nika, sepse kërcënimet i atij dostit është mjaft shqetësues. Lidhur me mart. mos u ngutni, sepse fare lehtë mund të ndodhë, që ato, në vend të ndihmës, të kthehen në një pengesë të madhe, të cilën ju sot është shumë vështirë edhe ta paramendoni.

Lidhur me atë rastin e djeshëm, ju mund t'i njoftoni shokët në mënyrë të përgjithësuar, pa përmendur asesi emra ose vende dhe në të ardhmen kujdesuni shumë që për vendin, kohën dhe qëllimin e tak. tonë të mos dijë askush tjetër, pos ju të dyve, absolutisht askush tjetër. Kjo praktikë duhet të kthehet në një princip të përhershëm.

(Të dyshimtit provokoni në atë drejtim që ta dini se si po reagojnë)

Po që se ju jepet rasti, ju lutem që t'ia përcillni Kamberit argumentimet tona lidhur me nevojën e ndryshimit të emrit të organit dhe përpikuni të jeni sa më origjinal dhe sa më të arsyeshëm dhe këtë mos e bëni sa për ta bërë, por vetëm pse është shumë e nevojshme.

Po që se ka diçka lidhur me L., më njoftoni, por asesi mos veproni jashtë suazave për të cilat kemi vendosur, pra takt dhe pjekuri të madhe. Gjithashtu pyeteni N., për njëfarë Mehmet Bala e Isniqit dhe më njoftoni menjëherë edhe për këtë gjë. Mos i tregoni se kush po interesohet për të, më duket se i përmenduri e ka edhe babain atje dikund tek ju.

Lidhur me artikujt që ju thashë, ata së paku në këtë numër duhet të jenë shumë të qëlluar, të gdhendur mirë dhe kryesisht nxitës e luftarak. Momentalisht ma merr mendja se në faqen e parë s'është e nevojshme të jetë fare ai simboli i L..., sepse mjafton vetëm ai i pari.

Do të ishte shumë mirë që të interesoheni dhe disi të veni kontakt me shokët tuaj në Vajazan, por me kujdes të madh, se mos i rrezikoni, sepse për ne është më se e domosdoshme që të kemi një pamje të qartë se ç'po ndodh atje, por ama kontakti të vihet në atë mënyrë që të mos humbim asgjë në këtë drejtim.

Në pritje të përgjigjes suaj, pritni përshëndetjet vëllazërore të
Lleshit (Xh. Shatrit), 16 maj 1982

Më shkruani në këtë adresë: Sandui Grandinari, Post Restant 1242, Satigny, Helvetia.

(Kjo letër i është dërguar Xhafer Durmishit dhe Osman Osmanit)
(Faridin Tafallari, Dhimbje krenare, Tiranë1998, f. 162-164)

2. Letër Xhafer Durmishit dhe Osman Osmanit, pas 16 majit 1982

Të dashur shokë, mbrëmë ua dërgova punimet dhe një letër të shkruar me këtë "arapqen" time, të cilën zor se do të mund ta lexoni. E di se janë vonuar por vërtetë ka qenë e pamundur të mbaroj punë më parë. Komenti s'doli ashtu siç e kam paramenduar unë, u frikova se mos po e zgjas dhe mos po bie në përsëritje, përndryshe punimi që është përgatitur si pjesë historike e Programit Politik u pa e nevojshme të botohet si gjoja punim që e ka shkruar një gjerman sepse afekti i tij ashtu do të jetë më i madh, pra si rubrikë e veçantë "Çka shkruajnë miqtë tanë për ne". Unë ia dhashë dikujt ta përpunoj pakëz por ai i kishte lënë disa gjëra shumë të rëndësishme, ndërsa ju po që se e shihni të arsyeshme ta botoni bazohuni kryesisht në kopjen e parë që teknikisht ka dalur më e dobët. Komentin e lash më të shkurtë sepse ma mori mendja që të jetë më shumë si thirrje për mobilizim, ndërsa për qëllimin e Lëvizjes do të jetë e mjaftueshme komunikata. Këto që të dyja i kam shkruar si në emër të KQ për shkak të efektit që do ta kenë. Në komunikatë, siç e patë i kam bërë disa gdhendje e plotësime të cilat s'e kanë dëmtuar aspak esencën e saj të mëparshme. Për "Prijësen ideore" që flitet më duket e gjymtë shprehja Organizata komuniste, sepse ne duhet ta formojmë P. (partinë-shën i Xh. D.) të cilën më duket se është më së miri ta emërtojmë P. e Popullit, apo popullore. Ky do të ishte vërtetë një emër origjinal, ndërsa përmbajtjen do t'i pasuronim ne me punë revolucionare e ide m-l. (marksiste-leniniste-shën i Xh. D.). Për këtë i kam shkruar edhe Kamberit (Sabri Novosellës).

Sa për dasmë (demonstratë), tash duhet t'i nisni propagandimit të saj në mënyrë të përgjithësuar, përndryshe në këtë situatë ajo duhet të bëhet vetëm në një vend dhe të bëhet si duhet në mënyrë që në këtë fillim (nisje prej zerosh-shën i Xh. D.) të jetë njëfarë lloj prove praktike e perspektivës që ka hapur bashkimi ynë. Për leje siç e thash edhe në telefon këtu jepen vetëm dy javë para saj, kështu që ne i kemi organizuar njerëzit që të kërkojnë në dy vende, në Gj. (Gjenevë) dhe B. (Bern) e ku të ndezë atëherë po ia mësyjmë.

Lidhur me zgjerimin e radhëve, mos bëni ndonjë hap të ngutur se mos po bini në "minë" shkoni vetëm në njerëz të sigurt, **ndërsa të dyshimitit provokoni në atë drejtim që ta dini se si po reagojnë**. Këtë punim për çështje organizative akoma s'ia kam përshtatur emrit të ri, por megjithatë do t'ua dërgoja, mirëpo s'po guxoj se mos po përcillet posta e pastaj dihet çelësi i punës sonë...

Për materiale të organit këqyrni dhe seleksiononi si duhet në mënyrë që të mos jetë njëngjyrësh, por në të ardhmen bile një muaj para botimit do t'i tubojmë të gjitha materialet dhe do ta bëjmë maketën e numrit të ri.

Për fjalime të botuara apo të lexuara në dasma ma merr mendja se do të ishte shumë mirë që ta shkruani një reportazh për dasmat e B. (Bonit) dhe V. (Vjenës), ky do të kishte efektin e vet.

Shokëve tanë që kanë fëmijë të rritur u thuani apo caktojuani nga një poezi që ta mësojnë përmendësh në mënyrë që ta recitojnë në dasmë si duhet, duke i abstrahuar të metat e të mëparshmeve dhe duke marrë nga të mirat e tyre.

(Të dyshimitit provokoni në atë drejtim që ta dini se si po reagojnë)

Për emër të organit (revistës) meqë po dalim haptas, **unë s'e shohë të nevojshme t'ia ndërrojmë emrin fare**, por në faqen e parë nëse stema nuk del si duhet atëherë qiteni si më parë, sepse si simbol vërtetë është shumë i mirë. Përndryshe komunikatën botojeni me shkronja nëntitujsh si material me rëndësi historike. Bile s'do

të ishte keq që ta botojmë e shpërndajmë së bashku me letërthirrjen për dasmë të cilën do ta shkruaj në rastin e parë dhe do t'ua dërgoj që ta shumëzoni me makinën e re, por nëse s'keni mundësi ta bëni këtë atëherë më lajmëroni. Për çdo rast nëse del diçka e ngutshme ju mund të më kërkoni në atë numrin që ua kam dhënë atë natë. Më kërkoni si Ukë dhe u thuani për kur u duhem dhe ku duhet t'u thërras apo t'u pres.

(Të dyshimtit provokoni në atë drejtim që ta dini se si po reagojnë)

Tash besoj së shpejti do të ndërmarrim diçka që ta sjellim këtu Halimin, **ndërsa për makina do të ishte mirë që t'i sjellim së bashku me dasmorët në autobus** por njëherë ju kryejeni shtypjen. Për Halimin na duhet të marrim gjithsesi mbrojtës se s'shkon ndryshe, sepse këta ... po shkojnë duke e ashpërsuar punën me të huajt. Përndryshe mua më kanë detyruar të punojë dhe kjo po më pengon vërtetë shumë, por s'ke ç't'i bëjsh, sepse tash për tash s'ke kah të luajsh.

Me Ibra. (Ibrahim Kelmendin-shën i Xh. D.) ka pasur kontakt një shok imi dhe i ka treguar për bashkimin, kështu që edhe ju ashtu siç jemi marrë vesh lejeni vetëm Far. (Faridin Tafallar-in-shën i Xh D) që të kontaktoj me te dhe të tregohet shumë i pjekur dhe i kujdesshëm, sepse ne duhet të kemi sa më shumë aleatë.

Kur kam menduar për ndarjen e detyrave, sidomos për çështje org. (organizative-shën i Xh D), kam menduar se Nika (Osman Osmani) kryesisht të orientohet brenda sepse e njeh terrenin, ka ardhur tash rishtas dhe s'i ka shkëputur lidhjet me njerëz... Ky është për neve fronti më i rëndësishëm dhe pa forcimin e tij ne jemi vetëm një hiq, sepse baza është atje dhe rrënjët tona duhet të jenë atje shumë të forta, absolutisht të pavdekshme po që se ne duam të ekzistojmë.

Ju lutem që për këtë çështje të mendoni shumë.

Tash në pritje të përgjigjes suaj pritni përhëndetjet vëllazërore të Lleshit.

2 maj 1982 (Gabim shtypi-kronologjie sepse kjo letër është shkruar pas 15 majit dhe para qershorit 1982-shën i Xh. D.)

Në faqen e fundit shënojin adresat e "ZK" (Zërit të Kosovës) në disa shtete ku mund të shkruajnë lexuesit. Ja një adresë e mirë por të mos i shtohet asgjë tjetër: BUCHHANDLUNG, BADHAUSSTR. 35, 2503 BIEL-BIENNE, SUISSE

3. Letër Xhafer Durmishit, korrik 1982

Shok Gjergj,

dje i mora të gjitha materialet që m'i ke dërguar, prandaj të falemnderit, por që në fillim më duhet të them se procesverbali më shqetësoi bukur shumë, disi ai N. ishte larguar shumë keq. Ajo është shumë e dëmshme dhe absolutisht e palejueshme... njëkohësisht i mora edhe dy letra të Kamberit dhe duke iu përgjegjur në to i thash se disi kam përshtypjen se prej fillimit e gjer më sot dikush ka manipuluar me Sahitin, me qëllim që duke i nxitur njerëzit njërin kundër tjetrit ta marrë vet situatën në dorë, prandaj është e domosdoshme që t'i hapësh sytë dhe asesi të mos e lëshosh situatën nga duart, pastaj do të ishte shumë mirë që ta analizosh çdo gjest të njerëzve gjer më sot prej që i njef dhe për çdo njërin të më njoftosh gjerësisht në mënyrë që ta kam një pasqyrë sa më të qartë dhe të dimë se çka duhet të ndërmarrim, por ti mos gabo ta humbësh torruan apo gjakftohtësinë, sepse dikush mund të leverdisë në këtë farë zbrazëtire që është krijuar. Prandaj ke kujdes se këtu aspak nuk është në pyetje frikësimi i mundshëm i N., por prapa kësaj fshehet krejt diçka tjetër e ndoshta është në pyetje edhe dëshpërimi i tij,

sepse ka pritur më shumë ndoshta... sido qoftë hapi sytë sepse kjo mund të ketë pasoja të mëdha edhe tek anëtarët tjerë të K. Është shumë me rëndësi ta di se çfarë qëndrimi në këtë rast (konkretisht pas daljes së tij (N.) nga mbledhja në mënyrë aq demonstrative), ka pasur Nika (Osman Osmani-shën i red.), a ndërmori diçka që ta qetësoj situatën sepse ai ndoshta ka ndikim tek N. dhe të mos e lerë punën të shkoj më larg. Sidoqoftë ti më shkruaj menjëherë dhe propozo se çka të ndërmarrim, apo ndoshta mund ta bindësh N. që disi të vie këndeje dhe të bisedoj me të unë, në mënyrë që të mos e lëmë këtë punë të shkojë më larg. Sa i përket Nai. ti duhet të kesh ndikim më të madh tek ai shok, sepse ai, ashtu si edhe ne të gjithë, është ushtar i popullit dhe s'guxon të bëjë apo ndërmarrë asgjë pa iu dhënë urdhër për atë gjë, përndryshe j. memzi që presin që ne të merremi me gjëra të tilla me të cilat jo vetëm se nuk arrijmë asgjë, por edhe e dëmtojmë çështjen shumë keq. Në anën tjetër duhet ta kanë të qartë që të gjithë se këtu ka disiplinë dhe askush s'guxon të hyjë e të dalë sa herë t'i teket në LRSNJ, apo aq më pak të bëjë çka t'i dojë qejfi. Bëjua të gjithëve me dije se nuk jemi klub anglez, por organizatë revolucionare e cila i ka ligjet e veta të cilave s'mund t'u shpëtoj askush.

Punimet i mora dhe siç e ke parë edhe ti ato duhet të përpunohen shumë, sepse në mesin e tyre vërtetë ka shumë të dobëta, dhe këto s'do të mund t'i dërgoj të gjitha menjëherë, por herë pas here dhe ti nëse mundesh nisja t'i shtypësh që tash nëse ekziston një mundësi e tillë, por ngadalë dhe të kesh kujdes që të mos bëjsh asnjë gabim, e pastaj i qet në faqe konkrete ashtu siç të konvenon më së miri, ndërsa për citatin e Jusufit aty s'ka kurrfarë problemi, larg asaj, por ma merr mendja se duke i lexuar punimet e tij të shumta ne do të hasim në citate tjera po ashtu të fuqishme dhe herëpsherë do të qesim edhe tjera. Punimi i Qemalit për gjendjen ekonomike është shumë i mirë, por duhet të korrigjohet, ndërsa ai tjetri s'më pëlqeu edhe aq. Sot e përpunova punimin e Kamberit për Plisin... ndërsa ditëve tjera ata tjerët dhe do t'i dërgoj me radhë dhe mundësisht sa më shpejt por besomë se po kam shumë punë, ndërsa në mbrëmje po kthehem mjaft i lodhur.

Sidoqoftë me organin s'bën të ngutemi, por ta qesim sa më mirë që tash, përndryshe kur të kem mundësi ta lë punën atëherë do të punojmë në të shumë më tepër, dhe natyrisht do të përpjqemi që të dalë në nivel artistik që ka qenë gjatë jetës së Sokolit. Para disa ditësh ta kam dërguar një letër të përgjithësuar për shokët e KD në të cilën jam përpjekur që t'i jap mendimet e mia lidhur me dy letrat që i ka dërguar Kushtrimi, prandaj do dëshiroja të dijë se a e ke marrë, njëherit pyete Nikën se a erdhi akoma ai punimi apo ç'u bë me të, të them të drejtën kjo gjë më ka shqetësuar bukur shumë... mos rastësisht kanë rënë në dorë të të zinjve... në atë punim janë bërë disa lëshime teknike, por besoj se nuk ka humbur shumë nga vlera.

Për këtë numër të organit unë po punoj në një koment për Kong. e XII dhe për këto proceset e tashme politike në Kosovë, dhe posa t'i mbaroj do t'i dërgoj. Sa i përket propozimit tënd për grumbullimin e të hollave ai është i drejt, këtë ta kam thënë që në fillim, por të them të drejtën në këtë drejtim po çalojmë, sepse kemi bërë shpenzime të mëdha duke u përpjekur që të mos i lemë të durojnë urie shumë nga familjet e shokëve tanë të burgosur. Mendoj se për këtë numër do të ishte mirë ta botojmë një letër të preکشme dhe përmes saj të kërkojmë ndihma materiale për familjet e të burgosurve. Letrën do ta shkruaj unë, por ti mendo se si, në çfarë mënyrë dhe ku duhet të dërgohen ato ndihma, në atë adresën e mëparshme apo gjetkë? Letra duhet të botohet në faqen e fundit...

Gjergj, është mirë që me Nikën ta kontaktoni sa më shpesh dhe t'i sqaroni çështjet me gjakftohtësi e sinqeritet dhe të mos e leni punën të marrë përmasa të këqija, sepse do të na dëmtonte shumë. Ju s'jeni të rinj asnjëri sa të mos e kuptoni se çfarë përgjegjësie keni. Kaq... Priti përshëndetjet vëllazërore të Ll. (Xhafer Shatri)

4. Letër e Xhafer Shatrit për Xhafer Durmishin, 10 korrik 1982

I dashuri shok,

10 korrik 1982

mbrëmë i mora dy letrat tua në të cilat i mësova bukur shumë gjëra lidhur me marrëdhëniet e ju të dyve (Xhafer Durmishit e Osman Osmanit-shën i Xh. D.), për të cilat kam shpresuar se duhet të jenë në nivel më të lart, por sidoqoftë këto janë gjëra që ndodhin, prandaj është edhe e domosdoshme që të tregohemi të pjekur e tolerantë dhe kurrë të mos i merrni njerëzit si duhet të jenë, por ashtu siç janë, me të gjitha të metat e mundshme që i kanë. Sidomos në të ardhmen keni kujdes, që në prezencë të të tjerëve të mos i qitni në shesh kundërthëniet tuaja, sepse në atë mënyrë e humbni autoritetin në sy të shokëve dhe ata pastaj s'u binden urdhërave tuaja, apo nëse në të ardhmen vie gjer tek ndonjë konflikt i ngjashëm, ju duhet të delni dikund dhe vetëm ju të dytë t'i shqyrtoni ato probleme. Përndryshe sa i përket motos së organit ato fjalë vetëm sa e bëjnë më të fuqishëm atë. Por mu për atë citat unë ka menduar se do të ishte mirë që të gdhendet në një gur (obelisk) të përbashkët varresh për të tre shokët sepse vërtetë është shumë domethënëse. Kur jemi tek varret, lidhur me këtë një shok ka biseduar me Ibra. (Ibrahim Kelmendin) dhe ai i paska thënë se gurët janë shumë më lirë dhe shumë më të bukur në Çekosllovakia, prandaj ma merr mendja se do të ishte mirë që për këtë çështje të konsultohemi me një skulptor dhe të na e jap ai një ide, disi për një gur (obelisk) të përbashkët për të tre, disi të jetë i madh dhe i vënë mbi një bazë të përbashkët guri mu në mes të të tri varreve dhe në të gdhenden emrat e shokëve të rënë së pari dhe pastaj ai citat aq i qëlluar... Sidoqoftë për këto gjëra duhet të mendojmë më gjatë dhe ta gjejmë një zgjidhje sa më të mirë.

Përndryshe më pëlqen kontakti yt me "Rininë kosovare" dhe të lutem që për këto gjëra të më njoftosh sa më gjerësisht, sepse ai është një terren shumë i përshtatshëm për neve, ndërsa për magjistrin po e marrë unë përsipër që të kontaktoj me të apo me një shok tjetër që ka mundësi, ndërsa për organin do të ishte mirë që sa më parë t'i rezervoni bile nja 200 ekzemplarë dhe t'i leni tek F. (Faridin Tafallari) e atje do ta çojmë ndoke t'i marrë, sepse duhet ta shfrytëzojmë një rast që t'i fusim disi në Vajazan, ku siç jam informuar disponimi është i mrekullueshëm. A e dëgjove mbrëmë Radio Beog. si lajmëroi për gjykimin e shokëve në Prishtinë dhe mos prezencën për "shkak të sëmundjes" të shokut H. Hysenit dhe reagimi e mospëlqimi i shokëve që të flasin para gjyqit përderisa të mos e sjellin Hydajetin në gjyq. Oh, kjo ka rëndësi shumë të madhe për besë, çka do të thotë se këtu ka qenë në pyetje diçka edhe më e madhe kur ata xhelatë marrin mundimin të njoftojnë për të...

Sa i përket organit në të ardhmen unë do të jap propozime konkrete se çka duhet të bëjmë, përndryshe ne këtu i kemi siguruar tri baza shumë të mira për mbajtjen e makinës dhe teknikës në tërësi... por tash në situatën e krijuar ma merr mendja se duhet ta zgjidhim çështjen organizative njëherë e përgjithnjë, ndërsa sa i përket propozimit për "dekonspirim" të përgjegjësit kryesor këtu ose dhe brenda na duhet të mendojmë më gjatë për këto gjëra, pra t'i masim të mirat dhe të këqijat që dalin prej kësaj dhe sidomos a është ky çelës i mjaftueshëm apo ndoshta duhet ndonjë tjetër që t'i mbyllë që në embrion të gjitha mospajtimet e mundshme që dalin pas këtij bashkimi të cilin duhet ta ruajmë si sytë e ballit dhe ta ushqejmë për çdo ditë qoftë edhe me gjakun tonë. Në anën tjetër për këto çështje duhet të bisedojmë me Kamberin dhe shokët e tjerë dhe t'i qesim në rrugë të gjitha çështjet. Sidoqoftë duhet ta ruajmë gjakftohtësinë dhe të tregohemi të pjekur...

Të fala Lleshi (Xhafer Shatri)

Këqyr për organ të sigurohen ata numra. Herën tjetër me shkruaj më gjerësisht për të gjitha çështjet. Më njohto më gjerësisht për "R. Kosovare" që ta kem një pasqyrë të qartë për ta.

5. Letër Xhafer Durmishit, 25 korrik 1982

I dashuri shok Gjergj,

i mora dy letrat e tua të fundit dhe nga e para e kuptova se ti akoma s'i ke marrë tri letrat e mia, ndërsa e dyta ishte e gjymtuar, sepse i mungonin dy faqet e para dhe nuk e dija se kush janë ata dy të tjerët që paskan dalë prej ku dhe pse, përndryshe dihej se ajo është në kontekst me Halimin, i cili është dashur të na lajmëroj para se të shkoj në T. (Turqi) dhe t'ia japim disa porosi për shokët atje, pastaj s'di si ka guxuar të rrezikojë e të shkojë me veturë nëpër Jugosllavi kur ai është dekonspiruar. Prej Kamberit e mora dhe një letër që ishte më tepër në emër të K. (Komitetit) "H. Prishtina" lidhur me letrën time, në të cilën shpreha mendimin tim për propozimet e Kushtrimit. Sidoqoftë unë prej teje s'e mora vesh se a të ka rënë në dorë ai punimi që ia pata çuar Nikës, apo duhet të ta dërgoj ndonjë kopje tjetër. Përndryshe do të ishte mirë që të takohemi sa më parë që të tre dhe t'i analizojmë punët dhe ta zbusim përçamjen në mes jush, sepse kjo është shumë e dëmshme e besa prej saj mund të rrjedhin pasoja edhe më të mëdha. Por një gjë kije parasysh mos të ndodhë që të vij gjer tek ndonjë konflikt i pandreqshëm, por ruajeni gjakftohtësinë që të dy gjer në fund dhe kur të ulemi të tret ne do ta shqyrtojmë situatën dhe konform saj edhe do të ndërmarrim masa konkrete, që ajo farë amullie të mos zgjatë më, sepse me thashetheme nuk qitet asgjë në dritë. Pasojë e parë e tyre është dalja e palejueshme e N. për të cilin ti s'më njoftove më gjatë se çka ka ndodhur, a ke biseduar me të më vonë dhe a e ke përcjellë sjelljen e tij më vonë. Hapi sytë dhe mos gabo ta lëshosh situatën nga duart dhe me zë autoritar bëju me dije të gjithëve se këto punë nuk janë dansing në të cilin mund të hysh e të dalësh sa herë që të teket... dhe kuptohet përpiku që të depërtosh në esencën e shkakut të këtij rasti dhe jo vetëm të këtij e të më njoftosh gjerësisht në mënyrë që ta kem një pamje më të qartë e ta shpreh mendimin tim lidhur me atë që duhet të ndërmarrim. Për gurët e varreve qenka bërë mirë që kanë marrë fund dhe ndoshta është dashur ta organizojmë një manifestim të madh për atë rast, por tash është vonë e në anën tjetër duhet ta shohim se si po merr puna fund pas këtij pushimit të tashëm të punëtorëve të cilët frikohem shumë se kësaj radhe do të kalojnë keq. Udba tash kryesisht me ta ka punë.

Sa për kurorë në emër të Kr. të KQ të LRSNJ mendoj se është e ngutshme, apo më mirë të them se ndodhë që të preken shokët, prandaj mendoj se do të ishte më mirë që ajo kurorë të qitet në emër të KQ të LRSNJ. Sa për IK unë me të kam biseduar shkarazi për gurët dhe me iniciativën e tij e jo timen, përndryshe ai njeri do të ishte i vlefshëm, ma merr mendja, vetëm në bashkëpunim me organizata të ndryshme e parti politike të këtushme, pastaj me organizata ndërkombëtare etj., dhe jo për tjetër, por pse këtu është kaheër dhe këtë punë e njeh më mirë se ne. Sidoqoftë mendo për këtë gjë më gjatë sepse kam nevojë të di mendimin tënd, e sa për dyshim, të jesh i sigurt, se unë atë s'e heq kurrë, por fle dhe ha bukë me të.

Korrespondenca jote me njerëz të ndryshëm është shumë e mirë dhe atë duhet ta vazhdoesh e ta zgjerosh dhe në këtë drejtim do të ndihmoj edhe unë posa ta lë këtë dreg punë, që, për besë më ka lodhur për së tepërmi. Por me këtë farë azili po duan të më zhagisin këta zotërinjtë, dhe pa e marrë atë, punën s'mund ta lë. Pos letrës që ia ke dërguar Engj. (Engjëll Kolanecit-shën i red.) të lutem që për atë njeri të më njoftosh

gjerësisht, për aftësitë e tij intelektuale, për intencat e tij lidhur me ne, por kuptohet pa përmendur emra etj., në këtë kontekst mendoj se do të ishte mirë që ta gjesht një adresë më afër teje ku do t'i marrësh letrat menjëherë, sepse ai shoku mundohet ashtu, dhe po vonohet puna në anën tjetër.

Për organ unë po ta dërgoj një artikull për Lubiqiqin që më ka ardhur prej Kam. ndërsa një koment tjetër për Kongresin XII dhe për proceset politike në Kosovë do ta dërgoj posa ta marrë vesh se sa u dënuan edhe këto grupet tjera në mënyrë që të jetë i përgjithshëm. Ndërsa në faqe të parë do të ishte mirë të botohet ndonjë fotografi e shokëve që po dënohen apo edhe gurët e varreve nëse ta merr mendja. Përgjegjen e letrave të lexuesve do ta shkruaj sa më parë sepse ajo ndoshta s'duhet të jetë e gjatë. Ndërsa për Bernin është referati dhe telegrami dërguar Kongresit e besa edhe një reportazh akoma i pambaruar. Unë do t'i dërgoj të gjitha e ti zgjidh çka ta merr mendja e sa për faqe, kjo më tepër mvaret prej materialeve, pra nëse ka materiale atëherë pse të mos i botojmë në 20 faqe, por ai të shtypet ngadalë dhe pa asfarë ngutje, veç kur të dalë ama le të dalë si duhet. Në atë moment që të lodhesh gjatë shtypjes, lere e dil e shëtit një kohë e pastaj vazhdoje prapë punën. Misini më është dukur atë ditë fytyrë e njohur, por vitet e gjata në kuvli lënë shtresë të trashë harrese, aq më parë kur fshati i tij është shumë afër me timin e unë s'e njihja. Por ti ma trego mbiemrin e tij a është Mavraj, Berishaj apo ndryshe e pastaj më njohto edhe për të shoqen e tij prej nga është.

Sa për lënien e makinës nuk ka ndonjë rëndësi se a është njeriu i organizuar apo jo, por duhet të jetë besnik dhe kjo mjafton; ndërsa për Qemajlin vepro siç ke vendosur sepse të dekonspirohet baza e makinës s'është e nevojshme e në anën tjetër edhe atij i duhet një kohë bukur e gjatë që të mësohet të punoj me të. Me komentin për gjykimet do ta dërgoj një karikaturë shumë interesante që ma ka dhënë një shok turk. Për statusin tënd s'më tregove se çka ke vendosur, mendoj se këtë punë duhet ta rregullosh sa më parë, dhe rrethit tënd thuaji le të kërkoj këshilla prej teje e jo prej të tjerëve...

25 korrik 1982

Të fala vëllazërore

Lleshi (Xhafer Shatri)

6. Letër Xhafer Durmishit, 31 korrik 1982

Shok Gjergj,

mbrëmë bisedova me F. lidhur me Br., ku shpresoj se do të ndaheni mirë, përndryshe duhet qenë syçelë dhe mos të ndodhë nesër si me N. Sidoqoftë mendoj se me njerëzit azilerosa në Perëndim ta përdorim formën gjysmë legale të punës duke e masovizuar L. edhe në atë mënyrë. Por kur janë në pyetje njerëzit që duhet të kthehen në K. apo edhe të tjerët në të cilët nesër mund të mbështetemi krejtësisht madje edhe në punët më të fshehta, atëherë seleksionimi duhet të jetë më se rigoroz. Për t'i shkruar BKSJ "Bajram Curri" kjo është punë shumë e lehtë, vetëm dërgojua organin e fundit dhe shkruaje një letër të mirë thjeshtë shoqërore përmes të cilës do t'ua bëjsh me dije se je anëtar aktiv i LRSJ, kuptohet duke kërkuar, në ato baza, bashkëpunim më të ngushtë dhe letërkëmbim të rregullt, kur do të bëheshin informime reciproke ndërsa më vonë do t'u drejtohem "zyrtarisht" po që se duan që të formohen si organ (k.) i mirëfilltë i L. Mirëpo këtu s'bën të ngutemi, duhet disi t'i nxisim që ata vet të propozojnë një gjë të tillë.

Sa për Br. po frikohem se mos kjo është e ngutur, sepse nuk i njihni njerëzit personalisht e përmes letrash këto punë nuk rregullohen si duhet... Sa për konton që më thua, ata njerëzit s'janë këtu këto ditë, përndryshe po tregohen mjaft aktiv dhe me ndihmën e tyre e kemi formuar Komitetin Zvicëran për Repu. Shq. në J. Sa për

keqpërdorim shokët më kanë thënë se s'ka asgjë në atë drejtim... por tash duhet të kërkohet ndihma për familjet e të burgosurve në Kosovë dhe në këtë drejtim do të formohet grupin e posaçëm që do të kujdeset për familjet e të burgosurve dhe ato ndihma t'i ndajë e t'i dërgojë sa më me rregull, në anën tjetër po i njëjti grup si edhe çdo shok i yni ka për detyrë të marrë informata nga më të hollësishmet se kush është dhe ku është në burg, sa është dënuar etj. Pastaj fotografitë e tyre janë të domosdoshme në mënyrë që t'u shkruajmë për çdo ditë organeve ndërkombëtare dhe shteteve e qeverive të ndryshme. Kjo pos që do ta popullarizojë çështjen tonë, do t'u ndihmojë edhe shokëve tanë të burgosur...

Letra e M. Vranicës është shumë e mirë dhe çështjen ai e shtron shumë drejt, por meqë se dija se si ke ardhur në kontakt me të s'dija se si duhet t'i përgjigjemi, prandaj më njofto për këtë gjë sa më gjerësisht dhe mos të lejojmë të na shkojë një rast i tillë pa e shfrytëzuar. Pastaj me N. Dibranin s'më kishe shkruar më gjerësisht, sidomos se si ke rënë në kontakt me të qoftë ti, qoftë K. Përndryshe këtë punë po e marrë unë përsipër ta rregulloj dhe kuptohet së pari do t'ia dërgoj disa organe...

Sa i përket Dritës ma merr mendja se nuk bën t'i dërgosh procesverbal etj., sepse e dëshpëron atë si njeri dhe në anën tjetër ATA s'i marrin seriozisht punët tona pastaj. Artikujt që m'i dërgove i lexova por ai për gjykimin e Ademit s'është përpunuar aspak dhe atë duhet ta botojmë në shtator kur të bëhen shtatë vjet të arrestimit të tij dhe njëherit ta përpunojmë sa më mirë... si i tillë ai do të dalë shumë i fuqishëm, sepse edhe unë i di disa fakte të cilat s'përmenden aty fare. Për të gjitha këto që t'i shtrova më lart, posa të kthehesh prej Br. më shkruaj gjerësisht, kuptohet duke më informuar edhe për atje se si u ndatë. Djali i Metushit plak është në Aust. këqyr merre adr. e tij ndërsa edhe për H. Gërvallën merr vesh se kur del dhe vërë kontakt me të pa e ditur kush tjetër pos teje dhe Haxh. absolutisht askush tjetër. Ai njeri na duhet shumë, shumë, si ajri. Mendoj se ai do të jetë përgjegjës për t'iu kundërvënë udhës edhe në atë mënyrën tjetër. Kaq... të fala Lleshi (Xhafer Shatri) 31 korrik 1982

7. Letër Xhafer Durmishit, verë 1982

Shtojcë

Shok Gj.,

Halimi m'i ka dërguar disa poezi kushtuar Afrim Abazit dhe shokëve që u vranë këtu si dhe një punim tjetër që ka ngjashmëri të madhe me traktin që u shpërnda, mirëpo meqenëse në trakt disa gjëra janë thënë më mirë dhe më fuqishëm (po që nuk do të thotë se do të pajtohem me të gjitha) e pash të arsyeshme t'i marrë disa faqe të traktit të cilat mendoj se duhet botuar, së pari sepse disa gjëra janë aktuale dhe së dyti se mosbotimi i punimeve të tij ndoshta do të merrej si injorim i qëllimshëm. Në pamundësi që t'i shtyp po t'i dërgoj fletët e ndara me lutje që gjatë botimit ta bëjsh ndonjë përmirësim gramatikor e asgjë tjetër, sepse në këtë mënyrë edhe kësaj radhe duam t'ua bëjmë me dije se përkundër të gjithave ne i konsiderojmë shokë e bashkëluftëtar, përderisa të ulemi në tavolinë dhe atëherë t'i shqyrtojmë çështjet njëherë e mirë. Këtë punë do ta bëjmë posa të dalë prej spitalit, sepse kështu nuk shkon më. Ne përfundimisht duhet t'i qesim në vi punët, le të dihet njëherë e mirë kush për çka është dhe atëherë "le të ndahen dhentë dhish" siç thotë populli. Këto mospajtime dhe ndërmjetminime na kanë kushtuar shumë e sidomos mua, sepse po më shqetësojnë edhe më tepër se sa duhet. Drejt e marrtë unë s'po mund ta marrë me mend pse po ndodhë kështu. Në vend se t'i bashkojmë forcat e t'i ndajmë detyrat dhe çdo njeri të kontribuojë aty ku mundet ne po merremi me gjëra të imëta që nuk guxojnë të çojnë asnjë çik peshë në jetën e luftëtarëve

të lirisë. Po më mundon më së shumti fakti se sikur të mos ishin këto ne sigurisht do ta ndërtonim një bazë të fortë brenda në Vajazan, një rrjetë të pathyeshme, sepse tash shkojnë mërgimtarët tanë dhe ne duhet ta intensifikojmë aktivitetin tonë.

Poezinë kushtuar Afrim Abazit e shkrova me dorë, por besoj se ti do të mund ta nxjerrësh shkrimin tim. Kaq...

Të fala Ll. (Xhafer Shatri)

P.S. Fotografinë që po ta çoj ma kthen më vonë, sepse e kam shkëputur prej një libri të huaj.

(verë 1982-shën i red.)

8. Letër Xhafer Durmishit, 9 gusht 1982

Shok Gjergj,

Po të shkruaj shumë për nguti. E mora letrën tënde dhe ja përgjegjja. Artikujt për Ademin dhe Jusufin duhet përpunuar shumë, sidomos të dytin mos e boto tash sepse ka lajthitje, sidomos teprohet lidhur me mua. Ne nuk guxojmë të bëjmë autopropagandë! Kjo do të na komprometonte keq në njërin anë dhe në tjetrën s'përkon me moralin tonë. Komentin për burgosjet ta dërgova dje, S'ka bërë të jetë më i shkurtë. Në organ do ta botojmë fletën e gjelbërt me lajme (tash emrat e të dënuarve) të ngjashëm që e botonte Sokoli ynë në Lajmëtarin... Njëherit po ashtu si fletë të pavarur do ta botojmë një fletanketë të Inter. Amnesty-s për të burgosurit (informatat). Nëse bëhet tepër atëherë po e botojmë si trakt dhe e shpërndajmë pas organit.

Mos u ngut gjatë shtypjes, le të dalë pa gabime ky numër, sepse në të ardhmen do ta botojmë më shpesh, sepse unë vërtetë s'bën të punoj më tutje. Më ka ardhur në maje të hundës. Po që se organi s'del i fuqishëm pas nr. 4 e tutje për ne është vdekje. Kjo gjë po më mundon shumë, akullnajë shpirtin po ma bën. I kam marrë dy letra prej K.

Ç'u bë me Nikën? A po e sheh ndonjëherë?

Më shkruaj e më njohto a ka kohë ta përpunoj bile artikullin për Ademin dhe një koment të shkurt për Kongresin XII të LKJ. Për atë të Jusufit bisedo me Mërgimin, dhe përpiku ta bindësh që ta lëmë për numrin e ardhshëm. Konton ta dërgoj nesër. S'ka pasur keqpërdorime me sa kam kuptuar. Mos u ngut gjatë shtypjes fare.

9 8. 82 (9 gusht 1982)

Të fala Ll. (Xhafer Shatri)

P. S. Fotot botoji siç ta merr mendja në këtë numër. Të dënuarit duhet të jenë pikë qendrore.

9. Letër Sabri Novosellës, 16 gusht 1982

I dashuri vëlla,

para dy ditësh më erdhën përnjëherë nga ti katër letra, dy prej të cilave ishin vazhdim i një reportazhi të gjatë, (i cili tregon se autori ka aftësi dhe talent të bëhet një gazetar shumë i mirë, vetëm porosite të lexoj sa më tepër), dhe dy të tjera tok me raportin aq të thukët lidhur me bisedimet që ke pasur me Plakun (Bujar Hoxhën-shën i red.), por së pari po dua të të njohtoj shkurtimisht për shkakun pse po t'i vonoj nganjëherë përgjegjet e pastaj drejt e në temë.

Siç e di, që më kanë detyruar të punojë dhe prej atëherë unë punoj në një shtypshkronjë të vogël si letërpërpunues, në njëfarë makine shurdhuese të cilës më duhet t'i rri në këmbë prej orës 7-17, mirëpo meqë rruga është bukur e gjatë dhe lidhje direkte nuk ka, pos këtyre nga dy orë po më shkojnë nëpër tramvaj, autobusë dhe në fund në tren. Do të ishte e tepërt ta them se sa po lodhem, pastaj po ia nisim këto obligimet tona të përhershme të cilat s'guxojmë t'i harrojmë për asnjë moment; duhet t'i lexoj gazetat jugosllave "Politikën", "NININ" dhe Rilindjen rregullisht, pastaj bile një gazetë të këtushme, letrat e shokëve, ndërsa libra shumë pak apo më mirë të them hiç edhe pse kam aq shumë nevojë. Kuptohet se kohën më të madhe po duhet t'ia kushtoj organit dhe çështjeve o. por këto të fundit jo drejtpërsëdrejti, mirëpo megjithatë po duhet energji e përqendrim shumë i madh, pas të gjitha këtyre më duhet të fle (kurrë s'po mund të bie para orës 24) e besa edhe atëherë po më ndihmojnë të "pushoj" ëndrrat e domosdoshme për përjetimet në ato kuvlitë e përgjakura. Këto që t'i shkrova mos i merr si lavdim për gjoja punën time "të madhe", por vetëm si arsyetim pse s'po mund të përgjigjem me kohë në letrat tua edhe pse kjo është aq e nevojshme dhe për mua aq e rëndësishme...

”Sa i përket letrës tënde të fundit, për mua çdo gjë është e qartë dhe qëndrimin tënd e aprovoj plotësisht, sepse ta duan dy vetë një njeri kjo është vërtetë më tepër se krim (ti duaj mua e unë veten kjo s'shkon). Përndryshe unë me djem të vëllaut s'kam pasur rastin të rri shumë, vetëm me njërin në Itali. Por këtu jam informuar prej shokëve lidhur me ta, dhe nga të gjitha këto kam ardhur te përfundimi se këta njerëz nuk po e bëjnë atë që duhet ta bëjnë apo atë që pritet prej tyre dhe jam i sigurtë se këtë gjë nuk e dinë eprorët e tyre. Besom se këta njerëz nuk kanë fije konspiracioni në kontakt me njerëzit tanë, p.sh. ai që kam biseduar me të në Itali u ka treguar njerëzve se ku kam shkuar unë...dhe kur e kam kuptuar një lëshim të tillë unë s'kam mundur t'u besoj veshëve të mi. Kjo dhe të tjerat që t'i përmenda m'i kanë hapur sytë shumë prandaj edhe kam insistuar aq shumë më 15 maj që kontaktet me këta njerëz t'i mbajsh vetëm ti. Meqenëse është kështu ma merr mendja se është e domosdoshme që t'u drejtohem drejtpërsëdrejti sh.e. dhe b.p. dhe atë me shkrim dhe t'i njoftojmë detalisht për të gjitha dhe vetëm pas përgjigjes së tyre me shkrim të marrim qëndrim të caktuar... dhe kuptohet t'ua bëjmë me dije se ne nuk jemi aventurier që me veprimet tona duam ta rrezikojmë edhe atë. Assesi. Prandaj nëqoftëse mendojnë se veprimtaria jonë shpie në atë drejtim, atëherë le të na tregojnë, apo të them më mirë le të na bindin me fakte.

Pas të gjitha këtyre po që se vazhdon avazi i vjetër atëherë do t'i ndërmarrim masat e domosdoshme dhe të bazohemi vetëm në forcat tona. Por në atë rast ti duhet të vish këtu dhe mos gabo që familjen ta qosh atje. Po ta them drejt se edhe me Premtonin keni gabuar, këtë do ta marrësh vesh më vonë... Ne s'guxojmë të kërkojmë ndihma të tilla prej vëllaut, pra ndihma të prekshme që nesër armiku mund t'i përdorë si kompara delikt të them. Ajo ndihmë duhet të bëhet vetëm përmes një personi nga pala jonë dhe në atë mënyrë që pos dy-tre vetësh askush mos ta dijë, absolutisht askush, sepse në të kundërtën kjo do të ishte një lojë e asgjë tjetër. Këtë gjë, po e them prapë, duhet ta bësh vetëm ti e askush tjetër, përndryshe do të ketë pasoja të mëdha, ja për shembull, mbrëmë bisedova me S. (Xhafer Durmishin-shën i red.) dhe po më thotë se ka biseduar me ata të V. (Vjenës-shën i red.) dhe ai i paska kërkuar adresën e atij shokut me të cilin ti e ke vënë atë kontakt aq të mirë në Br. Këtij shokut tonë si thash asgjë, sepse është i ri dhe akoma si kupton shumë gjëra sidomos në këtë fushë.

Pos tjerash i paska thënë se gjoja ti i ke thënë Plakut se edhe ne apo më mirë të them unë s'qenkam i kënaqur me ta... sidoqoftë unë i kam thënë S qysh më parë se me atë njeri dhe as me kolegët e tij unë s'dua të bisedoj, sepse është shoku kompetent për këtë çështje, prandaj nëse kanë diçka le të urdhërojnë e të bisedojnë me të, çka është kjo t'i

formojnë qindra lidhje? Lidhur me këtë do të ishte mirë, që ti t'ia tërheqësh vërejtjen Sahitit (Xhafer Durmishit-shën i red.) për këtë çështje dhe le ta kuptojnë ata njerëz se ne kemi disiplinë... Mbjaj mend, nëse këtyre punëve s'ua presim rrugët që tash dhe t'i qesim në baza të shëndosha, atëherë do të kemi pasoja nesër që edhe dreqi do të çuditet. Këtu s'ka lojë. Politikë në mes vëllezërve s'guxon të ketë. Dreqi e marrtë thesi është thes, por njëqind bira nuk i ka.

E sa për dëshpërim që më kishe thënë, për këtë mos u mërzit aspak, sepse unë jam i përgatitur për të gjitha ama për të gjitha dhe e di se vetëm të bazuar në forcat tona ne do të fitojmë më lehtë. S'po e zgjas më tepër, sepse jam shumë i lodhur. Në letrën tjetër do të shkruaj edhe më gjerësisht për këtë gjë, por të lutem që edhe ti të mos e marrësh këtë si tragjike, sepse e shkatërron shëndetin kot.

Përsëndetje vëllazërore prej u. (Uka=Xhafer Shatri)

16 gusht 1982

10. Letër Xhafer Durmishit, 24 gusht 1982

Shok Gj.

pas një kohe bukur të gjatë, sot po të lajmërohem më gjerësisht njohtoj se unë marrë në tërësi jam mirë, tash pasi që edhe këtë numër veç e kryem po më duhet t'i hy përpunimit të materialeve për numrin tjetër në mënyrë që të mos vonohemi, sepse mund të ndodhë fare lehtë diçka e pastaj ne duhet të shkruajmë për të e kështu bile le të qëllojnë të gatshme këto që i kemi. Lidhur me këtë ma merr mendja se do të ishte më se e domosdoshme që t'i ndajmë rubrikat në disa vetë dhe të perfeksionohemi në to, sepse në atë mënyrë do të na dilte më pak punë e në anën tjetër edhe organi do të ishte shumë më kualitativ. Sidoqoftë mendo për këtë dhe propozojë ndonjë shok që ta merr mendja se mund të kontribuoj me shkrime...

Po ti andej si po ia shpie, a të erdhi ende ai trakti për të burgosurit, pastaj me Nikën a u takuat akoma? Ma merr mendja se do të ishte mirë që të shiheni sa më parë dhe me gjakftohtësi t'i zbutni kundërthëniet e mundshme që keni, sepse pa unitet ne vërtetë s'mund të bëjmë asgjë, ani sidomos në këtë situatë. Gjithashtu edhe me N. (Nuhi Sylejmanin-shën i red.) do të ishte mirë ta zbutësh konfliktin, së paku të sillësh me të, po që se takoheni, me mjaft gjakftohtësi dhe të bëjsh çdo gjë që të viesh gjer tek shkaku i vërtetë që e shtyri të veprojnë në atë mënyrë...

Lidhur me rastin në Dyseldorf unë nuk kam marrë letër akoma prej një shoku që ka kontakt me atë mësuesin apo çka ishte ai, por e pata një bisedë telefonike me shokun tim dhe ai po më thotë se ka biseduar me atë, poashtu përmes telefonit dhe ai qenka prekur pse gjoja ti i paske përmendur disa raste të shokëve të vuarë, jo ai ka thënë kështu, jo ai tjetri ka thënë ashtu...

Përndryshe diçka konkrete jo. Besoj se më vonë do të informohem edhe më gjerësisht e pastaj të shkruaj. Fundja edhe harroje atë rast, por kij kujdes në të ardhmen e mos hyr thellë me I. (Ibrahim Kelmendin-shën i red.) edhe nëse të provokon thuaji të lutem këto gjëra kanë marrë fund kaherë, ne jemi bashkuar e po luftojmë bashkë, prandaj t'i lëmë ato që kanë qenë...

Prej Kamberit ka ditë që s'kam marrë letër, s'e di hiç se si e ka punën.

I dashur Gj. tash s'po e zgjas më tepër, por të lutem pranoji të falat e Ll. (Xhafer Shatri)
24 gusht 1982

Tash e tutje më shkruaj në këtë adresë:

Mark Mirdita

Cl. Al. c/o STC

16 Rue de Chaudroniees
1205 Geneve

(Për shkak të prishjes së shiritit m'u desh të shkruaj në këtë mënyrë, për shkak se çilja mbrapsht e letrës më doli kështu. Më falë pash besën. Besoj se e lexon edhe kështu fundja me pasqyrë. Mos më shkruaj në adresën e mëparshme.)

11. Letër Xhafer Durmishit, 8 shtator 1982

Tutjeta Gj.

me vonesë më ra në dorë letra jote, pothuajse menjëherë me organin dhe të them të drejtën marrëdhëniet e ju të dyve nuk më shqetësuan pak, unë vërtetë s'po mund ta kuptoj këtë... do të ishte mirë që të uleni vetëm ju të dy dhe me gjakftohtësi t'i shoshitni gjërat që nga fillimi sepse këtu si duket është një djall i madh në pyetje, ti do të thuash se ai s'po vjen në takim, mirë, por megjithatë bën prapë përpjekje në këtë drejtim dhe të lutem ruaje gjakftohtësinë çkado që të ndodhë... mos harro se nuk guxojmë të ngutemi aq më parë kur përgjegjësia jonë është aq e madhe, prandaj përpiqu sa të mundesh që ta bëjsh mirë sepse keq bëhet fare lehtë, siç po e sheh po kemi vështirësi të mëdha në këtë fillim e bile brenda ta ruajmë në mos tjetër një qetësi të përkohshme (nëse s'ka rrugëdalje tjetër?) gjersa t'i konsolidojmë radhët. Siç po e sheh ne duhet të llogarisim gjithmonë edhe në pengesa nga më të papriturat, por megjithatë duhet të mësohemi me të metat e njëri-tjetrit, mjerisht askush s'është i përkryer, sepse ky shekull i njëzet (më mirë të quhet shekull i nervozës) ka nevojë për njerëz tolerantë, pasi njëmend s'po shkon ndryshe. Të them të drejtën unë as me veten s'jam aspak i kënaqur, por çka t'i bëjsh. Me ata shokët konsultohu dhe ruajeni të gjithë gjakftohtësinë dhe sidomos çdo qëndrim që ta merrni ai le të ketë si qëllim interesin e përgjithshëm...

Për propozimet e tua lidhur me festat e Nëntorit pajtohem plotësisht, por siç i kam propozuar edhe Kamberit në një letër të mëparshme, së do të ishte mirë që më dhjetë dhjetor, Ditën Ndërkombëtare të të drejtave të Njeriut të organizojmë një manifestim këtu para pallatit të OKB, ose më 17 janar aty ku na janë varur shokët, ma merr mendja se kjo do të kishte një jehonë të madhe para opinionit ndërkombëtar ani sidomos këtu, por e ka një të keqe sepse është e premtë pra ditë e punës, ndërsa për përgatitjet ke plotësisht të drejtë, sepse ato njëmend duhet të bëhen me kohë, por tash për tash mendo edhe ti për këto propozime e pastaj të vendosim të gjithë tok. Këtë të fundit do ta përgatisim shumë më mirë se të gjithë deri më tash, por edhe unë e kam njëfarë problemi: Këto ditë më duhet të operohem dhe kjo sigurisht do të më humbë kohë, mirëpo mos rri fare po shkruaj sa të mundesh, kuptohet se këto nuk dalin që në fillim mirë, por më vonë i përmirëson e redakton ngadalë... Për këtë konfliktin në D, atij njeriut i paska mbetur shumë hatri pse gjoja ti i paske përmendur ata shokët e varur... Diçka tjetër jo, së pakut kështu u informova.

Lidhur me organin më duhet të them se skema që ma dërgove në fillim nuk më kënaqi, ishin bërë disa imputime e amputime, ndoshta disa edhe prej ngutjes, në anën tjetër disa ndryshime të shenjave të pikësimit ua ndërrojnë kuptimin shumë fjalive, por kur e mora organin të kompletuar atëherë më la përshtypje shumë të mirë. E sa për atë që më thua ti se si duhet të jetë organi ynë, kuptohet se pajtohem plotësisht, sepse vërtetë është e domosdoshme që të dalim me një organ sa më të fortë dhe atë mundësisht ta shpërndajmë në të gjitha anët.

Dërgimi i apar. atij shokut është ide shumë e mirë, prandaj përpiqu që edhe shokëve më të besueshëm aty sugjerojua që të bëjnë çdo gjë e ta krijojnë nga një lidhje të pavarur, sepse kjo është shumë e rëndësishme... Sa i përket dhënies së materialeve E. (Engjëll Kolanecit-shën i red.) ma merr mendja se nuk do të ishte mirë. Ne ato i kemi

për arkivin tonë, e ai e ka gazetën ta lexoj dhe njëherit obligimin që të kujdeset për gjëra më të mëdha...

Të fala Ll. (Lleshi=Xhafer Shatri) 8.9.82 (8 shtator 1982)

12. Letër Xhafer Durmishit, 11 shtator 1982

Shok Gj.,

11 shtator 1982

sot më ra në dorë letra e 6 shtatorit, lidhur me atë që shkruan përgjithësisht pajtohem, por mundësisht sqaro në letrën e ardhshme këto gjëra: çfarë është ajo që në "esencë" s'po mundke t'i shkruajsh" lidhur me bisedën tënde me E. (Engjëll Kolanecin-shën i red.) siç thekson ti në letrën tënde? Pastaj a mund të marrësh vesh se në çka qenka ankuar konkretisht Halimi tek Plaku?

Sa për "B. Currin" ma merr se ke bërë mirë që ke vazhduar korrespondencën, por përpiqu që sa më tepër të blejsh e sa për bisedime konkrete për këtë, siç e di edhe ti ne s'kemi mundësi veç nëse ata vinë këtu e në atë rast do të ishte shumë mirë që t'i konkretizojmë gjërat sa më tepër me ta.

Sa për letrën e M. Vranicës, mendoj se ajo është e mirë, pra shiko në të ardhmen që të shkruajsh më ngadalë, sepse, siç e di, një letër lë përshtypje shumë të madhe tek njeriu.

Për N. Dibranin s'do ta lëmë keq, do t'ia dërgoj një letër dhe disa numra të organit që sot, lidhur me këtë po të njohtoj se të gjitha letrat apo punimet që po i vinë organit, që të gjithëve u përgjigjemi qoftë unë qoftë ndonjë shok tjetër. Tash kohët e fundit ne i kemi krijuar drejtpërsëdrejti disa lidhje shumë të mira në SHBA, prandaj edhe i thash F. që t'i dërgoj atje 200 ZK. Neve këtu na kanë ardhur shumë pak numra, në të ardhmen duhet të gjejmë një mënyrë më efikase të shpërndarjes, por edhe mua m'i ka lidhur këmbët ky farë statusi i parregulluar gjer më tash.

Për organin e ardhshëm duhet t'ia nisim punës që tash, në mënyrë që ta qesim kah fundi i tetorit, por mua më duhet të operohem këto ditë (këtë mos ia thuaj kujt.)

dhe s'e di sa sado të mund të kontribuoj po që se rri shumë në spital. Puna s'është rrezik aspak, prandaj shpresoj se edhe do t'i kem disa ditë të lira në dispozicion për t'u marrë vetëm me këto punët tona. Përndryshe në F. i kam disa oferta shumë interesante, veçse pa i qitur këto punët tona në vijë disi s'po mund të vendosi për asgjë. Përndryshe në të ardhmen shpresoj se do të kontribuoj edhe më shumë sepse për çdo ditë po më përmirësohen kushtet.

Lidhur me Naimin ma merr mendja se më së miri do të ishte të kërkoj a. aty ose në F. për këto shkaqe: ai ka mjaft fakte për a. dhe do të ishte afër teje e do të mësonte një gjuhë "të madhe" siç thuhet sepse me su. s'mund të bëjë asgjë. Për atje unë kam pas menduar ta dërgojmë Kamberin së bashku me familje po që se atje i prishet puna, sepse aty ka kushte shumë të mira jetese dhe s'do të kishte nevojë të mendojë për familjen aspak, pra ta "ruajmë" atë vend për ndonjë rast më të madh. Si do qoftë mendo edhe ti në këtë drejtim më tepër e pastaj po vendosim si të na e merr mendja se është më së miri.

Shoqja e këtij shokut më njohtoi se ka biseduar me ty sonte dhe se ia ke dhënë ti një emër të një personi që po interesohej për mua... ai mbiemër për mua është i panjohur nëse është Maku, siç më tha kjo gruaja e shokut, prandaj më njohto më gjerësisht për këtë si dhe për Milaimin se a ka diçka të re për të apo jo, pra a e more adresën e tij apo jo. Kjo është shumë e rëndësishme.

Kaq... Të fala vëllazërore Ll. (Xhafer Shatri)

Klubet kanë vendosur ta nxjerrin fletushkën "Kurbetxhiu". Këtë do ta botojmë ne.

13. Letër Xhafer Durmishit, 20 shtator 1982

Shok Gj.

sot dola prej spitalit, tashmë po ndihem shumë më mirë, pothuaj në të njëjtën kohë u informova për letrën tënde me adresë "Vio..", në pamundësi që ta marrë menjëherë i thash shokut tim që ta lexoj përmes telefonit. Sa i përket takimit në të cilit ti po insiston, natyrisht se ai është më se i nevojshëm, dhe për të biseduar kemi jo një por shumë e shumë gjëra, mirëpo në këtë drejtim të lutem të m'i sqarosh këto dy gjëra: nga të dy palët që jeni atje sa keni kompetenca që të vendosni në emër të degëve që përfaqësoni dhe a ke menduar se çka duhet të në atë takim, konkretisht çfarë vendimesh duhet të merren? Për këtë më njohto menjëherë në mënyrë që ta kem një pasqyrë sa më të qartë, sepse meqë ky duhet të jetë takim shumë i rëndësishëm atëherë mua më duhet ta thërras një shok prej shumë larg, prandaj edhe dua të di se në çka qëndrojmë.

Sa i përket atij shokut që po dashka të shkoj në shtëpi, duhet t'i thuash se ne nuk jemi profetë që ta dimë se çka mund t'i ndodhë, ne nga ato që i dimë duhet t'i themi se ai është i rrezikuar, prandaj nëse vendos të shkojë atëherë në radhë të parë të mos e njohtoj askend për atë hap, pastaj kur të arrijë (?) në shtëpi të mos dal fare dhe natyrisht të mos flejë aty por tek ndonjë i afërm i tij, por kuptohet poashtu pa dal ndonjë fjalë... dhe të mos e zgjas shumë, sepse në situatën e krijuar mund të bjerë në sy... Ne njerëzve të tillë mund t'ua themi vetëm këtë e asgjë tjetër.

Sa për Ha. (Haxhi Berishën-shën i red.) do të ishte mirë që të ma sqarosh çështjen e tij edhe më gjerësisht, po si do qoftë nëse puna ka ardhur gjer tek strehimi ne do ta mbajmë këtu për një kohë e sa për punë është vështirë të gjendet. Nëse ka menduar gjer... kjo është shumë e vështirë, ndërsa nesër do të jetë edhe më vështirë...

Prej Halimit e kam marrë një letër para disa ditësh, bukur të gjatë, prandaj lidhur me propozimin tënd do t'i shkruaj dhe vetë do të përpiqem e do të vij atje, sepse ju jeni më shumë, prandaj radha është që unë të vij atje... mirëpo harrova të të pyes se a e ke diskutuar këtë çështje me Kamberin dhe çka të ka thënë ai?

Gazetat këtu janë shpërndarë si duhet, nuk është dërguar numër i mjaftueshëm në adresat që ua kam dërguar, sepse ne qemë marrë vesh që këtu të dërgohen 2000 copë, pastaj edhe në Amerikë i keni dërguar me linjë të rëndomtë (detare) edhe pse u kam thënë se të gjitha shpenzimet postale i heqim ne vetëm na e tregoni shumën e duhur...

Lidhur me këtë posa ta lexosh këtë letër të dërgohen menjëherë përmes postës në adresë të ZK edhe së pakut 500 copë, por jo përnjëherë... çdo ditë nga 100, pastaj poashtu edhe në këtë adresën e mëposhtme edhe 500 copë tjera po në të njëjtën mënyrë
c/o Mark Mirdita, 16 Rue de Chaudroniess, 1205 Geneve, Suisse

Tash nuk po e zgjas më tepër prandaj të lutem t'i pranosh përshëndetjet vëllazërore të Ll. (Xhafer Shatri)

20 shtator 1982 P.S. Më dhjetë (10.9.1982) më ka ardhë një letër e jotja. Menjëherë të jam përgjegj...

14. Letër Xhafer Durmishit, 26 shtator 1982

Shok Gj.

i mora letrat tua dhe në to e kuptova, me shqetësim, se kundërthëniet atje kanë marrë kahje të palejueshme, prandaj unë do t'i ndërmarr të gjitha masat dhe do të vij atje, por mungesa e një shokut tim, që të jetë edhe ai si pjesëmarrës më ka vonuar në këtë, po megjithatë do të dal këto ditë dhe do të bisedojmë gjerësisht, kuptohet se për këtë do ta

njohtoj edhe Nikën në mënyrë që të mos ankohet për mos informim, sepse edhe nuk do të ishte e drejtë, e sa për pjesëmarrjen e tij këtu s'guxon të bëhet fjalë, sepse ai është i obliguar për këtë, sikundër që jemi edhe ne të tjerët.

Lidhur me "Kurbetçiun" po e shoh se qenke alarmuar pa nevojë, si së pari ka lindur si propozim i rastit nga punëtor që pasdarkave të vona i bie çaji në kokë. Për këtë më kanë informuar menjëherë, prandaj i kam porositur shokët që pasi që qenka vendosur ta marrin ata botimin përsipër, pra shokët e Gjenevës në mënyrë që ai të jetë në duart tona, për çdo rast. Në fillim shokët më thanë a të propozojmë të botohet si Republika, gjë që më vonë e pamë se nuk bënë për këto shkaqe: e para se ai do të ishte emër politik, gjë që ne s'na konvenon që armiku të ketë fakte për pohimet e veta se klubet janë çerdhe tonat; e dyta si emër vetvetiu për shkak të një propozimi të mëparshëm do të keqkuptohej si qëllim për organ të dytë... gjë që kjo s'guxon të vijë në shprehje kurrën e kurrës. Edhe aludimi më i vogël në këtë drejtim për mua do të ishte fyerja më e madhe, e sa për fjalët e botës ne ato s'mund t'i ndalim, por duhet ta dimë se armiku në një mënyrë ose tjetër është infiltruar në radhët tona, sado periferik qoftë ai, në këtë prizëmë unë i shoh të gjitha orteqet e thashethemeve të gjertanishme, prandaj t'i hapim sytë dhe të mos biem nën ndikimin e tyre. Por të jemi të qartë se ato i ka nxitur bukur shumë edhe shkuarja jote dhe F. (Faridin Tafallari-shën i red.) në Dyseldorf dhe sidomos fjalët tua si përgjegje në provokimet e I.K. gjë që ke mundur ta ikësh fare lehtë dhe për këtë unë të kam dhënë material të mirë që t'ia mbyllësh gojën dhe të mos mbeteni armiq.

Shumë herë të kam thënë se një Lëvizje e tillë siç është e jona nuk mund të jetë kurrë një armatë e disiplinuar, por do t'i ketë edhe njerëzit që edhe pse shkojnë me të, megjithatë ata nuk janë kurrë mish e gjak i mirëfilltë i saj. Këtu s'guxon të kesh asnjë iluzion. Edhe në Bruksel, jeni dekonspiruar krejtësisht, ama krejtësisht. Dreqi e marrtë çka ka qenë e nevojshme ta dijë krejt bota se kush ka shkuar atje dhe përse. Merre me mend edhe pseudonimet tuaja i kanë mësuar njerëzit. Kjo është e palejueshme. Sa për fjalët e N. (Nuhi Sylejmanit-shën i red.) për konton etj., kjo të mos shqetësoi aspak, sepse ai në atë mënyrë e lufton më së miri veten e vetë dhe kjo është e mirë për ne. Për familjen e Na. këtë e kemi pasur parasysh edhe më parë, prandaj në këtë drejtim do të bëjmë diçka sa më parë, e sa për shkuarjen e tij te V. i madh, unë siç të kam thënë edhe më parë, nuk pajtohem kurrsesi. Ne s'guxojmë t'i derdhim radhët tona, ushtarët tanë, pa nevojë. Më ndje për rrallësinë e letrave, por besom se kokën s'po mund ta lëviz prej punëve të shumta. Po ta dërgoj letrën që ia kam dërguar "Vatrës", por që për shkak të ngutësisë s'kam mundur të konsultohem me shokët, pra as me ty, para se ta dërgoj. Siç e di IK ka shkuar në A. dhe pavarësisht nga të gjitha e ka bërë një punë të mirë. Për këtë më vonë.

26 shtator 1982

Të fala Ll. (Xhafer Shatri)

15. Letër Xhafer Durmishit, 9 tetor 1982

I dashur shok,

këto dy ditët e fundit i mora njërën pas tjetrës letrat tua, kjo e fundit ishte përgjegjja e KVG në letrën e K, prandaj edhe po ndalem këtu. Letra është e mirë dhe ky nuk është vetëm mendim i imi, por për hir të unitetit do të sugjeroja ta shtypësh edhe njëherë dhe t'i bësh disa korrektive, në mënyrë që të mos jetë aq e ashpër sidomos disa shprehje si "idioteske" etj. dhe sa më parë t'ua dërgosh ti vetë, sepse kështu do të ishte

më së miri, mendoj se mund ta gjejsh një mënyrë. Besoj se nuk do të më keqkuptosh aq më parë kur unë do të ktheja përgjegje në atë letër qysh ka herë, por mu shkaku i ruajtjes së unitetit më ka shtyrë që të përmbahem... Në adresë të ZK kishin ardhur dy letra prej Br. dhe ato m'i lexoj përmes telefonit një shok, si duket ato i kishte shkruar M. Hoti apo dikush i tyre dhe disi interesohet të japim përgjegje decidive për Kamberin. Duke besuar në qëllimin e tyre të mirë unë ua shkrova vetë dhe ua dërgova menjëherë, prandaj të lutem merr hetime se çka është në pyetje. Atë natë nuk u lajmëruam fare dhe kemi bërë keq, por besomë se tërë natën dhe pastaj tërë ditën kemi qenë në rrugë, sepse për atë shokun që e pritëm morëm informata se gjoja ka dalë, mirëpo fjala kishte qenë për tjetër kend, kështu që për një mossqarim të vogël u deshtë të humbim aq shumë kohë e mund. Duke kërkuar falje për këtë që po ju falenderoj njëherit për mikpritjen dhe kujdesin.

Lidhur me bisedimet që patëm unë jam i kënaqur, por disi nuk më ra rasti të të pyes për mendimin tënd lidhur me rezultatet e gjertanishme të bashkimit tonë, për të metat e mundshme që ke vërejtur ti ose shokët e tu nga ana jonë, për mundësitë që kemi lënë ne kënde pa shfrytëzuar etj. sa i përket bashkëpunimit, pastaj shkalla e sinqeritetit etj. Të gjitha këto po t'i them me qëllim që të m'i thuash haptas ashtu si shoku shokut në mënyrë që të mësojmë nga lëshimet dhe të mos lejojmë që ato të përsëriten.

Në letra ti po më përson, dhe gjer më sot më vinte keq të ta them, prandaj tash po marr lirinë të kërkoj nga ti që të më drejtohesh gjithmonë me ti sepse ne jemi shokë e bashkëlufëtare dhe në çdo aspekt të lirë me njëri-tjetrin. Pos kësaj atë ditë desha të ta them edhe këtë gjë, por më erdhi keq: fjala është për Jusufin. Së pari vlera e të gjallit nuk mund të matet kurrë me vlerën e të vdekurit sidomos në këto çështje... unë për vete do ta quaja për nder të madh që të jem një nxënës i rëndomtë i Jusuf Gërvallës e të mos flasim të krahasohem me të. Mjerisht unë s'kam pasur nderin ta njoh personalisht, por nga shkrimet e tij sidomos dhe nga rrëfimet për të jam bindur se ai ka qenë një nga bijtë më të mëdhenj që i ka lindur populli ynë ndonjëherë. Shumë bashkëkohanik madje edhe bashkëlufëtar të tij nuk ia kanë ditur vlerën... ai ka qenë NJERI prej flokëve e në thonj dhe padyshim një nga fytyrat më të ndritura dhe më të pastra të historisë sonë të re. Kurrë vetes nuk do t'i dëshiroja jetë dhe vdekje më të mirë.

Për hapat që do të ndërmarrësh për a. (azil) pajtohem plotësisht. Vërtetë është koha e fundit të vendosësh.

Të fala Ll. (Xhafer Shatri)

9 tetor 1982

16. Letër Xhafer Durmishit, 10 tetor 1982

I dashur shok,

e mora letrën tënde të fundit prandaj po të shkruaj menjëherë. Sa për N. unë vërtetë nuk di se si t'ia kërkoj gjërat për të cilat ti më porosit, sepse me atë njeri unë vetëm njëherë në jetën time ka kontaktuar, pra atë ditë në Bern e asnjëherë tjetër.

Sa për mënyrën e parapagimit të organit mendoj se është mirë, me përjashtim të rreshtit të fundit, sepse ne nuk mund t'u japim njerëzve adresa të na i dërgojnë të hollat aq më parë kur ekziston xhirollogaria për Ndihma Kosovës, apo po që se ta merr mendja atëherë ne po e hapim një kontonumër tjetër gjë që s'më duket e arsyeshme...

Për Peterin ke bërë shumë mirë që je takuar dhe ma merr mendja se kontaktet me të duhet t'i mbajsh rregullisht. Në redaksi po na vinë disa letra që po përpiqen t'i komprometojnë shokët në Br. Letrat e tilla nuk do t'i denjësojmë fare me përgjegje. Më parë i ka dërguar disa poezi njëfarë Bashkimi i Dyseldorfit dikund dhe unë ia kam kthyer një përgjegje mjaft të mirë shoqërore, por ai nuk më shkroi më tutje, prandaj a di gjë për atë njeri se çfarë është a jo? Artikulli i Jusufit është i mrekullueshëm prandaj

botoje sa më parë, por ama të lutem këqyr e përvetësoi rregullat e drejtshkrimit dhe evitoi gabimet e mundshme të shtypit, sepse po marrim letra që po kërkojnë kujdes të madh në këtë drejtim.

Sa për ardhjen tënde këtu që më shkruan ti unë e kam ditur që në fillim se ajo nuk është e nevojshme sepse ai s'do të vie kurrë, prandaj përpjekjen për një "pajtim" të tillë unë e kam bërë për krejt qëllime tjera pa as më të voglin iluzion. Sa për artikullin e "Lajmëtarit" s'di çka të them njëherë, por në numrin kushtuar shokëve të vuarë do t'i botojmë shumë punime të shokëve të vuarë kryesisht të Jusufit...

Kësaj radhe po t'i dërgoj këto punime e nisja që tash punës sepse nuk pret koha. Ma merr mendja se po që na kushton më lirë do të ishte mirë që botimi të bëhet në letër më të lirë dhe kuptohet ta nxjerrim në sa më pak faqe, po mendoj 14-16 faqe më së shumti por të dalë shpesh dhe të mos humb asgjë nga aktualiteti.

Ndoshta në këtë numër do ta botojmë listën e njerëzve që u dënuan këto kohët e fundit.

Kaq...

10 tetor 1982

Të fala Ll. (Xhafer Shatri)

Në një letër të mëparshme të kam kërkuar përgjegje për atë se si ti i sheh marrëdhëniet tona gjer më tash sepse më është bërë një provokim i madh në këtë drejtim.

Më shkruaj gjerësisht se çka të kanë thënë për Ibrahim Kelmendin Sk. (Skënder Dushi) i Vjenës!

17. Letër Sabri Novosellës, 12 tetor 1982

I dashur vëlla,

12 tetor 1982

sot i mora tri letra nga ti dhe menjëherë e vura një shenjë në mur, sepse vërtetë u bë gjatë që s'pata marrë letra të tilla, por për esencën e këtyre letrave do të ndalem në letrën e ardhshme, ndërsa tash po të njoftoj me sa vijon: poashtu sot e mora një letër të KK (Kushtrim Kosova=Abdullah Prapashtica-shën i red.) dhe për përmbajtjen e saj do të ndalem vetëm pak. Ai propozon që Halimin dhe Sk. (Skënderin=Xhafer Durmishinshën i red.) t'i shkarkojmë nga Kryesia dhe të them të vërtetën ky propozim m'u duk i drejtë, sepse me Qemajlin atëherë s'do të kishim asfarë problemi dhe për këtë po nisem nga ajo që ke thënë ti për të, ndërsa në anën tjetër S do të kishte mundësi t'i përkushtohet përvetësimit të teknikës së shtypit dhe kuptohet çështjeve organizative si kryetar i KVG. Këtë propozim të tij unë e aprovoj duke qenë i bindur se është në interesin e LRSNJ, përndryshe sa i përket Sk. unë për çdo ditë po bindem se ai është njeri i punës e besa edhe mjaft i sinqertë. Në anën tjetër unë i propozova KK që unë të vijë atje dhe të takohemi ne të tre dhe t'i qesim punët në vijë njëherë e përgjithmonë... i thash le të mendoj dhe të propozojë për vendin e takimit etj. duke menduar se ju meqë jeni atje do ta rregulloni këtë punë së bashku, prandaj më shkruaj menjëherë të lutem, sepse unë tashmë kam mundësi të vi, kuptohet me një pasaportë të një shokut tim i cili më përngjan shumë dhe i cili i ka të rregulluara të gjitha dokumentet sa i përket ndërtjes këtu.

E di se shpenzimet janë të mëdha, por ne s'guxojmë ta lëmë punën që të shkojë më tutje kështu. Në takim me shokët jam ndarë shumë i kënaqur. F. meriton të jetë në udhëheqësi edhe pse nuk është i aftë sa N., megjithatë në këtë njeri mund të bazohesh gjithmonë pa kurrfarë rezerve. Lidhur me Nuhiun kam ndërmarrë edhe unë diçka që disi t'i takoj vetëm atë me S dhe t'i pajtoj por akoma s'kam marrë përgjegje prej N. Mirëpo pasi që të paska shkruar ty edhe nëse unë s'kam sukses nuk do të mërzhitem aspak ama aspak. Me rëndësi është që të mos mund të fus zallë në një të çarë të tillë, sepse na

dëmton shumë. Për këtë hap i kam telefonuar F. dhe ai u pajtua, por nëse ai nuk e shef të arsyeshme një gjë të tillë, atëherë unë do të tërhiqem menjëherë.

Sa i përket "Kurbetçiu" mua më duhet të shkoj këto ditë në Gj dhe në mos ta paralizoj krejtësisht, së paku ta minimizoj dhe se me të nuk do të ketë rastin të merret kurrë IK por një shok imi, anëtar i udhëheqësisë më të lartë këtu.

Për letrën e Vatrës pajtohem me atë që thua ti dhe më beso se koka më ka dhimbtë shumë e shumë gjersa e kam formuluar në mënyrë që "mishi të piqet e helli të mos digjet", por në këtë hap më ka shtyrë fakti se sipas të gjitha gjasave udha është infiltruar në të bukur shumë, pra në "Vatrën" e Nolit dhe në kohën kur Plaku (Bujar Hoxha-shën i red.) me kolegët, bëjnë politikë të "madhe" me llojloj injorantësh. Para kësaj s'kam mundur të rri indiferent, prandaj e kam bërë vetëm atë që ma ka marrë mendja se i kontribuon asaj që të mos përdhohet një relikti yni siç është "Vatra". Përndryshe në atë drejtim nuk kam asnjë iluzion. Ndërsa sa për ndihma ne do të mbështetemi vetëm në forcat tona. Pohimi yt për ndryshimin e sjelljes pas M. Sh. (Mehmet Shehut-shën i red.) është shumë simptomatik dhe ke bërë shumë mirë që më ke njohtuar me këtë. Të lutem që të më kthesh përgjegje sa më parë lidhur me propozimin tim, dërgoje express. Nëse s'të pëlqen mos të të vie keq të ma thuash!

Të fala vëllazërore U. (Xhafer Shatri) (Për hapjen e le... edhe unë po dysh.)

(Shënim i Sabri Novosellës për Xhafer Durmishin, lidhur me këtë letër: "I dashur vëlla, ky propozim i K. i aprovuar nga U. m'u duk i arsyeshëm edhe mua. Largimi i Halimit do të ishte shumë i arsyeshëm, kurse me Qemalin kam bindjen se do të jetë pozitiv sidomos kur të jetë pranë Uk. Nëqoftëse do të ndahen definitivisht do të na duhet me humbë gjysmën e kohës rreth tyre, pasi ata s'do të heshtin. Kurse ti në ZK nuk do të kryeje vetëm punë teknike, por faktikisht ti do të jesh shtylla kryesore e tij.

Të fala vëllazërore M. (Mërgimi=Sabri Novosella)

18. Letër Xhafer Durmishit, 18 tetor 1982

Shok Gj.,

18.10.1982

e mora letrën tënde e cila kishte mjaft paqartësi. Së pari unë kam kërkuar që të takoheni vetëm ju të dy, në prezencën time, por jo aq për të ose me ndonjë shpresë se ai do të vie, këtu unë s'kam pasur asnjë iluzion, por kjo ka qenë e mirëseardhur për ne në mënyrë që ta kuptojnë shumë njerëz se aty diçka nuk është në rregull, sepse ai që i ikën takimit nuk e ka ndërgjegjen e pastër. Për të holla në Br. do të bëjmë diçka, por sa për "Ilirinë" siç më ka shkruar edhe Kamberi atë do ta botojmë ne, e besa edhe ta redaktojmë. Por tash për tash ne duhet ta nxjerrim organin sa më shpesh, ndërsa "Ilirinë" njëherë në tre-katër muaj sepse nuk kemi mundësi. Mu për shkak të pamundësisë ne u deshtë ta lëmë krejt "Kurbetçiun" pasi që njerëzit e dhanë pëlqimin e tyre dhe për këtë sigurisht se unë do të kritikohem, bile ashpër. Por ne jse. Atë letrën që ta dërgova para disa ditësh nuk mora përgjegje, unë mendoj se ne duhet ta analizojmë rrugën që kemi kaluar gjer më tash. Lidhur me këtë të lutem të më shkruajsh gjithashtu edhe për bisedën tënde me E. (Engjëll Kolanecin-shën i red.) bile gjerësisht në mënyrë që ta kem një pasqyrë sa më të qartë, sepse diçka më njohtoi F. Duhet të them se disa njerëz që kanë qenë atje më kanë njohtuar se i kanë parë takimet e herëpashershme qoftë me ty qoftë me N. të E. apo të kolegut të tij. Kjo gjë më ka dëshpëruar pa masë. Kjo është turpshme që ata të merren me mospajtimet tona. Mua ma ka dërguar Kamberi letrën që ia ka dërguar N. Në të nuk kishte asgjë. Ajo ishte në stilin e tij: po të them asgjë..." Por ne jse. Kalojnë edhe këto. Por do të dëshiroja ta dija se me çka më së shumti

ia kishin mbushur kokën E. Poashtu dua të dijë se a ka qenë atë ditë atje Halimi apo jo, pastaj Qemajli etj.

Lidhur me organin ne duhet të ndërmarrim këtë gjë: sa më parë do ta zgjedhim redaksinë së pakut prej 5-6 vetësh. Aty do të jesh ti, një shok prej Bru., Qemajli, një shok tjetër që ti s'e njeh dhe unë. Me atë rast do t'i ndajmë detyrat dhe çdo njëri prej nesh ta shkruaj nga një rubrikë dhe para botimit të çdo numri të mbahet mbledhja dhe të analizohet përgatitja e përgjithshme. Kjo do të na ndihmojë shumë. Mitat Vr. (Vranica) lidhur me letrën e K. na e ka dërguar në Red. një letër shumë të poshtër duke thënë se ai po e ditke se në "livadhin e kujt po kullotkemi ne" etj. Do t'ia kthej një përgjigje. Bisedo me shokët e Br. për redaksinë sa më parë dhe ata le të vendosin për shokun e vet.

Më shkruaj menjëherë... Të fala Ll. (Xhafer Shatri)

19. Letër Xhafer Durmishit, 1 nëntor 1982

Shok Gj. 1 nëntor 1982

Kur u ktheva nga rruga më ra në dorë letra jote. Po të përgjegjem menjëherë. Pajtohem plotësisht me atë citimin e Jusufit për domosdoshmërinë e njësimi të deklaratives me monologjet e dialogjet... dhe për atë që thua ti se duhet të botojmë diçka të përafërt me NH (Nova Hrvatska-shën i red.) Edhe analiza e punës së gjertanishme ka koncizitet e besa edhe mjaft ngjashmëri me ato krahasimet që bënë ti. Lidhur me njerëzit që thua ti se nuk duhet të lejojmë të ketë probleme, aty nuk ka asnjë dyshim. Unë jam takuar me Sh. (Shaqir Shabanin-shën i red.) këtu para dy ditësh dhe me kënaqësi kuptova pa ma thënë ai haptas, se ka kontaktuar me ty dhe se në të ardhmen nuk do të mund të manipulohet me të. Unë kam besim të madh në atë njeri, por me qëllim që të mos hy më thellë me të pa dijen tënde do të ishte mirë që ta përcaktojmë se kush mund të kontribuoj më shumë, pra pa lënë të na grumbullohen kuadrot apo anëtarët.

Në këtë rast për çdo individ do të konsultohem ne të dy, sepse siç ua kam thënë se e sa herë unë nuk kam pranuar të bashkohemi me qëllim që të bëjmë veprime diversioniste në radhët e njëri tjetrit por me qëllim që të bashkohemi përfundimisht dhe nga shokët tanë ta formojmë një "organizatë unike e operative", pra një kulm e një ndërtesë e jo një kulm e tri ndërtesa... kur ta kam shkruar një letër më parë, në përgjegjen e së cilës kam fituar përshtypjen se është keqkuptuar krejtësisht, unë kam insistuar që t'i shprehësh botëkuptimet e tua lidhur me këto çështje, pra të mirat dhe të metat, sidomos këto të fundit që i keni parë në këtë anën tonë, dhe këtë jo për tjetër po me qëllim që të mos përsëriten e asgjë tjetër. Ma merr mendja se të kam treguar, jo me fjalë, se këtyre punëve nuk u kam hyrë për të bërë ndonjë karrierë, por vetëm pse e di se duhet të sakrifikojmë të gjithë, prandaj si të tjerët unë po e bëj vetëm atë që po mundem pa i dhënë vetes të drejtë të kërkoj qoftë edhe shpërblimin më të vogël. Si edhe të tjerët jam për atë që të bëjmë aleatë e sa më pak armiq... jam për një unitet të mirëfilltë të mendimit e të veprimit në mes bashkëluftëtarësh, sepse pa të nuk mund ta bëjmë as një hap... këto thashethemet e fundit më kanë humbur shumë kohë dhe më kanë dëmtuar pa masë. Kur po mendoj në gjëra të tilla po më humb qetësi krejtësisht e pa të siç e di, nuk mund të shkruhet asgjë e hajrit.

Këto punime po t'i dërgoj tash, ndërsa korrigjimin e fejtimit të Ademit nuk e kam bërë, sepse nuk më ka shkruar Kamberi edhe pse pata kërkuar leje nga ai. Ndoshta ka harruar, sidoqoftë përpunoje ti ashtu siç ta merr mendja, por pa lejen e tij mos e bërë. Në Dysel. tash puna është mirë, prandaj s'ke nevojë të angazhohesh atje. Do të ishte mirë që këto qytetet tjera si Kaseli, Frankfurtit etj., të jenë objekt observimi e besa të

dalësh edhe kah Aus. Por mendoj se org. duhet të jetë në dy faza: a) të org. njerëzit më të aftë në fshehtësinë më të madhe dhe b) njerëzit përmes së cilëve masovizohet Lëvizja, por që prej tyre nuk mund të presim ku me dit sa. Këta njerëz nuk bënë të përzihen në mes veti. Lidhur me zgjerimin e radhëve mund të bisedosh vetëm me F. po mendoj tek emrat konkret të njerëzve... në këtë drejtim kij shumë kujdes. Pra emrat e anëtarëve mund dhe duhet t'i dijnë vetëm njerëzit që kanë kontakt me ta, por jo edhe ndonjëri prej anëtarëve të KVG që ata njerëz nuk i ka organizuar. F. është tjetër gjë, në të mund të llogaritësh për çdo gjë që paraqitet nevoja, bile unë i kam thënë Kamberit se ai duhet ta zëvendësoj N. në KD.

Për punimin kushtuar Jusufit mendoj se duhet botuar me rastin e përvjetorit të rënies së shokëve, pra në një numër që kryesisht do t'ju kushtohet atyre. Lidhur me emrin tim po të them prapë se nuk bënë të përmendet në asnjë mënyrë, absolutisht në asnjë mënyrë, pavarësisht se çka dërdëllitin bota. Unë fjalë e E. që i paska lëshuar i marrë më parë si provokim që të është bërë ty për ta kuptuar se në ç'shikallë është besimi dhe mirëkuptimi ynë, sepse përkundër të gjithave unë s'besoj se ata përpiqen që m'u në këtë kohë ta minojnë punën tonë, unitetin tonë. Tek i lexoj shkrimet e atjeshme, çfarëdo qofshin ato, unë kurrë se besoj se dikush prej tyre guxon të merret me punë që e dëmtojnë një lëvizje nacionalçlirimtare e kujtdo qoftë ajo. Por nëse atij i intereson që ta dij atë punë, atëherë le t'i drejtohet shokut tonë kompetent për marrëdhënie me ta dhe ai do t'ia mbaj një ligjëratë të vogël jo vetëm për këtë "rastin" tim, por edhe për mirësjelljen. Kjo punë mos të shqetësoj aspak. Shqetësues është rasti i Dritës, bile shumë shqetësues, sepse mua nuk mund të më bind askush se ajo do ta përdhosë gjakun e Sokolit tonë. Për këtë numër të organit mendoj se në faqe të parë duhet botuar fotografia e Ismail Qemalit, pastaj një ese për Pavarësinë dhe më pastaj një koment tjetër poashtu për Shpalljen e Pavarësisë. Këtë e ka marrë përsipër një shok yni dhe do të vi tek ti brenda javës. Po a ke ndonjë foto për faqen e parë, diçka si të mirë? Në adresë të organit po na vijnë letra edhe të holla. Radhën tjetër do të shkruaj sa kanë ardhur dhe asnjë tërheqje nuk do të bëhet pa pëlqim të përgjithshëm, sepse sidomos në këtë drejtim duhet të kemi shumë kujdes sepse përmes kësaj do të përpiqen njerëzit të na përçajnë bile do të ishte mirë që të mblidhemi më 10.12 Dita ndërkomb. e të Drejt. të Nje. para pallatit të OKB në Gj. apo edhe në Strasburg para Parlamentit Evropian apo me rastin e përvjetorit të rënies së shokëve në St. 10 dhjetori ka jehonë në botë, por edhe qendra gjeografike...

Nesër më duhet të shtrihem në spital për operacion, besoj se nuk do të rri shumë. Kur të dal na mbetet të marrim vendim përfundimtar për manifestimin.

(Xhafer Shatri)

20. Letër Xhafer Durmishit, 14 nëntor 1982

Shok Gj.

sot po ta dërgoj këtë punim i cili ma merr mendja se duhet të botohet dikund në faqen e dytë, para komentit historik për Pavarësinë, të cilin ka mbetur ta shkruaj një shok po që gjer më tash nuk ma dërgoj. Do ta pyes nesër në telefon në vendin e punës, e nëse nuk e ka bërë si duhet atëherë po e punoj unë dhe po ta dërgoj që tash. Edhe pse u bë shumë vonë por siç po e sheh nuk po e mbajnë fjalën sa duhet. Punimi që po ta dërgoj ma merr mendja se duhet të botohet me shkronja pak më të mëdha, si në vend urimi i LRSNJ, Atdheut.

Kamberi ma ka dërguar atë propozimin tënd lidhur me parapagimin e ZK dhe lidhur me të i kishte dhënë disa vërejtje që m'u dukën mjaft me vend. Edhe unë mendoj se ajo kërkesë duhet të konkretizohet.

Posa kam dalë prej spitalit, t'i kam dërguar punimet e mbetura, pra sa të vie edhe punimi tjetër, atëherë ky numër po kompletohet krejtësisht. Besoj se do të arrish ta botosh në prag të festës. Punime tjera KK dhe H nuk kanë dërguar fare. Nuk e di se çka dreji është në pyetje. As në letrat e fundit që ua kam dërguar nuk kam marrë përgjegje.

Në një letër Kamberi më shkruan se gjoja ti po mendoke se unë po taktizoj me ty, do të ishte mirë që në këtë drejtim të më shkruajsh bukur gjerësisht, sepse këtë nuk kam si ta marrë ndryshe pos si një keqtrajtim të sinqeritetit tim. Lidhur me këtë nuk do të kënaqem me një sqarim të rëndomtë, sepse kjo është një befasi shumë e madhe për mua.

Kaq. Të fala Ll. (Xhafer Shatri), 14 nëntor 1982

Mendoj se do të ishte mirë ta botojmë fotografinë e Ademit, por të madhe si POSTER me urimin për 70 vjetorin!

21. Letër Xhafer Durmishit, dhjetor 1982

Shok Gj.

këto janë punimet e fundit që duhet t'i botosh në këtë numër, dhe tjera nuk. Unë shpresoj se për këtë do të gjesh vend sepse pa to org. do të mbetet i zbrazët. Me qëllim nuk i zgjata më tepër. Në letrat tua do të kthej përgjegje më vonë sepse gjer më tash njëmend nuk kam pasur mundësi.

Gjatë botimit jij në radhë të parë gazetar dhe shikoje gjithnjë se çka është aktuale dhe mos të botohen gjëra që u ka dal aktualiteti apo edhe asosh që ne i kemi botuar edhe më parë. Reportazhi për 28 nëntorin, ky për demonstratën dhe ky për punëtorët janë të domosdoshëm.

Të fala LL. (Xhafer Shatri)

Nën letrat e lexuesve botoje edhe këtë letërz të veçantë, sepse fjala është për një lexues nga Brukseli i cili na ka shkruar tri herë rresht dhe ka kërkuar ndihmë mirëpo adresë nuk ka e s'po dimë se si t'i ndihmojmë (moralisht)

pra:

Lexuesi nga Brukseli, i cili tri letrat e tija i nënshkroi me mbiemër që niste me Sh... është e domosdoshme që të na e dërgoi adresën sa më parë, sepse shkak i mospërgjegjes është mungesa e adresës.

(Dhjetor 1982-shën i red.)

22. Letër Xhafer Durmishit, 19 dhjetor 1982

Shok Gj.

në letrat tua po të përgjigjem me vonesë, sepse njëmend i kam pasur njëmijë punë, pastaj edhe të punojë po më duhet çdo ditë dhe kjo po më dëmton poashtu. Sidoqoftë po përpiqem të të shkruaj vetëm për çështjet që tash na hynë në punë, për të tjerat duhet të shihemi së shpejti dhe do t'i shqyrtojmë hollësisht, edhe pse kam mbetur jo pak i befasuar pse nuk erdhe në dasmë. Së pakut ti është dashur të vish. Sidoqoftë qëllimi u arritë plotësisht...

Sa për numrin e ardhshëm të organit mendoj se duhet kushtuar kryesisht shokëve të vrarë, dhe për këtë do të kemi mundësi të rrimë e të bisedojmë së shpejti, besoj javën e ardhshme...

Këtë shkresë e shkrova para dy ditësh dhe ia dërgova KK e edhe Mër. Mospërgjegjja e tyre edhe në këtë thirrje na i lë duartë të lira ta bëjmë këtë: pra zgjedhjen e Qendrës Ekzekutive të L në Perëndim prej pesë vetësh dhe atë

Përgjegjësin për or. të jashtëm, (për organizim të jashtëm-shën i red.)

Përgjegjësin për marrëdhënie me bj, (bj=botën e jashtme-shën i red.)

Përgjegjësin për prop., (prop.= propagandë)

për org. të br. (për organizim të brendshëm-lidhjet me Kosovën- shën i red.)

përgj. për ç. mater. (përgjegjësin për çështjet materiale-shën i red.)

Kjo çështje duhet të rregullohet tash së shpejti.

Sa për artikullin kushtuar Sokolit qysh ka herë ti pate kërkuar që ta marrësh përsipër rregullimin e tij dhe unë u pajtova me përjashtim të përmendjes së emrit tim, kjo siç të kam thënë edhe më parë nuk guxon të vie fare në konsiderim, për këtë nuk kemi çka të diskutojmë më kurrë.

Për organin duhet të bisedojmë sa më gjerësisht dhe këtë çështje duhet rregulluar disi sa më mirë në mënyrë që të mos përsëriten artikujt dhe në anën tjetër të botohen ata që janë aktual në kohën që s'e kanë humbur akoma aktualitetin, pastaj për manifestimet e 28 Nëntorit duhet të botohet vetëm një reportazh për të gjithë, pra për S, për Br., për C., për Gj. Hiç më gjatë jo. Sa për referat me sa di unë Shaqa nuk e ka lexuar asnjë referat në C. Përndryshe ai që është lexuar është i gjatë dhe s'bën të botohet.

Unë mendoj se ne duhet të botojmë materiale kryesisht nga Kosova, kuptohet me ndonjë reportazh nga jeta dhe veprimtaria e mërgimtarëve shqiptarë.

Artikujt që unë t'i kam dërguar e që kësaj radhe kanë mbetur pa u botuar më duhet t'i këqyrë se cilët njëmend meritojmë t'i botojmë tash.

Për gazetarët që gjoja Tanjugu ka lajmëruar se gjoja i kemi maltretuar, po të njohtoj se kemi rënë në kontakt me ta dhe se ata na kanë premtuar se do t'i demantojnë me tërë forcën shpifjet e tilla të Tanjugut, bile do të marrim edhe një shkresë me shkrim të cilën ndodhë ta botojmë si dëshmi e dallaveve serbe...

Gazetat e këtushme i kanë dhënë publicitet të madh këtij rasti, bile ajo qendrore e ka botuar fotografinë e dasmorëve në faqe të parë dhe nëpër kiosqe janë botuar shpallje të mëdha "Grand Manif a Geneve". Do të thotë se ia kemi arritur qëllimit plotësisht, e pastaj të shohim e të bëjmë.

Sa për ata komplimentet që ti përmend se ndodhë t'ia japim njëri-tjetrit pas kësaj mbledhje kryesore që duhet ta mbajmë, unë mendoj se bile në këso rastesh nuk do të vij ajo fare në shprehje, ne duhet të punojmë e të luftojmë dhe çdo gjë që na pengon në këtë drejtim e sidomos mossinqeritetin ta luftojmë me të gjitha forcat. Fundja ne njerëzit duhet t'i marrim ashtu siç janë me të gjitha të mirat dhe të metat e mundshme që kanë.

Që të gjithë duhet ta kemi të qartë se para kësaj mbledhje duhet t'i mendojmë të gjitha në mënyrë që nesër apo pasnesër të mos dalë diçka e papritur.

Në konto janë bërë afër 10 000 franga, gjer më tash asgjë nuk kemi nxjerrë, të hollat e fundit për organ i kemi dhënë tonat, dhe as që e kemi ndërmend ta nxjerrim qoftë edhe një qindarkë të vetme përderisa të mos u vëmë një kapak të sigurtë këtyre punëve tona. Kuptohet se në mbl. do t'i shqyrtojmë edhe disa raste mjaft simptomatike e shqetësuese për të cilat veç i kam folur Faridinit në telefon.

Pra në këtë mble. duhet të jemi të gjithë të përgatitur shumë mirë dhe t'i qesim punët në vi, në mënyrë që nesër ose pasnesër të mos kemi vrcmrc në asnjë pikë. Atë ditë

do të ndahen përfundimisht detyrat dhe do t'i grahim punës ashtu siç me të vërtetë pritet prej nesh.

Më ndje se nuk po të shkruaj më gjatë, por besomë se i kam njëmijë punë.

Prandaj ti dhe shokët pranoni përshëndetjet e mia të përzemërta.

19 dhjetor 1982

U. (Xhafer Shatri)

Me qëllim që të tregohemi gjer në fund "fer" unë këtë shkresë ia kam dërguar, siç të thash edhe më lartë. Dëshiroj që ta kam ndërgjegjen e pastër në çdo rast.

23. Letër Xhafer Durmishit, dimër 1982

Shok Gj., (dimër 1982-shën i red.)

sonte më ranë në dorë dy letrat tuat. Sa për organin më erdhi keq vetëm pse nuk është botuar komenti për këtë përvjetor, mirëpo pasi që është vonuar s'ke edhe çka i bën, prej lëkurës nuk mund të dalim. Ndërsa tash po të jap përgjegje për të gjitha ato që më shkruan ti. Së pari mua Kamberi nuk më ka thënë tekstualisht lidhur me taktizimin, por në mënyrë indirekte kjo kuptohet fare mirë gjë që më ka befasuar shumë. Sa për ardhjen e shokëve nga Bilefeldi, Dyseldorfi etj. unë këtë po e dëgjoj prej teje, më parë ma ka thënë edhe F., por si një manifestim gati qendror në S. e asesi ndryshe, fundja nga kjo punë nuk shoh asgjë negative përkundrazi, po ashtu edhe për kokën ju nuk keni pse ta mbani ulur. Për besë mua për këtë kurrë nuk do të më shkonte mendja. Lidhur me letrat apo datat e tyre ekziston mundësia fare lehtë të më vonohen letrat dhe dikush të marrë të parën dhe të ma sjell pas të dytës, por jij i sigurt se lojëra të tilla unë nuk bëjë kurrë, ndërsa pse ta kam bërë pyetjen për shkallën e sinqeritetit nga ana jonë, këtë s'e kam bërë pa shkak, sepse kam vërejtur gjëra të tilla që mua më kanë befasuar jo pak, për këto ne do të bisedojmë, prandaj të kam pyetur athua mos edhe dikush nga ana jonë po i kushtëzon ato pa qenë unë i vetëdijshëm fare?

Mos harro se për besimin tim të plot sa i përket anës suaj unë jam kritikuar disa herë, sa që njerëzit më kanë quajtur edhe naivë. Por e kam përbirë këtë se e di se pa besim të plotë nuk ka luftë të suksesshme. Nëse unë nuk guxoj të ta kthej ty kurrizin, atëherë çfarë lufte mund të bëjmë ne?

Sa i përket M. Hakut ti nuk ke gabuar aspak, edhe pse sipas informatave që i kam marrë për të, ai nuk ka qenë aspak njeri i keq. Lidhur me E. unë të kam thënë se më tepër unë nuk dua të takohem me të, sepse jam bindur me fakte se ai pse e sheh udha me ty, me mua e me atë tjetrin nuk i jep pesë pare, e unë thjeshtë nuk jam për takime të tilla, mirëpo pse ti shihesh me të, jij i sigurt se unë nuk kam asgjë kundër, mirëpo mu për këtë njerëzit mua ma kanë zënë për të madhe pse lejoj shkeljen e vendimeve, bile shkojnë aq larg sa që më thonë mua se Kamberi (Sabri Novos nuk është i autorizuar që të ketë vetëm ai kontakte me v.m.!!! (v.m.= vëllaun e madh-diplomatët e Shqipërisë-shën i red.). Kur E. nuk ka aspak kujdes në këtë drejtim, unë s'di si ta quaj këtë ndryshe pos si nënçmim tonin, e me njerëzit që më nënçmojnë unë s'dua edhe të bisedoj, sepse nga biseda të tilla nuk del asgjë. Mirëpo edhe nëse ndonjëherë rri me të, jij po ashtu i sigurt se që në fillim do të bëjë me dije se unë askujt nuk i besoj më shumë se sa shokëve e bashkëlufëtetarëve të mi me të cilët më pret vdekja në çdo hap.

Lidhur me 5000 frangat, kur e kam përmend këtë fjala ka qenë te mbledhja e ndihmave dhe se si njerëzit më shumë janë në gjendje të japin në dorë po që se kanë besim të pakufishëm në dikend se sa të dërgojnë në xhirollogari, përndryshe atë shumë ia ka dhënë një njeri i varfër (e kam parë para dy javësh) një shokut tonë, bile njeri i varfër sa mendja mos ta përthekojë dhe kjo gjë na ka mundësuar të blejmë kerrin, përndryshe jij sërish i sigurt s'ta kam thënë atë për t'u mburr para teje por e kam përmend me shumë njerëz duke e marrë si dëshmi jo të vogël se populli është me ne, i

tëri, prandaj edhe kemi obligime të mëdha ndaj tij. Edhe për telefonin është e njëjta gjë, në atë numër thërrasin shumë njerëz të cilët ndoshta s'e din as kush jam, përndryshe unë s'kam nevojë të të fsheh ty se ku ndodhem kur ti këtë gjë e di prej fillimit, unë jam në Z., drejt e marrtë e jo në F. Ti këtë e di mirë. Edhe për pseudonimet jo vetëm më kanë njohtuar njerëzit përmes telefonit të nesërmen, por kanë ardhur në red. shumë letra për këtë çështje, të cilat kanë për qëllim edhe t'i diskreditojnë shokët.

(Xhafer Shatri)

24. Letër Xhafer Durmishit, 26 dhjetor 1982

Shok Gj.,

meqë në letrën e fundit për shkak të ngutjes nuk kam qenë gjithaq i qartë, po të shkruaj prapë dhe po t'i tregoj pikëpamjet e mia lidhur me numrin e fundit të organit. Së pari në faqen e parë duhet të jetë fotoja rrëqethëse ku shihet vetura e bërë shoshë nga plumbat dhe trupi i shokut tonë i shtrirë në dëborë. Në të dytën komenti rreth përvjetorit të vrasjes së shokëve, besoj se do të ta nis nesër. Pastaj fotot e shokëve, por diçka më të mira, po ti dërgoj tri që mua më janë dukur mjaft të mira e ti bëja si të duash, por me porosi që së toku me të tjerat që t'i kam dhënë edhe më parë të m'i kthesh, pastaj vie artikulli i Jusufit "T'i japim shtytje të re luftës", së dyti një artikull nga Liria të cilin akoma nuk e kam zgjedhur nga arsyeja e thjeshtë se nuk po kam kohë, këtë ta dërgoj pasnesër. Pastaj një koment lidhur me demonstratën së toku me foton që është botuar në gazetën autoritative zvicerane Le Suisse, pastaj një reportazh për festimin e 28 Nëntorit në mërgim, pra le të jetë i përgjithësuar, pastaj një koment i shkurt për vitin 83, çka duhet të bëjë rinia kosovare... një faqe do t'ua rezervojmë letrave dhe një përgjegje lidhur me botimet e egra apo për thirrjet në emër të Lëvizjes nga ana e lloj-lloj njerëzve, shembull konkret le të merret komunikata që ma ke dërguar ti ndërsa qëllimi kryesor tek qarkorja për të cilën shpresoj se të ka shkruar Mërgimi. Një artikull duhet të jetë për mikpritjen apo më mirë të them për "mirëseardhjen" që u përgatiti udha shokëve tanë mërgimtarë.

Prej punimeve që ti ke atje lidhur me fejttonin për Jusufin këqyr që të jetë sa më i shkurtë sepse njëkohësisht duhet ta botojmë edhe një për Zeqën që të botohen paralelisht, por të mos jenë aq të gjatë, mjafton nga një faqe e njërit dhe e tjetrit, së pakut tash, në fillim. Më vonë këqyrim. Sa për atë takimin për të cilin kam biseduar me F. tash për tash ka mbetur, sepse duhet ta përgatisim organin e pastaj atë manifestimin për të cilin mendoj se duhet të mbahet më 15 janar, në mënyrë që të kemi kohë për përgatitjen e atij dokumentit që duhet dorëzuar në OKB bile gjer më 20 janar, sepse mbledhja vjetore për të drejtat e Njeriut nisën nga punimet më 30 janar.

Nëse organi nuk ngarkohet duhet të botojmë edhe diç nga shtypi i huaj që shkroi për dasmën e fundit apo për ndonjë temë tjetër më aktuale. Do të ishte mirë të botohet bile një këngë kushtuar tre shokëve në mënyrë që ta mësojë populli dhe ta këndojë...

Këngën do ta dërgoj sa më parë sikurse edhe punimet tjera. E di se po vonohen gjërat, por besom se nuk po kam mundësi të bëjë më shumë, po e sheh edhe vet se na e ka zënë puna punën, po të shpresojmë se pas atij takimit të ardhshëm ndoshta do të shkojë puna pak më mirë...

Ndihma kanë ardhur, si duket janë mbi 10 mijë franga dhe gjer më sot nuk e kemi nxjerrë asnjë centavos, të hollat për numrin e fundit të organit i kemi dhënë tonat personale vetëm e vetëm që të mos ia lejojmë askujt të thotë se e keqpërdorëm besimin dhe përderisa të mos caktohet shoku kompetent për këtë çështje, unë nuk do të lejoj askënd t'i nxjerrë.

Lidhur me atë që ti thua në letrën e fundit se ne gjoja qenkemi thirrë se manifestimi i Cyrihut është bërë në emër të ZK, kjo nuk është e vërtetë, i vetmi rast që e kam bërë është kur një injoranti i kam thënë se një shoku im i Redaksisë së ZK më ka porositur që t'i them që të na çojë informata për tre vëllezërit e burgosur sepse mendonim ta përmendim si rast në peticionin dërguar OKB-s. Prandaj është e domosdoshme që për këtë dezinformim të më shkruajsh se prej nga dhe prej kujt ka lindur. Edhe për manifestimet unë ju kam dërguar propozime që ta zgjedhim njërën prej tri datave, 28 Nëntorin, 10 dhjetorin apo 17 janarin dhe me bindje se festimet tjera le të jenë lokale për çka e kam njohtuar F. pra se këtu do të mbahet në C. por si qendror për Z. e jo më gjerë. Ndërpropozimi im i ngutshëm për 28 Nëntor, ka ardhur për shkak të fjalimit të fundit... por shokët nuk e panë të arsyeshme dhe që në fillim unë i thash F. që këtë çështje mos ta dij askush pos ju dyve, bile për këtë çështje mua më ka dalur këtu telashe e madhe...

Zëri i Popullit e ka botuar një artikull shumë interesant për dasmën tonë ndoshta s'do të ishte keq ta botojmë, por mos nuk do të ketë vend?

Tash për tash kaq...

26 dhjetor 1982

Të fala Ll. (Xhafer Shatri)

Ty dhe shokëve, të gjitha të mirat për Vitin e Ri 1983!

P.S. Poashtu duhet botuar për gjykimet e fundit.

25. Letër Remzi Ademit, janar 1982

(Xhafer Shatri për Remzi Ademin)

I dashur shok,

po të lajmërohem sërish me këta rreshta me dëshirë që ty, familjen dhe shokët të ju gjejë shëndosh e mirë. Edhe ne këndej jemi fare mirë. Ai shoku ka shkuar, po dukej djalë i mirë, por ishin që të gjithë shumë të rinj dhe mos po bëjnë kund farë kiksi e bien në burg. Sidoqoftë takimi me ta ka një rëndësi bukur të madhe. Për materialin që ke ndërmend ta dërgosh, do të ishte mirë që të bisedosh me F. nëse ka ia ndonjë Zë të mëparshëm të Kosovës, në mënyrë që të mos jenë të gjithë Zk të njëlojtë, pastaj edhe ndonjë libër kombinoje, sidomos "Titistët" dhe unë do ta dërgojë ndonjë ekzemplarë të "Këngëve të lirisë".

Natyrisht nëse nuk bëhen shumë, por kij kujdes në zgjedhjen e njeriut që do ta dërgoj materialin, nëse ke nevojë për material të sërishëm ti vetëm urdhëro e shkruaj, sepse ta dërgoj unë. Edhe gjatë dërgimit është mirë të kish kujdes, po mendoj gjatë dorëzimit të tij. Për këtë operacion do të ishte mirë të më informosh më gjerësisht, në mënyrë që ta dij se si të këshilloj për ndonjë detaj.

Përshëndetje revolucionare B (B=Bacaloku=Xhafer Shatri)

26. Letër Xhafer Durmishit, 4 janar 1983

Shok Gj.,

me një vonesë po të përgjigjem në letrat e fundit. Shkak ishte zënia e madhe me punimet e fundit të cilat besoj se do të arrijnë me kohë, mirëpo edhe pse po i dërgojmë expres, megjithatë ato po vonohen çuditërisht, diçka s'është në rregull. Për shkak të ngutjes edhe letërthirrjen për tubimin përkujtimor ia dhashë të shkruar IK që ta shumëzojë, mirëpo këndej e kishte dërguar vetëm një kopje... dreq bjeri në fije, me sa

dëgjova ishte shpërndarë edhe një thirrje tjetër... pastaj edhe një trakt... këtë e kam. Pra puna nuk është aspak mirë. Ne duhet të ndërmarim diçka...

Tash është shumë me rëndësi që ta rregullojmë edhe këtë tubim si duhet prandaj bisedo me shokët... unë e thirra F., por ai qenka në spital, më erdhi shumë keq, por larg, shumë larg dhe nuk po mund të shkojmë e ta vizitojmë ose bile të ndihmojmë në përgatitjet. Duhet të formohet një komision i përgjithshëm përgatitor në të cilin duhet futur sa më tepër punëtorë që janë nën ndikimin tuaj, sepse kjo do ta paralizonte krejtësisht çdo qëllim destruktiv.

Lidhur me letren e tij unë i shkrova Kamberit e i dhash sqarimet e mia. Sa për punimin tënd unë mendoj se është i mirë, por në të ardhmen këqyr dhe merre një rubrikë të veçantë e specialozohu për të, por gjithnjë kije parasysh se propaganda e sotme duhet të jetë e dokumentuar e ashpër dhe konkrete, pra me sa më pak fjalë të thuhet sa më shumë, në çështje ekonomike të merren shifra e fakte konkrete, pastaj të matet pulsi i masës se për çfarë ka më tepër nevojë dhe shkrimet tona t'ia përshtasim shijes së saj... kjo ka rëndësi shumë të madhe.

A mos t'i kanë dërguar shokët e "Ilirisë" shkrimet për numrin tre, çfarë kualiteti kanë, nëse t'i kanë dërguar etj.?

Për çështjet org. po shkon tollovi e madhe, një drejt i madh po e luan rolin e vet për mrekulli dhe po që se vazhdon kështu atëherë mos pyet, po sidoqoftë punët duhet qitur në vijë sa më parë. Mendo për këtë dhe më shkruaj, sepse së pakut tash ti ke më tepër mundësi. Merre me mend unë po punoj 10 orë në ditë dhe kjo po më dëmton pa hesapë. Ani sidomos në këtë kohë kur po kërkohet kaq shumë punë...

Do të përpiqem që të arrij me kohë në tubim por kësaj radhe e kam bukur vështirë, sepse kanë shkuar shumë njerëz me letra të kuqe, të cilët m'i jepnin me dëshirë.

Është tepër vonë ndaj s'po e zgjas më tepër, prandaj prit të fala nga Ll. (Xhafer Shatri),
4 janar 1983

27. Letër Xhafer Durmishit, 31 janar 1983

I dashur shok,

sot u lirova pak andaj po të shkruaj menjëherë. Me Sh. s'është puna aspak mirë. Ai njeri me të gjitha forcat po përpiqet të mbjellë përçarje. Merre me mend tash ka nisur të hap një klub në një fshat të vogël në mes Gj e Lloz. pra në mes dy klubesh të mëdha dhe kuptohet me qëllime të caktuara. Për këtë po shihet se ai njeri së toku me N. po i kryen urdhëratë e dikujt, sepse edhe Hasan Veselaj e ka ndërmend të hap një klub dikund kah rrethi i S. Për këtë jam informuar, prandaj këqyr, bisedo me shokë që të marrin hetime dhe kuptohet iniciativën, sepse po shihet se këta e kanë për qëllim të na kundërvihen me klubet dhe kjo është një taktikë shumë e rrezikshme që mund të ketë pasoja të mëdha. Lidhur me Ha. Ves. këtë mbaje në atë mënyrë që të mos dihet kurrë se prej kujt dhe nga ka rrjedhur. Përndryshe ekziston bindja se Sh. e ka hequr maskën krejtësisht, dhe tash ku po shkon po mbjell përçarje gjë që vetëm sa po e komprometon veten shumë, por edhe po na i denoncon njerëzit bile edhe tek pol. e këtushme ata që punojnë në të zezë, vetëm pse nuk iu bindkan urdhrave të tij. Të merremi vesh se ai këtë po e bën në mënyrë shumë perfide, tamam profesionist.

Për ata të v. të m. më shkruaj gjerësisht dhe më njohto se kur do të mund të dalësh këndeje, sepse do ta rregullonim disi një dok... për ty, pastaj çka bëre me pyetjet që i ke pasur, si u ndave?

Në Br. e arritëm njëfarë kompromisi, besoj se në të ardhmen puna do të shkojë më mirë, por nuk po punonin njerëzit fare përkundër kushteve shumë të mira. Shokët e

Il. janë më të vyerit, s'ka fjalë, fundja po e tregon edhe puna. Sa për atë rastin në kufi, tërë përgjegjësinë mbaj unë, por pas atyre përshtypjeve të shumta unë e harrova veten fare, krejtësisht dhe u shkova si hutit në zgurajë siç thuhet prej nesh. Kjo më ka kushtuar shumë, por besoj se do të rregullohet. Po e përsëris edhe njëherë: më njohto gjerësisht për dialogun me v. e madh me të cilin pata kontakt dhe krejtësisht se çka i the dhe çka të tha. Ne duhet t'i analizojmë shumë mirë taktikat e tyre që ta kuptojmë esencën, sepse është në pyetje diçka e madhe. Unë nuk kam mundur ta marrë me mend një gjë të tillë kurrë, por ja po ndodhka çdo gjë. Të lutem puno në atë dokumentin dhe kryeje sa më parë.

S'do të ishte keq të vish për një kohë të gjatë këtu, sepse kam vend dhe do t'i kryenim shumë punë. Tash pas këtij organi mendoj që këtë materialin dërguar OKB-s ta zgjerojmë mirë e mirë dhe ta botojmë një broshurë të vogël me titull "Akuzojmë tiraninë". Besoj se do të jetë interesante dhe do ta shesim s'ka tjetër. Por do të përpiqemi që në Kosovë ta fusim sa më shumë.

Këto ditë na ka ardhur edhe një letër-ultimatum. S'ka fjalë njerëzit po përpiqen të na bëjnë bisht të tyre në çdo aspekt e ne kurrë nuk guxojmë të lëshojmë pe. Kurrë, sepse në të kundërtën kjo do të ishte vdekje. Po shihet qartë se qëllimi i adashit tënd (Skënder Dushit-shën i red.) është të mbjellë amulli dhe të mos bëhet asgjë. Ndodhë që fare lehtë që ata të shërbehen edhe me njerëz të ud. (UDB-së-shën i red.) vetëm sa ta bindin në mënyrë indirekte J. (Jugosllavinë-shën i red.) se nuk po përzihen në punët e saj të brendshme. Mirëpo megjithatë unë besoj thellë se këta këtu shumë gjëra i bëjnë kokë më vete. Prandaj sa më parë më njohto se si u çarmatos ai burri i botës, çka thoshte, a përpiquej të kundërvihet dhe si, a ishte sjellja e tij e mëparshme apo ndryshe etj. etj., përndryshe jam i sigurt se ai ka kontaktuar me Nuhiun dhe se ky i fundit ka punuar me direktiva të tij ndoshta qysh kaherë, s'është larg mendsh të ketë qenë edhe rojë e Sokolit, prandaj ashtu sa më realisht që të jetë e mundur më trego për atë se çka thoshte Jusufi për të, sa e çmonte dhe si, pastaj se e shikonte Bardhi etj. Kjo ka rëndësi të madhe që ta njohim këtë njeri sa më mirë që të jetë e mundur.

E kam marrë një letër të cilën s'e deshifrova akoma sa duhet, por si duket udba është në korrent të ngjarjeve lidhur me mua, bile shumë më tepër se që mendoja unë. Pade të shohim. Edhe Demë Demaj e ka provokuar dikend lidhur me mua dhe jam i sigurt se ai njeri është dorë e u. këtu, prandaj porosite F. që ta mbaj gjithnjë në përcjellje dhe njëherit të ketë kujdes edhe vetë. Kam fakte se DD ka njohuri për gjëra të cilat ka mundur t'ia thotë vetëm udba e askush tjetër. Do të të njohtoj më vonë për këtë. Sidoqoftë duhet t'i bëjmë sytë katër.

Në të ardhmen më shkruaj gjerësisht për këto që të parashirova në mënyrë që të mos lejojme të na krijohen zbrazëtira por në çdo kohë dhe në çdo rast ta kemi situatën në duar, sepse kemi përgjegjësi të madhe para popullit e atdheut. Naimi bëri shumë keq që nuk i dërgoi informatat për të atin etj. Pastaj një shok i H. (Haxhi Berishës-shën i red.) që e ka në Sent Gallen, prej Maqedonisë e që i ka tre vëllezër në burg s'ka dërguar asgjë. Kjo nuk është aspak mirë dhe këtyre njerëzve ti duhet t'ua tërheqësh vërejtjen, sepse kur obligimet që i kanë nuk i kryejnë njerëzit si ata, atëherë kush do t'i kryej. Bisedo me ta dhe rregulloje këtë çështje.

Të fala Ll. (Xhafer Shatri)

31 janar 1983

28. Letër Xhafer Durmishit, shkurt 1983

I dashur shok,

e mora materialin. Në tërësi është i mirë sepse shtron ide të cilat kërkojnë realizim të menjëhershëm. Për çështjen e mbledhjes është bukur problem sepse mua ato

ditë kur të vish këtu duhet të më ndihmosh në përgatitjen e organit, sepse unë s'po merrkam aspak vesh në makinë, ama aspak, bile bile edhe shiritin ia kam ngatërruar sa që s'po di si t'ia rregulloj

Tash për tash është me rëndësi kjo: duhet të ndërmerren masa të menjëhershme për organizimin e pritjen e ansambllit që po vie. Pra t'i ndahen shokëve detyrat se kush ku do të kujdeset për pjesën e caktuar të sallës, sepse ndodhë fare lehtë që të ketë provokime të ndryshme e besa edhe tjetër gjë. Unë një ditë në ngutje e sipër, i formulova disa akte apo më mirë të them skica se si e shoh se duhet të shkoj kjo punë...

Ma merr mendja se duhet që së pakut tetë vetë të kujdesen për çdo sallë, dhe kujdesi të jetë i tillë sa që askush të mos e dij se ata kanë detyra të posaçme. Për këtu në Zvicër nuk ka problem sepse janë vetëm dy koncerte dhe mund të koncentrojmë mjaft shokë, por atje është terreni mjaft i gjerë e besa edhe koncerte ka shumë. Do të ishte mirë që qysh tash t'i caktojmë shokët se ku dhe si të kenë kujdes. Në My. do të ishte mirë të shkoj Hafizi dhe me Muharremin, Misinin (veç me kusht që ky njeri të mos bërtas aq shumë, aman) etj. Në Sind. kemi shumë shokë të mirë dhe aty F. dhe Mej. le ta bëjnë të veten. Kah veriu në Bremen ka shokë, pastaj në Dysel. dhe në ndonjë qytet afër le ta marrë përsipër qoftë Hyz., qoftë Xhav. Për këtë të fundit po të njohtoj se vetëm disa minuta pasi që më thirre ti, më thirri edhe Plaku dhe unë ia shpjegova se atje nuk ka nevojë të shkojë, në rast takimi me të ai mund t'i thotë se nuk iu ka bërë puna dhe Xh. të mos e marr vesh fare këtë se është bërë në mënyrë të organizuar....

... Brenda kemi bërë diçka, bile bukur shumë, por akoma s'po kemi mundësi të mjaftueshme që ta ushqejmë sa duhet me material e besa edhe me mjete tjera. Verës ndodhë të na vijë një kuadër i fortë për këso gjërash, një i orëve të para, e pastaj puna do të shkojë fare mirë. Në Br. (Bruksel) s'është puna mirë. Ata njerëz ishin si kalamaj, për çdo javë po na dërgojnë nga një procesverbal qesharak me fjalë të mëdha, ndërsa tash ishin përçarë e bërë pikë e pesë. Nëse kësaj radhe hetohet se pas kësaj qëndron I. atëherë me të duhet qëruar hesapet njëherë e mirë, kjo do të ishte një thikë prapa shpine, edhe pse Agimi është bukur naiv dhe me gjestet e veta i nxit njerëzit. Numrin e telefonit tënd e kam humbur, ma dërgo prapë.

Të fala Ll. (Xhafer Shatri) (shkurt 1983 shën i red.)

Ndërmerr të gjitha masat që më 1 mars të jesh këtu.

29. Letër-Qarkore, mars 1983

Vetëm për radhët e organizuara të LRSNJ lëshohet kjo

QARKORE (interne)

Në fillim të muajit prill do të vij në Gjermani dhe në Zvicër një ansambël folklorik nga atdheu ynë i shtrenjtë, Shqipëria socialiste. Ky ansambël dhe të japë koncertet e veta në disa qytete të këtyre shteteve, por kryesisht në Gjermani, prandaj është e domosdoshme që në këtë rast ne si organizatë politike t'i ndërmarrin masat përkatëse në mënyrë që gjatë koncerteve të mos ndonjë e pabërë, të cilën siç dihet është i interesuar ta bëjë vetëm armiku.

Detyrë e jona në këtë situatë është që ta organizojmë një kontroll të padukshëm përmes shokëve tanë në tërë sallën, në mënyrë që qoftë provokimin apo incidentin më të vogël ta evitojmë menjëherë.

Meqenëse qytetet ku do të jepen koncertet s'janë caktuar akoma tash për tash është detyrë e shokëve që të veprojnë në këtë drejtim:

të propagandojnë që të vinë sa më shumë bashkatdhetarë në këto koncerte, për këtë të bëhen udhëtime ndër të njohur, dhe atyre që janë larg t'u shkruhen letra,

që tash t'i caktoni shokët të cilët mund të vinë në konsiderim të kujdesen për një anë apo rresht të sallës të cilin do t'ia caktojme disa ditë para koncertit. Me ata shokë të bisedohet gjerë e gjatë dhe të analizohet mënyra më efikase e kryerjes së kësaj detyre të rëndësishme. Shokët që ngarkoni në këtë detyrë duhet t'i obligoni që për këtë të mos i tregojnë askujt. Pasi të raportoni për këtë, para çdo koncerti do të merrni instruksione të hollësishme se si duhet të vepron dhe në bashkëveprim me kënd.

KQ i LRSHTJ

30. Letër Xhafer Durmishit, 5 prill 1983

I dashur shok,

po të shkruaj përngut, pasi që fola me ty u informova për H. (Halil Malën-shën i red.) se ka arritur aty ku je, më informoi se ia kanë burgosur të katër fëmijët dhe se paskan bërë një bastisje që nuk mbahet mend. Ka shumë burgosje. I thash që të duket kah M. besoj se do të shihen. Tash si prind që është, ai ndodhë të jetë pak i hutuar por është njeri i mirë, ndaj është mirë që t'i koordinoni punët njëherë e pastaj shohim e bëjmë.

Kosova është në flakë, po vinë lajme nga më rrëqethëset. Ka shumë, shumë burgosje.

Ja adresa e atij shokut i cili shpresoj se do t'i gjendet në ndihmë: Selman Rashica, Rue de Ju (zhyl) Verne nr. 7, Paris 11. Le t'i thotë se po kërkon ndihmë sepse e ka drejtuar në atë adresë një shokë që e ka dikend në Redaksi të ZK, mendoj se kështu është më së miri, apo le t'i thotë se e ka dërguar Mil. edhe pse me këtë njeri i ka shkëputur bukur shumë kontaktet,... Mblidh sa të mundesh informata prej njerëzve të porsaardhur dhe më shkruaj pak më shpesh.

Atje nuk mund të vi kursesi.

E. te kush paska qenë? Pastaj për atë mbledhjen themeluese më njohton se çka ka qenë në pyetje. A di diçka për atë traktin që është shpërndarë kohët e fundit në Sindelfingen, më njohto për këtë menjëherë dhe pyete Mejd. pse nuk ka informuar me kohë për atë punë. Kjo nuk shkon kështu, ne duhet ta dim se ç'djallin po bëhet, pra kush çka po bën.

Në Dys. e kishin dërguar të përkthyer në serbo- atë traktin e mëparshëm të Halimit. Si duket Nuhiu.

Të fala Ll. (Xhafer Shatri) Mërgim, 5 prill 1983

31. Letër për Remzi Ademin, 28 prill 1983

(Xhafer Shatri për Remzi Ademin)

I dashur shok Remzi,

na erdhën referatet dhe leja e manifestimit të Stutgardit për çka të falenderojmë përzemërsisht, sepse me to do të pasurohet edhe më tutje arkivi i Lëvizjes dhe njëherit do të mbesin dokumente origjinale për aktivitetin patriotik të kësaj gjenerate mërgimtarësh shqiptarë.

Në të ardhmen të lutemi që të na shkruajsh edhe më gjerësisht dhe të na njohtosh për aktivitetin patriotik të shokëve në Ludvigsburg, në atë vend ku ka vepruar një kohë shoku ynë i paharrueshëm Bardhoshi. Tash në këtë fazë ndodhë të ashpërsohet lufta edhe më tepër, sidomos në atë rrethin tuaj andej, prandaj hapini sytë e jini pandërprerë vigjilentë, sepse armiku më së lehti na lufton nga pozitat tona, pra duke folur me gjuhën tonë ai përpiket të depërtojë sa më thellë dhe kudo që të hyjë t'i fus pykat e veta të përçarjes. Meqenëse atje janë një vistër shokësh të përvojshëm jemi të sigurt se nuk do t'i shkojë përdore po sidoqoftë kujdesi i duhur gjithmonë ka qenë nëna e sigurisë, e ani sidomos në këto punët tona.

Nëse shokët andej kanë ndonjë vërejtje lidhur me ZK, apo me punën e Lëvizjes në tërësi, të lutemi të na informosh menjëherë, por para së gjithash për çdo problem konsultohu me shokët atje, analizojeni mirë situatën dhe as veprimin e vogël mos e bëni pa e pasur të qartë se në ç'përfundim shpë ai.

Në rast se në kontaktet me shokët merrni ndonjë lajm që meriton të botohet, na shkruaj për të menjëherë dhe përpiku si ti si shokët që të shkruani edhe vetë diçka, në fillim është vështirë, por me kohën njeriu i mëson të gjitha.

Ti dhe shokët pranoni përshëndetjet e përzemërta të Zërit të Kosovës
Mërgim, 28 prill 1983

32. Letër Xhafer Durmishit, 28 prill 1983

Shok Gj.,

Mërgim, 28 prill 1983

po të shkruaj përngut, sepse njëmend jam shumë i zënë me përgatitjet përfundimtare të org. po të shkruaj në këtë letër për të treguar se si kanë dalë letrat e org, për përgjegje lexuesve, mjerisht ka dalë një gabim i vogël shtypi, por do ta përmirësojmë.

Letrën tënde e lexova me vëmendje, por disi kam përshtypjen se ti këtë çështjen e profilit tënd më tepër e ke kuptuar si çështje administrate: po bisedon me njerëz sikur ata ta kishin parapërgatitjen tënde, p.sh. me Sh. unë të kam thënë se duhet të kesh shumë kujdes e në anën tjetër i kishë thënë se çështjen se S. është njeri i organizuar. Kuptohet se askush s'është që prej atij apo të tjerëve të bëjmë armiq, ne për këtë kemi marrë qëndrim por sjelljet e atij njeriu janë të një elementi destruktiv, ndaj të cilit duhet të kemi kujdes, por pa ia bërë kurrë me dije se ne dyshojmë në të. Në Dys. ka shkuar puna shumë keq, atë gafin tënd e kanë keqkuptuar e kuptohet pastaj edhe keqpërdorë element të ndryshëm të cilët ti i njeh shumë më mirë se unë, edhe pse në atë mes ka njëmend shokë shumë të mirë, pastaj kësaj i frynë dikush. Posa u njohtova e thirra bacën dhe ia shpjegova se të kanë keqkuptuar, sepse ti ke menduar për klubet tjera legale etj. dhe e porosita që ta qetësojë ambientin dhe të mos lejoj njerëz të ndryshëm që të llomotisin edhe në të ardhmen. Strategjia në M. është e mirë dhe sigurisht se do të ketë sukses, por më mirë ndodhë të shkoj në St. dhe atë nga arsyeja e thjeshtë se njerëzit aty kanë shumë më përvojë. Mendoj se pas daljes së këtij numri duhet ta org. një manif. në Strasburg, për këtë mos i trego askujt, por shiko me atë shokun t'ia bëjmë disi për leje, kuptohet përmes atyre shqiptarëve në F. Angazhohu në këtë drejtim. Në Bilefeld po më njofton Ganiu sot po u takokan me Bremenin dhe Këlnin për t'i rregulluar disa çështje. Thuaj Xh. (Xhavit Ramabajës-shën i red.) mos të nguten me foton e tiranit se mos po na keqkuptojnë masat e pastaj mos pyet.

Abdullah Prapashtica me të dy agjutantët e vet është në Evropë, si duket në Belgjikë, prandaj ai rasti i Dys. mund të ketë edhe më pasoja sepse ata veç po përgojnë për të futur në rastin e parë pyka kudo që të munden. Ky numër i organit më ka lodhur

shumë, sidomos disa konture të Programit Politik që duhet t'i botojmë me rastin e njëvjetorit të themelimit të L.

Letra po vinë shumë mos pyet hiç. Nga të gjitha anët, por punime që duhen, shumë pak. Interesant po janë të rrallë njerëzit që dinë ta përthekojnë problemin ashtu dhe aty ku duhet.

Kjo greva e fundit në Ramiz Sadik i ka dhënë luftës shtytje të re. Për të do të shkruaj, në të vërtetë e kam shkruar komentin e Redaksisë për të, por edhe për rekuiemin e Mahmutit në skenën politike jugosllave. E di që s'bën të merremi me gjëra të vdekura por na kanë ardhur disa letra nga Vajazani që na thonë që t'i kamxhikosim edhe opingat e shkyera...

Ti thua se nuk po shkruaj më shpesh etj. dije se nuk po kam kohë, besom se ky kryeartikulli i tashëm ma ka shkatërruar mëlqinë, sepse duhet të kemi kujdes e kah po shkojmë, merre me mend duhet të jemi de jure autonomist e de facto seperatist, pastaj janë edhe kundërshtarët e shumtë që po bëjnë presion edhe përmes letrash. Merre me mend prej Amerike ka ardhur një pliko e në të foto e foto të kopjuara të Enver Hoxhës me Dushan Mugoshën, ashtu disa foto pa asnjë fjalë. Porosi kuptohej fare mirë.

Të holla po na dërgojnë bukur mirë, tash i kemi punuar nja 3000 kasete në të cilat duhet t'i nxjerrim bukur do të holla e pastaj ta blejmë disi një shtypsh... të tërë, pade të shohim se si po shkon puna njëherë. Me Kamberin po korrespondojmë por rrallë, besa edhe po vonohen letrat.

Shkruaji ti pak më shpesh. Tash duhet të kemi kujdes sepse KK nuk do të rrijë kurrë i qetë, dhe për mbarë ai njeri s'do të mundohet kurrë, Këtë e tregoi praktika.

Të fala Ll. (Xhafer Shatri)

33. Letër Remzi Ademit, 9 maj 1983

(Xhafer Shatri për Remzi Ademin)

I dashur shok,

na erdhi letra dhe trakti që qenka shpërndarë andej prej jush, prandaj të falemnderit për interesimin.

Sa i përket asaj se kush e ka shkruar dhe kush e ka shpërndarë, ne e dimë, për këtë mos u shqetëso aspak.

Lidhur me porosinë time për ndonjë informatë për Sh. P. a ke mundur të bëjsh diçka apo duhet të kujdesemi edhe nga anë të tjera, po që se ti mendon se nuk ekziston mundësia atëherë më njohto menjëherë dhe nuk ka asgjë të keqe.

Prej shtëpi a po merrni ndonjë lajm qoftë ti qoftë shokët, çka po thonë si janë andej? Rinia e atjeshme ka bërë çudira, do të lexosh në numrin e fundit të ZK një reportazh shumë të mirë për ngjarjet më të reja në Lumthat.

Organi do t'ju vie tash së shpejti, besoj të enjten. Qoftë edhe për vërejtjen më të vogël të lexuesve të lutem të më njohtosh.

Ty dhe shokëve të fala vëllazërore

Bacalok (Xhafer Shatri)

Mërgim, 9 maj 1983

* * *

Më 15 janar 1983, në Ludvigsburg, me iniciativën e Xhafer Shatrit u formua Qendra Ekzekutive (QE) nga pesë anëtarët e mëposhtëm, të cilët morën pseudonimet përkatëse. Qendra Ekzekutive pushoi së vepruari më 3 mars 1984 në Gjenevë, kur u vendosë formimi i Komitetit Qendror, që në korrespondencën tonë do të identifikohet me emrin "Dukagjini".

Pseudonimet:

-Iljazi =	Ibrahim Kelmendi
-Xhema=	Xhafer Shatri
-Plaku=	Hasan Mala
-Fahriu=	Faridin Tafallari
-Salihu=	Xhafer Durmishi

34. Letër Qendrës Ekzekutive, 1 qershor 1983

Anëtarëve të QE, 1 qershor 1983

Shokë,

dje e mora një letër prej shokut Fehmi, ishte një letër e mirë dhe e sinqertë, një letër tamam shoqërore por edhe shqetësuese. Në të shpreheshin mendimet lidhur me situatën në Dys., për atë se Iliazi kur e paska ditur se çfarë njeriut është H. atëherë pse e ka bërë dhëndërr të atyre etj., pastaj sidomos për Salihun, ai me të drejtë e gjykon qëndrimin e tij lidhur me rastin e Dyseldorfit, për këtë punë mbrëmë më thirri një shok prej andej dhe u shpreh aq keq sa unë kaherë nuk jam ndodhur në pozitë kaq të vështirë. Gabimin e Salihut e kanë shfrytëzuar maksimalisht njerëzit që kanë folur në emër të Il. çka tregon se mosmarrëveshjet e tyre të mëparshme po reflektohen, madje edhe po marrin përmasa të palejueshme mu në kohën kur ne duhet të tregohemi sa më unikë që të jetë e mundur. Prej Salihut e kam marrë një letër, një letër më se të çuditshme, në të thotë lidhur me një element të këtushëm destruktiv se "në masën më të madhe e urrej unitetin formal..." apo kështu disi dhe, si edhe më parë insiston të shihemi. Kuptohet se është e domosdoshme të shihemi, por ja që s'po kemi edhe kushte: kemi qëlluar larg, s'po kemi dokumente e besa as të holla, fundja ne jemi në luftë dhe nuk mund të shihemi çdo ditë: i kemi ndarë detyrat njëherë dhe tash duhet të vazhdojmë luftën, çdonjëri sipas mundësive e aftësive. Unë vetë siç e dini jam tepër i zënë: të nxirret një gazetë për 40 ditë dhe të pretendohet që ajo të jetë busullë e 3 milionë shqiptarëve, kjo është shumë e vështirë, don me një fjalë shumë punë. Fryt i asaj pune është numri 3, pastaj po kam probleme edhe lidhur me futjen e tij brenda, sepse për shkak të përvojës sa do modeste po më duhet t'i mësoj njerëzit se si t'ia bëjmë. Kësaj radhe kemi pasur sukses shumë të madh në këtë drejtim.

Një çështje tjetër është edhe organiz. brenda, vetëm kohët e fundit kam kontaktuar me disa njerëz që kanë ardhur prej atje vetëm për këtë punë e për asgjë tjetër. Edhe kjo po kërkon shumë punë e energji. Thjeshtë nganjëherë po e ndiej veten më tepër se të dërmuar. Pra mu këto janë ato shkaqet që s'po më lënë kohë t'u ndihmoj edhe të tjerëve, edhe ata e kanë më lehtë, kanë më pak obligime. Ja për shembull Il., siç po shihet e ka shkelur me të dy këmbët betimin e dhënë para shokëve të vet dhe ka treguar për ekzistimin e QE dhe madje edhe për përgjegjësitë që ka çdonjëri prej nesh. Për këtë punë unë kam fakte të padiskutueshme. Lidhur me këtë unë ia shkrova letrën e fundit por akoma nuk kam marrë përgjegje. Kuptohet faktori të vetmen mbrojtje e ka heshtjen. Keqpërdorimet e tij kanë shkuar edhe më larg. Ka njerëz që shkruajnë se Il., nuk i lejon (kuptohet në mënyrë mjaft perfide) që t'i shkruajnë ZK. Është çështja e të hollave të Zylb. fillimisht i kërkoi 600 marka, më vonë 1100. Po për të njëjtin njeri

punëtorët na shkruajnë se të hollat që i kanë mbledhur bashkërisht për t'i dërguar ndihma Kosovës, ai i ka harxhuar, sipas tij, në udhëtime zyrtare në Bruksel etj. E për çështje zyrtare ne kemi vendosur ta mbajmë vetëm një njeri, sepse nuk kemi mundësi e jo për tjetër.

Çështja e fotografisë së Ti. e di se është rritur, por unë nuk mund ta di se çka e ka shtyrë njeriun tonë të thotë gjëra të tilla dhe aq më keq, siç thotë Fehmiu, të vazhdoj edhe tash me të njëjtin avaz. Duke besuar në aftësitë e S. unë të gjitha propozimet e tij i kam marrë si punë të kryera, ndërsa tash po shihet se ky çështjet organizative, ashtu siç i kam shkruar në letër, i ka marrë tejet administrativisht: përmes një njeriu të njohtohesh për të gjitha në një rreth të caktuar dhe pastaj çka të thotë ai... Xh., dhe F. janë tipa shumë kontraverz, duhet të kemi kujdes, edhe nëse kemi bërë ndonjë lëshim më parë tash nuk bën të mashtrohemi.

Jam i mendimit se duhet t'i hyjmë riorganizimit të themelshëm, të bëjmë seleksionimin e njerëzve dhe të mos i japim askujt kompetenca të shumta, por ato t'i ndajmë në disa shokë të qarku p.sh. Ta këqyrim të kaluarën e njerëzve, karakterin e tyre. Merreni me mend nga të gjithë ata ZK që janë shitur në Dysel. këtu s'kanë ardhur të holla fare. Pastaj organi nuk po shpërndahehet kurrsesi. S. tha se duhet ta organizojmë këtë më mirë, por ai nuk ndërmori asgjë në këtë drejtim edhe pse ai është përgjegjës për këtë, sepse vetëm përmes organit mund të organizojë njerëzit me të cilët duhet të punohet pastaj shumë e shumë. Unë nuk e di se çfarë takimesh dhe mendimesh të ndokujt na duhen kur e kemi plot njerëz tokën, njerëz që memzi presin t'ua shtrijmë dorën.

Në letrën e tij F. thotë se e shqetësojnë mosmarrëveshjet e mia me S. Unë nuk e di se për çfarë mosmarrëveshjes është fjala. Sa më përket mua unë për këtë, për besë, vetëm tash po dëgjoj. Lidhur me letrën e mëparshme, që e përmenda kam menduar t'i shkruaj një letër të rrastë, por ai ashtu rrugëve, s'dija ku t'ia dërgojë, prandaj në një bisedë telefonike ia thash atë që mendoja. Letrat shumëkuptimshe e të paqarta, ashtu krejtësisht të shkurta, madje për çështje që unë kam shprehur mendim njëherë e mirë nuk qesin asgjë në dritë. Për atë individ (Sh.-Shaqir Shabanin-shën i red.) unë ia kam analizuar punët dhe fushatën kundër tij nuk e kanë nisur shokët tanë por ai vet me sjelljet e tij aspak të mira madje shumë të dyshimta. Tash ka shkruar aq larg sa po u del njerëzve në rrugë dhe po i kërcënon me armë... ai njeri nuk i ka këputur kurrë kontaktet me N. dhe aq më pak tash kur ai me kompani dolën me një manifest të tillë idiotesk. Meqë është puna kështu, do të ishte mirë që ta ngutni takimin e 3 qershorit për të cilin më pat shkruar S. Ne duhet ta marrim një qëndrim, pra ta demaskojmë apo jo, ta demaskojmë haptas apo si. Kam përshtypjen se sidomos atje nuk po punohet fare me njerëz. Nuk mjafton një mbledhje, me njerëz duhet të shihemi më shpesh. Ne nuk guxojmë t'u besojmë njerëzve që nuk e meritojnë besimin tonë. Ja një shembull: vitin e kaluar njëfarë tipi në St. Gallen s'bente asgjë, apo më shumë keq se mirë, dhe në mungesë të tjetrit apo të frikësuar se mos po e dekonspirojmë një kuadër perspektiv e lënim ashtu. Këtë vit shkoi atje H. (Haxhi Berisha) dhe ka bërë shumë punë burri i botës për shumë pak kohë...

Kam shumë për të thënë, por po propozoj që të shihemi sa më parë. I. do t'i telefonoj disi sot, dhe me atë rast mendoj të analizohen këto çështje: puna e gjertanishme, propozimi i shokëve nga Tur. që ky aparat të shtohet në 25 veta (unë s'e kam pranuar një gjë të tillë sepse nuk kemi kuadro, nuk i besohet detyra e madhe kujtdo, sepse pastaj mund të humbasim shumë, mendo se duhet t'i kemi çdonjëri nga dy ndihmës, pa ditur ata për QE dhe anëtarët e saj.), formulimi i rregullores së punës së QE, formulimi i Statutit dhe plotësimi i Programit politik, çështja e mjeteve materiale

(ka të drejtë F. për të hollat, ne do të vendosim përfundimisht për këtë punë si dhe për atë se kush ka të drejtë të shpenzoj dhe për çka,) çështja e anëtarësisë, pse nuk po mblidhet anëtarësia, si të kursejmë në të ardhmen edhe më shumë, si ta zgjidhim çështjen e financimit, pse ZK nuk po shitet më shumë, apo pse nuk po mblidhen më me sukses të hollat e tij, duke e shitur atë ne mund të fitojmë rreth 7000 franga, kjo nuk është një shumë e vogël, si ta rregullojmë në të ardhmen çështjen e udhëheqjes nëpër lokalitete, si t'i përgatisim kuadrot sepse pa kuadro të forta ne s'mund të bëjmë asgjë, ani sidomos tash kur duhet t'i kundërvihemi një nxënësi të udbës i cili na ka luftuar dhe do të na luftojë edhe më me forcë në të ardhmen, propozoj që ta hapim një kurs për kuadro, një kurs të shkurt 4 ditor bile dhe ta organizojmë në atë mënyrë që të përfshihen njerëzit e të gjitha qendrave në Perëndim, kuptohet ata më të besueshmit, mendoni që tash për një seleksionim të tillë. Ne disi do ta organizonim fjetjen, vendin e ligjëratave, ushqimin etj., a do ta bëjmë më ndonjë demonstratë (unë i thash S. të këqyr përmes një shokut për një leje, por ai nuk bëri asgjë, bile as që më ktheu përgjegje...) me një fjalë kemi shumëçka për të diskutuar e vendosur. Në të ardhmen mbledhjet do të mbahen me procesverbal të tërë... ose edhe në trakë magnetofoni. Në të ardhmen mendoj se duhet ta zgjerojmë QE m dy anëtarë tjerë, një për sigurim dhe tjetrin për çështje ushtarake... por edhe për këtë do të bisedojmë më vonë...

Çështjen e klubeve ne duhet ta rregullojmë përmes bashkësisë së tyre me të cilën do të udhëheqin njerëzit tanë më besnik dhe ta rregullojmë çështjen e inventarit, për këtë S. na pat folur shumë kaherë por nuk ka asnjë rezultat. Në atë farë bashkësie mendoj se duhet të përfshihen të gjithë shokët që janë aktivist po që në rrethet e tyre ndoshta nuk ka klub, por sallë apo edhe odë. Kjo është e domosdoshme, sepse ndodhë që të na kundërvihen pastaj me sindikatat e tyre këta budallenjtë e fëlliqur.

Mu për këtë sot më shumë se kurrë shtrohet çështja organizative si shumë e rëndësishme, prandaj edhe vendi i S duhet të jetë në mesin e punëtorëve, të mos lerë vend në Gj ku ka shqiptarë që ai të mos e di se kush sa vlen. Në Xhav. po ankohen njerëzit se po ju flet me mburrje se si i ka 30 celula, se si vetëm ai duhet ta shpërndaj ZK etj... pastaj është e vërtetë se po flet me të madhe kundër I. Kjo gjë duhet të ndërprehet, kjo nuk shkon më kështu. Çka janë të gjitha këto thashetheme, aty ku shkojnë S apo I është e pamundur të shpëtoj pa tym. Pasat edhe kur është në pyetje çështja e Lëvizjes, dreqi e marrtë po Lëvizja nuk është çelës i artë që i qel të gjitha dyert. Rreptësisht është e ndaluar të manipulohet me emrin e saj, njeriut mund t'i imponohet dikujt si autoritet me punë, me sjellje e zgjuarsi e jo me emrin e Lëvizjes në gojë. Merreni me mend po më thotë baca Zymer: kush është ai që guxon të na përzihet në punët tona. Ne s'e njohim Lëvizjen nëse ajo merr vendime të tilla dhe nëse në emër të saj flasin njerëz të tillë e gjëra të tjera që janë edhe më të rënda të shkruhen. Poashtu edhe në Hamburg, ishin të dytë dhe çka ndreqën, asgjë, ama asgjë. Prapë me të vjetrën, afroje njërin e largoje tjetrin, para njëri-tjetrit "pajtohu", pas shpine ç'është një e zezë. Unë thjeshtë po çuditem. Dreqi e marrtë më ka lodhur kjo çështja e dokumenteve, sepse tash po e shoh të rëndësishme që organin ta botojmë edhe rrallë por të merremi me çështje organizative me më sukses. Atje në Gj. duhet të kemi pak njerëz autoritativë e të besueshëm përmes të cilëve përfshihen masat. Ndërsa këtu të përqendrohen të gjitha forcat, sepse ka njerëz sezonal dhe me moshë shumë të re që mund të bëjnë shumë për çështjen tonë. Kjo këtu jashtë është zhurmë, puna bëhet brenda, atje është fronti kryesor.

Ata më thirrën që të shkoj gjithsesi në Dys... dhe sikur ta kisha atë dokument të djallit do të shkoja gjithsesi, sepse ndodhë të shkoj Nu. ai kësi rastesh pret. Tash për tash është shumë me rëndësi që të mendojmë se si ta demaskojmë një klan të tillë të keq

e të poshtër që flet për punët që s'i ka bërë fare me aq mburracakëri. Po më vjen turp kur po më bie ndërmend se me çfarë njerëzish kam pasur punë. Në një letër që ma ka dërguar Nuhiu e pash se ai s'është hiq më i mirë se ata, edhe pse letrën dukej se e ka shkruar Abd. Sipas të gjitha gjasave ata do ta lëshojnë së shpejti një komunikatë në të cilën Nu, në emër të LNÇ do të "bashkohet" me PKMLSHJ... jam i sigurt se kështu do të veprojnë. Mendoni edhe për këtë dhe veproni ju që jeni atje. Vendi i S tash ka qenë në mesin e punëtorëve në St. e jo gjetkë. Lidhur me atë broshurën e tyre unë e shkrova njëfarë Qarkoreje të shkurtë që t'i njoftojmë shokët, sepse sidomos këta këtu s'kanë ditur asgjë për këtë punë. Dhe për këtë unë mbaj fajin.

Xhema (Xhafer Shatri) 1 qershor 1983

(Faridin Tafallari, Dhimbje Krenare, Tiranë 1998, faqe 168-171)

35. Letër në emër të Qendrës Ekzekutive, 7 qershor 1983

Anëtarëve të QE

Të dashur shokë, para dy ditësh kam pasur rastin të bisedojë me disa shokë të Dyseldorfit dhe prej tyre jam informuar për shumë gjëra me rëndësi. Çka është kryesore atje Nuhiu me kompani nuk do të mund t'i fusë hundët, e kësaj unë iu kam frikuar jo pak, sepse ata së bashku me statutin e tyre po u çojnë njerëzve edhe letra në të cilat në emër të Komitetit Kryesues kërkojnë prej tyre që t'ia nisin organizimit të celulave dhe krejt kjo në emër të LRSHJ dhe të PK (ML) të Kosovës (Partisë Komuniste Marksiste Leniniste të Kosovës - shën i red.); Veç po e shpërndajnë edhe fletushkën e tyre me emrin simpatik "Punëtorët". Fletushkën e kam lexuar desha të them statutin, në të ka çdo gjë, por për të mirë pothuaj asgjë, ai ka për qëllim dezinformimin e njerëzve, njoftimin e armikut me format organizative të punës dhe një metodë e paparë e prepotencës (mendjemadhësisë), për këtë çështje ne duhet të ndërmarrim diçka duhet të diskutojmë gjerë e gjatë dhe të ndërmarrim diçka sa më parë që të jetë e mundur, njëherë për njëherë është shpërndarë një takt që është parapërgatitje për demaskim. Natyrisht nëse vazhdon kështu kjo gjendje e nderë, atëherë ata do të mund të bëjnë shumëçka kundër nesh, sidomos në Gjermani nuk është puna hiq mirë... atë ditë ata shokët po më thonë se na ka thënë Musa Daka se ju nuk guxon të shkoni atje, do të thotë në Gjenevë (sa i përket kësaj ardhjeje ju njoftoj se një natë më ka thirrë baca Zymer, ky s'e ka pasur numrin e telefonit tim dhe po më thotë se a mund të shkojë te ai (ata).

Unë ia tregova punën se nuk kam asnjë mundësi dhe u përpoqa t'ia sqaroj punën e fotos, se ai nuk është ndonjë qëndrim i përgjithshëm për klubet, por shoku ua ka thënë me qëllim që të këqyrni dhe të mos i rrezikojmë shumë njerëz, fliste me tonë të lartë dhe shihej se është shumë i mllefosur.... një natë aty kah ora tre e gjysmë pas mesit të natës, më telefonuan dhe më thanë se po nisemi. Thënë të drejtën nuk arrita të flasë me shumë me ta por u frikova se mos është në pyetje diçka shumë e madhe...) erdhën të nesërmen dhe po më tregojnë se si M. Daka u paska thënë se ju nuk duhet të shkoni pa e pyetur Xhavitin se ai qenka përgjegjës për Gjermani (kuptohet ata e treguan edhe rastin e fotografisë, mirëpo për këtë ne do të bisedojmë më gjerësisht) kjo gjë më brengosi shumë, sepse kjo formë e luftës, nëse kjo mund të quhet luftë është e palejueshme. Lëvizja është një organizatë ilegale që nuk guxon të dekonspirohet para masës, duhet të shihet puna e saj e jo fjalët. Tamam puna sikur ne të dilnim dhe të tregonim përgjegjësit që kemi, kjo metodë është së tepërmi e dëmshme. Lëvizja nuk është një shkop magjik që na i rregullon punët tona as qelës-kallauz që na i hap të gjitha dyert, ne kurrë nuk

bënë të flasim në emër të Lëvizjes por me sjelljen tonë, me aftësitë tona duhet ta zbatojmë në masë politikën e Lëvizjes, se flasim në emër të Lëvizjes ne mund t'i themi vetëm shokut të organizuar, dhe një takim me celulën, kuptohet është krejtësisht i ndryshëm me një takim në masën e gjerë. Në këtë drejtim duhet të merren masa të menjëhershme përkatëse dhe të mos përsëriten kurrë më gafe të tilla. Ai i Bremenit ka njoftuar këndeje se Xh (Xhaviti) ka shkruar dhe i ka thënë se unë jam përgjegjës për këtu, sepse punoj me 30 celula, prandaj Zërat e Kos. T'i jap unë. Në anën tjetër shkon një tjetër, ai Faz. (Fazli Memaj) dhe i thotë njeriut se jam kompetent të të pyes pse ti nuk je diçka i kënaqur... edhe një rast tjetër edhe më flagrant me rastin e shfaqjes së koncertit në Dys. shkon Engjëlli (Kolaneci, diplomat shqiptar në Vjenë-shën i red.) dhe i merr Xh. Hyz dhe Faz. (Xhavit Ramabajën, Hyzri Rekën dhe Fazli Memajn-shën i red.) e u thotë: ku është Lëvizja, keni kujdes se aty është udha, mos u mashtroni, hapini sytë dhe kështu në këtë kuptim... diçka e pabesueshme dhe ata burrat e botës asnjëri s'e kanë njoftuar shokun me të cilin kanë kontakt. Çfarë njerëzish mund të jenë ata kur prej tyre ka pasur që kanë thënë në masë se nuk kemi bazë, Lëvizja nuk ka ndonjë bazë të sigurt dhe kështu në këtë kuptim. Shtoja kësaj edhe rastin flagrant të Ilazit atëherë shihet se sa metodë e dëmshme pune është kjo. Sot më shumë se kurrë po bindem se ne duhet të mbështetemi në njerëz të sigurt, sado pak qofshin ata, tre tre mjaftojnë por ama të jenë burra e shokë.

Me Ilazin mendoj se duhet ta lëmë kështu njëherë të mos i bëjmë zë fare, por ai njeri nuk guxon më kurrë të jetë aty ku e kemi zgjedhur, ai është njeri i papërgjegjës dhe gjer në fund i pabesë. Unë ia kam shkruar një letër në këtë drejtim pa ia potencuar të gjitha këto drejtpërsëdrejti dhe nuk ka kthyer përgjegje, sepse fajtori kurrë nuk ka guxim të flasë, ai mbrohet me heshtjen, që do të thotë se është një pranim faji.

Të tregohen përgjegjësitë që i ka caktuar dikujt populli në një luftë ilegale dhe të dekonspirojë gjëra për të cilat shokët tanë i lënë veshkët e dhëmbët në qeli burgjesh pa qelë gojë, ky është një gjest i papresedan tradhtie e mospërgjegjësie.

Është edhe një rast tjetër, çështja e Shaqës. Në një letër aspak shoqërore Salihu më thotë se e urrej në masën më të madhe unitetin formal, dhe vazhdon pse nuk po ndalen thashethemet kundër Shaqës (Shaqir Shabanit-shën i red.). Dreqi e marrtë po Shaqa i ka nxitur vetë thashethemet me sjelljet e tij të poshtra udbeske, ai shkon dhe i thotë njeriut shko dhe organizoje filan fistekun në Lëvizje sikur L. të ishte kafene pastaj i mashtron dhe i frikëson se do t'ua qesë në Zërin e Kosovës, se ka kompetenca të mëdha e çka po di unë. Për këtë njeri unë nuk dua të harxhoj fjalë e kohë, por po them se ky është një element destruktiv puna e të cilit nuk ka asgjë të përbashkët me Lëvizjen. Ai ose është ambicioz i sëmurë, ose njeri i udhës, dhe unë më shumë droj se ky është i dyti. Tash po na dalin fakte se ai po u thotë shokëve në Gjermani që të kenë kontakt vetëm me Nuhiun... Pra puna ka shkuar larg. Ai njeri kurrë s'i ka shkëputur lidhjet me ish-patronin e vet. Disa herë kam menduar të bisedoj me atë horr...

Kohët e fundit kam qenë shumë i zënë, kam pasur shumë kontakte me shokë të brendshëm dhe besoj se ia kemi arritur të bëjmë shumëçka: atje do të shpërndahen trakte e do të kryhen aksione vetëm nga ana e LRSNJ dhe do t'ia arrijmë që veprimet e fëlliqura të këtyre fraksionistëve të evitojmë në një masë të madhe... por kjo do shumë punë, tmerrësisht shumë punë dhe nerva, prandaj do të ishte mirë që me organizimin jashtë të merreni të gjithë më shumë dhe sidomos Salihu që e ka përgjegjësi kryesore. Ai duhet t'i krijojë kuadrot tona të ardhshme dhe të gjithë frenjtë e organizimit t'i përqendrojë në duartë të veta, por kuptohet me një punë dhe përgjegjësi në nivel me obligimin që ka. Në bisedë telefonike me të mbrëmë po më thotë s'kam të holla... ky

nuk është një arsyetim bindës, fundja të hollat për kënd i kemi, për luftën e jo për sytë e zi. Sidomos në këtë kohë ai është dashur të jetë në mesin e punëtorëve në St. (Stuttgart) dhe ta rrokim punën përpara, sepse kemi të bëjmë me njerëz që s'kanë fije burrërie, por që do të merren edhe me denoncime të armiku, për këtë jam i sigurt, por nëse ne punojmë, nëse ne e qesim shpesh dhe kualitativ ZK ata nuk kanë çka të bëjnë. Do të ishte mirë që në këtë drejtim t'i përqendrojmë të gjitha forcat tona dhe ta lëmë në heshtje punën e tyre, kuptohet duke e qitur krejtësisht nën hije punën e tyre përçarëse e minuese, pra me punë.

Pastaj lidhur me ta t'i sqarojmë punëtorët sa më tepër jo vetëm gojarisht dhe duke e përqendruar vëmendjen në qëllimet e tyre tamam armiqësore, e jo duke ndenjtur nën hije, sepse ara pa i zhytur këmbët në dhe nuk mihet... Ka kuadro bile shumë, por ne nuk po punojmë sa duhet, po na mungojnë ata militantët që s'u shihen kurrë gjurmët por që u ushton puna, e Halimi duhet ta dini është talent i intrigave dhe mashtrimit të njerëzve, prandaj Salihu duhet ta ketë parasysh këtë dhe ta formulojë një formë të veçantë për t'iu kundërvënë. Në këtë drejtim të mendojmë edhe ne si t'ia bëjmë. Natyrisht pa një unitet mendimi e veprimi nuk do të kemi sukses. Mua s'më pëlqen ajo që para syve të luajmë rolin e unitetit e pastaj kur të ftohet muhabeti të ndërrohet pllaka. Vetë nga toni i bisedës së Salihut mbrëmë unë kam kuptuar shumëçka. Edhe pse nuk jam ithtar i mbledhjeve të shpeshta, kjo më detyron të insistoj për një takim të ngutshëm. Ne i kemi marrë detyrat, prandaj çdonjëri prej nesh le të shkrihet për realizimin e tyre, le të duket puna. Natyrisht takimet janë të frytshme dhe mëse të domosdoshme, por po e shihni edhe vet se në çfarë kushtesh po veprojmë, pa dokumente, pa mjete materiale të bollshme, pa status të sigurt, si në vend të huaj më.

Vendin e Ilazit mendoj se duhet ta plotësojmë, por pa e njohtuar njëherë përnjëherë, me të duhet të taktizojmë sa më tepër që të jetë e mundur....

Ju lutem të mendoni për këto dhe të vendosni diçka menjëherë. Për shkak të largësisë unë dhe plaku mund të dalim deri kah Baseli, në mënyrë që ta ndajmë përgjysmë rrugën e besa edhe shpenzimet.

7 qershor 1983

Xhema (Xhafer Shatri)

36. Letër Remzi Ademit, 10 qershor 1983

(Xhafer Shatri për Remzi Ademin)

I dashur shok,

shkoi një kohë bukur e gjatë që ne nuk komunikuam në mes veti, si je tash a po e ndien veten më mirë, do të ishte me vend nëse disi mund ta lësh duhanin, sepse ai të dëmton shumë me ata ithata të djallit. Pastaj të kërkosh ca hapa që quhen Tagamet dhe të ushqehesh vetëm me prodhime qumështi, jij i sigurt se në atë rast për një kohë fare të shkurt do të shërohesh. Familjen si e ke dhe a janë akoma andej?

Po nga vendlindja a ke më ndonjë lajm lidhur me atë që biseduam atëherë përmes telefonit? Do të ishte shumë mirë që t'i sjellësh ndonjërin prej tyre këndeje dhe t'i akordojmë aksionet në tërë Kosovën. Nëse ne i arrijmë kësaj atëherë këta farë sharlatanësh që kanë dalë me paçavuren e tyre nuk do të kenë as ndikimin më të vogël në Kosovë.

E sa për këtu nëse ne punojmë sa duhet dhe si duhet as këtu s'do të kenë mundësinë më të vogël të ngulin dhëmbin. Ne, mendoj nuk duhet të merremi me

thashetheme, por t'i sqarojmë punëtorët, t'ua tregojmë se ku shpie një veprimtari e tillë dhe ngado që të shkojmë të përpiqemi e të bëjmë sa më shumë miq e dashamirë.

Aktualisht shtrohet si detyrë me shumë rëndësi që t'i vizitoni punëtorët, të mos leni kund shok apo të njohur pa e vizituar dhe pa e prekur mençurisht se në çfarë pozitash qëndron ai, natyrisht duke bërë përpjekje për t'i zbuluar punktet dhe njerëzit e N. me shokë, pra të veprojmë ashtu siç po veprojnë ata dhe t'i lëmë një ditë fare ashtu si peshkun në zallë. Pra t'i mundim me punë e aktivitet revolucionar. Sidomos aty në odë e keni një mundësi të madhe t'i grumbulloni punëtorët dhe të bëni seleksionimin e tyre, të punoni me ta ngadalë e me durim, t'i sqaroni, por ama edhe ta mbani konspiracionin në mënyrë që N. me kompani të mos mund t'ua dij se ku i keni këmbët as kokën.

Nëse ka ndonjë gjë të re në atë drejtimin tonë të lutem më njohto menjëherë.

Ti, familja dhe shokët pranoni përsëritetjet e mia revolucionare

10 qershor 1983 Bacaloku (Xhafer Shatri)

37. Qarkore në emër të Redaksisë së Zërit të Kosovës, qershor 1983

Qarkore interne lidhur me rastin e ish-PKMLSHJ

- Kohët e fundit ka nisur të shpërndahet nëpër Gjermani një broshurë me titull: Platforma Politike, Programi dhe Statuti i OS (organizatës sindikale) Bashkimi i Punëtorëve të Kosovës. Në këto 40 e sa faqe ka gjithçka, prandaj kësaj radhe s'po e analizojmë fare përmbajtjen e saj, le ta bëjë këtë vet lexuesi, por po e analizojmë atë çka i parapriu kësaj: Në vitin 1981 në Kosovë për herë nisi të flitet për PKMLSHJ (Partia Komuniste Marksiste-Leniniste e Shqiptarëve në Jugosllavi), ajo nisi ta nxjerrë organin e vet në dhjetëra kopje me titull "Revolucioni", njëherë tjetër Zërin e Atdheut, kjo e fundit është shpërndarë shumë pak, kështu që nuk dihet për të, ndërsa "Revolucioni" është më i njohur nga ajo se te lexuesi i pjekur që ka qenë në dijeni të organizimit ilegal në Kosovë, ka lënë përshtypje me prepotencën e pashembullt të njerit prej numrave të tij, në të cilin autorët e tij pohojnë se gjoja ata qenkan ata që i kanë organizuar demonstratat e 81, dhe se për këtë sukses kryetari dhe sekretari gjeneral e kanë shpallur veten heronj të popullit. Këto gjëra i kanë indinjuar së tepërmi sidomos njerëzit që kanë vepruar në ilegalitet të thellë gati me dekada, por kurrë s'kanë nxjerrë zë, ata e kanë lënë të tregoj puna e tyre; kjo që thamë, niveli i ulët intelektual i shkrimeve të tyre, fjalori i konferencave jugosllave bënë që te shumë njerëz të fitohet përshtypja se kjo është vepër e UDB-së, në të vërtetë autori i shkrimeve ka punuar në SPB.

Këtë organizatë në një masë e ka popullarizuar edhe regjimi duke shkruar për të në kohën kur ata kërkonin me pishë njëri për t'ia hudhur fajin për Pranverën e 81, sepse ishte qëndrim i organizata tjera ilegale që një shpërthim i tillë në opinion të paraqitet si vepër spontane e popullit pavarësisht nga ajo se kush ka kontribuar në atë drejtim, sepse kjo do të ishte shumë më akuzuese për armikun. Veç kësaj kjo org. në fjalë e ka përdorë me sukses luftën psikologjike, të gjitha shkrimet e veta së pari ua ka dërgua organeve krahinore, kuptohet duke i ngjitur vetes emra të mëdhenj e fjalë që me asnjë rast s'i ka përcjellë punë përkatëse. Kjo metodë është treguar e suksesshme sepse e ka popullarizuar këtë organ. Në të vërtetë kjo organizatë ka qenë, sikundër që edhe është vepër e një grupi të ngushtë familjar dajë, nip, dajë etj. Për herë të parë në Kosovë këta kanë lëshuar në "përdorim" një formë të vjetruar organizative, të kohës së Leninit apo të tipit të sotëm të Perëndimit, do të thotë celulat dhjetëshe, gjë që për realitetin kosovar kjo është treguar si shumë e pasuksesshme, madje edhe e rrezikshme. Në këtë formë organizimi nuk ka pasur asfarë seleksionimi të njerëzve dhe të përfitimi i simpatisë së

tyre, siç po mësojmë kohët e fundit, është përdorë me të madhe shantazhi në këtë stil: je i rrezikuar prej policisë, unë punoj në UDBë, ndaj e di mirë, pra eja të të strehojmë, dhe njëmend i kanë strehuar njerëzit viktimë e kësaj forme pune janë profesorët që u dënuan në procesin e fundit politik në Prishtinë. Ata, pa qenë fare, janë dënuar si njerëz të organizuar.

Një parantezë. Në prag të vrasjes tragjike të shokëve tanë Jusufit e Bardhoshit (kanë qenë siç dihet anëtarë të ish Lëvizjes nacionalçlirimtare...) dhe Zeqës (anëtar i ish-Organizatës Marksiste-Leniniste...) janë zhvilluar bisedime për bashkim. Bisedimet kanë qenë të suksesshme dhe sipas të gjitha gjasave natën e vrasjes ka ardhur gjer te bashkimi. Këto organizata kanë vepruar në mërgim sidomos dhe gjithmonë i kanë koordinuar aksionet, janë ndihmuar në mes veti me të madhe, ky është një fakt i padiskutueshëm. Pas rënies së tyre në popull u krijua një indinjim i pakufishëm e mjerisht edhe një huti e palejueshme... Në Kosovë u bënë burgosje të mëdha. Nga të gjitha organizatat u burgosën shumë njerëz, shumë të tjerëve iu deshtë t'ia mësyjnë mërgimit, ndër ta edhe udhëheqësi i PKMLSHJ. Në mërgim janë zhvilluar bisedime në mes tij dhe shokëve të ish LNÇ... ka ardhur te bashkimi, gjegjësisht formimi i LRSHJ, jo LRSSHJ. Përkundër kësaj nuk është zhvilluar kurrfarë aktiviteti, kjo ka mbetur anonime, çështje e tre-katër njerëzve. Në maj, më 14 e 15 maj janë zhvilluar bisedime edhe me përfaqësues të ish OMLK. Ka ardhur gjer tek bashkimi gjegjësisht formimi i LRSHJ. Për këtë ekzistojnë dokumente. Në bisedime kanë qenë dy përfaqësues të organizatave të mëparshme, si përfaqësues të organizatave të tyre.

Kur ka ardhur te botimi i komunikatës, përfaqësuesi i ish-OMLK-së ka insistuar që ajo të përpunohet pak, por në esencë të mbetet e njëjta, dhe i ka bërë ndonjë plotësim, ashtu siç qe vendosur, dhe e ka dërguar në botim, mirëpo përfaqësuesi i ish-PK... ka insistuar në që në komunikatë të futet pasusi se prijëse ideore e Lëvizjes do të jetë Partia Komuniste, gjë që në fillim tingëllonte fare padajllëzisht... Njeriu kur të bashkohet me dikend të luftoj për të njëjtin qëllim aty s'ka asnjë vend dyshimi, dhe thënë të drejtën sikur të mos ishte përfaqësuesi i LN... kjo do të bëhej, mirëpo ai duke i njohur mirë ua hetoi qëllimin, dhe kuptohet doli komunikata që thotë se LRSH është një organizatë unike e operative... U zgjodhën organet e përkohshme udhëheqëse, por në mbledhjet e tyre mungonte përf. i PK... ai insistonte rregullisht që të flasim vetëm në katër sy... Fillimi si çdo fillim nuk na mundësonte takime të shpeshta nisëm të letërkëmbejmë. Shoku i PK nuk përgjigjej në letra, më vonë njëri prej tyre shtroi në një letër të gjatë propozime të shumta që dukeshin të papranueshme, ndër të tjera insistonte të formohen organizata të brendshme si Fronti demokratik, organizata e gruas, e pionierëve etj. gjë që për realitetin kosovar kjo është e pamundur: në një shtet totalitar të tipit më fashist t'i shkapërderdhësh njerëzit kjo është vetëvrasje.

Në të tjera kushte ka vepruar PKSH, ajo e ka pasur malin... ndërsa Kosovë është krejt diçka tjetër. Në këto shkresa kemi dhënë përgjegje të qarta dhe kemi shprehur mendimet tona. Kemi insistuar për një takim, sepse e pamë se veç ia kanë nisur t'i përçajjnë radhët tona, të organizojnë edhe njerëzit e organizuar, duke u shërbyer me shpifje dhe dinakëri krijuan konfuzion të madh sidomos në rrethin e Shtutgardit. Kjo reflektohej keq te punëtorët. U përpoqëm të bisedojmë bashkarisht për këto probleme, por u iknin takimeve. Njëherë udhëtuam me mija kilometra për t'u takuar, por ai burri i botës i iku takimit, vetë shoku i tij më i ngushtë ikjen e tij e çmoj si tradhti... Ky rast pati pasoja të mëdha. Herën e dytë i shkruam letër urgjente që të propozojnë se ku po shihemi dhe kur, bile morëm përsipër që të udhëtojmë 5000 kilometra, me rreziqe të shumta, por përgjegje morëm vetëm pas dy muajsh, kuptohet përgjegje negative. Shkruanin herë pas herë, nuk kthenin përgjegje, apo më mirë, shërbeheshin me

arsyetime që s'ishin gjë tjetër veçse gënjeshtër fare të paskrupullta. Duke e parë se çdo gjë është e kotë edhe ne e ndërpreme letërkëmbimin aty kah viti i ri duke thënë se kur të bëhen gati le të shkruajnë në ZK e ne do t'u japim përgjegje. Atë ditë e sot nuk kemi marrë letër. Gjersa marrëdhëniet nuk ishin aq të ftohura ata e shpërndanë një trakt disafaqesh me konglomerat idesh, por në të kishte edhe gjëra të mira. Për shpërndarjen e këtij trakti kemi marrë vesh pasi që na ka ra në dorë. Disa herë kanë premtuar se do të shkruajnë për ZK, këtë e kanë bërë shumë rrallë dhe punimet kanë qenë krejtësisht të dobëta, fare të papërpunuara. Kanë premtuar se do të dërgojnë informata për një dëshmor të ri, Afrim Abazin këtë s'e kanë bërë kurrë. Në një letër të mëparshme kur autorit të këtyre rreshtave i propozuan ta bëjnë "kryetar" të L. dhe kur ky propozim u injorua, si duket i humbën të gjitha shpresat se do të mund të luajnë me emrin e Lëvizjes, të cilës, duhet të themi, duke keqpërdorë sinqeritetin tonë ia imputuan emrin me ndajshkrimin LR(S)SHJ, sepse në dokumentet e bashkimit përmendet vetëm LRSHJ, asgjë tjetër. Këtu është shkaku pse edhe sot e tutje në ZK përdoret vetëm në një vend LRSSHJ (Lëvizja për Republikën Socialiste Shqiptare në J.). Në këtë letër-informuese është vështirë që për një kohë fare të shkurtë të përfshihen të gjitha ato që na shtynë të bashkohemi, pastaj ato marrëdhëniet ngreh e mos e këput që për ne kanë qenë torturë, minimi i radhëve nga brenda, intrigat e ndryshme, mossinqeriteti total, dëshira e sëmurë për dominim etj. kanë qenë arsenal i tyre i përditshëm në marrëdhënie me ne. Për hir të unitetit ne jemi treguar së tepërmi tolerantë, apo për të thënë më mirë oportunistë. Me ta është dashur ta shkëpusim që në fillim. Me njerëzit që nga hija e vet nuk e shohin interesin e luftës e të popullit, ne s'na lidhë asgjë. Kjo broshurë më tepër është një konglomerat budallëqesh se sharlatanrie të pashoqe. Autorët (i) i saj nuk e njeh apo thënë më mirë se njeh fare realitetin e sotëm, apo thënë ndoshta nuk do ta njohë. Nisur nga kjo që në biseda verbale dhe në mbledhje të ndryshme duhet të plotësohet edhe me shembuj më të freskët e më të imët, tash për tash shtrohet si detyrë që të gjithë anëtarët e LRSHJ ta analizojnë këtë broshurë dhe të shprehin mendimin për të, pa kurrfarë mërie ose inati personal. Ne qëllimisht s'po e bëjmë këtë, sepse na nevojitet mendimi i të gjithë shokëve e pastaj nga ato do të marrim një vendim.

Një gjë është e qartë: ky është një fraksion që mund ta dëmtojë, por kurrë ta ndalë hovin e Lëvizjes. Këta janë njerëz që nuk kanë ndikim në masë, ata i frikohen takimit me të, nuk kanë kurrfarë aftësie intelektuale për të shkruar diçka të mirë, apo aftësi organizative që ta dëmtojnë armikun ashtu siç e kërkon populli sot dhe kushtet ekzistuese. Është dëshmuar se janë mendjemëdhenj të sëmurë, njerëz në të cilët nuk mund të mbështetemi kurrë, dhe s'mund të shohim asgjë të mirë. Sikur të ishin shokë, ata kanë mundur të kontribuojnë, sepse udhëheqësi i tyre ka punuar në çerdhen e armikut dhe ka mundur të na informoj e mësoj për shumë gjëra. Ka ndodhur krejtësisht e kundërta. Mjerisht puna ka shkuar edhe më larg, ka fakte se po na i denoncojnë njerëzit e tyre shokët tanë më të mirë. Sidomos kjo po na dëmton shumë. Është edhe një e keqe tjetër: ekziston dyshimi i themelshëm se në mesin e njerëzve të tyre ka edhe njerëz që punojnë për armikun, fundja të gjitha veprimet e tyre çojnë ujë atje... ku s'duhet. Por megjithatë ne nuk guxojmë të jemi shpirtngushtë dhe t'i kualifikojmë si armiqë e tradhtarë, pavarësisht se puna e tyre është kokë e këmbë e tillë.

Lidhur me këtë nga shokët tanë kërkohet që gjithsesi ta studiojnë këtë broshurë dhe sa më parë t'i shprehin mendimet e veta. Gjatë leximit ta analizojnë së bashku çdo rresht dhe të vinë vetë në përfundime të drejta. Duam ta dimë poashtu se a mendojnë shokët t'i demaskojmë apo jo, t'i luftojmë haptas dhe ta bindim popullin se kush janë e çka duan apo ta lëmë për një kohë se si po zhvillohet situata. Por një gjë duhet ta kemi parasysh, këta njerëz mbjellin hutime e dezorientim te masat dhe kjo është shumë e

dëmshme, sepse komprometohet emri i Lëvizjes, e ata do të vazhdojnë të veprojnë edhe në të ardhmen në emrin e saj, sepse ky është paravani më i mirë përmes të cilit ata i fshehin budallallëqet e veta. Ky është i vetmi shkak që na shtynë të merremi me ta, përndryshe ata janë fare të parëndësishëm. Do të mund të ishin të rrezikshëm vetëm nëse lidhen me ndonjë shërbim të huaj informativ, sidomos me atë bullgar, siç ka propozuar shefi i tyre njëherë, por e kemi kundërshtuar, mu për këtë duhet të jemi shumë e shumë vigjilentë, t'i sqarojmë masat, sepse ata kanë për qëllim të fusin konfuzion dhe në emër të saj të verbojnë Lëvizjen. Të aktivizohemi të gjithë në zbulimin e njerëzve që e shpërndajnë këtë manifest të budallallëkut dhe t'i sqarojmë punëtorët, por pa hyrë në detaje të marrëdhënieve tona me ta. Ata duhet t'i luftojmë me punë të përditshme dhe jo me thashetheme.

Presim mendim të menjëhershëm

Redaksia e Zërit të Kosovës (Xhafer Shatri)

(Faridin Tafallari, Dhimbje Krenare, Tiranë 1998, faqe 208-212)

38. Letër Sabri Novosellës, verë 1983

(Xhafer Shatri për Sabri Novosellën, verë 1983)

Tungjatjeta shok Mërgim,

pas pritjes se do të vinë shokët e pastaj do të të shkruaj gjerësisht edhe për përshtypjet e takimit me ta e pash se nuk ka gjë në atë drejtim, prandaj vendosa të të shkruaj shkurtimisht, sepse jam duke punuar në numrin 6 të ZK.

Lidhur me njerëzit që kanë ardhur prej atje nuk kam se çka të të them. Disa flasin shumë mirë, madje kanë dëgjuar prej njerëzve kompetent se p.sh. ZK ka artikuj që as në ZP nuk janë botuar ndonjëherë, pra shumica flasin kështu. Më vonë na vie një shok dhe na informon shumë më gjerësisht, po megjithatë fiton njeriu përshtypjen kah e dëgjon atë kristalizim thashethemesh se atje (në Shqipëri-shën i Sabri Novosellës) diçka nuk është në rregull, çka nuk e di, por diçka është në pyetje.

Studentët kosovar e kanë kërkuar t'ua lejojnë leximin e ZK, kanë pranuar. Si duket vetëm pasi që i kanë shkruar KQ.

Ka njerëz që i kanë porositur disa që të mos dëgjojnë askënd, që ne të ndalemi vetëm në kërkesa të ngushta, pra KR e asgjë tjetër. Natyrisht ne nuk mund t'i injorojmë as t'i këqyrim me indiferencë 500 000 vëllezër tanët në Maqedoni kah masakrohen e shpërngulen çdo ditë. Këtë është dashur ta dijë edhe një kalama, pastaj një gjë do të ishte një gabim historik për një organizatë patriotike. Me një fjalë le të thotë kush çka të dojë, politika e Lëvizjes është e drejtë. Ndodhë që kësaj t'i fryej edhe njëfarë Engjëlli i Vj. (Engjell Kolaneci, diplomat i Shqipërisë në Vjenë-shën i red.) që është mësuar më parë të mvrej e kthjellë këndeje e tash pasi që e ka parë që nuk po ia varë kush, përpiqet të na luftojë me metoda kaq të poshtra. Por sjelljet e tyre të bëjnë të kuptosh se ata duan zhurmë e jo punë. Ne nuk jemi për zhurmë dhe natyrisht ata e kanë parë këtë fare mirë. Tufanin kur të shpërndahen tash këto ditë 1200 ZK në Kosovë ia ndien tërë Ballkani e më së shumti ata. (ata=Vëllau i madh. Me këtë nuk kam mund me e kuptuar çka ka dashtë me thënë. ZK po u shpërndajka kundër Vëllaut apo kundër Jug. - shën i Sabri Novosellës). Këto ditë i kanë blerë 100 autobusë në Shkup...

Pak më tutje është konsullati i T. ku si në ditë tregu shtyhen shqiptarët e shkretë për t'i rregulluar dokumentet për të marrë rrugën që nuk ka kthim..

Pra fjalën e kam prapë për Shkupin.

Lidhur me gjykimin e udbashëve atje nuk më shkruat pak më gjerësisht, sepse duhet ta shkruajmë një artikull interesantë në këtë temë, pra a kanë shkruar gazetata gjë

dhe pastaj ne të thirremi në to gjë që do të kishte efekt shumë më të madh. Përgjegjen që ia kishit kthyer Nuhiut ishte shumë e mirë. Merre me mend se çka më shkruan, thotë se "Punëtorët" i nxjerr LNÇKVSHJ. Çfarë provokatori i poshtër. Po ua kthejmë çdo ditë njerëzit kundër tyre. Ata sido që ta marrësh janë të vdekur. Lidhur me njeriun që të shkrova në letrën e fundit të lutem më informo menjëherë sepse tash na vjen një kurir i sigurt apo ndoshta edhe shoku kompetent për atë punë. Dhe le të kontaktoj në ka ardhur një njeri. Me të duhet pasur kujdes, po frikoj mos po bëhet ndonjë ngutje sepse njerëzit brenda po duan të nguten e neve nuk na konvenon një ngutje e tillë. Punët duhet të shkojnë ngadalë por sigurt. Kam përshtypjen se tash së shpejti do të ketë atje burgosje masovike, sepse janë liruar të gjitha burgjet. Ama të gjitha. Jam për ata që të zgjerohen radhët por ngadalë, duke i pasur ne këndeje jashtë, prej nga nuk mund të marrin askënd ta fusin në rrymë emrat e të gjithë lidhjeve të reja, në mënyrë që të mos mund ta zhdukin apo dëmtojnë rënd organizimin. Ne kemi arritur gjer më tash ta mbulojmë tërë territorin gati, por mungonte kordinator i fort, tash edhe kjo çështje është rregulluar...

Njerëzit po janë të rinj e të papërvojë. Kurrë nuk ka pasur vullnet më të madhë por edhe përvojë më pak gati kurrë jo.

Pra siç ta kam thënë, ma dërgo emrin e njeriut në të cilin ti e ke besimin e plotë ama njeri të përvojshëm në mënyrë që të mos e rrezikojmë shokun, sepse një kuadër i tillë ka vlerë të madhe.

Pra le të njihen njerëzit në zjarrin e luftës, ajo i lidh e i çelnikos edhe më shumë.

Atë ditë të thirra në telefon sepse këtu te unë thirrnin orë e çast dhe më pyetnin për emrin dhe adresën tënde, por unë qëllimisht nuk ua jipja sepse thash mos ke harruar farë dokumenti aty e po kundërpërpiqen të më mashtrojnë. Adresën e shokëve në Australi nëse nuk ua kam dërguar më parë është kjo:

Komiteti i LRSNJ "Bajram Curri" PO Box 36, Hastings, Vic. 3915, Australia

Me këta çdo gjë është në rregull, këta janë burra e gjysmë.

Adresa e shokut tonë në Amerikë është jo aq e sigurt, sepse e ka ndërruar vendin por shkruaj në këtë adresë: X. Kabash PO Box 7197, Flushing, N.Y. 11352. USA

Në Amerikë është më vështirë të veprohet. Po kanë shumë probleme. Ata në Australi më njohin si Bardhyl, ndërsa në Amerikë si Daja nga Zv. Do të ishte mirë që kur të keni kohë të shkruani komente për këto dy Radio të cilat emitojnë vetëm gjëra të ZK. Njerëzit që i udhëheqin janë krejtësisht tanët. Adresat: Gjergj Kalaj, (shumë njeri i mirë), 125 Goldner Aveny, Pontiac Mi. 48054 USA dhe: Zani i Malësisë 315 E 68 st. N.Y. 10021, New York USA

Mundësisht komentet i shtypni në makinë dhe kujdesuni që rregullisht t'i furnizoni të dy palët. Ne për besë nuk po kemi kohë. Të njëjtin koment shtypeni në dy kopje dhe ua dërgoni të dy palëve. Do të ishte mirë që ta marrësh vetë përsipër këtë punë. Por ama bile dy herë në muaj të shkruani për ngjarjet aktuale në Kosovë. Po me Naimin nuk më shkrove se çka u bë, ai nuk u lajmërua fare, dreqi e marrtë jam bërë merak, disa ditë më kanë humbur gati kot në ankthin e pritjes. Do të ishte mirë sikur të vendosej në S. Atje do të kishte kushte të mrekullueshme për punë dhe unë do të lirohesha shumë që të kushtohem orga. pak më tepër. Ne po na mungojnë orga. e fortë, asi që bëjnë shpellë ku t'i mëshojnë. Siç të thash edhe atë ditë në tel, mendoj se ne duhet që tri vjet t'i bimë me gjoks, dhe me se të mundemi, sepse po që se e lëmë hekurin të ftohet droj se do të shkojë kohë e gjatë për ta skuqur prapë...

(Xhafer Shatri)

39. Letër Remzi Ademit, 7 korrik 1983

(Xhafer Shatri për Remzi Ademin)

I dashur shok,
po të shkruaj fare shkurtimisht, të gjitha këto falenderime po t'i dërgoj me lutje që në të ardhmen t'ua japësh vet atyre që kanë kontribuar apo që do të kontribuojnë në dhënien e ndihmave për Kosovën.

Përsëndetje vëllazërore

B... (B=Bacaloku=Xhafer Shatri) 7 korrik 1983

40. Letër Qendrës Ekzekutive, 26 korrik 1983

Të dashur shokë,

po ju shkruaj shkurt. Në broshurën për shpërnguljet nuk ia nisa akoma, sepse po më duhet të punoj në nxjerrjen e organit për muajin gusht, sepse siç ka nisur ne duhet të përqendrohemi vetëm këtu tash për tash. Referatin që S. (Xhafer Durmishi) e lexoj atë ditë mendoj se tash për tash duhet ta fotokopjojmë ashtu siç është dhe ta lëshojmë në lexim vetëm në radhët më të ngushta, pra te njerëzit që ata mund ta kuptojnë drejt.

E lexova gazetën e atyre burrave, nuk është në nivel të duhur, ajo nuk e ka atë lëngun e nevojshëm dhe siç po shihet s'do ta ketë kurrë, sepse nëse diçka nuk shkruhet me zemër ai s'e tërheq askënd.

Më së keqi na ka mbetur puna në rrethin e Frankfurtit, sepse atje ka shumë element të mirë dhe duhet që S. gjithsesi të shkoj te Ahmeti e të bisedoj me të gjerësisht, sepse janë atje disa azilerosë që do të mund ta ndihmonin luftën shumë, e nëse bien në duart e atyre injorantëve atëherë mund të dezorientohen shumë. Ma merr mendja se ju të dy e madje edhe Hafizi, meqë keni pasur shumë punë me ta, ta formoni një raport plan se si t'iu kundërvihemi, t'i zbulojmë planet e tyre, t'i zbulojmë njerëzit ku ata i kanë punktet e veta dhe t'i luftojmë me të gjitha forcat, në mënyrë që kur ta botojmë demaskimin atëherë të mos gjejnë askund mbrojtje as mbështetje.

Me Shaqën ka biseduar K. ia ka dorëzuar disa gjëra bukur të rëndësishme. Do të bisedojmë më vonë, por ky njeri ka bërë një kthesë të madhe, çka e ka shtyrë në këtë është vështirë të dihet, por atë mbrëmjen e demaskimit këtu atyre të Shq. u ka bërë përshtypje të thellë demaskimi, e ndoshta edhe Sh është informuar për këtë. Sidoqoftë edhe unë do të bisedoj me të, ndërsa ju priteni gjithnjë mirë. Ndodhë që të vie tash edhe te ju, nëse ai e sheh se si është puna dhe është për punë natyrisht se do t'ia japim mundësitë që ta tregoj veten. Me H. është puna në rregull, ai ka arritur një sukses të madh në grumbullimin e njerëzve atje, por duhet t'i ndihmojmë që t'i organizojë. Çka u bë me ata shokët e Italisë, shkuan në Belgjikë apo jo. Do të ishte mirë që me ata njerëz të mos i shkëpusim lidhjet, sepse një shkëputje sado e vogël pastaj po na dëmton shumë, ta marrim si shembull rastin e Agronit, të cilin e ka kthyer ai farë Hyseni. Për këtë ne tashmë kemi fakte të gjalla. Merrni poashtu hetime edhe për njerëzit që ua merr mendja se duhet të jenë të Shaqës dhe si po sillen ata, në mënyrë që ta kontrollojmë përmes tyre se sa është i sinqertë. Në bisedën e fundit K. më tha se dukej mjaft i sinqertë, por dreq merre vesh punën kur për një çështje po të hyn dyshimi në shpirt.

Lidhur me aktivitetin tonë, në të ardhmen është e domosdoshme që ne t'i shkruajmë njëri tjetrit rregullisht dhe sa më gjerësisht në mënyrë që të mos na krijohen zbrazëtira si më parë, përndryshe mos pyet.

Po e përsëris, tash na ka mbetur më së keqi Frankfurti e Manhajmi, prandaj t'i gjejmë shokët tanë edhe aty dhe të mos u lëmë askund mbështetje.

Si duke AP ka shkuar në Holandë dhe do të vendoset sipas të gjitha gjasave atj. Ne edhe atje duhet t'ia zbulojmë bazat e tij, por sidoqoftë më i rrezikshmi prej tyre mbetet Nuhiu, të cilin në të ardhmen duhet ta përcjellim edhe më me ngulm. Duhet ta përgatitni një njeri që i afrohet dhe e fiton besimin e tij.

Po me ata studentët që biseduam si u bë a janë akoma aty dhe kur do të shkojnë në shtëpi. Kijeni parasysh se ata janë aq të vlefshëm sa nuk mund të maten me asgjë. Për kontaktet tuaja me ta nuk guxon të merret vesh shumë dhe natyrisht se nuk bën të rrin haptas me ju, sepse të gjithë ne jemi të përcjellur e besa edhe të fotografuar.

Edhe për këtë numër të gazetës ka material shumë interesant. Besoj se do të dalë shumë e mirë, pade të shohim njëherë.

Përsëritetje revolucionare Xhema (Xhafer Shatri) 26 korrik 1983

41. Letër Remzi Ademit, 27 korrik 1983

(Xhafer Shatri për Remzi Ademin)

I dashur shok,

po të shkruaj fare shkurt. Vendi ku ti jeton e militon tash për tash është ndër vendet kyçe të frontit, prandaj duhet t'i bëjsh sytë katër e të shkosh në mesin e njerëzve kudo, të rrih me ta, të bisedosh dhe të mos i dijë as djalli se ku i ke këmbët, rri dhe bisedo edhe me Sahitin edhe me Hasanin, dhe për çdo bisedë me ta më shkruaj menjëherë gjerësisht dhe kuptohet njohtoi shokët automatikisht, por jo të gjithë, sepse po dalin fjalët pastaj dhe roli yt mund të bie në ujë.

Në bisedë me ta kije parasysh se ata janë njerëz që kanë rënë në një rrjetë shumë të rrezikshëm dhe sot edhe po të përpiqesh t'ua shpjegosh nuk të kuptojnë pa u dalë dehja. Nuk do të shkojë shumë e ata dhe shumë të tjerë do ta kuptojnë se janë viktima të një ambiciozi të sëmurë.

Pra tërë aktivitetin tënd përqendroje aty ku je, nëse ta merr mendja se duhet të vie ndonjë shok tjetër për ndihmë bisedo me Sk. dhe me shokë të tjerë e ne duhet të bëjmë diçka që ta ndihmojmë aktivitetin atje.

Kaq.

Përsëritetje revolucionare B (B=Bacaloku=Xhafer Shatri)

Mërgim, 27 korrik 1983

42. Letër Qendrës Ekzekutive, 31 korrik 1983

Shokëve të QE

Të dashur shokë,

po ju shkruaj fare shkurtimisht dhe po ju njohtoj me sa vijon:

Situata brenda po ashpërsohet, para sa kohe jugosllavët kanë luajtur rolin se gjoja në Glogovc po presin edhe një desant nga Shqipëria! Forcat ushtarake tashmë një kohë të gjatë janë vendosur dhe nuk ka lëvizje të tyre. Lidhur me këtë ekzistojnë mendime të ndryshme, njëri prej tyre është ky, se në rast kryengritjeje të armatosur, do të thotë se ata po presin se edhe me ne do të përsëritet rasti e 72 në Kroaci, atëherë ta bëjnë të vetën duke e masakruar popullin e paarmatosur në një rën anë dhe në anën tjetër të qëllonjë të përgatitur ne rast ndërhyrjeje nga ana e Sh. Disponimi i popullit është i tillë sa nuk mund të merret me mend, njëmend i janë harxhuar të gjitha rezervat e frikës. Traktet kundër tradhtisë janë shpërndarë me të madhe, sidomos në Prishtinë e Ferizaj

dhe në fshatrat e komunës së Gjilanit e Kamenicës. Të trimëruar nga një disponim i tillë i popullit kuislingët, tash më me guxim po i kundërvihen presionit të Serbisë, këtë më së miri e vërtetën intervista e I. Bajrës dhënë Zërit të Rinisë. Lidhur me situatën ushtarake në kufi sidomos kam edhe disa informata të rëndësishme që nuk bën ta ngarkoj letrën.

Për propozimin e Il. që buletini të quhet Kosova, unë pajtohem plotësisht. Për botimin e dramës së Jusufit, nuk kam mundur të bëje asgjë tash për tash, veç përgatitjes së një parathënie të shkurt, sepse po na duhet ta botojmë ZK tash në gusht, kjo m'u duk më e rëndësishme.

Në traktin kam punuar pak, por atë duhet rregulluar për në fund të shtatorit. Lidhur me traktin il. (ilazi-Ibrahim Kelmendi-shën i red.) do të ishte mirë që atje në Suedi ta gjej në post emërtuesin telefonik të Jugosllavisë që është i tëri në një libër dhe të na e dërgoj menjëherë. Fehmiu duhet ta ngarkojë një shok që nga një ZK t'ua dërgoj rregullisht Komitetit Krahinor, të gjitha komiteteve komunale të Kosovës, Bujanocit, Ulqinit, Tetovës, Shkupit, Dibrës, Kumanovës, Plavës, Preshevës etj. pastaj Bibliotekës Universitare në Prishtinë, Institutit Albanologjik etj.

Në këto adresa duhet të dërgohen të gjitha botimet tona. Diçka do të bëjnë edhe shokët nga brenda, por edhe ne nga jashtë duhet t'i bombardojmë ata qelbanikë.

Kam biseduar me një shok nga brenda. Ne duhet të bëjmë edhe shumë më shumë, ne duhet të mendojmë natë e ditë se si ta ndihmojmë luftën brenda dhe të mos lejojmë që një disponim i tillë të mos përcillet edhe me punë përkatëse. Pritet që të vie një shok nga T., të cilit ia kam nxjerrë biletën këtu, për shkak të vizës. Sigurisht se duhet të vendosim se çka të bëjmë me grupin e këtyre udbasho-patriotëve. Letrën përgjegje shokëve në T. mjerisht kam harruar ta fotokopjoj, por po ju njohtoj se është një letër fare e shkurt dhe përmban më shumë vendimet që janë marrë atë ditë.

Për Bashkësinë e Klubeve gjer tash kanë ardhur tri propozime. Por tash duhet të mendojmë edhe për Br. prej atje ma merr mendja se duhet të caktohet ai punëtori që quhet Sabit, ose Qamili, dhe këtë le ta merr përsipër il. ta rregulloj. Do të ishte më mirë të jetë punëtori, pra Sabiti, sepse është njeri shumë besnik dhe nuk mund të thotë dikush se është azileros. Për Mynhen le ta caktoj apo rregullojë disi S. Letrën prej F. me ato informatat e ka marrë, të holla akoma, posa të vinë do të veprojnë sipas porosive. Frankfurti na ka mbetur shumë keq. Atje dhe në Manhajm duhet të intensifikohet aktiviteti. Po punohet në vënien e themeleve të shërbimit tonë informativ. Propozoni edhe ju njerëzit që do të mund të kontribuonin në këtë drejtim. Brenda është zgjeruar puna shumë mirë, sikur të kisha kohë të merrem më shumë me këtë punë, besoj se do t'i komenzonim të gjitha humbjet e gjertanishme të shokëve të burgosur. Lëvizja është popullarizuar shumë dhe për t'u inkuadruar në të janë të interesuara të gjitha forcat vitale të popullit tonë.

Do të ishte mirë që në këtë drejtim edhe ju ta jepni kontributin tuaj.

Letrën po e shkruaj për së shpejti, ndaj mos ma merrni për keq për lëshimin e kaq shumë gabimeve. Është e domosdoshme që bile njëherë në javë të letërkëmbejmë në mes veti.

Një mbrëmje kam biseduar me Shaqën. Gjatë bisedës me të kam menduar shumë se sa e vështirë është lufta e jonë, sepse ne DUHET TË NDËRKOJMË KALA EDHE ME GURË QË JANË EDHE GRANIT EDHE BALT NJËHERIT. Ai njeri nuk është aspak i singertë, ai njeri (kam përshtypjen) ka bashkëpunuar gjer tani me fraksionistët, e ndoshta edhe tash është në shërbim të tyre, sidoqoftë duhet që S dhe F të bisedojnë me të gjerësisht dhe t'ia këpusin që ai të kontaktoj me K. (Kadri Abdullahun-shën i red.) dhe vetëm me të, sepse ai është i vetmi njeri që ka tolerancë të pakufishme dhe është çdo ditë në kontakt me njerëz me të cilët rri Shaqa. Ai më thirri edhe në shtëpi dhe më erdhi keq që të mos i shkoj brenda. I kishte dy fëmijë shumë të mirë dhe një grua shumë

bujare. Ia bëra me dije qartë se ne jemi në dijëni se AP dhe sidomos Nuhiu po thirren në veprimtarinë e tij, se po llogarisin në të, se shoku i tyre ka qenë te ky etj. Ky i ka dorëzuar 30 numra të "pun.", ndoshta e ka bërë me qëllim. Sidoqoftë pasi bisedova me të, edhe ashtu qesh mjaft i lodhur, u ndava prej tij me përshtypjen se kam pir ujë të turbullt.

Ndoshta po mashtrohem dhe do të ishte mirë të mashtrohem në këso diagnozash. Sidoqoftë ai më tha se do të shkojë në Gjer. kah i 15 gusht dhe drejt e te F. Prandaj është e domosdoshme që S të bisedoj me të dhe ta detyrojë që njerëzit me të cilët ai e ka njohtuar N. të mos i lejojë më që të bëhen vegla qorre të AP. Aq më parë kur mu këta njerëz janë bërë vegla të tyre të bindura.

Ilazi do të ishte mirë të marrë informata më të hollësishme për atë farë Sokol Zeqirajn e Brukselit, dhe të na njohtoj pak më gjerësisht, por natyrisht për informata të tilla të tregoj një "mosinteresim" te ata që pyet... Kam një informatë lidhur me atë njeri, ndaj do të dëshiroja ta verifikoj. Ilazi do të ishte mirë që të na informojë lidhur me atë propozimin që ishte për deponimin e të hollave në ndonjë dyqan atje apo gjetkë...

E kam shkruar edhe në atë shkresën-rregulloren e QE se ne duhet të mbështetemi vetëm e vetëm në forcat tona e në askënd tjetër dhe në këtë Ilazi disi reagoi, po shfrytëzoi nga rasti ta pyes edhe kështu, e në kënd të mbështetemi atëherë ne, vallë punët që mund t'i bëjmë ne të presim të na i bëjë dikush? Kurrësi. NE DUHET TË MBËSHTETEMI VETËM NË KËRQELEN TONË, dhe në këtë çështje të mendojmë më seriozisht, sepse pa mjete materiale nuk çohet lufta përpara. Sidomos njerëzit brenda po kërkojnë teknikë pa të cilën nuk do të mund ta zhvillojnë atë që pritet prej tyre e një teknikë e tillë është shumë e shtrenjtë, pastaj duhet të përgatitemi edhe për dimrat e gjatë që po vien, sepse ne do të livadhësim nëpër Evropë vetëm gjer sa të jetë nevoja, asnjë sekondë më shumë, dhe kur të hymë atje sigurisht se nuk do të hyjmë për të luajtur dansing.

Në Jugosllavi mund të pritet çdo gjë, aty në asgjë nuk është i sigurt njeriu, prandaj nuk guxojmë të na befasojë diçka nesër e pas nesër për të thënë goliatçe, ah s'e kemi ditur.

Pas këtij numri të organit do ta përpunojë atë për shpërnguljet, besoj se do të dalë një broshurë mjaft e mirë, ndërsa tani për tani si material nuk është as përafërsisht i përpunuar, mu për këtë edhe nuk po ia dërgoj Ilazit.

Dramën e Sokolit do ta përgatisim menjëherë pas përfundimit të nr. 5.

Punimin e Ilazit për buletinin e mora, por nuk ishte gjithaq i përpunuar, unë do ta redaktoj dhe do ta botojmë, por është më se e nevojshme që çdonjëri prej nesh që merremi me shkrime ta kemi parasysh një çështje: asnjë shkrim nuk mund të jetë kualitativ po që se ai që ka marrë mundimin të shkruaj nuk e lë në atë shkrim një pjesë të jetës së tij, mu për këtë shkrimi është torturë mbi të gjitha torturat.

Sa i përket M. ma merr mendja se ai duhet të angazhohet atje në veri për çështje org. dhe për këtë le të merren vesh në mes veti Il. Sa dhe Muh. Ai njeri nuk bën të rrij anash.

E thash edhe më parë, në të ardhmen ne duhet që bile njëherë në javë t'i shkruajmë njëri tjetrit, po kështu letra të përgjithshme ku ndërinformohemi për çështje të ndryshme nga aktiviteti ynë. Në mungesë takimesh të rregullta kjo paraqitet si domosdoshmëri. Letrat duhet të jenë të gjata, desha të them të plota dhe informuese.

Përshëndetje revolucionare Xh. (Xhafer Shatri)

Zvicër 31 korrik 1983

Ata fraksionistët po thirren në PPSH. Haptas po thonë se e kanë përkrahjen e shokëve të Vjenës.

(Faqja e parë e kësaj letre, nga gjithsejtë dy, është botuar në librin e Faridin Tafallari, Dhimbje Krenare, Tiranë 1998, faqe 207-208)

43. Letër Xhafer Durmishit, gusht 1983

Shok Salih,

pare e mora letrën tënde. Po të përgjigjem shkurt, sepse tash po punoj në organ, i cili duhet të dalë në këtë muaj. Kryeartikulli do ta ketë një për atë se si e shohim ne shqiptarët Shqipërinë.

Artikulli për Fazliun kishte me qenë shumë më i mirë edhe fotoja ishte shumë e mirë, por unë kam pritur material për të që të na vie tash, bile një shok më lajmëroi se do të na e nisin, tash nuk e di se kur do të vie. Pra material burimor e ndodh edhe ndonjë foto tjetër, por një artikull i tillë më i mirë do të ishte sigurisht me rastin e 20 vjetorit të rënies së tij, apo ndoshta edhe me rastin e 28 Nëntorit?

Sa i përket Gjurekoviqit, pajtohem lidhur me atë që ti shkruan, por është e nevojshme të shkruajmë, pavarësisht se çka mund të thotë AP. Ne duhet të shkruajmë në këtë aspekt që me një shkrim të tillë ta demaskojmë udbën e Jugosllavinë pa kurrfarë lavdatash për të vërtetë, sepse ata kanë shkruar për shokët tanë dhe do të ishte dobësi po që se ne heshtim për një krim të tillë monstruoz, merre me mend pasi e kishin vrarë, e kishin përdhosur e sakatosur me sopatë!

Një lajm i tillë do ta komprometonte shumë Jugosllavinë te lexuesi shqiptar.

Po ta dërgoj këtë statut-program që e ka bërë Hy. për Bashkësinë e Klubeve. Të lutem përpunoje mirë e mirë shtoji ato idetë që kishe dhe përpiku që ato t'i jetësojmë.

Hamburgu e ka propozuar Ali Ademin, Dyseldorfi, kryetarin, ti këqyr me Mynhen, për këtu nuk ka problem do ta rregullojmë atë çështje. Besoj se për Sent Gallen do të jetë Haxhiu ndërsa punët le t'i marrë në dorë Fehmiu, sepse është më afër teje dhe vepron sipas asaj që ta këshillosh ti.

Sidoqoftë ti mendo se kush duhet të jetë në atë kryesi.

Mehmet Bala më ka treguar se si ka qenë te Sahiti, ky njeri nuk është i keq, së pakut nuk duket. Ky e ka dërguar një letër demaskuese kundër frak. (fraksionit të Abdullah Prapashticës-shën i red.)

Përsëndetje revolucionare Xh. (Xhafer Shatri) (gusht 1983-shën i red.)

Dërgoja Mërgimit atë kopjet e referatit tënd sepse ai është punim i fort se si duhet demaskuar horrat!

44. Letër QE, apo në emër të Qendrës Ekzekutive, 31 gusht 1983

QE,

Të dashur shokë, siç po shihet ne nuk po u përmbahemi vendimeve tona, pra letërkëmbimi nuk po është i rregullt. Ne nuk po ndërinformohemi në mes veti, kjo nuk shkon më kështu. Ju lutem mos të ndodhë më që një letër e shokut sado e vogël apo sado e parëndësishme të mbetet pa përgjegje përkatëse. Kjo le të mbetet vërejtja e fundit.

Lidhur me makinat që thotë Ilazi në letrën e tij të fundit do të ishte mirë që ai të këqyrë dhe të gjej aparat shumëzues që punon me ofset, pra në pllaka llamarine, të jetë i formatit A3, le të këqyr dhe le ta gjej sa më të vogël që të jetë e mundur, sepse ka edhe të tillë dhe mendoj se nuk duhet të jetë aq shtrenjtë. Natyrisht njerëzve që e blejnë nuk bën t'u themi se për ku duhet... pajtohem me atë se fotokopjuesi është i shtrenjtë në çdo aspekt dhe tejet i komplikuar, sidoqoftë duhet të gjendet një zgjidhje bile së shpejti. Kjo

është e domosdoshme. Unë pata dëgjuar se Hafizi e ka gjetur një aparat bukur interesant shumëzues, u fol se do ta fus brenda etj. por nuk doli asgjë nga ajo, ky që përmenda, Naimi etj. mua po më befasojnë shumë, unë nuk po mund ta marrë me mend se si mund t'i thonë vetes të organizuar këta burra të botës. Kështu nuk shkohet më, Salihu duhet të ndërmarrë masa të letërkëmbejë me ta dhe me këdo që mundet të vërë kontakt, sepse letrat janë një formë shumë e përshtatshme e mobilizimit të njerëzve: i shpreh mendimet tua e mbyll, e dërgon me mija kilometra dhe e merr një lexues e hap ngadalë ndoshta pa vetëdije se po e hap një bombë që do të shpërthej para syve të tij, gjë që është e vërtetë, sepse është e pamundur që një letër, mendimet e shprehura në te, të mos ia plagojnë bile një çik ndërgjegjen.

Merreni me mend p.sh. H. (Haxhi Berishën-shën i red.) është në rrethin e San Gallës, ka arritur të afrojnë një vistër të tërë njerëzish sidomos nga Tetova, mirëpo ata njerëz tash duhen organizuar. **NE DUHET T'I PËRGATISIM USHTARËT TANË, KUDO DUHET FORMUAR QELULAT TONA AMA KUDO**, është koha e fundit të vepron në këtë drejtim, kudo, sepse praktika po tregon se njeriu i organizuar po ka disiplinë më të madhe poashtu edhe përgjegjësi. Njeriu i paorganizuar nuk mund ta futësh me një thirrje telefoni në zjarr të luftës çka nuk do të thotë se nuk do të jetë e nevojshme bile së shpejti ndoshta, sepse kur ngjarjet zënë të rrokullisen atëherë ne nuk dimë se si mund të ndalen ato. Poashtu duhet të vepron edhe Ilazi, poashtu duhet të vepron edhe Muhameti atje ku ai mund të arrijë. Kudo duhet t'i formojmë vatrat e lirisë. Njerëzit e paorganizuar janë një lukuni spontanësh që nxehen e ftohen saora. Ne nuk na nevojiten njerëz të tillë. Me qelulat e posafomuara duhet të kontaktohet bile njëherë në dy javë. Ekziston një punim lidhur me këtë çështje dhe meqë nuk kemi ndonjë më komplet atëherë le të vepron sipas tij. **ËSHTË KOHA E FUNDIT QË TA FORMOJMË NJË DISIPLINË NË RADHËT TONA, TA FORMOJMË NJË RREJTË TË QELIKTË CELULASH QË NUK DO TË KETË FORCË NË BOTË TA THEJ, DREQI E MARRTË PO KA KUSHTE IDEALE PËR KËTË ÇËSHTJE, MERRE ME MEND I ORGANIZON NJERËZIT, MBAN TAKIME META DHE NUK KE AS MË TË VOGLËN FRIKË SE MOS PO TË VIE UDBA DHE TA ZË DERËN...** Pra duhet t'i shfrytëzojmë këto kushte ideale. Pse të mos organizojë njerëzit atje ku është Ilazi? Këndeje po vepron në këtë drejtim por jo sa duhet, bile as përafërsisht.

NË TË ARDHMEN NE NUK GUXOJMË TË MBËSHTETEMI NË NJERËZ TË PAORGANIZUAR, T'U JAPIM NJERËZVE BESIMIN E PASTAJ TË SHOHIM SE SA JANË TË DENJ PËR TE, NATYRISHT NUK JAM PËR KUANTITET, POR PËR CILËSI. Merreni me mend tash janë grumbulluar e tërë lukunia e mërgatës kundër nesh, me kuqkë e me maqkë dhe po i organizojnë njerëzit edhe me libeza! Është e domosdoshme që të formohen komitetet e vendit, apo do të thosha përgjegjësit e caktuar për një regjion dhe ata le të bëhen bartës kryesorë të aktivitetit për atë krah. Ndryshe nuk shkon shokë! Njerëzit nga brenda po presin prej nesh shumë. Ma merr mendja se duhet ta bëjmë edhe ne njëfarë diferencimi në radhët tona, kush është për luftën me mish e me shpirt le të dihet dhe le të dihen edhe ata që nuk janë. Besimi t'u falet vetëm atyre që e meritojnë, t'i shoshisim njerëzit dhe të mos kemi punë me lloj lloj tipash të Nuhiut. Këtë të shtunë e kemi marrë një telegram prej shokëve të AP në Redaksi.

Kërkojnë takim burrat e botës. Telefonojnë te Kadriu dhe ky u thotë se nuk di ku është ai shoku prandaj telefononi më vonë, për këtë qëllim Plaku (Hasan Mala-shën i red.) erdhi në Gjenevë që të mos thonë se ne po i ikim takimit, fundja ne nuk i kemi borgj askujt e aq më pak atyre qelbanikëve. Mu për këtë Plaku i telefonoj Hasan Veselajt, veglës qorre të tyre, i tha se po i pres tërë ditën në Gjenevë... Ata më vonë

telefonojnë te Ka (Kadri Abdullahu-shën i red.) ky u thotë na jepni një numër telefoni (ata lajmëroheshin kinse nga Zvicra dhe këtu, siç e dini çdo kabinë e ka numrin...) e unë po u vë në kontakt me shokët, sepse ata tash nuk mund të vinë këtu janë me qinda kilometra larg. E mbyllën telefonin dhe pastaj thërrasin prapë, duke i thënë a erdhën ata shokët, thjeshtë hajgare... Ky u kthen mosni bre burra, po ne u morëm vesh, ma jepni numrin e telefonit dhe unë po u vë në kontakt me ta... ata e mbyllin prapë duke i thënë do t'ju shkruajmë dhe kështu në këtë stil... Të nesërmen e thirra unë H. Veselajn dhe i thash mos bëni hjiangare përmes telefonit me njerëz se nuk u ka hije (Njëherë më parë po Kadriu kur ky e ka pyetur se prej nga po lajmëroheni i ka thënë në mes Gjenevës e Cyrihut...) nëse jeni për bisedime thuj Abdullahut kur të duash mund të takohemi në cilindo qytet të Zvicrës, vetëm njohtomë një javë më parë në adresë të ZK dhe ia mbylla telefonin. Menjëherë pastaj ka thirrë ai farë Hasani dhe s'ka lënë gjë pa i thënë shoqes së tij, sepse Kadriu s'ka qenë aty. (Kjo duhet të mbetet në mes nesh). Pra ata duan takim, në të vërtetë duan kinse janë për bisedime por takimit i frikohen si gjarpri shpatës. Ne duhet ta ruajmë gjakftohtësinë...

Lidhur me vizitat e bashkatdhetarëve në Shqipëri, unë nuk jam i informuar aspak, por sidoqoftë ajo shoqja e shokut tonë, pra po mendoj se fjala është për Su. ka folur sigurisht duke qenë e painformuar për gjendjen e sotme këtu. Pastaj ata njerëz që po vijnë prej andej po sjellin lloj lloj fjalësh, vetëm të përmendet rasti i Jahirit vitin e kaluar. Në nuk duhet t'u kushtojmë rëndësi këtyre gjërave, por njëkohësisht duhet të bëjmë përpjekje që lëshimet e lajthitjet e mëparshme të mos na dalin tash si vampirë prej andej kah s'e presim, sepse na pengojnë në punët tona. Thashethemet janë murrjela që pengojnë punën. Për shumëçka mendoj se duhet ta informojmë Su. dhe këtë më së miri mund ta bëjë Salihu, ani sidomos për çështjen e Nuhiut.

"Ndërkohë, në mënyrë të tërthortë mora lajmin se në fillim të dhjetor 1982, në Gjenevë do të mbahej një demonstratë. Ish-shokët e idealit nuk e kishin parë të arsyeshme të më njoftonin as për demonstratën, e as për mënyrën dhe kohën e udhëtimit. Mora rrugën i vetmuar. Udhëtova me tren. Arrita në vendin e caktuar ku do të mbahej demonstrata. Pasi i përgëzova shokët e Gjenevës, Ejup Ahmetin dhe Elfi Agushin, për organizimin e mirë të demonstratës, ata më takuan me Xhafer Shatrin, të cilit i kërkova bashkëpunim... edhe pse më premtoi me fjalë të „singerta“, mjerisht me këtë takim përfundoi edhe bashkëpunimi ynë!" (Nuhi Sylejmani, Vrasja e trefishtë, Prishtinë 2010, f.54)

Këtë qelbanik e stërpleh duhet demaskuar me të gjitha forcat dhe me të gjitha mjetet.

Tash nuk po e zgjas më shumë, sepse edhe ashtu nuk po kam kohë, por po e përfundoj duke u porositur të gjithëve që të mendoni gjatë e gjatë se a keni njerëz të sigurt brenda, të cilëve ne mund t'u dërgojmë materiale, të gjejmë baza për nevoja të ndryshme dhe t'i organizojmë etj.

Lidhur me këtë do të ishte mirë të veprohet më sistematikisht, sepse njerëzit e "mi" nuk keni pasur mundësi t'i njihni ju dhe kështu reciprokisht....

Përsëhendetje revolucionare

Xhema (Xhafer Shatri)

31 gusht 1983

Sa për slloganin që propozon Ilazi mendoj se ne e dimë se nën petkun e një Lëvizje autonomiste qëndron një organizatë nacionalçlirimtare në kuptimin e mirëfilltë

të kësaj fjale, por edhe nëse përdoret nuk ka asgjë të keqe. Do të ishte mirë që të kërkojmë edhe ndonjë sllogan më të përshtatshëm.

Shoku nga T. nuk erdhi. Por sot e kishte dërguar një letër ku thotë se duhet të bëjmë diçka për njohjen e L. në botë. Lidhur me këtë çështje ne kemi biseduar disa herë dhe më në fund pat mbetur që në të gjitha shtetet të përpiqemi të na njohin, pra të gjithë aty ku jemi. Ne nga ana jonë kemi biseduar me një sindikatë dhe ata na kanë premtuar ndihmë, por ka mbetur të bisedojmë edhe me një avokat. Shoku nga T. (Turqia-Sabri Novosella-shën i red.) kërkon që Il. (Ilazi-Ibrahim Kelmendi-shën i red.) të shkoj atje për konsultime në këtë pikë, por ma merr mendja se një konsultim i tillë mund të bëhet edhe përmes letrave, prandaj të mos hargojmë shumë, sepse qëndrojmë shumë keq materialisht. Duhet të kursejmë e të kursejmë.

Kaq...

(Shën i Xhafer Durmishit: Kjo letër më erdhi më 23 prill 2012)

45. Letër në emër të Qendrës Ekzekutive, shtator 1983

Shokëve të QE,

e mora një letër prej Ilazit dhe menjëherë po përgjigjem në të, poashtu e kam marrë një letër edhe prej Fehmiut, kryesisht lidhur me atë që unë kam parashtruar në letrat e fundit... Në letrën e Ilazit ishte një keqkuptim i madh sa i përket termit "të mbështetemi vetëm në forcat tona"... Së pari për rregulloren: Siç e dini unë pata mbetur ta formuloj një rregullore që në takimin e parë, por këtë e bëra me vonesë dhe atë që e pata përpiluar në takimin e fundit nuk mundëm ta analizojmë apo thënë më mirë edhe harruam për shkak të punëve të shumta, dhe sigurisht edhe për shkak të lodhjes sime të madhe, gjë që nuk është dashur të bëhet ai lëshim, ajo rregullore është dashur të lëshohet në diskutim gjë që do të bëhet, por tash s'më qëlloi këtu që ta shumëzoi dhe t'ua dërgoi të gjithëve nga një... dhe në të unë pata shkruar, kur ishte fjala për çështjen materiale që ne të mbështetemi vetëm në forcat tona, duke pasur parasysh se ne jemi pjesë e pandashme e Lëvizjes, dhe kur e kam thënë atë kam menduar në Lëvizjen si tërësi e jo ne të pestë, që natyrisht pa Lëvizjen do të ishim pesë individë e asgjë tjetër, fundja çfarë kapaciteti (kësaj radhe vetëm ekonomik) mund të paraqesim ne të pestë, tre të papunë dhe dy të tjerë me rroga të punëtorëve fizik që kanë një mori fëmijësh për t'i mbajtur... Pra kam menduar në Lëvizjen gjë që kuptohet vetvetiu, sepse, siç e dini ne mbështetemi në ndihmat që japin punëtorët e shkretë që robtohen e shfrytëzohen si mos më keq, dhe se gjendja e tyre është aq ... e pashpresë kur dihet për papunësinë katastrofike në Perëndim dhe natyrisht shumë prej tyre do t'i ndjekin, siç ia kanë nisur në Gjermani dhe siç kanë vepruar gjithnjë në Zv. E pastaj si t'ia bëjmë ne. Ku të mbështetemi? Lufta jonë është e gjatë dhe mos harroni se shtypja e përditshme e bën të vetën, ajo i lodh njerëzit i drobitë për çdo ditë nga pak... Pra mu për këtë duhet të mbështetemi në forcat tona, ne na duhet mjete të mëdha materiale, e atyre që do të vinë tash së shpejti do t'u duhen edhe më shumë, prandaj ne duhet të bëjmë çdo gjë që ta sigurojmë një bazë solide materiale, pra të gjejmë mënyrë që edhe në kooperim me tjerët, të na dalë çdo ditë na diçka, sepse ndihmat janë shumë të vogla, ato janë tmerrësisht të vogla, shokë... Mungon organizimi do të thoshim, natyrisht se mungon, por ne nuk po mund të arrijmë kudo, përndryshe janë minimum 70 000 mërgimtarë shqiptarë, pa llogaritur mërgatën... dhe vetëm nga një markë në muaj po ta jepnin mjafton, por ne nuk po kemi mundësi që të arrijmë te të gjithë, e dikund ndoshta edhe po e teprojmë...

Ka shokë që nuk po e paguajnë anëtarësinë fare (ta marrim p.sh., celulën Arbëria, që nuk është vetmja...). Ndihma mund të japin njerëzit e paorganizuar,

përndryshe të organizuarit duhet ta japin anëtarësinë dhe në këtë drejtim ne duhet të jemi edhe më të kujdesshëm në të ardhmen... Sidomos botimet dhe aktiviteti brenda po kërkojnë shpenzime të mëdha... Tash organi botohet në 6000 copë, ndërsa nuk shiten prej tij as 1000...

Kur thotë Ilazi se nuk bën të dihet se me të holla të punëtorëve do të hapim ekonomi, natyrisht një gjë e tillë nuk guxon të dihet fare prej askujt, fundja ne duhet të mësohemi përfundimisht që të mos na i di askush këmbët. Po shkojnë njerëzit dhe po flasin në emër të L., thotë Ilazi. Të gjithë e dimë se me emrin e Lëvizjes po manipulohet dhe kjo gjë do të bëhet edhe në të ardhmen, por njerëzit e tillë do të demaskohen me të gjitha mjetet bile. Po këtij avazi i bie edhe Sadik Tolaj, letrat e të cilit i lexova me vëmendje... Kur është në pyetje ky njeri më duhet të them këtë: kam dëgjuar fjalë të mira dhe të këqija për këtë njeri. Në mërgim preferohet të njollosen njerëzit dhe ne nuk guxojmë të bëhemi kurrë burizane thashethemesh. Absolutisht, por në mes veti duhet t'i analizojmë mirë e mirë njerëzitpravi se tosho, apo izigrava budalu, pra mbarohet shumë naiv dhe pyet për gjëra të cilat ai i di më mirë se ne. Po ai njeri e ka fakultetin, ju lutem. Por në letrat e tij unë kam vërejtur rregullisht se ai përpiket të dijë për shkallën e unitetit në mes nesh, për atë se në këtë moment çka është më e rëndësishme për ne. Çdo letër e tij është përplot grepa në dukje të parë, të maskuar fare mirë me kureshtjen e njeriut të padjallëzuar, që do të di esencën e neve që bota mendon se jemi "bog i batina". Si ky, si Reshati shkruajnë shpesh dhe gjithnjë të njëjtat pyetje. Vallë paska nevojë t'i mbajmë ligjëratë qoftë njerit qoftë tjetrit për unitet atje? Po ata e dinë fare mirë se çka duhet të bëjnë, prandaj mu për këtë unë po u shkruaj tash, po ju shkruan tjetër kush. Vetëm në dy letrat e tij që m'i dërgoi Ilazi unë kuptova shumëçka, se çka po do ai njeri: ai është jetikisht i interesuar të mas shkallën e unitetit tonë. Qëllimi i letrave të tij është ky. Ma merr mendja Ilazi duhet të merret me ata njerëz atje, por le t'i hap sytë shumë, sepse ai është terreni më i rrezikshëm për ne. Jemi në gjurmë të disa gjërave që unë kurrë s'kam mundur t'i marrë me mend. Në letrat që do t'ia dërgoj Ilazi ST duhet t'i thotë se Ujkani nuk është këndeje për një kohë bukur të gjatë, le të ma heq qafe dhe le të përpiket që ta ruaj unitetin në mes pleqve që u intereson më shumë emri i tyre dhe në mes të rinjve që ka çdo gjë në mesin e tyre. Sikur të ishte ai që duhet Sadiku, athua do të kishte nevojë t'i thuhet shkruaj për ZK? Po të shkruaj për Diellin si gjeti kohë vallë?

Edhe kur është në pyetje përgatitja teknike e organit, natyrisht se unë nuk kam qëllimin më të vogël ta monopolizoj punën në ZK, por thjeshtë në mungesë kuadrosh po më duhet t'i qorrojë sytë në lektorimin e shumëfishtë të gabimeve, sepse nuk po ka njerëz që meritojnë t'u falet një besim i tillë pa qenë të provuar mirë e mirë, sepse nesër ta bën si Nuhiu. Përgatitja grafike e teknike e org. për mua është torturë, por ja që po duhet gjersa të vihen në vijë edhe disa gjëra... Kuptohet se ka shokë që po më ndihmojnë dhe gjersa të përgatiten se duhet ata më duhet t'i grah kështu. Te njerëzit tonë po më mundon shumë mungesa e ndjenjës së përgjegjësisë, nuk mërzhiten fortë për lëshimet, nuk mërzhiten fort për kohën që humbin kot së koti e jeta shkon, ndërsa punët mbesin.

LOJA NUK DUHET VAZHDUAR

"Ndërkohë, në mënyrë të tërthortë mora lajmin se në fillim të dhjetor 1982, në Gjenevë do të mbahej një demonstratë. Ish-shokët e idealit nuk e kishin parë të arsyeshme të më njoftonin as për demonstratën, e as për mënyrën dhe kohën e udhëtimit. Mora rrugën i vetmuar.

Udhëtova me tren. Arrita në vendin e caktuar ku do të mbahej demonstrata. Pasi i përgëzova shokët e Gjenevës, Ejup Ahmetin dhe Elfi Agushin, për organizimin e mirë të demonstratës, ata më takuan me Xhafer Shatrin, të cilit i kërkoja bashkëpunim... edhe pse më premtoi me fjalë të „singerta“, **mjerisht me këtë takim përfundoi edhe bashkëpunimi ynë!**" (Nuhi Sylejmani, Vrasja e trefishtë, Prishtinë 2010, f.54)

LOJA DUHET VAZHDUAR

Me Nuhiun po "letërkëmbejmë". Po na dërgon letra që po ia dikton AP (Abdullah Prapashtica-shën i red.) Përmes tyre po përpiqet me tërë qenien e vet ta kuptojë se çka e kemi ndërmend të ndërmarrim. Natyrisht, s'ka mundur të blejë asgjë dhe tash e ka qitur viçin (të gjitha letrat e tij janë shumë provokative) dhe po thotë hiç më pak se "Punëtorët" po i qetë ish-LNÇKVSHJ! Po kërkon takim me "përfaqësuesit e OMLK-s" (Po e përsëris, këtë po e bëj me keqardhje, që të mos ndodhë ndonjëherë të dalë diçka nga letërkëmbimi ynë...). Do t'ia kthej një përgjegje dhe do t'i them merri dy shokët e tu, pra Sk. (Skënderin=Xhafer Durmishin-shën i red.) dhe shokun në Turqi, dhe eja të bisedojmë...

Pra loja duhet vazhduar... ata duhet t'i tërheqim për gjuhe ngadalë ngadalë. Natyrisht pa ia përmendur kurrë "Punëtorët" ose fraksionin. Zotriun e tij, udbashin AP duhet ta lëmë le t'i lëpijë kockat... Për informimin që thotë Ilazi edhe unë pajtohem, pra shkurt të distancohem nga ta, por, po që se ata do të dërdëllisin, gjë që sigurisht do ta bëjnë, besomëni po pritoj shumë të ulem e të shkruaj për ata. Ata do të gëzoheshin një popullarizimi të tillë. Injoranca e "njeriut" nuk ka kufij. Për atë se ku po thirren edhe në PPSH, natyrisht kudo, sidomos në ata të Vjenës. Duhet të presim edhe një kohë e pastaj shohim e bëjmë. Ata duhet t'i mbysim me punë, me organ të fortë dhe me botime e shkrime të forta në ZK. Frikohem se një polemikë me ta do të ishte nënçmim i madh për ne. Ata duhet t'i ndëshkojmë me mospërfilljen. Kjo i qet prej taktit.

Përsëritje revolucionare Xhema (Xhafer Shatri) (shtator 1983-shën i red.) (Shënim i Xhafer Durmishit: Kjo letër më ra në dorë për herë të parë më 23 prill 2012; Nëntitujt "Loja nuk duhet vazhduar" dhe "Loja duhet vazhduar janë të vendosur prej meje.)

46. Letër në emër të Qendrës Ekzekutive, tetor 1983

të dashur shokë,

me pak vonesë po përpiqem të shkruaj lidhur me letrën e fundit të shokut Ilaz, nuk po zgjatem edhe gjithaq sepse edhe ashtu po kam shumë punë.

Letra është e gjerën dhe informuese, por disi kam përshtypjen se vuan nga ajo shtro e mos mbulo, pra vlojnë propozimet nga të gjitha anët, por në realizimin e tyre nuk bëhet asgjë. Sa i përket Programit të Lëvizjes do ta rregullojmë këtë çështje, por është e nevojshme që edhe Ilazi vet t'i jap propozimet e tij për Programin ashtu siç e ka bërë Salihu, pastaj të bisedoj edhe me Muhametin që edhe ai të thotë fjalën e tij. Këndeji do ta angazhoj edhe një shok, ndërsa shokët brenda janë të informuar dhe diçka kanë bërë në këtë drejtim. Çështja e Programit Politik si dhe e Statutit do të rregullohet menjëherë, besoj në muajin e ardhshëm. Atë do ta botojmë në shumë ekzemplarë dhe do ta shpërndajmë sa më shumë që të jetë e mundur.

Propozimet e veta Ilazi le t'i dërgoj kah 25 tetor, së bashku me të Muhametit... Pastaj edhe për një çështje tjetër duhet të shprehem këtu. Është interesant se as Ilazi as Salihu nuk shprehin kurrë as mendimin e vetëm se si t'ia bëjmë me organin, të flasin për të metat dhe të bëjnë përpjekje që ai të jetë më i mirë, sepse asnjë gazetë nuk mund të jetë aq e mirë sa të mos mund të jetë edhe më e mirë nesër.

Çështja e këtyre propozimeve në erë mua po më mundon. Ne duhet t'i themi çështjet troç, pa asfarë zvarritjesh.

Kohët e fundit ka shkruar letër Enver Hadri, një letër korrekte, dhe thotë se nuk dua ta nxjerrë gazetën që ka mbajtur emrin Zëri i Kosovës dhe se në të ardhmen e ndiej veten si simpatizant i saj, kërkon që ne ta provojmë sinqeritetin e tij në vepër etj. Ia ktheva një letër poashtu korrekte, dhe i thash se hapi i tij është një gjë e rëndomtë kur dihet se i tërë populli është për atë që të gjithë shqiptarët e ndershëm ta japin kontributin e vet në kuadër të Lëvizjes dhe kështu në këtë stil...

Më vonë e dërgoi një qarkore që ua kishte ndarë shokëve të tij se e ka rasformuar organizatën e tij. Ndoshta ai ka pritur që ne të shkruajmë edhe në ZK, por këtë nuk e kam parë të arsyeshme.

Siç e dini kohët e fundit Prapashtica e kompani e kanë shpërndarë një kumtesë në të cilën flasin në emër të Lëvizjes, e përdhosin e shtrembërojnë komunikatën etj., pra punë në atë stilin e tyre. Me ata njerëz tash për tash nuk na konvenon të merremi. Këtë do ta bëjmë më vonë dhe gjithsesi, por duhet të kemi sa më shumë material dhe me një të goditur t'i shkapërderdhim si duhet.

Ata nuk paraqesin asnjë rrezik të madh përderisa nuk kanë mundësi të nxjerrin gazetë të fortë, gjë që nuk mund ta bëjnë kurrë, sepse për këtë duhet qëllimi i pastër para se gjithash, e ata nuk kanë qëllime të tilla.

Tash për tash kaq Përshëndetje vëllazërore Xhema (Xhafer Durmishi)

P.S. Për letërkëmbim jemi marrë vesh. Kjo dihet, ndaj duhet t'i respektojmë vendimet tona. Gazeta del tash një javë. Letrat tuaja dërgojani plakut në Redaksi se është andej pari.

(Shënim i Xhafer Durmishit: Kjo letër më ra në dorë për herë të parë më 23 prill 2012).

47. Letër Asllan Muharremit, Faridin Tafallarit e Xhafer Durmishit, 18 tetor 1983

Të dashur shokë (A.F. dhe S.) (A=Aliu=Asllan Muharremi, F=Faridin Tafallari, S=Xhafer Durmishi-shën i red.)

para disa ditësh e mora një letër nga A. unë nuk iu përgjegja me kohë ngaqë isha shumë i zënë lidhur me këtë tubimin në Gj. Ai propozonte që ta thellojmë organizimin dhe t'i japim atij një kahje vërtetë revolucionar. Po jetojmë në kohë të tilla që pa një organizim taman të themelshëm ku në çdo vend do të jenë kapilarët e gjakut tonë, ne nuk do të mund ta kryejmë kurrë atë që populli pret prej nesh. Sa i përket Z mund t'ju them se është bërë diçka. Ekziston K. për Z. (Komiteti për Zvicrën-shën i red.) dhe në disa rrethe K. e vendit, disa prej të cilave janë shumë aktive. Por disa jo, mirëpo kur po dalë nganjëherë dhe sidomos në një mbrëmje në Gj dhe po i shoh të gjithë ata djem të rinj të cilët unë nuk i njoh fare, po e shoh se nuk është arritur asgjë, sepse ka mundësi për organizim edhe shumë më të madh, shumë më masiv, sepse njerëzit janë të gatshëm të angazhohen në luftë. Tash edhe ndonjë ditë ne presim një forcim me kuadro për Z. dhe besoj se do të bëhet një punë shumë më e mirë.

Sa i përket org. në Gj. atje puna e parë që duhet ta bëjmë është që të formohet K. për Gj. tash për tash prej 4 vetësh (për këtë bisedova edhe me S. e F.) S.F.A. dhe M. Kelm. S le ta udhëheq. A të merret me çështje org. M. me çështje e propagandë dhe F. me çështjen e klubeve. Pastaj të nisemi nga ajo që të formohen K. e v. apo thënë më mirë në zgjedhjen e përgjegjësve për një regjion të caktuar. Këtu duhet të zgjidhen njerëz të besueshëm e të sprovuar dhe në as një mënyrë të mos mbështetemi vetëm në një njeri, sepse po u rritet mendja, por le të afrohet një rreth i tërë dhe ai le ta zgjedhë udhëheqësin e vet dhe t'u ngarkojmë njerëzve detyra që të mos rrinë kot, duke u nisur që nga komentimi i librave e tutje gjer te aksionet konkrete në të cilat do të provohen aftësitë, besimi dhe guximi i tyre, ndjenja e sakrificës etj. Ne duhet të ndërmarrim një ofensivë të tërë për organizimin e njerëzve dhe pastaj të punojmë me ta e të ngritemi së bashku me celulat. Mbledhjet me cel. duhet mbajtur bile njëherë në dy javë dhe për çdo mbledhje të caktohen detyra konkrete se duhet vepruar dhe çka duhet bërë gjer në mbledhjen e ardhshme.

Organizimi duhet të pësojë ndryshime kualitative, taman ashtu siç shkruante Aliu, ta ngrisim konspiracionin në shkallën më të lartë që të jetë e mundur. Dhe ta dimë se në kënd dhe sa mund të mbështetemi në kohët e vështira që do të vinë sigurisht. Pastaj të bëjmë përpjekje për intensifikimin e luftës brenda dhe të gjejmë mundësinë se brenda të dërgojmë material më me shumicë dhe me rreziqe më të vogla. Në një rast patëm biseduar me S. për një gr. që do të ishte në gjendje të fusë material brenda pa rrezikuar asgjë, por më nuk dëgjova se është bërë diçka në atë drejtim. Këtë punë tash njerëzit po e kryejnë me kokën në strajcë.

Përgjegjësit për një vend duhet të jenë nga 3 vet mendoj unë, të zgjedhur si duhet. Në M. (Mynhen) këtë duhet ta rregulloj vet A. Për Halilin më shkroi edhe S. ai është njeri i mirë, këndeje e ka djalën e axhës, pastaj edhe 3 fëmijë në burg, në gjendje shumë të keqe. Jam i sigurt se edhe ai do t'i ketë lidhjet e "veta", por duhet ta sqarojmë mirë se ZK vinë në Myn. në një vend dhe prej aty le të shpërndahen, s'ka lidhje e mbi lidhje., mirëpo është e nevojshme që për këtë ta sqaroj ngadalë A., sepse ai është njeri i vjetër. Një shok i tij R. më ka pëlqyer shumë ishte shumë aktiv. Pra zgjidhni në atë rreth një grup njerëzish dhe le të formohet K.V. por gjersa ta marrë të mbarën si duhet me të duhet të udhëheq gjithsesi A. Për celulat e njërit apo tjetrit prej tyre le të dij vetëm A. e asesi ata, sepse mund të lindin xhelozitë të ndryshme e besa edhe të rrezikojmë edhe njerëzit. Por A. nuk bën të ndalet vetëm në një vend... por le t'i formoj celulat kudo që të jetë e mundur, por të merremi vesh, praktika po e tregon se besimin duhet t'ua falim vetëm atyre që janë të denjë për të. Po që se organizojmë celula dhe nuk punohet me to ne nuk do të arrijmë asgjë, ato do ta shohin se nuk është çështja serioze dhe vetvetiu do të ftohen. Edhe vetë Komiteti duhet të takohet sa më shpesh. Prej meje në këtë drejtim mos pritni ku me dit sa, sepse ZK po kërkon shumë punë. Edhe në këtë drejtim do të ishte mirë që S. dhe A. ta caktojnë nga një rubrikë dhe të shkruajnë rregullisht në të, pastaj në bisedë me njerëzit ne mund të vimë te lloj lloj informatash, ndaj seleksiononi mirë dhe dërgojini sepse në këtë mënyrë do ta bëjmë ZK edhe më të fortë.

Edhe lidhur me atë fraksionin do të ishte mirë që të mbledhim sa më shumë informata, t'ua dimë se ku i kanë njerëzit, prej nga janë dhe t'i përcjellim e t'i hetojmë pandërprerë në mënyrë që të kemi sa më shumë fakte për t'i demaskuar, edhe pse një gjë të tillë ne duhet ta bëjmë vetëm kur është më se e domosdoshme. Fjala fjalën nuk e mund kurrë, por nëse ne punojmë sa e si duhet, ata vetë do ta mbysin veten e tyre, por të jemi të kujdesshëm që të mos u japi material për të na luftuar. Të punojmë më shumë me njerëzit tanë, t'i sqarojmë dhe ta ngrisim te ata ndjenjën e përgjegjësisë.

Në Dys. duhet që M. ta formoj një K. V. me H. dhe me ndonjë tjetër dhe të punohet aty sa më shumë sepse jam i sigurt se Riza Salihu nuk rri duarkryq, ai ka kontakte me Musa Dakën, pastaj edhe në Bilefeld le të formohet dhe këtë le ta udhëheqë Xh., por dy shokët tjerë t'i zgjedhë sa më të mirë dhe ata le ta kontrollojnë dhe ta detyrojnë që para tyre të jap përgjegjësi. Përndryshe ai njeri është prepotent i papërmirësueshëm dhe njeri fjalësh.

Poashtu në Dortmund le ta bëjmë me S. (Sylën-shën i red.) Ai është njeri shumë i mirë edhe pse dikush po përpiqet ta njollosë. Ai e ka një rreth shumë të mirë shokësh.

Në Ber. janë do njerëz të mirë dhe këtë mund ta rregulloj Qa. i këtushëm kur të dalë andej ose disi të njohtohet vet S. apo A. me ta dhe ta rregullojmë çështjen.

Sa për simbolet jugosllave ne duhet të punojmë me njerëzit që ata vetë ta kuptojnë një gjë të tillë por ama kurrsesi ne të mos ia mundësojmë dikujt që duke u thirrë në ne t'i përçaj njerëzit. Kjo klimë me plotë pasoja është bërë sidomos në Bremen. Aty janë në pyetje Xhaviti e Zylbehari të cilit si njëri si tjetri kanë interesat dhe sujetat e tyre. Nuk janë ngushtë ata as për Lëvizjen as për popullin.

Në letërkëmbim me Mërgimin i kam thënë se dy shokë brenda duhet të kontaktojnë me njëri-tjetrin me qëllim që të koordinohen aksionet. Ai tha se Aliu duhet të ma jep emrin e Gjonit. Kjo është një çështje shumë serioze prandaj edhe ju mendoni në këtë drejtim se si dhe kend mund ta angazhojmë më shumë brenda që t'u nxjerrim sa më shumë punë. Ta rrahim hekurin sa është i skuqur sepse pastaj duhen dekada për ta sjellur një gjendje të tillë.

Tash këtë muaj pritet ta kemi një demonstratë në Fr. por lejen nuk e kemi marrë akoma. Do të ishte mirë që Aliu ta përgatisë referatin që duhet lexuar para dasmorëve. Le të jetë një punim aktual dhe i fuqishëm.

Prandaj që tash të nisim ta propagandojmë domosdoshmërinë e një demonstrate pa e përmendur askund konkretisht, por ashtu përgjithësisht që ta përgatisim masën që t'i përgjigjet thirrjes sa më masovikisht.

Tash për tash kaq.

18 tetor 1983 Përsëndetje revolucionare (Xhafer Shatri)

48. Letër Asllan Muharremit, 24 tetor 1982

I dashur shok Ali,

E mora letrën tënde si dhe punimet. Me të gjitha jam shumë i kënaqur. Më vjen shumë mirë që ke dalë këndeje, besoj se do të kontribuosh shumë në konsolidimin e radhëve, sidomos propozimet tua për brenda janë me vend, dhe më duhet të them se nga ai krah ky është një propozim i një njeriu që di fort mirë se çka duhet të bëjmë brenda, atje në frontin kryesor të luftës. Edhe për makina jam i pajtimit me ty, ato duhet të jenë dy ose më shumë, por tash për tash vetëm dy. Meqë ti ke kontakte me brenda pa u takuar nuk ka nevojë të bisedojmë për atë shokun brenda. Dije mirë se letra jote më ka ardhur në një gjendje të vështirë shpirtërore kur më erdhën lajme për një burgosje shumë të rëndë, për një dëmtim shumë të madh për ne, por më ndihmoj ta kaloj, prandaj edhe njëherë të faleminderit.

Sa për Stras. Do të ishte shumë mirë që të dalësh edhe ti, por të maskohesh mirë me ndonjë kasketë dhe ta lexosh referatin para popullit. Unë besoj se me shokët do të dilni lehtë me autobus.

Përpiqu që ta organizosh sa më mirë që të jetë e mundur ardhjen e shokëve. Referati le të jetë aktual për gjendjen në Kosovë, për shtypjen dhunën e terrorin dhe përplot thirrje për Lëvizjen me qëllim që ta popullarizoj Lëvizjen sa më shumë. Sipas praktikës së këtushme brenda çdo kryerreshti të gjatë duhet të jetë një thirrje si p.sh. Poshtë dhuna e terrori në Kosovë etj.

Edhe leximin e referatit ushtroje që ta lexosh sa më mirë e sa më qartë dhe përfundimi i tij le të jetë po ashtu me thirrje që janë aktuale për gjendjen në Kosovë. Punimi për ushtarët ishte shumë i mirë dhe do ta botojmë gjithsesi. Të lutem që edhe në të ardhmen kur të vinë apo kur të kesh informata të tilla dërgoji sepse ato e bëjnë organin sa më aktual. Për çdo siguri referatin jepja Halilit se mos po të bastisin apo të zbresin në kufi. Kështu që mbesim pa të. Sikur të ishe këtu ne do të të qitnim pa vështirësi të mëdha, po megjithatë besoj se me autobus do të kalosh po ashtu mirë. Mundësisht dil pak ma herët që të kemi mundësi të rrimë e të bisedojmë, edhe pse atje do të jetë tollovi e pashoqe.

Tash nuk po e zgjas më shumë, por urdhëro edhe ti me shokët pranoji përshëndetjet e mia vëllazërore U., (Xhafer Shatri) Egsil, 24 tetor 1983

49. Letër Asllan Muharremit, tetor 1983

I dashur shok,

Më në fund u vendos që edhe sivjet ta organizojmë një demonstratë të madhe këtu në Evropë. Kjo është kërkesë e madhe sidomos nga brenda prej popullit, i cili është në pozitë të vështirë për shkak të rritje së dhunës e terrorit shovinist, prandaj përpiqu që kudo përmes shokëve dhe të njohurve ta shpërndani këtë thirrje, të mos leni mundësi dhe rast pa shfrytëzuar që të organizoni sa më shume njerëz të vinë.

Nëse dikush ka mundësi, sidomos nëpër klube e gjetkë, të organizojë recitale, referate etj. le të punojnë në këtë drejtim, sepse është rezervuar edhe një sallë solide ku do të takohemi pas manifestimit. Është obligim patriotik i juaji që kudo që të keni mundësi të thirrni njerëz në këtë dasme, sepse edhe në opinionin evropian ekziston një interesim i madh për gjendjen në Kosovë.

Interesohuni që me shokë të merrni një autobusë, të vini të gjithë së toku, dhe të përpiqeni që gjatë dasmës të mbahet qetësi dhe rend pa ekselin më të vogël, sepse edhe udha duke iu frikuar një manifestimi të tillë sigurisht se do të përpiqet të na pengojë në rrugën tonë të ndritshme, por në saje të vigjilencës sonë, të organizmit të mirë dhe të qëllimit të pastër, padyshim se të gjitha përpyekjet e armikut do të bien në ujë.

Pra mirupafshim në Strasbourg të Francës!

Zëri i Kosovës (Xhafer Shatri)

50. Letër Remzi Ademit, 3 nëntor 1983

(Xhafer Shatri për Remzi Ademin)

I dashur shok,

atë mbrëmje që të premtova se duhet të shihemi me atë shokun tonë, unë nuk mund të vi me kohë, sepse më rastisi të takohem me një shok që nuk e kisha parë me vjet dhe bisedë pas bisede mbeta gjer vonë, kur u ktheva ju asnjë nuk ishit aty.

Prandaj po të drejtohem me këta rreshta dhe po të kërkoj falje si ty dhe bacës Avdirrahman, të cilit po ia shkruaj një letër të shkurt sa për të rënë në kontakt me të drejtpërsëdrejti.

Letrën e atij shokut ta vonova, por besom se kam qenë aq i zënë sa as frymë siç thonë plakat s'kisha kohë për të marrë sa duhet.

Atje si jeni të gjithë dhe si po shkon puna, si është puna me Remziun dhe me rrethin e tij atje. Do të ishte mirë që t'i ndihmoni pak më shumë sepse ai është si vetëm atje dhe t'ia krijoni së bashku një rreth të fortë shokësh që të mund t'i kundërvihen me sukses atij farë llymit të N.

Në këtë drejtim keni kujdes dhe mos pritni që të vinë njerëzit te ju, por t'i vizitoni edhe ju duke shkëmbyer përvoja në mes veti.

E thash këtë sepse Ludvigsburgu, Mahajmi dhe Frankfurti na kanë mbetur më së keqi.

Jam i interesuar të di për njëfarë Mehmetin, dikun i anës së Lumthatit, që punon në Munhen, merr informata për te dhe më shkruaj sa më parë.

Ti dhe shokët, pranoni përshëndetjet e mia të përzemërta.

3 nëntor 1983

Bcl (Bcl=Bacaloku=Xhafer Shatri)

51. Letër Remzi Ademit, 7 nëntor 1983

(Xhafer Shatri për Remzi Ademin)

I dashur shok,

po të lajmërohem me këta rreshta, sepse, besomë, kam qenë shumë i zënë, pastaj numrin tënd të telefonit e ka humbur dikund, kështu që sake qenë brenda nuk kam mundur t'i lajmërohem as familjes tënde, mirëpo më mirë vonë se kurrë siç thotë populli, prandaj në pamundësi që të vi dhe t'ju shoh, ashtu siç është adet ndër shqiptarë, të lutem që përmes këtyre rreshtave të pranosh urimin tim për lirim nga ai farë qymezi gjerman.

Besoj se keni kaluar mirë, përkundër asaj se ai nuk është aspak vend i mirë. Mjerisht na kanë mbetur edhe disa shokë brenda, por ani, sepse ajo punë i ka dhënë publicitet të madh luftës sonë, merre me mend kanë shkruar gazetat sikur ajo të ishte një demonstratë e madhe.

Po familjen si e ke, dhe prej shtëpisë a ke ndonjë lajm?

Ato ditë në Strasburg të pashë me Maksin, por nuk pata mundësi të të lajmërohem dhe bile të të them që atij të mos ia qelësh atë punën e atyre shokëve brenda.

Këndej nuk ka ndonjë gjë të re, përgjithësisht 28 nëntorin e kemi festuar mirë.

Tash në fund të kësaj shkrese të lutem që ti me shokët t'i pranosh përshëndetjet e mia më të përzemërta.

BCI (BCI=Bacaloku=Xhafer Shatri)

Adresën po e marrë nga një paradërgesë e mëparshme

7 nëntor 1983

52. Letër Asllan Muharremi, 22 nëntor 1983

I dashur shok,

Për shkaqe të njohura edhe për ty unë ta vonova përgjigjen në letrat tua. Kësaj radhe nuk do të zgjatem, por besomë se kurrë nuk kam qenë në një pozitë më të keqe. Por si shumë herë në jetën time, edhe kësaj radhe u binda me fakte se e vërteta dhe drejtësia fitojnë kurdoherë.

Më gjatë nuk po shkoj kësaj radhe. Lidhur me këtë çështje po e pe të arsyeshme, unë do të t'i dërgoj traktat e manjetofonit të atij takimi... Në fund të falënderoj përzemërsisht për fotografinë që më ke dërguar. Ajo është edhe një dëshmi, se kam të

bëjë me një shok, me kualitete morale të të cilit mund të llogarisë populli gjithnjë. Kaq...

Pranoji përshëndetjet vëllazërore e revolucionare të U., (Xhafer Shatri) Mërgim, 22 nëntor 1983

Shtojcë. Si do që të vie puna, mos lejo që të H. të dalin fjalët që janë thënë kënde. Ne nuk guxojmë t'luajmë me besimin e patundur të popullit në Lëvizje. Ai është urdhëruar që për çdo gjë të konsultohet dhe të veproj sipas udhëzimeve tua.

53. Letër Shokëve të Komitetit Qendror (me përjashtim të Xhafer Durmishit), 19 prill 1984

(Dukagjini=Komiteti Qendror i Lëvizjes-LRSHJ)

Shokëve të Dukagjinit,

përkundër asaj e vendosëm të shihemi krye një muaji, megjithatë ne s'u pamë. E ngjarjet u rrokullisën me shpejtësi të madhe. Rasti i Dyseldorfit është barometri më i qartë se gjer ku ka shkuar puna. Kur tre anëtarë të një forumi të tillë janë prezentë dhe me punë tregojnë se çfarë "uniteti" kanë, atëherë nuk duhet befasuar pse punëtorët theren mes veti me thika.

Fehmiu përmes Komisionit ka treguar se si e ka parë tërë ngjarjen. Këtë e ka bërë edhe Ilazi. Salihu s'u bë i gjallë. Nuk e di pse. Kanë ardhur shumë letra në të cilat përmenden emra që ata i demaskojnë pa asnjë mëshirë. Çështja pra është shumë serioze. Po shpërndahen trakte të ndryshme përmes të cilave shpifet dhe dekonspirohen njerëzit. Me çka mund të kuptojmë se nënshkrimet e Salihut në dokument paskan qenë asgjë. Në kemi heshtur për hirë të masës nuk kemi dashur dhe as që duam të shfrytëzojmë rastin për të sulmuar ata që me vepër po tregojnë çdo ditë se nuk janë për punë, por për thikime prapa shpine. Të cilët mburren me punët e të tjerëve dhe në çdo hap të vetin minojnë Lëvizjen.

Pa e dëgjuar edhe fjalën e Salihut lidhur me të gjitha këto çështje ne nuk do të marrim asnjë qëndrim.

Pra ne po e presim edhe fjalën e Salihut (Xhafer Durmishit-shën i Xh. D.)

Përshëndetje revolucionare Xhema (Xhafer Shatri)

19 prill 1984

P.S. Ne nuk guxojmë të heshtim në këtë situatë kur masa kërkon sqarime.

(Shënim i Xhafer Durmishit: Kjo letër, edhe pse kam qenë anëtarë i Dukagjinit (Komitetit Qendror) me vendimin e mbledhjes së 3 marsit 1984 në Gjenevë nuk më është dërguar në vitin 1984. Për herë të parë kjo letër më ra në dorë më 23 prill 2012).

54. Letër shokëve të Shtutgartit, 1 maj 1984

Të dashur shokë,

mbrëmë bisedova me Faredinin dhe më tregoi për dëshpërimin tuaj në Dyseldorf. Më besoni se edhe unë kam qenë në lëkurën tuaj, por mërgimi qenka shumë i rëndë. Këtu nuk paska fjala peshë. Të shtunën unë kam biseduar me një shok në

Dyseldorf. Kishte fjalë të mira. Pastaj bisedova edhe me Plakun dhe ai foli me të plagosurit. Edhe ata e sidomos Sylja patën fjalë të mira. Duke u nisur nga kjo e pash të arsyeshme që t'u shtrihet shokëve sa më parë dora e pajtimit. Ju nga ana juaj e keni bërë tuajën, pse dikujt nuk i ka konvnuar kjo është tjetër çështje. Dhe nesër po që se ndodhë diçka dihet se kujt do t'i mbetet përgjegjësia. Kujt iu kujtuar që në këtë çështje ta përziej Lëvizjen si dhe të gjithë atyre që duan të bëjnë shesh për përshesh në këtë situatë kaq të rëndë do t'ua bëjmë me dije, me punën dhe përpjekjet tona të përditshme se i kanë bërë hesapet pa hanxhiun. Prandaj mos u dëshproni, me Musain mbani kontakt parreshtur dhe pos jush mos të kërkoj ai as mësues e as shokë tjerë, sepse do ta qesin në pozitë edhe më të keqe. Thuani le ta ruaj gjakftohtësinë dhe të mos flas me askend tjetër pos me juve për këtë çështje. Herëdokur të vie pajtimi, në mes fjalësh nuk mund të jetë dikush tjetër pos jush. Mu për këtë, prandaj mbajeni Musain afër, këshillojeni, sepse ata që e kanë penguar pajtimin, të jini të sigurtë nuk do t'u dalë e tyrja, sepse jo vetëm juve, por edhe neve na kanë pre në besë.

Armiku memzi po pret të fus pyka në këtë mjegull që e kanë krijuar ata që janë ushqyer me bukën e punëtorëve tanë zemërbardhë e duarplasaritur, prandaj si këta të parët që e kanë nxitur këtë kasaphanë, si këta të dytët që nuk lejojnë të shtrihet dora e pajtimit mes vëllezërish, do të pësojnë disfatë të turpshme para vullnetit të shokëve që kanë lënë shtëpi e familje, dhe janë në gjendje ta lënë edhe kokën për lirinë e popullit.

Prandaj mos u mërzitni, me ata shokë që i keni përreth rrini më shpesh, konsultohuni në mes veti, kijeni parasysht se e tërë kjo mjegull nuk është bërë për tjetër veçse ndonjë hesap i Serbisë t'i ngul dhëmbët në gjak shqiptari. Qoftë edhe një hap apo ndërmarrje të vetme mos e bëni pa u konsultuar me shokët e atyshëm, sidomos me Hafizin, me Musën (të riun) etj. Ta keni parasysht se ne, kështu siç jemi, që të gjithë jemi me ju, sepse keni shkuar në Dyseldorf me qëllimet më të pastra e më fisnike.

Në këtë situatë më shumë s'po mund të bëjë, veçse përmes kësaj letre t'ju përshëndes përzemërsisht.

Të fala shokëve, Bacës Selim, Lutanit, Ismetit dhe të gjithë shokëve tjerë.

Zvicër 1 Maj 1984 B.cl (B. cl është shkurtesë për Bacalokun, emër apo titull i përdorur nga Xhafer Shatri)

55. Letër dërguar Ibrahim Kelmendit, 1 maj 1984

Me asnjë kusht nuk do t'i shkruaja këta rreshta, sepse më me dëshirë do të takohesha me ty dhe do të bisedonim gjerësisht, sepse e tërë ajo që dua të them, as përciptazi nuk mund të përfshihet në një letër. Por mbrëmë bisedova me Faridinin, me shokun tonë të mirë, dhe dëshpërimi i këtyre njerëzve të ndershëm që kanë udhëtuar më shumë se 1000 km për ta bërë mirë dhe sjellja jote arrogante ndaj përpjekjeve të tyre po më detyrojnë të them troç: Ti je i papërmirësueshëm. Ti përgjithmonë ke mbetur mbreti i rrugëve, i mospërgjegjësish dhe i thashethemeve.

Së pari nuk denjove të shkruash për ngjarjen si ka ndodhur në tërësi, por një letër plot panik "me shyqyr që mbeta gjallë." Për atë që është në dijeni të gjërave më mirë ka qenë që ti të mbetesh aty, bile do të qanim... E unë e di mirë se nëse Skënderi është fajtori kryesor që i nxitu punëtorët tanë t'ia fusin thikat njëri-tjetrit, atëherë ti je ai që me tërë forcën tënde ke kontribuar të krijohen kushtet për një atmosferë të tillë. Ti vetë më ke gënjyer në pyetjen time se a ke biseduar me Faridinin lidhur me mbrëmjen e 7 prillit dhe më ke thënë po, e kjo nuk kishte qenë e vërtetë. Madje jo vetëm kaq, por ke

shkuar aq larg, sa agjutanti yt, Muhameti, të cilin me çdo kusht po përpiqesh ta mbash nën hijen tënde të mjerë, ka thënë Lëvizja është ku janë masat. E ajo s'ka qenë e vërtetë, sepse Lëvizjen aty e keni përfaqësue ti dhe Faredini e jo masa. Ashtu siç më ke thënë ti, duke të besuar, se njeriu dreqi e marrtë duhet t'u besoj njerëzve, unë e shkrova traktin. Dhe në atë e kam përmendur, sipas asaj që më the edhe 5 vjetorin e themelimit të Klubit. Sepse sipas teje "s'është dashur të rrezikohet Muhameti në Bohum." Merre me mend ti interesat e një njeriu i vë mbi interesat e 200 e sa të tjerëve. Po kush është Muhameti të rrezikohet? Po atëherë pse ka dalë këndeje? Si është e mundur të përmendësh gjëra të tilla? I lëmë këto. Pastaj si ke guxuar ti t'i telefonosh Mujës që ta dërgoj telegramin për ta përflliqur traktin që ishte shpërnda anë e kënd Evropës? Me çfarë të drejte manipulimet e tua të ulëta prej një mediokri prepotent përpiqesh në sy të 600 njerëzve, të m'i hedhësh mua (sepse njerëzit e dinë se prej ku është dërguar trakti)? Pse nuk telefonoje te Plaku apo te unë dhe të na thuash neve, që kemi qenë parreshtur në banesa, por e ke gjetur Mujin, po ashtu shokun tonë të mirë dhe ke manipuluar me të.

Jo vetëm kaq, por siç del edhe nga procesverbali i BK, ti i ke thënë Musa Dakës "myzevir" që pa nisur kjo punë, sepse për fjalë ti zakonisht je i zoti, prandaj, mos u mbaro si Pilati para askujt, bile jo para atyre që e dinë punën fare mirë. Unë Musain nuk e shoh si vëllavrasës, ai është një viktimë, së paku nga kjo perspektivë, e sharlatanizmit tënd, pafytyrsisë së Skënderit dhe karrierizmit të Milaimit. Dhe kur ne në pamundësi të kontaktojmë me ty, i çuam disa shokë shumë qëllim mirë, që t'i vënë kapak kësaj pune, që të mos lejojnë më gjakderdhje, që të mos lejojnë të fusë armiku pyka, sepse ti nuk je aq budalla të mos e dish kush dhe pse po shpërndan trakte, në të cilat të përziejnë edhe ty. Dhe vijne njerëzit atje e ti je aq i pacip, sa që një Sylë e Haxhi që të mbrojtën me trupin e tyre, dëshiron t'i bësh lodra të kapitalit tënd të mjerë politik. Po të m'i kishe dërguar gabelët e Pejës për një pajtesë unë nuk do t'i ktheja prapa. Ti me çdo kusht ke dashur të përzieësh Lëvizjen dhe përmes petkut të saj të akuzosh kundërshtarë të ndryshëm. Njeriu nuk guxon të hipën mbi popullin e vet për t'u dukur më i madh as më i pastër. Dhe i kthen njerëzit, shokët tanë të mirë, pa kryer asgjë, bile edhe i keqpërdor. Për tërë këtë përgjegjësia bien mbi ty.

Nuk je ti aq injorant, siç preferon të mbarohesh kur ta kërkon puna, e të mos e dish se në këtë çështje nuk guxon të përziehet çështja-lufta. Në këso situatash i duhet vënë kapak punës, sepse do ta shpëtoje edhe Musain nga kthetrat e merimangave të tipit të Skënderit, sepse në emër të tij nuk kanë ardhur rrugaçë, por njerëz, të cilëve Musa Daka nuk do të guxojë t'i luaj kurrë. Sepse që të gjithë ata janë njerëz të familjeve të ndershme që nuk luajnë me dikë, por as që lejojnë dikend të luaj me ta. Ata kanë ardhur nga qëllimet e pastra, ata janë konsultuar me ne. Plaku ka biseduar me shokët e plagosur, që të dy kanë treguar gatishmëri për ta bërë mirë. Por ti, që këso rastesh i pret si shkretira shiun apo si bora, ke shkuar aty dhe si njeriu i Lëvizjes ke dashur të bësh gjyq e ligj. Ti ke pasur rastin të tregohesh burrë, t'i shtish njerëzit të pajtohen dhe ta vrasësh një zagat të fëlliqur siç është Skënderi, me pjekurinë tënde, por edhe këtë rast e ke shfrytëzuar të tregosh se je kampion absolut i mospërgjegjësisë dhe meskinitetit.

Nuk po dua të çaj dërrasa më me ty, por po dua të përfundoj: Nëse atyre njerëzve sot apo nesër u ndodh diçka, nëse ata njerëz ndërrojnë në mes veti qoftë edhe një fjalë të keqe, apo po që se këtë atmosferë të rëndë e shfrytëzon armiku në çfarëdo aspekti qoftë, dije mirë se faji të a mbetur ty dhe poashtu dije mirë se unë do të kujdesem që t'i njoftoj njerëzit për atë se kush është shkaktari kryesor.

Nëse vjen gjer te pajtimi, në mes fjalësh nuk guxon të ketë njeri tjetër, pos atyre që kanë qenë gjer aty, sepse fjalëve të tyre Musa Daka nuk mund t'u luaj kurrën e kurrës.

Letra mos më shkruaj dhe ki kujdes e të mos ndodhë më kurrë që të përdorësh letrat me stemën e Lëvizjes për t'u treguar njerëzve "kompetencat" e tua. Janë disa raste që i di mirë, që ti i ke keqpërdorë këto letra.

Edhe sa për të më shkruar mos u lodh, sepse pas kësaj unë kurrë s'do t'u besoj fjalëve të tua.

Xh. (Xhafer Shatri)

(Faridin Tafallari, T-Dhimbje-Qëndresë, Tiranë 1997, faqe 417-419)

56. Letër e shokëve nga Zvicra, 29 qershor 1984

Xhafer Shatri për shokët e rrethit të Stutgartit

Të dashur shokë

ka disa ditë që na ka ardhur letra juaj, një letër e shkruar me shqetësim për rrokullimën që kanë marrë ngjarjet, për të cilat sigurisht se jeni në dijeni fare mirë. Ne nga ju kemi pritur letër edhe më parë, por një letër me qëndrime të qarta revolucionare, një letër çfarë pritët ta shkruajnë shokët e Jusufit.

Ne e analizuam letrën tuaj, e analizuam mirë e mirë dhe mund të merrni me mend se na qiti në dilemë jashtëzakonisht të madhe. Ju i citoni fjalët e famshme të Hasan Prishtinës: Bashkim e jo përçarje, luftë e jo fjalë. Po ju pyesim shokë, kush e prishi bashkimin? Kush i theu rregullat elementare të Lëvizjes, kush i bëri sekretet e saj dhe i qiti rrugëve në Evropë sikur ato të ishin paçavër bordelesh? Kush shpërndau trakte kundër bashkëlufëtareve, duke u shërbyer edhe me eksponentë të mërgatës së qyqeve? Kush inicoi që në emër të Lëvizjes të dalin gazeta, të cilat i nxjerrin emisarët e emigracionit reaksionar që janë në shërbim të drejt merre vesh se shërbimeve informative të botës? Ne, shokë, nuk e bëmë këtë, nuk e bëmë asnjëherë prej tyre. Ne, shokë, për hir të bashkimit, për hir të unitetit ua shtrimë dorën e bashkëlufëtimit edhe atyre, që nuk kishin dalë në Evropë për ta ndihmuar popullin e vet por për të luftuar për

Mehmet Hajrizi: *"Fillimisht duhet thënë se organizimi në Shqipëri i Luftës Nacionalçlirimtare, që për veprimtarët e kohës, në saje të literaturës që vinte nga Shqipëria, ishte në detaje i njohur, u bë modeli më i afërt, për ta zbatuar në kushtet e çlirimit të Kosovës. Atje ka pasur një Front Nacionalçlirimtar, që bashkonte forcat antifashiste të bindjeve të ndryshme, por Partia Komuniste në të **RUANTE ROLIN HEGJEMON.**" (Histori e një Organizate politike dhe demonstratat e vitit 1981, Tiranë 2008, f. 97)*

kolltuk e ballë të oxhakut, e kemi bërë këtë për të mirën e përgjithshme dhe nuk na vi aspak keq, sepse baza, masa e mërgimtarëve jashtë dhe masa e popullit në Kosovë, atje ku është fronti kryesor i luftës, ishte për bashkim e jo për përçarje, ishte për luftë e jo për fjalë. Për ta kryer këtë porosi të popullit, për t'u treguar bij të tij të denj ne u ulëm të bisedojmë dhe të bashkojmë armët edhe me njeri që ia kishte përplasur për toke fotografinë një njeriu që e kishte vrarë udhë dhe i cili me shokët e vet ishte bërë idol i tërë rinisë kosovare. U ulëm të bisedojmë edhe me njerëz siç është Mërgimi, për të cilin kishim fakte të padiskutueshme se ashtu si sot, që kur marshonim me kaq shpejtësi na

përçau kaq poshtërisht, po ai Mërgim kishte bërë përpjekje t'i përçajë Jusufin e Kadriun, duke u shërbyer po me mjetet e sotme, me shpifje e intriga të ulëta që nuk i bën kurrë një njeri që i thotë vetes burrë.

Ju të dashur shokë, i qitni në të njëjtën vagë gjykimi qarkoret që i shpërndante Musa Hoti, Skënderi, Mërgimi e Haxhiu me kompani ashtu tinëzisht prapa shpine me njoftimin që e botoi Zëri i Kosovës, me aprovimin e shumicës së njerëzve që kanë udhëhequr me luftën brenda e jashtë. E këto gjëra nuk qiten në një kandar, shokë. Nuk ka mbetur që punët tona të na i bëjë një kriminel e spiun i shumëfishtë siç është Musa Hoti. Ne një gjë të tillë nuk do ta bënim kurrën e kurrës. Ne nuk do të lejonim që llapanxhozët e Brukselit që nuk kanë as besë as nder të nxjerrin gazeta dhe në to të përdhosin emrin e Lëvizjes dhe varret e shokëve që me gjakun e tyre i dhanë luftës sonë një shtytje kaq të madhe. Nga letra juaj shifet se ju kenë qenë të nxitur në një hap mu nga ata që e kanë sjellur situatën në këtë shkallë. Dhe megjithatë, për hir të luftës që e kemi bërë bashkë ne qemë për atë që të ulemi dhe me fakte t'i bindim ata që as pas të gjitha këtyre nuk paskan mundur ta kuptojnë se kush është për fjalë e kush për luftë, kush për bashkim e kush për përçarje, se kush çka ka bërë gjër më sot, kush po e prish bashkimin dhe përse. Por po këto ditë, po na vijnë fjalë nga njerëz që janë në dijeni të të gjitha këtyre, se Ata nuk qenë të punës. Në kohën kur ne të gjithë shqetësoheshim e përpiqeshim për të tundur Strasburg, Bern e Gjenevë ata thurnin këto plane që sot po i vënë në jetë. Në kohën kur ne shkruanim trakte për të organizuar demonstrata në Nju-Jork e Çikago Musa Hoti, Mërgimi e Skënderi e bënë të kundërtën, tërë natën nuk flinin për t'i sabotuar ato. Gjersa ne u dërgonim shokëve materiale për të demonstruar në Australi dhe për t'ua dorëzuar autoriteteve të vendit, Mërgimi e Skënderi me shefin e tyre, agjentin e dëshmuar të UDB-së, Musa Hotin, dërgonin letra e telegrame për të na fyer e për të na njollosur. Këtë vetëm armiku e bën e askush tjetër.

Këta kurrë nuk i shqetësoi ajo se si të fusim material brenda, se si ta ndihmojmë luftën, këta nuk u shqetësuan të ndihmojmë shokët që jetonin në ilegalitet e që e propaganduan aq shumë Lëvizjen, por mu në kohën kur prisnin ndihmën tonë, ata ilegalë të famshëm të Kosovës, na doli një horr i poshtër si Mërgimi dhe nisi të na fyej e të na poshtërojë vetëm e vetëm që të humbim torruan dhe t'u nënshtrohemi poshtërsive të tij. Të gjitha ato shpifje që janë endur pas rënieve të shokëve ne na i ka vërtetuar Mërgimi me gojën e tij se vet ka qenë burimi i tyre. Dhe kur e pa se nuk u nënshtrohemi budallëqeve të tij por jemi për luftë të mirëfilltë, për punë e jo për fjalë ai ndërroi pllakë dhe nisi të akuzojë me shpifjet më të paskrupulla që mund t'ia dëgjoj sot veshi njeriut.

Përkundër të gjitha këtyre, për hirë të masës së gjerë të shokëve duarplasaritur që nuk kursyen as familjet, as fëmijët e tyre, as shtëpinë, ne ishim për takim, për bisedime në nivel në mënyrë që të binden ata njerëz që meritojnë të jenë në dijeni për disa gjëra se ku qëndron e vërteta, por pasi që edhe propozimi juaj që ne mendonim se është sekret doli nëpër tërë Evropën dhe tani dinë për të edhe ata që kushdo e di se janë vegla të armikut atëherë çfarë vlere edhe mund të ketë një takim i tillë?

Në këso rastesh preferohet t'u thuhet shokëve mos u mashtroni, mos lejoni të luhet me ju, me emrin tuaj se do të turpëroheni se nuk do të shkojë larg dhe t'u vie turp se vegla të kujt jeni bërë me dashje ose pa të. Ne nuk po e bëjmë këtë, qëllimisht nuk po e bëjmë. Veproni ashtu si ua merr mendja. Ne nuk e kuptojmë luftën si tuxharë, të "blejmë" njerëz, e të shantazhojmë ata, kjo nuk është në natyrën tonë.

Prandaj sa i përket propozimit tuaj për takim. Ne jemi për takim-sqarim me shokë lufte me të cilët na lidh lufta e ideali i përbashkët, me njerëz që me vepër kanë dëshmuar se janë për luftë e jo për fjalë, që janë për bashkim e jo për përçarje. Prandaj, në pamundësi që të vimë vetë, jemi pa dokumente, plaku është i sëmurë, etj. do t'ju luteshim që ju si shokë apo rreth t'i zgjidhni dhjetë shokë dhe të vini, të mblidhni të gjitha faktet që keni ju apo dikush tjetër kundër nesh dhe të na i thoni hapur, ne nga ana jonë do të përpiqemi t'ju bindim se jemi shokë që nuk i frikësohemi as armikut dhe as shpifjeve që i lëshojnë nëpër botë zagarët e tij.

Ne ju presim të vini, pra dhe shpenzimet do t'i ndajmë përgjysmë. Ejani kur t'ua merr mendja, kënd të vendosni ju si shokë ta dërgoni.

Me zgjedhjen e shokëve, ju lutem të keni kujdes, sepse ne nuk dëshirojmë, ashtu si edhe gjer më sot t'i bëjmë sekretet e Lëvizjes shesh për përshesh. Pra dëshirojmë të sqarohem të tilla. Ka shumë çka për të shkruar, ka shumëçka për t'u thënë, që ju sigurisht nuk jeni në dijeni, e të cilat në një letër nuk mund të thuhet, por disa gjëra duhej t'i themi. Prandaj edhe po përfundojmë me këtë: Veprimtaria e Mërgimit me kompani ka si burim frymën e sëmurë e të fëlliqur të grupeve, dëshirën për imponim, paaftësinë për ta luftuar armikun don ta shfrytëzojë për t'i luftuar bashkëluftëtarët e djeshëm, me një fjalë ky nuk është as një fraksion, por një grup i mjerë njerëzish në

Mehmet Hajrizi: *"Fillimisht duhet thënë se organizimi në Shqipëri i Luftës Nacionalçlirimtare, që për veprimtarët e kohës, në saje të literaturës që vinte nga Shqipëria, ishte në detaje i njohur, u bë modeli më i afërt, për ta zbatuar në kushtet e çlirimit të Kosovës. Atje ka pasur një Front Nacionalçlirimtar, që bashkonte forcat antifashiste të bindjeve të ndryshme, por Partia Komuniste në të **RUANTE ROLIN HEGJEMON.**" (Histori e një Organizate politike dhe demonstratat e vitit 1981, Tiranë 2008, f. 97)*

mesin e të cilëve pa asnjë dilemë qëndrojnë njerëz të UDB-së, një grup kolltukxhinjsh që mendojnë se duke i bërë varrin të tretit do të ngriten vetë, një grup injorantësh e llapanxhozësh që harrojnë luftën, që harrojnë rënkimin e popullit dhe nxjerrin thikat e përçarjes. Vie pyetja a do të kenë sukses, sigurisht se jo, sepse çdo gjë që mbillet me gënjeshtër e me shpifje dikujt ndoshta i duket e bukur, por kur mbin ajo del e shëmtuar, me dallavere as ndërtohet shtëpia, as ura, madje as gardhi. Kjo është luftë dhe kësi tipash do të na dalin prapë në rrugë, dhe ashtu si Abdullahu me kompani që pësuan disfatë po edhe këta do të pësojnë ashtu. E keqja, përgjithësisht e turpshmja nuk ka jetë të gjatë askund. Ajo mund të lëshojë degë, por edhe ato janë të përkohshme, ato janë degë pa rrënjë. Bile më mirë që tash këta kanë dalur haptas, që kanë dalur përballë me fytyrën e tyre të vërtetë, se sa kur ishin përkrah me ne. Dhe koha do ta tregojë se në anën e kujt ishte e drejta dhe e vërteta.

Brat Berat Luzha: *"Faktikisht, ne jemi **vetëquajtur** marksistë-leninistë, por realisht kemi qenë atdhetarë të mirëfilltë, idealistë. Nuk kemi qenë të indoktrinuar nga ideologjia. Kemi qenë veprimtarë të çështjes kombëtare... Pak ose fare pak jemi marrë me çështje ideologjike.*
...Rilindjen' e kam drejtuar pa asnjë problem të tillë ideologjik.
...Përmes ngjyrimit ideologjik, kemi tentuar t'i kundërvihemi ideologjisë komuniste titiste. Edhe në këtë mënyrë e kemi goditur armikun." . (Apostol Duka, Vrasje në Shtutgart, f. 220)

Me këso situatash do të mashtrohet ndonjë shokë i painformuar, ndonjë njeri që nuk i njej gjërat, por ai do të jetë një mashtrim i përkohshëm, sepse gjërave të fëlliqura siç është kjo që po e bën Mërgimi me kompani, u vie era shumë shpejt. Prandaj edhe nuk po shqetësohemi aq shumë, prandaj edhe nuk po veprojmë siç po bëjnë këta nëpër punëtorë dhe të shpifim e të thejm dhëmbët, por si gjithmonë po punojmë, po përpiqemi që me punë ta bëjmë atë që pret sot populli prej çdo njeriu, sepse vetëm puna me nder, vetëm puna e pastër si loti, vetëm puna e çiltër mbetet dëshmi, mbetet për t'u shënuar. Sepse vetëm gjërat e pastra si loti e ndihmojnë luftën e një populli. Me shpifje e intriga ndihmohet armiku. Ne do të mund t'i hidhnim poshtë me fakte të padiskutueshme të gjithë atë helm që po e vjell Skënderi me kompani nëpër Evropë, por ai nuk e meriton këtë, ai nuk është i denjë ne të merremi me të. Ai thirret në emër të Jusufit, por praktika e tregoi se ai s'ka pasur asgjë të përbashkët me të. Jusufi po të dëgjonte se sot në emrin e tij njerëzit duan t'i detyrojnë punëtorët t'i vënë fotografitë e Titos, apo i nxisin punëtorët të therren me thika mes vete, të jini të sigurt, se do të ngritej prej varrit dhe me horra të tillë do të merrej vesh ashtu siç e meritojnë ata.

Ku na ka çuar të gjithëve qerrja e Skënderit dhe punëtori e atdhetari është ai e tregon pikërisht rrethi i Stutgartit, ajo fidanishte që Jusufi e Bardhi e ujitën edhe me gjakun e tyre. Aty sot shumica e njerëzve, këtë duhet ta pranojmë shokë, janë vënë pas qerres së një Abdullah Prapashtica, që nuk ka në kokë aq sa kishte Jusufi në këmbë. Kjo do të jetë një luftë e gjatë, kjo do të jetë një luftë e rëndë, shokë, por në të do të dalin fitimtarë ata që janë të pastër ata që nuk kursejnë asgjë për të mirën e përgjithshme, ata që vuajnë e përpiqen natë e ditë për të mirën e popullit të vet ata nuk mund t'i përlyej askush e lere më një Mërgim, që ka dalur nëpër botë jo për luftë por për të manipuluar me njerëz. Dielli i njerëzve të tillë ka përfunduar përgjithmonë.

Ata që e sollën punën gjer këtu po dashkan të na nxjerrin edhe një tjetër gazetë, madje mu kur ne përgatiteshim t'i shprehnim mendimet tona për një bashkëbisedim mes shokësh që i konsiderojmë burra e shokë, shkon një njeri kafenesh e rrugësh, dhe në "emër" të Lëvizjes don ta ndërroj vendin e adresës së Zërit të Kosovës, një adresë që sot është bërë e njohur për të gjithë shqiptarët e botës, një adresë në të cilën dërgojnë përgjegjet e tyre në kërkesat që i bëjnë punëtorët tanë në demonstrata edhe shtete të ndryshme madje edhe Organizata e Kombeve të Bashkuara, dhe me një njeri të tillë ju, shokë të Stutgartit na propozoni të ulemi të bisedojmë. Jo, me njerëz të tillë, me rrugaç e

Mehmet Hajrizi: *"Fillimisht duhet thënë se organizimi në Shqipëri i Luftës Nacionalçlirimtare, që për veprimtarët e kohës, në saje të literaturës që vinte nga Shqipëria, ishte në detaje i njohur, u bë modeli më i afërt, për ta zbatuar në kushtet e çlirimit të Kosovës. Atje ka pasur një Front Nacionalçlirimtar, që bashkonte forcat antifashiste të bindjeve të ndryshme, por Partia Komuniste në të **RUANTE ROLIN HEGJEMON.**" (Histori e një Organizate politike dhe demonstratat e vitit 1981, Tiranë 2008, f. 97)*

kolltukxhinj që për interesat e tyre të ulëta personale, me njerëz të nxitur e të shtytyr nga xhelozia dhe nga vetë armiku, që duan të luajnë me luftën tonë ne nuk mund të ulemi në një tavolinë kurrë, me ata nuk na bashkon asgjë, ata qe dy vjet, sa ka që jemi bashkuar nuk e kanë treguar as minimumin e sinqeritetit. Këtu bën përjashtim Skënderi, i cili në fillim u tregua shok, gjersa nuk ra viktimë e dallaveve të Mërgimit dhe sot është bërë

një vegël e tij e mjerë. Për të shkuar aq larg sa në këtë situatë dhe mjerisht në emër të Jusufit të shkojë aq larg sa të ndërmarrë hapa në Evropë ndër punëtorë të ndershëm e duarplasarit që të qesin edhe fotografitë e Titos nëpër klube, për të shkuar pastaj edhe më larg dhe për t'i ndërsyer punëtorët t'ia fusin thikat njëri-tjetrit. Ajo çka ka ndodhur në Dyseldorf është vepër e Skënderit. Ai me atë gjest, edhe kur një i ri i papjekur si Milaimi, e ka parë se nuk bën ashtu ai e ka nxitur dhe ja se ku e ka sjellur punën. Me njerëz që e bëjnë popullin mish për top, ne nuk na lidh asgjë.

Nuk ka vend që ka shkuar Skënderi, që i besuam detyrë aq të rëndësishme, e të mos ketë mbjellur përçarjen e mosunitetin, të mos ketë shpifur prapa shpine, e të mos ketë bërë përpyekje t'i përvetësoj edhe njerëzit më të dyshimtë, për të cilët tashmë kemi fakte të padiskutueshme se kush janë dhe kujt i shërbejnë. Dhe tash na doli haptas, pasi e pa se shefi i tij Mërgimi është diskredituar dhe s'i ka mbetur sy e faqe të dalë para askujt. Sepse letrat që ai shkroi para dy muajsh sot po i boton, të thuash pas asnjë ndryshim "Politika" e Beogradit. Këta kanë shkuar aq larg, sa që për qëllimet e tyre të ulëta luajnë edhe me jetën e njerëzve që kalben burgjeve, me ata njerëz që edhe ndër torturat më të tmerrshme nuk pranuan se njohin ndonjë shok të veçantë, kur Mërgimi me Musa Hotin shpërndajnë trakte dhe thonë, në kohën kur dënoheshin njerëzit, se ata i paska dërguar filan filani. Këtë nuk e bëjnë burrat, këtë një shqiptar që e ka vetëm një dërrhem burrni nuk do ta bënte kurrë. Ky akt i ulët edhe një tupnaxhi do ta neveriste. Dhe ju, shokë, na thuani të ulemi edhe me një njeri të tillë e të bisedojmë. Jo, shokë, ai me kompani nuk meriton të mendohet as të shkruhet për të e lere më të bisedohet. Ai ka shkuar aq larg sa edhe sekretet kryesore të Lëvizjes t'i shpërndajnë nëpër botë si të ishin ato bagla leprash, e njerëzit për to lënë veshkë e mushkëri nëpër kazamatet jugosllave dhe nuk e qelin gojën. Por ani ndashtë, aq më keq për ta. Të gjitha këto ndodhën, shokë, dhe ne heshtëm. Ne nuk e qelëm gojën. Ne ua treguam vetëm disa prej këtyre gjërave shokëve që erdhën prej Stutgartit. Dhe heshtëm, as shpërndamë trakte prej Australisë e gjer në Amerikë as dolëm ndër punëtorë që të ndyejmë gojën me shpifje nga më të ulëtat. Këtë e bënë ata që po flasin në emrin tuaj, ata që kanë nxitur shokë në mesin tuaj edhe për të shkruar letra, përfundimisht vetëm ata që e dimë se janë për luftë, me punëtorët që ky realitet i vret dhe i mundon më së shumti. Na lajmëroni disa ditë përpara dhe do të ishte mirë që për takimin të mos përhapet fjala dhe me vete, po e përsërisim, merrni të gjitha faktet që ua merr mendja se ne u kemi hyrë në hak juve apo luftës, mos e kurseni asnjë, jini të sigurt se do të jemi të gatshëm para shokëve t'i pohojmë edhe lëshimet tona, t'i pranojmë të gjitha ato që nuk janë në interesin e luftës, por jemi të bisedojmë me burra e me shokë, me njerëz të fjalës e të besës. E Skënderi me Haxhiun, me Mërgimin dhe me radaktorin e ardhshëm të Zërit të Kosovës, Musa Hotin le të shtypin gazeta tërë ditën e tërë natën, se kjo neve nuk na shqetëson aspak. Bile po presim të mbledhim sa më shumë material në mënyrë që kur ta themi fjalën tonë, ajo të jetë bindëse, të jetë e fortë dhe shkatërruese për të gjithë ata që e sollën punën gjer këtu, të jetë dërrmuese për të gjithë ata që po përpiqen t'i përçajnë njerëzit mes veti.

Kësaj Lëvizje i kemi dhënë gjak e i kemi dhënë jetë, prandaj themelet e saj nuk do të lejojmë më të rrëmihe lloj-lloj budallai që mendon se lufta e një populli është stof prej të cilit mund të qepen herë brek e herë këmishë.

Nuk po e zgjasim më shumë, shokë, prandaj u mbetet juve të vendosni si të shihni se është më së miri. Veproni vetëm ashtu siç u urdhëron ndërgjegjja juan. Nga ana jonë do të përpiqemi ta bindim çdo shok e bashkëlufëtar se jemi për luftë e jo për

fjalë, se jemi për bashkim e jo për përçarje. Pra le t'i mbetet të ardhmes të tregoj se në anën e kujt është e vërteta.

Në pritje të përgjegjes tuaj, të dashur shokë, ju lutem t'i pranoni përsëritjet e përzemërta vëllazërore të shokëve nga Zvicra (Xhafer Shatri) 29 qershor 1984

57. Letër Faridin Tafallarit, 29 tetor 1984

I dashur shok,

po të shkruaj shkurtimisht. Kësaj radhe po ta dërgoj këtë Statut dhe po të njoftoj se fillimisht u përpoqa ta korrigjojë këtë të Muhametit, por vërtetë ishte e pamundur sepse në të nuk kishte asgjë, ajo ishte thjeshtë një lojë e tij, kështu që u detyrova t'ia nis prej fillimit (zeros - shën i Xh. D.). Besoj se ka dalur bukur i plotë, por sigurisht ka akoma shumë nevojë për plotësim me idetë dhe mendimet e shokëve që duhet t'i japin në takimin e ardhshëm të KQ dhe sidomos në lexim me celulat dhe komitetet e vendit.

Këtë kopje nuk po ia dërgoj fare as Muhametit as Iliazit (Ibrahim Kelmendit-shën i Xh D), sepse e di shumë mirë se do të jetë edhe një shkak tjetër që të na i humbin edhe një mori netësh, duke na lënë pa gjumë në teorizime boshe, prapa të cilave nuk fshihet tjetër veçse ambicieve personale.

Prandaj ti lexoje këtë dhe përgatitu për diskutim qoftë për të qoftë për Programin. Të lutem lexoje me vëmendje dhe mos hezito për asnjë moment për të dhënë kritika të pjekura të cilat gjithmonë ndihmojnë që të përmirësojmë të metat tona.

A bisedove akoma me atë shokun t. për fotok?

Familjen si e ke?

Ne jemi mirë.

Përsëritje vëllazërore Xhema

Pra për këtë Projektstatut mos i fol askujt gjë

29 tetor 1984

58. NJOFTIM I SHOKËVE NGA ZVICRA

NJOFTIM

Njoftohen shokët Xhafer Shatri dhe Ibrahim Kelmendi për mbledhjen e fundit të KQ të LRSSHJ.

Më 10.2.1985 KQ (Komiteti Qendror-shën. i red.) mbajti mbledhjen e vet të rregullt. Rendi i ditës ishte:

1. Analiza e Organit Qendror dhe shqyrtimi i propozimeve të Redaksisë për ndryshimin e "Zërit".

2. Raportimi për punën e forcave të organizuara në Kosovë.

3. Shqyrtimi kritik lidhur me sjelljet dhe punën e Xhafer Shatrit dhe Ibrahim Kelmendit.

Në mbledhje nuk ishin prezentë shokët Xhafer Shatri e Ibrahim Kelmendi.

Duke pasur parasysh situatën e krijuar në KQ të cilën e ka kapluar fryma e grupeve, frymë e cila është reflektuar edhe te forcat e tjera të organizuara jashtë dhe në Kosovë, andaj është e domosdoshme të bëjmë spastrimin e radhëve nga shokët të cilët janë të ngarkuar me këtë frymë përçarëse dhe të cilët po i shkaktojnë dëme luftës sonë.

Shoku Xhafer Shatri pas ardhjes në Zvicër i hyri punës në të madhe, duke kontribuar shumë në nxjerrjen e Organit qendror "Zëri i Kosovës". Vazhdimësia e daljes së "ZK" është e lidhur drejtpërdrejt me Xhafer Shatrin. Puna organizative e forcave të organizuara në Kosovë dhe fryti që del prej tyre është i lidhur edhe me Xhaferin. Por, në punën e tij Xhaferi bëri edhe mjaft gabime e lëshime politike, duke krijuar edhe frymën e mosbesimit ndaj njerëzve. Duke e parë situatën e krijuar, Xhaferi (Shatri-shën. e red.) dha dorëheqje me shkrim.

Derisa shoku Xhafer në punën e tij që bëri e përcollën edhe gabimet, në anën tjetër shoku Ibrahim Kelmendi nuk punoi fare, por u muar drejtpërdrejt me përcjelljen e punëve dhe gabimeve të Xhaferit; u muar me thash e thëna në mesin e punëtorëve. Bëri edhe dekonspirime të sekreteve të KQ të LRSSHJ-së. Keqpërdori ndihmat për Kosovën, duke mos sjellur në fond asnjë qindarkë. P.sh. të përmendim vetëm rastin e Suedisë në praninë e katër vetave një familje shqiptare i dha ndihmë luftës sonë prej 50.000 korona, prej të cilave nuk solli asnjë qindarkë, si dhe ndihmat që dhanë familjet e tjera në Suedi; mbjellja e frymës përçarëse në vetë KQ; mospërgjegjësia ndaj punës; prishja me miq zviceranë; mosaktiviteti me të huaj dhe krijimi i ftohjes së tyre ndaj luftës sonë dhe organizatës sonë; qëllimi pretendues i formulimit të fjalisë: "Vërejtjet, sugjerimet e propozimet që do të vijnë pas fillimit të dhjetorit të këtij viti do të kenë vlerën e vet, por nuk do të mund të merren parasysh, pasi në ndërkohë KQ dhe Komitetet e rretheve do të mbajnë mbledhjen për të aprovuar Programin e Statutin e LRSHJ-së" me të vetmin qëllim që të sabotojnë punën e diskutimit dhe shqyrtimit të PP dhe PS dhe në anën tjetër për të shfrytëzuar tubimin e zgjeruar për diskreditimin e Xhaferit me gabimet që ka bërë. Në KQ nuk qe vendosur të thirrej tubimi i KQ me Komitetet e rretheve të cilën gjë shoku Ibrahim Kelmendi e bëri pa dijen e shokëve duke u thirrur se gjoja qenka vendosur në mbledhjen e KQ, gjë e cila nuk ishte e vërtetë. Qëllimi i gjithë kësaj ishte ai që cekëm më lart, diskreditimi i Xhaferit para një tubimi më të gjerë. Kjo tregon se si disa njerëz veprojnë pas shpine pa u konsultuar me shokë, e këtë e bëri shoku Ibrahim Kelmendi.

Për shkak të krijimit të mosbesimit ndaj njerëzve, lëshimeve dhe gabimeve politike si dhe mbjelljen e frymës përçarëse KQ vendosi që të ndërmarrë masa për nxjerrjen e KQ nga situata e krijuar dhe të bëjë spastrimin e radhëve nga mospunëtorët dhe përçarësit.

Kështuq KQ i LRSSHJ me shumicë votash 4:1 (katër me një) vendosi që shokët Xhafer Shatri dhe Ibrahim Kelmendi përjashtohen nga KQ i LRSSHJ-së, përderisa të mos e vërtetojnë të kundërtën me aktivitetin e tyre.

10 shkurt 1985 Zvicër

KQ i LRSSHJ

(Faridin Tafallari, Terror-Dhimbje-Qëndresë, Tiranë 1997, f .253-254)

Letra për QENDRËN EKZEKUTIVE (QE) të Ibrahim Kelmendit 1983-1984

Nëntitulli i parë (Kurva, kurvarë dhe kurvërime) është marrë nga libri "Lëvizja e Jusuf Gërvallës" të Xhafer Durmishit.

1. KURVA, KURVARË DHE KURVËRIME
2. BAZUAR NË PËRCAKTIMIN TIM
3. DËSHIROJ TË SHFAQ PËRCAKTIMIN TIM
4. MEMORIZIMI I HISTORISË NË SHËRBIM TË SË VËRTETËS
5. E QUAJ TË DOBISHME TË OFROHEN INFORMATA, DËSHMI, DOKUMENTACION
6. Letër Faridin Tafallarit, 13 mars 1981
7. NË BAZA TË SHËNDOSHA MARKSISTE-LENINISTE!
8. Letër e Ibrahim Kelmendit për Faridin Tafallarit, 8 prill 1982
9. Kush është vojvoda Ramë Nikçi?
10. Letër-shkresë e Ibrahim Kelmendit, 17 qershor 1982
11. Letra e 14 prillit 1983
12. Letër F. Tafallarit, maj 1983
13. Letra e 4 majit 1983
14. Letra e 7 majit 1983
15. Letra e 3 qershorit 1983-F
16. Letra e 3 qershor 1983 - S
17. Letër F. Tafallarit, 17 qershor 1983
18. Letra e 30 qershorit 1983
19. Letra e 12 gushtit 1983
20. Letra e 25 gushtit 1983
21. Letra e 15 shtatorit 1983
22. Letra e 10 tetorit 1983
23. Letër e Ibrahim Kelmendit për Faridin Tafallarit, 3 janar 1984
24. Qarkore x. Janar 1984
25. Letër e Ibrahim Kelmendit për Faridin Tafallarit, janar 1984
26. Letra e 11 janarit 1984
27. Letra e 17 janarit 1984
28. Letra e 19 janarit 1984
29. Letra e 19 marsit 1984
30. Letër për "Dukagjinin", 22 qershor 1984

1. KURVA, KURVARË DHE KURVËRIME

Të gjitha citatat (me përjashtim të atij rreth dramës Misioni të Sabri Hamitit) nuk kanë asnjë koment përveç titujve që kanë për qëllim lehtësimin e dukjes së citateve.

KOMITETI QENDROR I LRSSHJ " Keqpërdori ndihmat për Kosovën, duke mos sjellur në fond asnjë qindarkë. P.sh. të përmendim vetëm rastin e Suedisë në praninë e katër vetave një familje shqiptare i dha ndihmë luftës sonë prej 50.000 korona, prej të cilave nuk solli asnjë qindarkë, si dhe ndihmat që dhanë familjet e tjera në Suedi."
(Vendim i Komitetit Qendror të Lëvizjes për Republikën Socialiste Shqiptare në Jugosllavi për përjashtimin e Ibrahim Kelmendit nga KQ, më 10 shkurt 1985. Marrë nga Faridin Tafallari, *Terror-Dhimbje-Qëndresë*, Tiranë 1997, f.253-254)

I. Kelmendi: "Në xhepat e mijë të grisur nuk ka bir nëne (e as bir kurve), që do mund të kërkonte të hollat e tij ose të hollat e cilido kontribues, që do të thotë se nuk kam shpërdoruar e përvetësuar nga

ato mjete për vete dhe as për familje." (Afishuar me: 23.03.2007 21:18,
www.kosova.de)

Daut Demaku: "**Dimensioni politik i romanit "Atentatet" është aq i thellë dhe aq domethënës sa iu mbetet studiuesve të rinj që ta zbërthejnë në qetësi, sepse brumi është aq i vërtetë, aq konkret dhe aq i bollshëm sa mjafton për gatime të të gjitha veprave politike, juridike, kriminalistike, psikologjike...**" (Prishtinë, 26 gusht 2007, www.pashtriku.org)

-1. Shqiptarët kurvarë garonin midis tyre

Gjatë marrjes në pyetje, në Vjenë, të kolegut të Dajës Ramadan nga posta e Pejës, i cili i zënë ngushtë betohet në kokën e vajzës

I. Kelmendi: "*Betimi në kokë të vajzës e neveriti Miranin, meqë kishte dëgjuar se ajo po ushtronte prostitucion në Vjenë. I kishin thënë se ishte e pashme e tërheqëse dhe se shqiptarët kurvarë në Vjenë garonin midis tyre që t'i jepnin asaj shilinga dhe të krekoseshin para njëri-tjetrit.*" (Atentatet, f.80)

-2. Faturat përmbajnë tatimin e vlerës së shtuar

I. Kelmendi për vetveten dhe për kurvarët profesionist që mbajnë kontabilitet e i paguajnë tatimet dhe sigurimet sociale me rregull

I. Kelmendi: "*Se si po më vjen keq që qenka katandisur në atë gjendje. Më drejtohet duke më poshtëruar, se dashka të bëka seks më mua, meqë nuk paska të holla për të paguar mashkull kurvar, nga ata që e kanë si marrëdhënie pune dhe paguhen nga femrat për të dëfryer ato kur kanë deficit seksual. Edhe ato fatura të pagesës përmbajnë tatimin e vlerës së shtuar, që duhet t'ia paguajnë shtetit, njësoj si edhe prostitutat e legalizuara që paguajnë të gjitha sigurimet sociale dhe tatimin vjetor mbi fitimin.*" (Atentatet, f.95)

-3. A të fascinoi edhe për bixhoz dhe kurvëri - Për Sadik Blakajn

Ibrahim Kelmendi: "*– Pse nuk po flet? – ia ndërpreu Vasili mendimet.*

– *Po atëherë çfarë ndodhi?*

– *Vërtet, Sadiu erdhi pas dy ditëve. Ndenjëm ca ditë bashkë te Demushi në Nagold. Atje u fascinoi nga shkathtësitë dhe patriotizmi i tij. Kishte shkathtësi të falsifikonte dokumente të të gjitha llojeve. Madje edhe bileta të trenit. Kishte shkathtësi për të qenë gueril i përkryer...*

– *A të fascinoi edhe për bixhoz dhe kurvëri, sepse kohën më të madhe e kalon me to? f.180*

"– *Po bëhem kurban, – ndërhyri Vasili. – Më mirë unë se ti dhe Baca Jusuf.*

– *Çfarë rëndësie ka kjo provë naive e shoqëruar me rrezik të qind për qindtë!? Në fakt, përse po na duhet ky farë Sadiu!? Ti vetë duhej të ishe bindur të paktën se ai është kurvarë, bixhozhinj, rrugaç! – i foli rrebtë Mirani.*" (Atentatet, f.182)

-4. U tërbova duke i thënë kurvar

Rreth fatit të një femre në duart e UDB-së e cila nga Kosova është nis enkas me plan të martohet me figurën frontale të Frontit të Kuq

Ibrahim Kelmendi: "Menjëherë u tërbova duke i thënë pusht, **kurvar** e të ngjashme. Bëra të iki, por ai e kishte mbyllur derën dhe çelësin e kishte futur në xhep." (Atentatet, f. 204)

-5. Sa për kurvërim të kam ty këtu më afër (Në bisedë me heroinën e vetë Renatën)

Ibrahim Kelmendi: "– Edhe ty nuk të shkoi mendja aq afër dhe aq qëllueshëm. Unë të fola për lisa, kurse ti më flet për fshesa, siç shprehet populli ynë. A nuk e kisha Martën këtu, e cila më përgjerohej, **pa pagesë**. Atëherë, përse u dashka të shkoj deri në Berlin për **kurvërim**? E di ti sa janë shpenzimet e udhëtimit deri atje dhe si keqtrajtohesh kur kalon transit nëpër Gjermaninë Lindore? Pastaj, po të **kisha kurvërimin si qëllim, a nuk të kam ty këtu më afër?**

– Stop! Stop! Mua kurrsesi për **kurvërim**. More vesh!?

– Stop! Stop! Ti e nise e para dhe më ofendove." (Atentatet, f.214-215)

KOMITETI QENDROR I LRSSHJ " Keqpërdori ndihmat për Kosovën, duke mos sjellur në fond asnjë qindarkë. P.sh. të përmendim vetëm rastin e Suedisë në praninë e katër vetave një familje shqiptare i dha ndihmë luftës sonë prej 50.000 korona, prej të cilave nuk solli asnjë qindarkë, si dhe ndihmat që dhanë familjet e tjera në Suedi."
(Vendim i Komitetit Qendror të Lëvizjes për Republikën Socialiste Shqiptare në Jugosllavi për përjashtimin e Ibrahim Kelmendit nga KQ, më 10 shkurt 1985. Marrë nga Faridin Tafallari, Terror-Dhimbje-Qëndresë, Tiranë 1997, f.253-254)

I. Kelmendi: "Në xhepat e mijë të grisur nuk ka bir nëne (e as bir kurve), që do mund të kërkonte të hollat e tij ose të hollat e cilido kontribues, që do të thotë **se nuk kam shpërdoruar** e përvetësuar nga ato mjete për vete dhe as për familje." (Afishuar me: 23.03.2007 21:18, www.kosova.de)

-6. Kapni kurvarët që jua bënë shoshë gratë e vajzat

Në doganën e Gjermanisë Lindore (DDR)

I. Kelmendi: "Atëherë, i thashë, kapni **kurvarët** që jua bënë shoshë gratë e vajzat, duke i paguar devizat që ndërrojnë në treg të zi." f.216

"Iu përgjigja se nuk kisha menduar ashtu, por se doja t'ju thosha t'i pengoni **kurvarët** që po vijnë, po bëjnë kontrabandë dhe po jua provokojnë gratë e vajzat me para." (Atentatet, f.216)

-7. Nuk ka bir nëne e as bir kurve

KOMITETI QENDROR I LRSSHJ " Keqpërdori ndihmat për Kosovën, duke mos sjellur në fond asnjë qindarkë. P.sh. të përmendim

vetëm rastin e Suedisë në praninë e katër vetave një familje shqiptare i dha ndihmë luftës sonë prej 50.000 korona, prej të cilave nuk solli asnjë qindarkë, si dhe ndihmat që dhanë familjet e tjera në Suedi." (Vendim i Komitetit Qendror të Lëvizjes për Republikën Socialiste Shqiptare në Jugosllavi për përjashtimin e Ibrahim Kelmendit nga KQ, më 10 shkurt 1985. Marrë nga Faridin Tafallari, Terror-Dhimbje-Qëndresë, Tiranë 1997, f.253-254)

I. Kelmendi: "Në xhepat e mijë të grisur nuk ka bir nëne (e as bir kurve), që do mund të kërkonte të hollat e tij ose të hollat e cilido kontribues, që do të thotë se nuk kam shpërdoruar e përvetësuar nga ato mjete për vete dhe as për familje." (Afishuar me: 23.03.2007 21:18, www.kosova.de)

-8. Shkrimtari harton fabula

Mustafë Xhemali: "Skema e famshme e Aristotelit lidhur me historinë dhe letërsinë është e qartë. Ajo nuk ka ndryshuar as sot dhe është kështu: **Historia tregon atë që ka ndodhur, ndërsa letërsia (poezia) tregon atë që mund të ndodhë;** historia tregon çka ngjet, letërsia tregon si mund të ngjajë; historia tregon gjëra të veçanta, letërsia tregon gjëra të përgjithshme, prandaj letërsia është më filozofike se historia. Më tutje: historiani shënjon referencat (të dhënat), **shkrimtari shënjon tekstin fiktiv, të mundshmen; historiani nuk harton fabula, kurse shkrimtari harton fabula.** Edhe më tej: historia mund të jetë e shkruar në vargje e të mos bëhet letërsi. Sepse e para mbështet te e vërtetëdhshmja (që do të thotë e mundshme) kurse e dyta në ngjashmëri (që do të thotë e besueshme). (shih te **S. Hamiti: Tematologjia, f.70**)." (Atentatet e zbuluara - Fjala promovuese më 14 prill 2007 në Dyzeldorf (Gjermani), për romanin e Ibrahim Kelmendit ATENTATET, www.pashtriku.org)

-9. Qenke njeri i poshtër

Atyre që ju intereson teoria e letërsisë mund shohin çka thotë Sabri Hamiti tek "Tematologjia f.70". Atyre që u intereson Drama e 17 janarit 1982, mund të shohin tek drama Misioni, pjesa e parë, skena IV, ku flitet për Ibrahim Kelmendin (**Keqën**), Kadri Zekën (**Lulin**), Jusufin (**Isën**) gruan e Jusufit (**Zanën**) dhe gruan e Kadri Zekës (**Lulën**). Pa komentuar aspekte tjera, interesant është 'respekti' për gratë, të cilin Sabri Hamiti duhet ta ketë mësuar nga burimi i tregimit të tij. Për hir të qartësisë brenda citateve në kllapa janë vënë emrat e personazheve të vërteta.

Pjesët e cituara paraqesin biseda në shtëpinë e Jusufit në mesditën e 17 janarit 1982.

Keqa nuk mund të jetë i keq

Sabri Hamiti: "ZANA (Suzana), hap derën, fut kokën.

Mirëdita të gjithëve!

KEQA (Ibrahim Kelmendi), Zanës.

Hyn fisnike vetëm një minutë. *Ia shtrin dorën, përshëndetet, mandej ulet.* Këtij Lulit tonë po i ngutet. Si e pleqnon ti fisnike këtë punë? *Zana rrudhë krahët. Ky e ka mendjen te Lula e vet e re që ia ka lënë shtratin thatë. Qetësi.* Unë jam kalli vetëm dhe s'kam çka të ngutem. E kam nanën vejushë të cilës s'mund t'ia gjej një plak. E kam edhe një motër, e sa për motër moj fisnike ia kam gjetur burrin. Ha-ha-ha. Do ta bëjmë dhëndër Isën për së dyti. *Isa hesht. Shikon Zanën, e cila pa asnjë fjalë del.*

LULI (Kadri Zeka), i mërdhezur.

E mira e të mirave po të lut, Lulën mos e përmend.

ISA (Jusuf Gërvalla), mban veten.

Të lutem Keqë, **respekt për shtëpinë, konakun, për femrën.** Të gjithë jemi me nerva, **por kjo është shtëpi.**" (*Misioni, Prishtinë 1997, faqe 41*)

Sabri Hamiti: "KEQA (Ibrahim Kelmendi), dredhas.

Ky prapë nuk e ka mendjen këtu. Ha-ha-ha. E ka mendjen te shtrati i thatë i Lulës.

LULI (Kadri Zeka), e gjuan fytyrës me bllok.

Qenke njeri i poshtër!" (*Misioni, Prishtinë 1997, faqe 46*)

S.H.: "Keqa nuk mund të jetë i keq" (*Misioni, faqe 49*)

Dordoleci superior i UDB-së Serbe dhe Vëzhguesi i tij superior: "Në këtë pozitë inferiore nga ana e „zëvendësit“, ndjehej edhe udhëheqësi i FKP-së, Ibrahim Kelmendi." (Nuhi Sylejmani, Vrasja e trefishtë, 2010, f. 89)

Ibrahim Kelmendi: "Sadik, ...Gjithsesi, çdo gjë do nxjerrë koha në dritë, por ti duhet të provosh menjëherë ta përshkruash ngjarjen pastaj të shohim: **ndoshta je i pastër si loti dhe mbetemi shokë të mirë.** Për të ardhur gjer tek kjo, do të ishte dashur një sinqeritet i thellë, duke pranuar edhe ndonjë gabim të vogël nga mosdija..." (*Letër për Sadik Blakajn më 21 janar 1981. Marrë nga Faridin Tafallari, Terror-Dhimbje-Qëndresë, Tiranë 1997, faqe 407*)

-10. Pa pretendim për të qenë të vërteta historike

Ibrahim Kelmendi: "Ato (ngjarjet-shën. i Xh. D.) janë paraqitur ashtu siç i kam përjetuar dhe siç i kam mbajtur mend, **pa pretendim për të qenë të vërteta historike.**" (*kopertina e mbrapme e romanit Atentatet*)... "romanin e kam shkruar sipas qejfit"."

Ibrahim Kelmendi: "Mirani mori frymë thellë për të pritur reagimin. Kishte frikë mos po e humbiste durimin, pasi ishte bindur se shtabi i UDB-së që kishte urdhëruar atentatet, tani kishte dhënë urdhër që të provokohej Mirani për të bërë ndonjë hata ndaj provokuesve.

– Jo vetëm ti, por as ajo **kurva**, që ju po i thoni Bule, nuk jeni të dëshiruar të qëndroni më këtu, – foli Xhafari.

Të gjithë të pranishmit hapen sytë në drejtim të Xhafarit, pos Nuriut që vazhdonte të mbante kokën ulur, pothuajse midis këmbëve. Sikur pjesëmarrësit nuk po u zënin besë veshëve çfarë dëgjuan.

– **Përse është kurvë bashkëshortja e nderuar e Kadriut?** – ia drejtoi Mirani Xhafarit, duke ruajtur qetësinë e jashtme, të cilën përbrenda pothuajse e kishte humbur. Sa s'po eksplodonte.

– **Ajo kurvë e dërguar nga UDB-ja** i ka qitur shokët në pritë, – u përgjigj Xhafari, që po ngjante me shumë në një kërmë se sa në njeri.

– Pa na e zërthe edhe këtë komplot, se si i keni sajuar detajet!?

– Nuk jam këtu para UDB-së që të përgjigjem në pyetjet e tua, – tha Xhafari.

– **Mor kriminel i dërguar, do të sqarosh apo do të ta dredh qafën si të gjelit!?** – e kërcënoi Mirani, i cili po shtrëngohej për t'ia mbërthyer fytyrën. Tashmë Mirani kishte fituar siguri se pos ndërhyrjes për t'i ndarë nuk do t'i hidheshin të tjerët.

– Dihet, – nisi të përgjigjet Xhafari, që kishte humbur davanë, – **Kadriu ka lënë orarin kur do t'i telefonojë kurvës së tij.** Ajo ka informuar vrasësit për orar dhe pastaj vrasësit kanë zënë pritë." (*Atentatet, f. 363-364*)

Ibrahim Kelmendi: "Sadik, ...Gjithsesi, çdo gjë do nxjerrë koha në dritë, por ti duhet të provosh menjëherë ta përshkruash ngjarjen pastaj të shohim: **ndoshta je i pastër si loti dhe mbetemi shokë të mirë.** Për të ardhur gjer tek kjo, do të ishte dashur një sinjeritet i thellë, duke pranuar edhe ndonjë gabim të vogël nga mosdija..." (Letër për Sadik Blakajn më 21 janar 1981. Marrë nga Faridin Tafallarit, Terror-Dhimbje-Qëndresë, Tiranë 1997, faqe 407)

Dezertori apo Dordoleci superior i UDB-së Serbe dhe Vëzhguesi i tij superior: "Në këtë pozitë **inferiore** nga ana e „zëvendësit“, ndjehej **edhe** udhëheqësi i FKP-së, Ibrahim Kelmendi." (Nuhi Sylejmani, Vrasja e trefishtë, 2010, f. 89)

-11. Mos më keqkuptoni, por kam shkruar sipas qejfit tim

Ibrahim Kelmendi: "Ato (ngjarjet-shën. i Xh. D.) janë paraqitur ashtu siç i kam përjetuar dhe siç i kam mbajtur mend, **pa pretendim për të qenë të vërteta historike.**"(kopertina e mbrapme e romanit *Atentatet*)..."romanin e kam shkruar sipas qejfit".

Saime Isufi: "...Këtë e bëj, pas leximit të **veprës tënde historike "Atentatet"**, për të cilën të përgëzoj nga zemra! Edhe njëherë urime!

...Për ato rrethana, ku pjesëmarrëse kam qenë edhe vetë, vërtetë secilin personazh e ke paraqitur të tillë siç pata mundësi t'i njihja edhe vetë." (Letër I. Kelmendit, 5 mars 2007, www.pashtriku.org)

I. Kelmendi: Afishuar me: 26.03.2007 15:45 "**Mos më keqkuptoni, por romanin e kam shkruar sipas qejfit dhe bindjeve të mia. Edhe po t'i dija qejfin, bindjet dhe përcaktimin Tuaj, ua them më keqardhje, nuk do ta kisha shkruar sipas tyre.**" (www.kosova.de)

-12. Keqpërdori ndihmat për Kosovën

Përjashtimi i Ibrahim Kelmendit prej KQ të LRSSHJ (Komitetit Qendror të Lëvizjes për Republikën Socialiste Shqiptare në Jugosllavi), pos tjerash për keqpërdorimin e ndihmave për Kosovën

"Njoftim

Njoftohen shokët Xhafer Shatri dhe Ibrahim Kelmendi për mbledhjen e fundit të KQ të LRSSHJ

"Duke e parë situatën e krijuar, Xhaferi (Shatri-shën ynë) dha dorëheqje me shkrim.

Derisa shoku Xhafer (Shatri-shën ynë) në punën e tij që bëri e përcollën edhe gabimet, në anën tjetër shoku Ibrahim Kelmendi nuk punoi fare, por u muar drejtpërdrejt me përcjelljen e punëve dhe gabimeve të Xhaferit; u muar me thash e thëna në mesin e punëtorëve. Bëri edhe dekonspirime të sekreteve të KQ të LRSSHJ-së.

Keqpërdori ndihmat për Kosovën, duke mos sjellur në fond asnjë qindarkë. P.sh. të përmendim vetëm rastin e Suedisë në praninë e katër vetave një familje shqiptare i dha ndihmë

I. Kelmendi: "Udhëtova me Hakanin,, alias Plakun dhe Sarandën, alias Bulen. Në Suedi na pritën bujarisht. Fëllanza me bashkëshortin dhe patriotin e devotshëm, Nexhip Toskën na dhanë **pesëdhjetë mijë korona** suedeze ndihma. Ishte rasti i parë që po na jepej një ndihmë kaq e madhe." (Atentatet, f.391)

luftës sonë prej 50.000 korona, **prej të cilave nuk solli asnjë qindarkë**, si dhe ndihmat që dhanë familjet e tjera në Suedi; mbjellja e frymës përçarëse në vetë KQ; mospërgjegjësia ndaj punës; prishja me miq zviceranë; mosaktiviteti me të huaj dhe krijimi i ftohjes së tyre ndaj luftës sonë dhe organizatës sonë."

"Kështuqë KQ i LRSSHJ me shumicë votash 4:1 (katër me një) vendosi që shokët Xhafer Shatri dhe Ibrahim Kelmendi përjashtohen nga KQ i LRSSHJ-së, përderisa të mos e vërtetojnë të kundërtën me aktivitetin e tyre.

10 shkurt 1985 Zvicër

KQ i LRSSHJ" (Faridin Tafallari, *Terror Dhimbje Qëndresë, Tiranë 1997, f.253-254*)

Dëshmitare kur Ibrahim Kelmendit i janë dhënë 50 mijë korona suedeze nga Nexhmi e Shefkate Sherolli është Saime Isufi. Anëtare e Komitetit Qendror të LRSSHJ në Zvicër, i cili më 10 shkurt 1985 e përjashtoi Ibrahim Kelmendin për hajni është Saime Isufi.

Ibrahim Kelmendi: Afishuar me: 23.03.2007 21:18 "Në xhepat e mijë të grisur nuk ka bir nëne (e **as bir kurve**), që do mund të kërkonte të hollat e tij ose të hollat e cilido kontribues, që do të thotë se nuk kam shpërdoruar e përvetësuar nga ato mjete për vete dhe as për familje." (www.kosova.de)

-13. Që të mos flinin me gratë e tyre

Letër publike Zotëriut Peter Feith

(Kjo pikë nuk ka të bëjë me librin *Atentatet*, por e mora se i përshtatet temës që është në shqyrtim)

I. Kelmendi: "Ju lus, sepse jam i bindur, se po që se do u sugjeronit Ju qeveritarëve tanë që të **mos flinin me gratë e tyre**, binduni, ata vërtetë nuk do të flinin, sepse edhe këtë sugjerim Tuajin ata do ta kuptonin si urdhër. Dhe meqë do ta kuptonin si urdhër, ata do frikësoheshin se ju do i hiqni nga postet qeveritare, po nuk ju dëgjuan. E ata i duan postet qeveritare më shumë se gratë e tyre, gjithsesi edhe më shumë se qytetarët e tyre." (Letër publike shefit të ICO-s, Zotëri Peter Feith, 5 shkurt 2009, Botuar në www.pashtriku.org)

-14. Cipërcullakosje

Biseda në forumin www.kosova.de rreth librit Atentatet

Moskeqkuptime, qejfe, cipërcullakosje, zhveshje, mveshje, pa pretendime për të qenë të vërteta, fantazi të vitit 2007 dhe jo ngjarje të vitit 1982

"Asgjë më të bukur e më të ëmbël s'ka sesa e vërteta."

I. Kelmendi: Afishuar me: 26.03.2007 15:45 "**Mos më keqkuptoni**, por romanin e kam shkruar sipas **qejfit** dhe bindjeve të mia. Edhe po t'i dija **qejfin**, bindjet dhe përcaktimin Tuaj, ua them më keqardhje, nuk do ta kisha shkruar sipas tyre."(www.kosova.de)

Sali Kabashi: "...duke qenë se në librin e tij e shohim **cipërcullak të zhveshur...**...edhe mjeranët shqiptarë" (Prill 2007, Republika)

I. Kelmendi: "Edhe për Rezilin ndjej keqardhje,... ..edhe ai do të mund të ishte njeri pa këto gjynahe që i **mvishen** në roman..." (Republika, prill 2007)

I. Kelmendi: "Ato janë paraqitur ashtu siç i kam përjetuar dhe siç i kam mbajtur mend, **pa pretendim për të qenë të vërteta historike.**"(kopertina e mbrapme e romanit *Atentatet*)..."romanin e kam shkruar sipas qejfit"."

I. Kelmendi: : Afishuar me: 26.03.2007 15:45 "**Mos më keqkuptoni**, por romanin e kam shkruar **sipas qejfit** dhe bindjeve të mia. Edhe po t'i dija qejfin, bindjet dhe përcaktimin Tuaj, ua them më keqardhje, nuk do ta kisha shkruar sipas tyre." . (www.kosova.de)

I. Kelmendi: "Mendimet dhe vlerësimet **janë të kohës, kur kanë ndodhur ngjarjet.**" (Kopertina e mbrapme e librit *Atentatet*)

I. Kelmendi: I nderuar Z. "panta_rhei" ! (Afishuar me: 25.03.2007 21:11) "Ju keni të drejtë kur mendoni, se romanin **ATENTATET** nuk e ka shkruar **Ibrahim Kelmendi i viteve 1978-1985, por Ibrahim Kelmendi i vitit 2007.** Kapitullin e fundit ia kam dorëzuar redaktuesit (Z. Adem Gashi) në fillim të janarit të këtij viti." (www.kosova.de)

I. Kelmendi: "Këshillë - Të mos lexohet nga adoleshentët (nën moshën 16-vjeçare)"

Sali Kabashi: "...duke qenë se në librin e tij e shohim **cipërcullak të zhveshur...**...edhe mjeranët shqiptarë"

I. Kelmendi: "Pastaj, po të kisha **kurvërimin si qëllim, a nuk të kam ty këtu më afër?"**

I. Kelmendi: "**Mos më keqkuptoni**, por romanin e kam shkruar sipas qejfit dhe bindjeve të mia. Edhe po t'i dija qejfin, bindjet dhe përcaktimin Tuaj, ua them më keqardhje, nuk do ta kisha shkruar sipas tyre." (www.kosova.de)

I. Kelmendi: Afishuar me: 26.03.2007 15:45 "Ju keni të drejtë kur mendoni, se romanin **ATENTATET** nuk e ka shkruar **Ibrahim Kelmendi i viteve 1978-1985, por Ibrahim Kelmendi i vitit 2007.** Kapitullin e fundit ia kam dorëzuar redaktuesit (Z. Adem Gashi) në fillim të janarit të këtij viti." (www.kosova.de)

-15. Epitete

KOMITETI QENDROR I LRSSHJ " Keqpërdori ndihmat për Kosovën, duke mos sjellur në fond asnjë qindarkë. P.sh. të përmendim vetëm rastin e Suedisë në praninë e katër vetave një familje shqiptare i dha ndihmë luftës sonë prej 50.000 korona, prej të cilave nuk solli asnjë qindarkë, si dhe ndihmat që dhanë familjet e tjera në Suedi." (Vendim i Komitetit Qendror të Lëvizjes për Republikën Socialiste Shqiptare në Jugosllavi për përjashtimin e Ibrahim Kelmendit nga KQ, më 10 shkurt 1985. Marrë nga Faridin Tafallari, *Terror-Dhimbje-Qëndresë*, Tiranë 1997, f.253-254)

I. Kelmendi: "Në xhepat e mijë të grisur nuk ka bir nëne (**e as bir kurve**), që do mund të kërkonte të hollat e tij ose të hollat e cilido kontribues, që do të thotë se nuk kam shpërdoruar e përvetësuar nga ato mjete për vete dhe as për familje." (Afishuar me: 23.03.2007 21:18, www.kosova.de)

-16. Nuk e dinte të mirën, nuk kishte turp

Faridin Tafallari: "**Ibrahimi** (Kelmendi-shën ynë) ka ecur më shumë. Ai ishte i pa disiplinuar, me ca sjellje jo të mira dhe aq më shumë të pa pranueshme tek ne shqiptarët. Futej në kuzhinë, te gratë...Shtrihej në dhomë gjerë e gjatë dhe nuk e kishte për gjë, se ishte ti me familje. Ai shtihej sikur të ishte në shtëpinë e vet... **Nuk tregoi asnjëherë mirënjohje për gjitha ato pritje që i bëheshin nga gratë e shokëve duke e nderuar si një patriot! Prandaj ai nuk e dinte të mirën, nuk kishte turp.**"(ÇKA PRET IBRAHIM KELMENDI, PSE NUK BËN KALLZIM PENAL NDAJ VRASËSIT TË

* * *

Më 15 janar 1983, në Ludvigsburg, me iniciativën e Xhafer Shatrit u formua Qendra Ekzekutive (QE) nga pesë anëtarët e mëposhtëm, të cilët morën pseudonimet përkatëse. Qendra Ekzekutive pushoi së vepruari më 3 mars 1984 në Gjenevë, kur u vendosë formimi i Komitetit Qendror, që në korrespondencën tonë do të identifikohet me emrin "Dukagjini".

Pseudonimet:

-Iljazi =	Ibrahim Kelmendi
-Xhema=	Xhafer Shatri
-Plaku=	Hasan Mala
-Fahriu=	Faridin Tafallari
-Salihu=	Xhafer Durmishi

2. BAZUAR NË PËRCAKTIMIN TIM

Ibrahim Kelmendi: "*Sidomos në prag të 30-Vjetorit të Lëvizjes (popullore), që, - bazuar në përcaktimin tim, - është me 17 Janar 1982, e quaj të dobishme të ofrohen informata, dëshmi, dokumentacion, vlerësime, të debatohet rreth tyre, për të ndihmuar ndriçimin sa më objektiv të kaluarës sonë.*" (Letër Xhafer Durmishit, facebook, 23 tetor 2011)

3. DËSHIROJ TË SHFAQ PËRCAKTIMIN TIM

Ibrahim Kelmendi: "*Fillimisht dëshiroj të shfaq përcaktimin tim për këtë bashkëbisedim. Më ka impresionuar shumë vizioni i Robert Kenedit, të cilit kam ndërmend t'i përmbahem. Po citoj: 'Pjesa më e madhe e njerëzve më shumë parapëlqejnë të ndihen të qetë, se sa ta njohin të vërtetën. Epo mirë, unë jam ai që do ta prishë qetësinë tuaj, duke jua thënë të vërtetën.'*" (Bedri Islami, LËVIZJA, Tetovë 2012, f.12-13)

4. MEMORIZIMI I HISTORISË NË SHËRBIM TË SË VËRTETËS

Sadri Ramabaja: "*Pjesa më e madhe e njerëzve më shumë parapëlqejnë të ndihen të qetë, se sa ta njohin të vërtetën. Epo mirë, unë jam ai që do ta prish qetësinë tuaj, duke jua thënë të vërtetën.*" Ky postulat i Robert Kenedit do t'i shërbej si stimul nxitës Ibrahim Kelmendit gjatë gjithë kohës sa po shehonte për këtë bashkëbisedim. Ai në këtë libër ka sjellë të vërtetën ashtu si e kishte perceptuar dhe memorizuar, e me këtë ambientit tonë konservativ politik ia ka prishur qetësinë...

... Duke vazhduar rrëfimin tutje, ai do të shndërrohet në kronistin më të mirë të kësaj organizate, e me këtë libër na e ka dhënë monografinë e munguar."

(MEMORIZIMI I HISTORISË NË SHËRBIM TË SË VËRTETËS, www.pashtriku.org, 15 prill 2012; Recension për librin e Bedri Islamit "LËVIZJA (Lindje e përgjakur) - Bashkëbisedim me Ibrahim Kelmendin, Tringa Design, Tetovë, 2012)

5. E QUAJ TË DOBISHME TË OFROHEN INFORMATA, DËSHMI, DOKUMENTACION

Ibrahim Kelmendi: "*Sidomos në prag të 30-Vjetorit të Lëvizjes (popullore), që, - bazuar në përcaktimin tim, - është me 17 Janar 1982, e quaj të dobishme të ofrohen informata, dëshmi, dokumentacion, vlerësime, të debatohet rreth tyre, për të ndihmuar ndriçimin sa më objektiv të kaluarës sonë.*" (Letër Xhafer Durmishit, facebook, 23 tetor 2011)

6. Letër e Ibrahim Kelmendit për Faridin Tafallarit, 13 mars 1981

13 mars 1981 (në mërgim)

I shtrenjti shok,

... Të shtunën, në mëngjes do të jem në Stuttgart ke Namiu. Prej aty do të udhëtojmë për në Mynih (München), pasi atje është një panair, ku merr pjesë edhe Shqipëria. Ti ke mundësi, po pate kohë, të vish në Mynih bashkë me mua dhe Namiun. Për çdo eventualitet i telefono Namiut të premten në mbrëmje dhe do dihet definitivisht se kur do udhëtojmë, ose si do ia bëjmë. Mua më duhet doemos të jem andej, pasi do të më duhet të takohem me shokë. Për çdo eventualitet po t'i dërgoj dy numra tel. Të Namiut dhe të Atdheut. Ti paraqitu ke tel. i dytë ashtu si të quaj unë, Taksisti.

Për të tjera gjëra do bisedojmë kur të takohemi.

I juaji Vermoshi

7. NË BAZA TË SHËNDOSHA MARKSISTE-LENINISTE!

Ibrahim Kelmendi: "Viti i Ri është viti vendimtar për fatin e ardhmërinë e popullit tonë. Revolucioni do të ketë fazën vendimtare gjatë Vitit që po vjen. Kjo do të thotë se nga ne kërkohen sakrifica më të mëdha se kurdoherë gjatë Vitit të Ri, deri në fitore të plotë përfundimtare. Prandaj më lejoni tua uroj Vitin e Ri 1982 të gjithëve, duke ju dëshiruar shëndet e sukses, sidomos në veprimtarinë patriotiko-revolucionare!

Si shokë që jemi, dëshiroj që gjatë Vitit të R 1982 shoqëria të thellohet edhe më shumë, në baza të shëndosha revolucionare - marksiste-leniniste!

KOSOVA-REPUBLIKË!

I juaj gjer në vdekje

Shoku (Ibrahim Kelmendi)" (Letër Faridin Tafallarit, fundi i dhjetorit 1981; Faridin Tafallari, Terror-Dhimbje-Qëndresë, Tiranë 1997, f. 411)

8. Letër e Ibrahim Kelmendit për Faridin Tafallarit, 8 prill 1982

Në mërgim, më 8 prill 1982

Shoku Fahredin,

nuk dyshohet që t'i s'do i marrësh punët me seriozitetin dhe sinqeritetin më të madh. Por punët duhet filluar shpejt e shtruar, para se përmasat e së keqes të bëhen të pa korrigjuara.

Vetë rrethanat, mbi të cilat edhe biseduam, patën kushtëzuar një punë të tillë, çfarë patëm bërë gjer në vdekjen e shokëve. Të dukej sikur puna nuk ecën sa duhet, si duhet e me sinqeritet. Po të ishin shokët në radhët tona, ndoshta ashtu do vazhdonin prapë, deri në bashkim të plotë. Tani, kur punën në LNC (në Perëndim) kanë marrë në dorë ca "shegërta" të pa mësuar mirë, pse shokëve të rënë duket se nuk u ka mjaftuar

koha t'i ngrisin për kuadra të nivelit, na duhet të mbajmë qëndrime të matura: Shokët në fjalë (nga egoizmi...) donë të shfrytëzojnë vrasjen e shokëve për ta "ngritur" LNÇ-në gjer në qiell kurse radhët tjera t'i "shtrinë" për balte, çka nuk është shoqërore dhe nuk qon ka bashkimi. Kështu, si po veprohet, siç edhe u bisedua, jo vetëm se dëmtohet lufta, por edhe vlera e shokëve u ulet. Të tjerët mund t'ua masin vlerën shokëve të rënë me nivelin e sjelljet e shokëve që lanë prapa. Sidomos vlera e shokëve do matet me atë se a arriti armiku që të na shpartallon që në orët e para.

Tipat me të cilët shokët e rënë nuk gjetën kurrë mirëkuptim, nuk do të duhej të futeshin me nxitim në radhë ose të informoheshin për bisedat tona. Po ndodhi ajo, atëherë të jep me kuptim se në ato radhë ka depërtuar dikush më heret, dihet nga elementët spuinë. Bisedat që bëhen në mesin tonë, edhe atëherë kur nuk gjindet mirëkuptim, duhet të mbahen sekrete, deri sa dikush të ketë rrëshqitur krejtësisht në pozicione të huaja. Kështu ishte edhe mendimi ytë mbramë. Prandaj shpejto të ua tërhekish vërejtjen shokëve, ndryshe nuk dihet ku do dalin punët tona, pse ka edhe parime, ku pushon toleranca.

Në biseda, si edhe në letër, u zgjerova, pasi ende të dimë për shok të radhëve dhe idealit dhe i tillë duam të mbetesh!

– Kosova - Republikë!

Shoku (Ibrahim Kelmendi)

P.sh. Emrin e ati shoku, që më pat ngarkuar t'i bëjë të fala shokut J..., po ta le. E kryej këtë porosi,

9. Kush është vojvoda Ramë Nikçi?

Shkrim i shpërndarë nga Ibrahim Kelmendi në maj 1982 me titullin:

KLIKA E BEOGRADIT – "Të vret natën, të këndon ditën..."

Sipas informatave të siguruar, ka fundi i majit – për "nder" të "ditës së rinisë jugosllave" (me nder me thën...) dërgohet për të na "argëtuar"... SHKA "Rugova" e vojvodës Ramë Nikçi. Turneja është paraparë në qendrat kryesore të Gjermanisë P., Zvicrës e Belgjikës.

Po kështu jemi të informuar së asnjë shoqëri nuk ka pranuar të ndërmarri turne të këtillë, bazuar në situatën që mbretëron, pos "Rugovës", udhëheqësi "trim" i së cilës ka rrahur gjoks: "Askush nuk do guzon të ma prishë koncertin..." Në fakt shumë shoqëri të afirmuara nuk ekzistojnë më, pse ato kanë kënduar këngë "irredentiste", që kanë "frymëzuar rininë me nacionalizëm shqiptaromadh..."

Kush është SHKA "Rugova"?

"Rugova" është shoqëri kulturore-artistike (SHKA) e Pejës, anëtarët e së cilës janë rugovasë. Folklori dhe lojrat duhet të jenë me origjinë nga Rugova kreshnike, emrin e së cilës e mban shoqëria.

Në historinë tonë të lavdishme Rugovën e njohim si vend ku armiqtë pushtues kanë thyer qafën, siç e thotë edhe kënga: "Ku po i del syni Shqipnisë?/ Del Rugova për derë t'kapisë... ndërsa rugovasit si kryengritës trima në mbrojtje të trojeve, veçmas

kundra pushtuesve malazezë në mbarim të shekullit të kaluar dhe në fillim të shekullit tonë, kur mbarë populli luftonte për P a v a r ë s i.

Përkundra kryengritjeve të pandërprera çlirimtare, Rugova me tanë Kosovën u pushtu nga mbretëritë shoveniste të Serbisë të Serbisë e Malit të Zi dhe më vonë, pas Luftës Dytë Botërore u ripushtu...

Bijtë dhe bijat e Rugovës, ashtu si dhe të parët e tyre, vendosën që atdheun t'mos e lënë në robëri të plotë – koloni klasike të të huajve. Në Pranverën Kosovare (1981) u ngritën haptas e me vendosmëri për t'i kërkuar të drejtat elementare, që popujt tjerë të Jugosllavisë i gëzojnë, si që Kosovës t'i njiqet Statusi i Republikës së federuar. Emrat e këtyre patriotëve revolucionarë u janë të njohur Kosovës dhe më gjerë, si ai i shokut Ali Lajçi me shokë e shoqe, të cilët edhe në gjyqe tmerruan gjykatësit çetnikë me vendosmërinë dhe revolucionaritetin e tyre. Dënimet e rënda, 10 - 15 vjet burgim të rëndë s'i tremben fare, pse ishin të bindur se kërkesat e popullit janë të drejta dhe duhet të plotësohen.

Sa kreshnike na del Rugova, kur flasim për kryengritësit trima, ndër ta shoku Ali Kelmendi, komunisti i orëve të para, kur flasim për gjithë ata rugovasë, që tani gjenden në kampet jugosllave. Sa shumë ia njollosin emrin Rugovës ca bastardë. Por s'do ia arrinë dotë, pse rugovasit ruajnë me fanatizëm krenarinë se janë nga Rugova! Këtë e bën sidomos vojvoda Ramë Nikçi, përmes SHKA "Rugova", anëtarët e së cilës janë kryesisht të komprometuar, moralisht dhe politikisht, që janë gati të gjithë nga familja e vojvodës dhe farefisit të tij.

Ç'do të thotë fjala v o j v o d ë ?

Vojvodë është gradë ushtarake në mbretërit serbe e malazeze. Këtë fjalë do ta gjejmë të sqaruar në "ilustrovana politika" të Beogradit. Por për çudi, kur klika serbomadhe ka ndërmarrë fushatë hysterike kundra "nacionalizmit romantik" shqiptar, si nuk u bie fjala vojvodë në sy, që nuk ka të bëjë vetëm me nacionalizmin serb. Për këtë nuk kanë frikë as gazetari shovenist Zec as vojvoda Ramë, që e përdorin me krenari.

"... Vojvoda rugovas, shkruan "ilustrovana politika" (më 26.05.81), është përfaqësuesi i tanishëm "lozës" (serbisht: loza), e cila që nga kohërat turke ruan qetësinë dhe paprekshmërinë e Patriarkanës...)

Siç na del, vojvodët kanë qenë rojë e rendit, ndërsa vojvodët e familjes Nikçi (nga Shtupeçi i Madh, fshat i Rugovës) kanë qenë rojë besnike e Patriarkanës, të ndërtuar nga Dushani, për ta përjetësuar robërinë e "stara Serbisë" (siç e quajnë shovenistët Kosovën.).

Kush është vojvoda Ramë Nikçi?

Të shkruajmë se kush është vojvoda Ramë Nikçi nuk e kemi vështirë, pasi ai vetë na e ka lehtësuar këtë, duke përmbledhur historinë e vetë e të familjes në bisedën dhënë "ilustrovana politikës" së Beogradit, Nr. 1177, të 26.05.81. Pos kësaj bisede, ai në rrethin e Pejës është ndër më të komprometuarit. Sa ai është edhe vetëm udbashi rankoviçevës Bajram Dreshi. Të dy së bashku, me ca të tjerë, Rugovës ia njollosin emrin e pa njollosur, pse bijtë e bijat i dalin asaj zot.

Në artikullin e revistës në fjalë, "Besa nije vracena" lexojmë:

"Ramë Nikçi është shef i shërbimit juridik ndërkomunal pranë Entit për Inkuadrim në Pejë..." Siç e pamë më lartë, është përfaqësuesi i tanishëm i "lozës" për ta mbrojtur Patriarkanën.

Në pyetje të gazetarit, se a ka marrë pjesë ndonjë rugovas në demonstrata "nacionaliste", vojvoda përgjigjet: "Po. Të tillëve ju takon sipas ligjit nga qeveria, kurse nga rugovasi – bojkotimi (izolimi). Në shtëpitë s'do hynë askush, dërisa Pleqësia jotë të mos vendos ndryshe. Nga vllazëria ime Nikçi nuk ka asnjë demonstrues. E kam vërtetuar dhe për këtë jap fjalën. Askush nga anëtarët e SHKA "Rugova" s'ka marrë pjesë në demonstrata. Më është bërë qefi..." Pastaj vazhdon vojvoda: "Ishim dy herë si shoqëri mysafirë në RPS të Shqipërisë. Këtë vit shqiptarët është dashur të na e kthejnë vizitën, por le të mos vinë..." Më poshtë vijon vojvoda: "... Çka u duhet këtyre demonstruesve që kërkojnë t'i bashkangjiten Shqipërisë (...). Këtë liri, siç e kanë shqiptarët në Jugosllavi, nuk e kanë patur asnjëherë askund dhe secili që mendon ndryshe – është njeri i keq..."

Gazetari pyet: "Babën tëndë, gjithashtu vojvodë rugovas, e kanë vrarë në pritë në vitin 1939. Kush dhe përse?"

Ramë vojvoda përgjigjet: "Kanë vrarë babën tim me dy mixhallarë, para syve të mij, brenda gjysmë ore. Ka qenë larje llogarish me fiseve, nuk ka qenë hakmarrje gjaku. U ka penguar (mendohen "vrasësit") pse baba ka qenë vojvodë rugovas, që ka **ruajtur** (nënvizimi ynë) Patriarkanën e Pejës..." Pastaj vojvoda vijon me nostalgji çetnike:

"... Me konakun e vjetër të kishës m'është djegur edhe dhoma në të cilën kam banuar prej 1941-tës e dëri në mbarim të Luftës. Në të ka qenë kërveti, në të cilin kam fjetur, aty ka qenë edhe luga me të cilën kam ngrënë dhe fotografitë e t'parëve të mij. Të gjitha janë djegur..."

Artikulli mbaron me fjalët e vojvodës Ramë: "Unë i **dua** (nënvizimi ynë) shumë fjalët e Mark Milanit..." (Ato s'po i citojmë – Shtojmë se Mark Milani ka qenë komandant i forcave pushtuese malazeze, në luftë për t'i pushtuar Plavë, Gusi, Hot, Grudë e Rugovë...).

E cituam si shumë artikullin në fjalë pse u pa e arsyeshme përmes të kësaj reviste çetnike, gjegjësisht përmes fjalëve të vojvodës, ta njohim udhëheqësin e SHKA "Rugova", i cili, sipas "Pravosllavjes" (Gazetë kishtarë serbe), "kur ka parë konakun në flakë ka qa." Vojvoda kësaj radhe "demanton" atë çka ka shkruar "Pravosllavja", duke thënë se rugovasi nuk qajnë kur t'u ndodhin fatkeqësi të rënda...

"Patriotizmi" serb i Ramë vojvodës, siç na bind ky artikull dhe profesioni i tij si vojvodë, ia kalon "patriotizmit" serb të shumë çetnikëve, të cilët nuk kanë bërë dhe s'do bëjnë aq sakrifica për ta mbrojtur kishën, sa bëri familja Nikçi (nga Shtupeqi i Madh). Krenaria e Ramë Nikçit si vojvod... për ta mbrojtur Patriarkanën...!!

Duket së nana e Ramës kur ka dashur të kryen nevojë (me nder me then) në vend të m... ka pjellur rastësisht vojvodën...

Dy fjalë mbi "ilustrovana politikën".

Pasi cituam si shumë këtë pelenë, duket e udhës t'i themi dy fjalë, pse artikujt tjerë janë vërtetë artikuj të frymës çetnike.

Kjo revistë, bazuar në shkrimet mbi shqiptarët e Shqipërisë, është çetnike e shkuar çetnikëve – edhe më çetnike se ato të emigracionit çetnikë. Për t'u bindur mjafton ta analizojmë numrin në dorë.

Me radhë artikulli i parë mbi Shqipërinë: "Busija mrznje i lazi" (Pusija e urrejtjeve dhe gënjeshtrove), i cili fillim e mbarim ka qëllim të caktuar – t'i hasmon lexuesit kundra popullit shqiptar e Shqipërisë, atëherë kur është thurur nga shpifjet e trillimet tendencioze.

Artikulli tjetër është: "Ko su albanski teroristi" (Kush janë terroristët shqiptarë). Në këtë artikull krahas plehrave të emigracionit rekonar të agjentëve,

ballistëve e zogistëve, radhiten shokët **Isuf Gërvalla** (Lavdi paqin ai me shokët Bardhosh e Kadri!), e Ibrahim Kelmendi. "Ata (mendohen shokët Isuf e Ibrahim) në fakt janë mizorë të njohur (në gjuhën serbishte, "poznati siledija"), njerëz pa ndonjë qëllim..." pra, nga artikulli kuptohet se shokët si Isufi e Ibrahim na qenkan "terroristë" e jo klika shoveniste serbomadhe e Beogradit. Dezinformimet, shpifjet e trillimet tendencioze nuk meritojnë analiza, pse edhe "kalemgjinjët" çetnikë dinë se nuk kanë shkruar të vërtetën, por dezinformime të qëllimta në luftë kundra revolucionarëve shqiptarë dhe popullit tonë.

Edhe më karakteristik është artikulli: "To su kriminalci" ("Këta janë kriminelë"). Dëshmorët **Tahir e Nebih Mehaj** "Ilustrovana Politika" dhe klika e Beogradit i quan "kriminelë" pse nuk patën ku të shkojnë përtej shtëpisë, por u mbrojtën si u ka hije trimave – bashkluftëtarëve e nipave të Shote e Azem Galicës! Ata qëndruan dhe ranë heroikisht për të mos vdekur kurrë! Populli do i përjetëson në këngë e histori! Gjeneratat do flasin për qëndrimin heroik kundra njësisve speciale të policisë së Beogradit dhe ushtrisë jugosllave, të armatosur gjer në dhëmbë me tanka, topa e helikopterë. Në këtë betejë dëshmorët Tahir e Nebih Mehaj gati shpague veten – do t'ishte dashur të ngordhin qindra nga tytë e trimave e jo dhjetëra, për të qenë të shpague. Asnjëherë luftëtarët e lirisë nuk mund dhe s'janë krahasuar me pushtuesit... Por, prap, jemi të kënaqur e krenar me këta dëshmorë të pavdekshëm në zemrën e popullit...!

Përse vjen SHKA "Rugova"?

Nuk do mend të thuhet menjëherë se ardhja e "Rugovës" është pjellë e politikës shtypëse, diskriminuese e demagogjiko-mashtruese e klanit serbomadh, në vend "që të vranë natën e të qanë ditën" "të vranë natën e të këndon ditën". Në një rën anë ushtron terror të paparë fashist, duke vrarë, terrorizuar, dhunuar, arrestuar bijtë e bijat më të mirë të popullit, bile edhe fëmijtë, që për hiqgjë dënohen me shumë vite burgim të rëndë, kurse në anën tjetër detyrojnë turne "argëtimi"... që të mashtrojnë bijtë e popullit në kurbet, sikur në Kosovë s'ka ndodhur asgjë dhe se jeta atje është "normalizuar", sa vëtëm "kërcehet" e "këndohet"...

Sa politikë të poshtër mashtruese ka armiku "ynë" i lig... Ai ende nuk ia ka kthyer popullit kufomat e të vrarëve në demonstrata e burgje që të varrosen sipas traditave, në një rën anë, kurse në anën tjetër përmes vojvodëve ndërmerr turne "argëtimi"... Bile, që t'i fshehin krimet e pafshehshme, klika shovensite e Beogradit (fashiste shkuar fashistëve, pse terrorin dhe mënyrat e tij që ajo ushtron në Kosovë, nuk kanë ditur t'i ushtrojnë as fashistët hitlerianë...) u ka bërë gjyq të vrarëve, që fëmijët e farefisi të shpresojnë se të afërmit e tyre të vrarë gjenden ende të gjallë në burgje...!!

Ose, mos ndoshta kësaj radhe dojnë të festojnë "suksesin" e tyre, të arritur përmes vrasjes së trefishtë të shokëve e vëllezërve tanë, bijve të popullit, Isufit, Kadriut e Bardhoshit... Ah! kriminelët, do festojnë kot – kanë rënë tre, janë ngritur me mijëra!

Na kujtohet viti i kaluar, kur nga salla e koncertit policia gjermane, me direktivën e udhëbësëve të konzullatit të Shtutgartit, nxori nga salla shokun Bardhosh. Çfarë ndodhi? Bashkatdhetarët u revoltuan shumë, kështu që pas një proteste te policia gjermane, e cila nuk pranoi që shokët t'i sjell në sall të koncertit, u ngritën duke thirrur njëzëri mbi 500 veta "Kosova – Republikë"! ... dhe demoluan çdo gjë. Të nesërmen koncerti i Frankfurtit u mbajt me veglat e huazuara nga "shkitë".

Kurtha e UDB-së – e cekët.

Vojvodë, more ti vojvodë! rrehe gjoks se do të mbash koncerte, pa guzuar të pengon asnjë "irredentist". Ke gabuar! Ne këndeje nuk frikësohemi! Por kësaj radhe se kemi ndërmend të biem në kurthën tënde e të UDB-së. Ju aq u bën që mund të ketë gjakdërdhje. Për ju me rëndësi është kompromitimi i luftës sonë të drejtë, që pastaj, po të ndodhi ndonjë e papritur, shtypi e populli vendës të "bindet" në "vlerësimet" tuaja se ne jemi "terroristë", që në fakt jeni ju.

Kjo kurthë e pasuksesshme ngjanë në ato të Brukselit, ku keni futur në lojë "lojën" e kaubojve. Shkuat aq larg sa të vrisni punëtorë të pafajshëm në klub të punëtorëve. Populli ynë dhe bijtë e tij në kurbet dinë se kush janë armiqtë e vërtetë – ata jeni ju, ti vojvodë bashkë me farën tëndë, klika shovensite serbomadhe e Beogradit dhe mbarë tradhtarët shqiptarë të markës Sinan Hasani e Ali Shukriu me shokë!

Kësaj radhe vojvodë e udbashë, nuk kemi ndërmend të biem në kurthën tuaj, por mos harroni ditën kur do t'i jepni llogari popullit! Ne nuk jemi terroristë e kriminelë siç jeni ju. Ne jemi bijtë e bija të popullit – do t'u presim me **bojkotime e urrejtje!** Në vend që të biem në kurthat tuaja, si bijtë e bija të popullit që jemi, i bashkangjitemi popullit, rinisë sonë revolucionare e intelektualëve përparimtarë duke kërkuar të drejtat tona legjitime, ato të drejta që kërkoi populli në të gjitha qytetet e Kosovës (dihet, edhe në Preshevë, Tetovë e Gostivar, deri në Ulqin), duke larë rrugët me gjak, për të cilat të drejta dhanë jetën aq shumë dëshmorë e dhëshmore:

- Kosova - Republikë!
- Duam punë në vendlindje, pranë familjeve tona!
- Lirim pa kusht të të gjithë të burgosurve politikë shqiptarë!
- Rroftë populli ynë heroik!
- Lavdi dëshmorëve, që dhanë jetën për liri të atdheut!

Punëtorët shqiptarë në mërgim. (Shkrim në 6 faqe A5, i shpërndarë nga Ibrahim Kelmendi, në maj 1982. Nënvizimet e këtij punimi ishin të autorit të saj, ashtu siç janë në origjinal në shkrimin e shpërndarë)

10. Letër-shkresë e Ibrahim Kelmendit, 17 qershor 1982

Në mërgim, më 17 qershor 1982

Shumë të dashur bashkatdhetarë e bashkatdhetare,

deri në ditën kur do të demonstrojmë në Bern (ose Gjenevë) kanë mbetur vetëm edhe ca ditë. Momentalisht leja është dhënë për në Bern, edhe pse kërkesa është bërë edhe për Gjenevë. Po që se ndërkohë ipet leja edhe për në Gjenevë, atëherë Demonstrata do të mbahet atje, për çka do informohemi kohë pas kohe.

Se në cilin qytet mbahet demonstrata ka rëndësi. Me një detyrë që të sigurohet leja për qytetin e dëshiruar, janë ngarkuar shokët, prandaj kërkimi i lejes në të dy qytetet në fjalë është me vend, që të mos ndodhë për të mbetur fare pa leje. Tani, kur dimë vendin dhe ditën, me rëndësi të veçantë është mobilizimi ynë, që numri i demonstruesve të jetë sa më i madh, demonstrata të jetë sa më e disiplinuar (ashtu siç kërkojnë rregullat e ligji i vendit nikoçir) dhe sa më e suksesshme.

Kësaj radhe, siç po dimë gjer më tani, demonstrata po mbahet në kryeqytetin e Zvicrës, Bern, më 26 Qershor të këtij viti. Edhe pse na kanë mbetur pak ditë, na duhet t'i mobilizojmë të gjitha forcat, që në Bern të shkojmë sa më shumë. Dihet se në këtë

drejtim kemi përvojë, por nuk është fare e tepërt të ndalemi te format e punës, se çfarë duhet të bëjmë që radhëve t'u bashkangjiten sa më shumë bashkatdhetarë e bashkatdhetare, pse pjesëmarrja e gjertanishme nuk kënaq gjithëaq, kur ta kemi parasysh numrin e përgjithshëm të kurbetçinjve në këto anë. Përkundrazi, duhet menduar shumë për format e axhitimit dhe informimit, të cilat sqarojnë më së lehti e më së shpejti bashkatdhetarët e bashkatdhetaret, që ata të mos mbesin indiferentë në këtë situatë, për të mos thënë, mos të kalojnë verbërisht në anën e armikut.

Së pari kjo demonstratë po mbahet në të njejtën kohë kur po fillon kongresi i 12-të i të ashtuquajturës Lidhje e Komunistëve të Jugosllavisë (LKJ). Mu për këtë arsye është zgjedhur kjo ditë për të demonstruar. Po të ishte Jugosllavia shtet socialist, siç e quan veten, po të udhëhiqej nga një parti e vërtetë komuniste, marksiste-leniniste, pararojë e klasës punëtore, atëherë mbajtja e kongresit do kishte rëndësi të veçant. Nuk do mend të thuhet se me atë rast, s'pari ne s'do bridhnim rrugëve të botës për bukën e gojës, e pastaj s'do kishim nevojë të dërdhnim gjak në demonstrata, duke i kërkuar të drejtat më elementare që popujt tjerë të Jugosllavisë i gëzojnë, ato të drejta që qenë garantuar kur luftohej krahu për krahu kundra hordhive fashiste, për të patur të drejtë secili të vendos mbi fatin dhe ardhmërinë e vet - parim ky themelor leninist. Por siç dimë, fatkeqësisht, LKJ është këmbë e kokë revizioniste, që udhëheqet nga klani titist.

...

... Mund t'i duket ndokujt e tepërt kjo, kur kritikohet mosdisciplina, por vërtetë është shumë e damshme prishja e rendit. Më mirë do të ishte të mos demonstrohet fare, se sa të arrihet efekti i kundërt me atë që synon demonstrata. Si shembull e kemi veçanërisht demonstratën e Vjenës, ku ka ekzistuar mundësia të kemi rrjedhime të shëmtuara. Sigurisht që ca nuk kanë mundur ta kuptojnë se përse nuk bënë të demonstrohet, edhe atëherë kur është udhëtuar me qindra kilometra, por kjo prapë nuk e arsyeton reagimin e cave, pse aty nuk ishte vendi për t'u treguar trimëri policëve austriakë në shtetin e tyre. Pa mëdyshje, mossa sigurimi i lejes është gabim i paarsyetueshëm, për çka mbahet përgjegjësi, por në raste të tilla është e domosdoshme disciplina e rrazia, kur shokët bisedojnë për kompromiset e mundshme aty për aty. Kurse aty ndodhi ndryshe: ca veta në mënyrë të pakuptueshme e të damshme, donin t'u tregon të tjerëve se janë "trima" e "patriotë", prandaj pse të mos demonstron me zor, kur ata të marshojnë në ball. Hiç nuk po zgjatëm më gjatë, pse skena të tilla i kritikon çdo njëri, prandaj edhe nuk duhet të përsëriten. Vërtetë rastësisht dhe në bazë të ujdisë që të shkojmë në rresht në muze (atje ku nuk ishte siguruar mundësia për t'i vizituar shpatën dhe përkrenaren e Skenderbeut) patëm sukses. Por ka mundur të rrjedh përfundim i shëmtuar...

Duke përfunduar këtë letër shoqërisht i bëjë lutje çdo shoku e shoqe, bashkatdhetarëve e bashkatdhetareve më aktivë, që të mobilizohen sa më shumë, pse vetëm të bashkuar do mundim armikun. Bashkimi ynë nuk arrihet vetvetiu. Për ta arritur atë, pos tjerash, duhen sakrifica më të mëdha në raste të duhura. Kështu, të bashkuar dendur, do i tregojmë vrasësve, se nuk na kanë shpartalluar me rastin e vrasjes së shokëve tanë të shtrenjtë, Jusufit, Kadriut e Bardhoshit, por përkundrazi, indinjata e shkaktuar me atë rast na bashkon edhe më dendur, pse vetëm kështu do ua marrim hakun.

Edhe kësaj radhe, mu si në demonstratat kur shokët i kishim në ball, marshojmë me ta në zemër, gjer në fitore, duke ju përmbajtur mësimëve të tyre! Urra! sa më shumë për në demonstratë!

– KOSOVA - REPUBLIKË!

11. Letra e 14 prillit 1983

Letra parë që i është dërguar nga Ibrahim Kelmendi, Qendrës Ekzekutive dhe mua si anëtar i kësaj Qendre është një letër e datës 14 prill 1983, në 8 faqe A4, që ka të bëjë me një fejesë në mes dy të rinjve. Kjo letër nuk përfshihet në këtë përmbledhje. Përmbajtja e saj moralizuese është interesante nëse krahasohet me portretizimin që Ibrahim Kelmendi u bënë femrave në librin *Atentatet*.

12. Letër Faridin Tafallarit, maj 1983 Kushtëzohet puna nga ato të mallkuara të holla

Ibrahim Kelmendi: "Sikur të kishe të holla ti aty, (kuptohet që nuk po i mendoj personalet) do të duhej të m'i dërgoje ca, pasi në këtë gjendje kur ende nuk i kam rregulluar dokumentet më duhen, pos tjerash që t'ju bie mbrapa atyre, por më shumë për udhëtime që të takoj personalitete që më duhet t'i takoj dhe punë të tjera që më përkasin, pasi dihet se sa kushtëzohet puna nga ato të mallkuara të holla..."

-Për Një Republikë Shqiptare në Jugosllavi!

-Rroftë LRSSHJ-a!"

(Letër Faridin Tafallarit, maj 1983; Faridin Tafallari, *Terror-Dhimbje-Qëndresë*, Tiranë 1997, f. 413)

13. Letra e 4 majit 1983

Në mërgim..., më 4 maj 1983

I dashur shoku S.,

Letrën tënde e mora. Të falenderoj që më shkrove - është letra e parë, njëherit edhe fillimi i letërkëmbimit mes nesh.

Festën e 1 Majit kaluam mirë (pa na munguar edhe një "incident" i vogël...). Nuk di si pat kaluar ju andej dhe a i patët marrë traktet.

Sa për rastin e F. dhe H., përfundimisht mori fund çdo gjë mes tyre në fushën e jetës bashkëshortore. Do të kishim dëshiruar që të mos kishim rrjedhime... Ti nuk kishe shkruar asgjë, bile mbi propozimet që para bërë, pavarësisht nga ajo se nuk i njihje mirë asnjërin. Më duket se pata shkruar mjaft, që të ipet ndonjë sygjërim a mendimet, edhe nëse personat në fjalë nuk njihen personalisht. Unë do jap mendimin tim se si u pleqërua kjo ndarje, duke bërë me shkrim, në pamundësi që të takohemi për të biseduar. Por po ndalem tek mendimi yt: "moral i dobët dhe patriotizmi mund të bashkudhëtojnë për një kohë por me bashkëjetuar nuk munden..." Ky mendim sipas teje, "është ligj i vërtetuar me mijëra herë dhe vlen për çdo kënd". Këti mendimi ka mundësi t'i ipen shumë kuptime. Edhe unë jap mendimin për kuptimin, si unë e kuptoj, sado që shkarazi. Sa për "ligj", mua s'më duket që mund të përlligjet edhe në raste tjera, e lerë më në rastin tonë (pasi dimë se ku militojmë.). Po sikur të përlligjej "për një kohë" do të ishte shprazëti e atij "ligji"; për dike kjo kohë e pakufizuar mundet me qenë shumë e gjatë, ose mundet me u zgjatë, kurse për dike tjetër mundet me qenë shumë e shkurtër, ose mundet me u shkurtu... Morali i dobët duhet të demaskohet pa i lënë shansë të bashkudhëtoi as "për një kohë" me patriotizmin. Pa u zgjatur, patriotizmi dhe morali i

dobët nuk mund të bashkudhëtojnë fare. Ka mundësi që i pari të maskohet me të dytin në rrethana të caktuara, pse jo ta shfrytëzoi të dytin dhe, mu pse ndodh kjo, sikur dukeka se ka mundësi të bashkudhëtojnë. Pavarësisht nga shpjegimet sipërfaqësore, për radhët e LRSSHJ-së, duhet të vlejné normat morale, të cilat s'do lejojnë fare që morali të jetë i dobët dhe patriotizmi të bashkudhëtojnë e të bashkëjetojnë "as për një kohë"! Po na ndodhën raste, si rrjedhim i vigjilencës së ulët, nga se dikush ia del të maskohet..., atëherë duhet të demaskohet dhe jo t'i ipet shansë të bashkudhëtoi. Përndryshe, do e bënë populli, të cilit nuk mund t'i imponohen "ligje" të tilla, duke patur rrjedhime për radhët tona. Them kështu duke njohur traditat popullore dhe faktin me çfarë fanatizmi ka ruajtur populli ynë fytyrën (moralin). Bile, ruajtja e moralit sa nuk ka kaluar në mit. Edhe njëherë: mendimi dhe propozimi im është që ata që anëtarësohen në LRSSHJ-në duhet të kenë moral të pastër, po deshëm që LRSSHJ-a t'i dalë zot misionit të vet të shenjtë me sukses! Mu për këtë arsye, po sa të na ipet rasti, duhet t'i përkushtohemi (duhet të them propozoj t'i përkushtohemi) edhe çështjes së moralit në gjirin e LRSSHJ-së...

Pasi vendosa t'i përgjigjem letrës tënde, çka është e vetëkuptueshme, pa vazhdoj me radhë.

Në vazhdim më shkruaj "se relativisht njihemi mirë". Sikur të të shkruaja unë i pari, s'do më kishte rënë ndërmend ta përdorë shprehje relativisht, ose më konkretisht, s'do më dukej me vend dhe e arsyeshme për ta futur në përdorim. Për pozitën tonë dhe nivelin e marrëdhënjeve kjo fjalë s'duhet të gjen vend, duhet të jetë e tepërt, edhe sikur ta kishte ndonjë dozë nga e vërteta (për çka edhe unë tani mendoj se ka.).

"Kemi vendosur me luftuar së bashku dhe këtë do ta bëjmë". Po mirë, pse ka nevojë të potencohet. Mendoj se kur bëhen përsëritje të ngjashme, atëherë sikur fshehet dozë e mossigurisë dhe e mosbesimit. Luftën jemi duke e bërë së bashku, ne bashkë me shokë tjerë e popullin, pasi është kërkuar, kemi dëshiruar e vendosur... Ndonjë fillim tjetër të rij nuk pres. Di vetëm se prej ati çasti..., se do të marshojmë prej beteje në betejë, për të dalur fitimtarë! Dhe nëse na del ndonjë punë a betejë e re, nuk do të thotë se do fillojmë luftën, kur, si bashkëluftëtar që jemi, luftën kemi filluar më heret.

"Njëri prej personazheve për të cilin flitet më së shumti je ti", më shkruaje në vazhdim. Në rregull, më duhet të them edhe njëherë. Por, krahas kësaj do të duhej të më shkruaje çfarë flitet dhe kush flet. Unë, thënë të drejtën, i shurdhër nuk jam, nëse bëjë veshin të shurdhër që të kuptoj më mirë se ku kanë ndërmend të dalin ata që udhëheqin këtë fushatë. Kjo nuk është fushata e parë dhe s'do të jetë as e fundit. Me tallaze të ngjashme jam duke u konfrontuar që kur kam zgjedhur këtë rrugë (e cila më duket e drejtë!). Nuk mashtroj veten se nuk do të ketë fushata... të ngjashme edhe në të ardhmen... Sipas të gjitha gjasave, kreatorët e fushatës në fjalë është një bandë (ta quaj kështu tani për tani), e përbërë nga Reshati, Xhaviti, Isaku, Fazliu... Këta edhe mund të mos i takojnë një bande, në kuptim të ngushtë të fjalës, por telat janë duke ju puçur... Se çfarë bëjnë, cilët janë, çfarë janë duke shpifur, nuk po zgjatem kësaj radhe. Sikur t'u përkushtohesha të tillave fushata e të tillëve njerëz (që po më imponohet...), në të kaluarën, tani dhe në të ardhmen, s'do të më mbetej kohë për aktivitete të tjera që kërkohen nga unë (ashtu, ashtu kam përshtypjen se kohës nuk po ia nxjerr kymetin sa duhet e si duhet.). Më është dukur çdo herë më e arsyeshme t'i përmbahem proverbit popullore: "qentë lehin, karavani le të ec".

E keqja më e madhe nuk qëndron tek ajo se dikush ndërmerr fushatë "demaskuese", por tek qëndrimi oportunist e "pritës" i shokëve të idealit - të radhëve..., me të cilët kam bashkuar luftën. Siç po ndodh, me anëtarët e kësaj bande (e thash, nuk

kam fakte se i takojnë një bande të organizuar, por më shumë po shprehem kështu duke u bazuar në veprimtarinë e tyre, pse jo pak edhe në mllëfin tim...) të "rastëtis" t'i vizitosh rrethet e ndryshme për t'u informuar e "bashkëbiseduar", edhe për ato që s'do të duhej të ishin të pranishëm të sipërpërmendurit (i mendoj kryesisht Xhavitin e Fazliun). Sa për Reshatin nuk di se në ç'nivel qëndrojnë marrëdhënjet, mu për këtë arsye nuk po konkretizohem kësaj radhe. (Le të mbetet herën tjetër, pasi siç po duket, jam i detyruar të jap mendimin tim rreth manovrave të tija...).

Për t'u konkretizuar edhe më, më duket fare e padrejtë që më leni "vetëm" të përballoj shpifjet që po përhap kjo bandë, duke vështruar si spektatorë e referë... Ti, shok i dashur, sikur të ishte i bindur se ata nuk kanë të drejtë dhe po ta kishe kuptuar se shoku duhet mbrojtur, do ua mbyllje gojën... Përkundrazi edhe pse pata shprehur mendimin (kur qem takuar në ... dhe gjatë rrugës në të kthyer), se që t'katërt (nuk di përse...) janë duke bërë "manovrimë", prapë se prapë mund ta bashkëpunon (nëse mund të quhet bashkëpunim vizitave që ua bën rretheve bashkë me ta, çka unë mendoj se është bashkëpunim.), pavarësisht nga fakti se ti dinë sa edhe unë (ndoshta ke patur mundësi të dëgjosh edhe më shumë...), se personat në fjalë janë motorët e fushatës "demaskuese" kundër meje, të cilin ti e quan "se njëri prej personazheve për të cilin flitet shumë je ti".

Sikur gjërat t'i quajmë me emrin e vet, pa patur nevojë të ngurrohemi që t'i shprehim mendimet sado kritike që të jenë (nga frika se kritika dhe sqarimet mund të arrinë efekte negative...), do të thoja se shprehja relativisht po na del vërtetë relative në llogari të asaj se ne nuk njihemi mirë, ose nuk je gjithaq i sigurt. Këtë e përforcon mendimi tjetër i yti: "Ne njihemi vetëm sa na ka kontaktuar puna dhe vetëm (nënvizimi nga unë) puna e asgjë tjetër. Në bazë të saj do të njihemi edhe në të ardhmen." Ja këtu del ajo që thash se po mbahet qëndrim oportunist e "pritës". Përndryshe, po të ishe i bindur se ke për shok një bashkëlufëtari të vërtetë (dhe jo që do të bëhet në të ardhmen...), do t'u kundërviheshe shpifjeve, po shpifjeve, në kuptim të vërtetë të fjalës të personazheve të sipëremërtuar. Sipas të gjitha gjasave këta personazh ndjejnë veten bukur të sigurt se do dalin fitimtarë, duke u mashtruar se të kanë me vete (kështu kam bindjen, të lindur nga...), pa i ditur relacionet e marrëdhënieve tona. Këtë e vërteton mendimi tjetër yti: "Opinioneve të ndryshme u intereson së tepërmi lidhja (nënvizimi nga unë) jote me lëvizjen e mjaft të tjera". (I jap të drejtë vetes, duke kërkuar falje, se fjala Lëvizje është emër i përvetshëm - në kuptimin kur është në pyetje LRSSHJ-a!). "Ngreh një kashtë dalin gjashtë", thotë një proverb popullor. E unë ngrehi kashtë, siç po më duket, por ja që letrës duhet t'i përgjigjem. Por, po t'i biem me sopatë të madhe, siç përdoret në anën tonë (kur ngatërrohet muhabeti), nuk po kuptoj fare se ç'ke dashur të shkruash.

Së pari, për çdo opinion të veçantë kemi qëndrime të veçanta, sipas kritereve të punës... Unë nuk kuptoj për cilat opinione ke fjalën ti dhe si i klasifikon ti opinionet. Siç duket, ti e ke fjalën për opinionin e përgjithshëm në mërgim, nëse kam mundur të të kuptoj, të cilin e ke ndarë në "opinione të ndryshme" (kjo edhe nuk është e përkufizuar, se për çfarë ndarje është fjala dhe cilat kritere janë përdorur.). Opinionin shqiptar në mërgim, sipas mendimit tim, mund ta ndajmë në opinionin patriotik-revolucionar të shumicës (për këtë mendim duhen analiza më të shtruara), në opinionin reacionar dhe në atë të veglave naive e çorre dhe besnike të armikut. Ngandonjëherë më ka rënë të dëgjoj të shprehem sikur çdo individ na paska opinion individual, që për mendimin tim ngatërrohen, pasi në pyetje është botëkuptimi i secilit (në filozofi janë dy – materialist dhe idealist). Botëkuptimet individuale varen nga aftësitë e secilit si individ (të

kushtëzuara nga rrethi e jeta) për ta kuptuar botën, gjegjësisht proceset që zhvillohen në të, në rastin tonë proceset e zhvillimit të shoqërisë njerëzore...

Me siguri që, secili prej këtyre opinioneve, në mënyrat e tyre, u intereson për lidhjet e mia me LRSSHJ-në, dhe jo vetëm për lidhjet e mia, por edhe të shokëve tjerë, duke shtuar këtu, se më së paku i intereson (me përjashtim të kurioziteteve individuale...) opinionit patriotiko-revolucionar, pasi është i vetëdijshëm se në këto rrethana do të ishte e damshme. Unë e di se mbahet konspirative lidhja e secilit me LRSSHJ-në, sigurisht edhe jotja, jo vetëm ndaj "opinioneve të ndryshme", por edhe brenda radhëve të LRSSHJ-së (dihet në cilat përmasa...). Sikur të shprehem, ashtu siç po e kuptoj, se çfarë më shkruaje, atëherë del se për lidhjet e të tjerëve me LRSSHJ-në "opinioneve të ndryshme" ditkan. Ekziston edhe një mundësi tjetër, që të kuptohet kështu: nga dashuria që kanë individët (në rastin tonë dihet se për cilët individ është fjala) për Lëvizjen, duan të dinë për lidhjet e mia (të njeriut të dyshimtë, thonë ata), që ta shpëtojnë LRSSHJ-në nga kjo e "keqe"... Pos lidhjeve "opinioneve të ndryshme" u interesokan edhe "mjaf të tjera". Ç'ke dashur të shprehish ti nuk e di, por unë kuptoj se atyre ju duhen edhe më shumë informata të tjera, më shumë mbi punën time se sa për personin tim. Këtë e kam ditur – mirë që ma bënë të qartë edhe ti. Fjalitë pasuese sikur i mbulon ato të mëparmet, por që të studjohen rrethanat duhet bashkëpunim mes nesh, duke mos patur asnjë dozë mossigurie duke llogaritur njëri në tjetrin shok të sigurt e sinqertë. Sa për operacionet (edhe pse kësaj radhe është në pyetje fushata, pasi në atë kontekst është përdorur) "zhvillohen shpejt" duke qenë të dënuara të dështojnë (varshmërisht nga vendosmëria, aftësitë dhe vigjilenca jonë.)!

Dëshiroj që ca nga mendimet në këtë letër të kanë shpëtuar dhe jo se i ke shprehur duke qenë i thelluar, edhe pse nuk guxon të na shpëtojnë gjëra të tilla (çka është e pamundur, por duhet t'i minimizojmë dhe, sigurisht, për ato që na shpëtojnë kritikohemi, këshillohemi, japim llogari...). Po them këto jo për qëllime taktike, por kam përshtypjen se vërtetë në raste të ndryshme gjatë bisedimeve të shpëtojnë fraza, duke u dukur përfundimisht si mendime mozaike. Ndoshta do të kujtohet vizita në Hamburg, pas Mbrëmjes Përkujtuuese. Ishin shumë bashkatdhetarë (mbi dhjetë veta, në banesë të një bashkatdhetari ku banon Isaku). Bënim bisedë kryesisht të natyrës sqaruese-informative, me qëllim që të ndihmohen grupet për të gjetur gjuhë të përbashkët, së paku sa i përket çështjes së klubit. Sigurisht që bisedove me tonë të rëndë e "zyrtar", për çka kam përshtypjen se edhe në jetë të rëndomtë gati atë natyrë ke. Në mes të bisedës të patë shpëtuar fraza: "... unë dhe I. luajmë rolin e Miladinit e të Dushanit... Tekstualisht s'e kam mbajtur mend, por ka qenë frazë e kësaj përmbajtje, e cila s'të hynte fare në punë. Pastaj fillove të tërëhjekësh parametra "analog", për të na "bindur" se nuk të shpëtoi rastësisht. Jo vetëm unë, por edhe të tjerët, që e njohin Historinë e PPSH, qenë çuditur. Nuk kishte asgjë analoge me ato të shokut Miladin dhe të çetnikut Dushan, të cilët nuk i patën bashkuar grupet komuniste në Shqipëri... Guxoj të shtroj me këtë rast edhe pyetjen e pa kripë, se cili nga ne të dy ishte Miladini e cili Dushani...?

Opinionin i bandës në fjalë është shumë i kufizuar. Kurse vet personazhët po guzojnë të hapin gojën duke u shitur si të LRSSHJ-së, bile me "përgjegjësi" në këto radhë. Këtë të fundit po ua mundëson qëndrimi yt pritës, në rastin konkret qëndrimi yt oportunist e "pritës" dhe marrja pas veti në takime e bisedime në rrethe të ndryshme, që provojnë t'u imponohen rrethëve si të "dërguar" (me taktikë përfide, për të lënë që të vetëkuptohet...) e "autorizuar" nga LRSSHJ-ja. Dhe lidhjet e mia me LRSSHJ-në u duhet shumë nga fakti, se unë i njoh nga orët e para në mërgim, prandaj janë të

vetdishëm se për të fituar sigurisht që u hynë në punë të tilla të dhëna. Bile u duhen shumë, duke u nisur nga fakti se në raste kur arroganca e tyre po kalon kufijtë e tolerancës, po u kundërvëm me vendosmëri dhe do t'u kundërvëm çdo herë. Këta e ka shijuar secili nga ta...

Duhet t'u ruhem rrjedhimeve serioze. Nuk dëshiroj të dëgjoj se në praninë tënde, bile duke t'u drejtuar ty, kanë shpifur dhe ti s'më ke mbrojtur. Po kështu, nëse të ka rastisur të dëgjosh se si "opinioneve të ndryshme" u kanë interesuar lidhjet e mia me LRSSHJ-në dhe ti s'u ke dhënë përgjigje të merituar, atëherë jo vetë që vlerësohet qëndrim oportun, por është shkelje e rëndë disiplinore, e diciplinës parimore!

Më duket shumë i arsyeshëm një shembull nga e kaluara. Gjatë aktiviteve të mëparme nuk kanë munguar fushata të ngjashme jo vetëm kundër meje, por edhe kundër shokëve. Edhe pse nuk ishim shokë të nivelit që jemi ne, kundër shpifjeve e trillimeve mbronim njëri tjetrin me vendosmëri, bile edhe atëherë kur paraqiteshin rreziqe serioze. Përse të mos ndodh kështu edhe në rastin tonë? Mosmarrëveshjet që kishim i muarëm si të sqaruara. Ato patën lindur... ose na qenë imponuar... Ne vendosëm... Pas ati "rasti", s'do mend të thuhet se ndaj tjerëve që ndërmarrin fushata "demaskuese" kundër nesh, duhet t'u kundërvëmi bashkarisht e me vendosmëri, e jo të lehet ndonjëri nga ne "vetëm". Sot qenkam unë "personazhi për të cilin flitet shumë", nesër, po të kenë fituar kundër meje, je ti e tjetri me radhë. Në fakt, luftën e fushatave nuk i bëjnë kundër personave, por kundër Lëvizjes, së cilës nuk guzojnë t'i shpallin luftë, përderisa të duan të bëjnë luftë nga pozita, sikur janë të LRSSHJ-së... Në rastin tonë konkret, pasi më njeh "relativisht mirë", ose se "ne njihemi vetëm sa na ka kontaktuar puna dhe vetëm puna e asgjë tjetër", duket se këtë fushatë "demaskuese" po e vështron me admirim, duke pritur edhe çfarë "faktesh" do të dalin në "dritë", për t'i patur si "poena"...

Sikur e bëra tërkuzë, për çka mund të fajsohem se përmbajtjes së letrës tënde i dhash përmasa "dramatike". Gjykimit të ndonjë gjyqi diciplinor nuk i iku. Po kështu, jam për atë që në radhët tona të gjallërohet një kulturë revolucionare për të diskutuar hapur e padroje, për të kritikuar pa hile, përndryshe nga gabimet e vogla (nëse nuk u rrimë gati me kohë) mund të rrëshqasim në gabime të mëdha dhe prej aty edhe në armiqësi. Prandaj, nuk kam përshtypjen as që u zgjerova dhe as që po "dramatizoj". Të shohim çfarë do të thuani ti dhe shokët. Kurse në të ardhmen varësisht nga nevoja dhe zhvillimi i ngjarjeve dhe në varshmëri nga përgjigja që do të marrë, do mbaj qëndrime përkatëse. Unë jam për atë që të bëhem urë për hir të çështjes, por nëse toleroj që të kaloj çdo gjë mbi mu, jam i dobët, kam shkelur parimet dhe është kundërrevolucionare!

T'i përgjigjem letrës tënde po vazhdoj, por më duket se pjesa e dytë, siç më duket e mundshme të ndahet, më shumë shërben për t'i përforcuar mendimet e pjesë së parë, që tërthorazi të përforcohen me "fakte" ato që ke thënë më lartë.

Në vazhdim më shkruaje për "mbresat" që ke fituar gjatë "takimit të parë" në rrethin e Dys. Menjëherë është sjellë fakti se në atë takim "në mes të tjerëve" ka qenë edhe "vëllau yt i nënës". Së pari po bëjë një sqarim të natyrës "teknike", se vëllau për të cilin më shkruan, nuk është nga ana e Nënës por e Babës (që nuk luan ndonjë rol në këtë rast.). Këtu do të jem bukur kategorik: Në fushën e aktiviteteve patriotike për vëllaun nuk jap llogari si vëlla, por vetëm si shok, mund ta gjykojmë së bashku për gabimet që i bënë! Kjo nuk është hera e parë që po e them. Për tradhëti, edhe pse llogari kërkon populli nga secili tradhtar, do nxitoja të lyp llogari, kurse për gabime, le të lypin llogari shokët, në rastin e tij duhet të kërkojnë llogari Kryesia dhe anëtarët e Klubit, pasi ai aty

është anëtar. Në aktivitetet revolucionare familjarizmi të ndihmon në fillim, por është i dëmshëm, s'është fare revolucionar. Sikur të mos mbahen qëndrime parimore ndaj familjarizmit që në fillim (duke përjashtuar shfrytëzimin e tij për nevoja revolucionare, pasi në rrethana të kushtëzuara si këto tonat, sikur ndihmon...), mund të bëhet shumë i dëmshëm më vonë. E kur është fjala për LRSSHJ-në, që nuk është ndonjë grup lokal i kufizuar edhe në mundësi, atëherë familjarizmit duhet vuar shqelmin dhe të mos lejohet të ngre fare të kokë në Organizatën tonë. Është e vërtetë se ai do duhej të gabonte me pak se ndonjë shok i nivelit të ti, sikur çdo gjë të ishte në rregull, pasi ekzistojnë mundësitë për të ndikuar në të më shumë se tjetri. Kjo s'do të thotë se u dashka dhënë llogari për të, kur ai është i vetdijshëm dhe është në gjendje të jap llogari vet. Në këtë rast konkret, vëllau është anëtar Klubi dhe jo i LRSSHJ-së. Si simpatizant që është, nuk kemi mundësi t'ia ndalojmë të mos jetë, përderisa LRSSHJ-a është pararoja e popullit. Të pranishmit në atë takim dinë se cilin qëndrim kam mbajtur edhe herave tjera, kur kanë qenë në pyetje gabimet e tija. Ndërsa sa i përket anëtarësimit në LRSSHJ-në, kur jam pyetur nga shokët, kam thënë se nuk është në nivel për të qenë anëtar. Ka mundësi që gabimet e vëllaut të më dëmtojnë tek ata që duan të kapen për këto gabime, kur do t'u mungojnë të tjerat. Po kështu edhe te ndonjë që nuk është në nivel revolucionar dhe te ata që mund të mendojnë se unë e "kurdisi" qëllimisht, por te shokët në nivel, as që duhet të diskutohet, pasi nuk kanë as më të voglin dyshim se unë e "kurdisi".

Pa u zgjatur më shumë mbi marrëdhëniet familjare në aktivitetet patriotiko-revolucionare, më konkretisht në gjirin e radhëve të LRSSHJ-së, e cila do të duhej të diskutohet në ndonjë rast tjetër, po ndalem te "vizita e parë" në Rrethin e dys.

Para se të filloj, më duhet ta pranoj se nuk jam në korent mbi takimin, se si është zhvilluar, për të mundur më shtruar të shkruaj dhe për të qenë i sigurt në atë që shkruaj.

Së pari, ky nuk ka qenë takimi i parë. Ti ke qenë edhe më heret në atë Rreth, ke takuar e ke biseduar me shokë të ati Rrethi. Ato takime nuk janë bërë të kota, përndryshe do dilte se atëherë qenka bjerr koha dhe vetëm takimet "zyrtare" (po i quaj kështu, pasi s'po gjej emër më të qëlluar) na qenkan takime pune. Që në fillim po shtoj, ndoshta ke nxjerr mësim se takimet e mëparme, të bëra në frymë më shoqërore e jo në nivel "zyrtar", kanë qenë më të frytshme, janë siguruar informata, janë ndërruar mendime dhe më në fund nuk është alarmuar gjendja si tani, siç je informuar edhe ti.

Në këtë takim ke patur Xhavitin si shoqëruar. Që të mos kalon në monotoni, nuk po zgjatem më rreth tij. Po të kërkohet e bëj me një rast tjetër. Kësaj radhe mjafton të them se nuk është kuadër në të cilin guzojmë të mbështetemi, siç e kam thënë. Përkundër kësaj që unë kam shpreh mendim të tillë rreth këti personi, ti ke parë të arsyeshme ta marrësh me vete në takim (dihet të cilit nivel). Unë jam i mendimit se kjo s'është dashur të bëhet, është e gabueshme dhe për këtë mban përgjegjësi. Kjo ka bërë që atmosfera e takimit të rëndohet dhe jo pyetjet e ndërhyrjet e vëllaut. Të gjithë të tjerët Xhavitin e kanë njohur më mirë se ti. Ata ia kanë njohur shumë sjellje e qëndrime gjatë sakrificave që kanë bërë për ta ndihmuar e përkrahur Klubin e "tij"... Sigurisht që duhet të jenë befasuar për shoqërimin e tij, dhe për mendimin tim, cilido që ka pranuar të diskutoi dhe jap informata më të hollësishme rreth Klubit, nuk ka qenë në nivel, ka gabuar. Po të pyetsha unë, ose po të isha në prani, një takim të tillë sdo ta kisha pranuar. Dhe, hajde e shkarkoja vëllaut fajin pse është alarmuar gjendja, përmes ti tërthorazi edhe mu, për ta shkarkuar nga vetja. Nuk e di si do arsyetohe për këtë gabim, kur secili nga tjerët në atë takim është më i sigurt se Xhaviti dhe kanë eksperiencë të mjaftueshme, në mos shumë.

Pasi ka qenë "takimi i parë", edhe po të mos ishte i pranishëm Xhavitit, a vërtetë është dashur të jetë i një niveli aq "zyrtar"? Ne, nëse të kujtohet, kemi pas biseduar se si duhet sjellur me rrethe e individ, te të cilët disa ngjarje të së kaluarës lënë gjurmë... Njerëzit nuk ndryshojnë aq shpejt edhe kur ata duan dhe nga ta kërkohet. Po të kërkohet ndryshim i shpejt, atëherë detyrohen të jenë formal dhe ky formalizëm bie në provim po sa të jetë prekur në "nervin e ndieshëm". Mu për këtë arsye, aty do të duhej një takim i nivelit më shoqëror, sigurisht edhe pa praninë e Xhavitit. Nga ajo që më ka thënë vëllau, pasi të tjerët nuk i kam takuar (kurse ato që m'i ka thënë vëllau i marrë si informime të bëra në gjendje të revoltuar...), janë shtruar pyetje aq të detaluara, sa, nëse janë të vërteta, edhe mu më befasojnë. Dua të shtoj se informata aq të detaluara nuk na duhen dhe janë të dëmshme. Kur lypsen për punën në Rreth, mund të informoj ndonjëri nga shokët aty për aty që të diskutohen format organizative në rreth, si më të përshtatshme që do gjenden. Puna në Klub duhet t'u besohet shokëve të rrethit. Mjafton me ta të bisedohet për çështjet parimore e statutare. Po, le të mbetet edhe kjo temë e hapur për diskutim, pse duke pritur këto që po ndodhin jo vetëm në Rrethin në fjalë, pata kërkuar që disa gjëra rreth klubeve të diskutohen dhe të bihen vendime.

Shiquar nga ana tjetër, vërtetë do lypsej, për ata që duan të merren me çështje klubesh, të shkojnë në Rrethin në fjalë për të mësuar nga eksperiencia e tyre. Ata, të Klubit... jo vetëm që Klubin e tyre e kanë drejtuar si duhet, por vazhdimisht kanë ndihmuar edhe klubet tjera, i kanë përkrahur ato dhe u kanë spjeguar mbi të gjitha rreth klubit. Atë është dashur ta pranon edhe vetë Xhavitit, nëse je këshilluar me të përpara. Jo vetëm në klubet për rreth, por edhe jashtë rfgj. kanë shkuar, vetëm e vetëm që t'u vinë në ndihmë bashkatdhetarëve që të formojnë klube. Në këtë drejtim, Referatin e mbajtur me rastin e 5 Vjetorit dhe Mbrëmjen me atë rast, duhet t'i çmojmë si literaturë, gjegjësisht si mësim praktik.

Mendimi im është se në atë Rreth nuk është dashur tjetër informatë, pos të riorganizohen shokët që janë anëtarë dhe atyre t'u besohet klubi, për të mos patur nevojë në të ardhmen të mbahet kujdes, pasi kemi punë e kujdese tjera mjaft. Jo vetëm në Rrethin në fjalë, por në të gjitha rrethet, edhe sikur vetëm me figura shahu të kishim të bëjmë, duhet zgjedhur mënyra e "lojës". Kurse ne jo, na duken më interesant badihavxhinjtë, fodullët, dallkaukët, pseudointelektualët, që me ta të organizojmë punën, kurse punëtorë, me kuptim të plotë të fjalës, vetëm të dëgjojnë dhe t'u vinë prapa të tillëve. Jo, kësaj duhet dhënë fund dhe do t'i japim se s'bënë. Ka punëtorë të ndershëm mjaft, që kanë dhënë prova, ndërsa të tillët, s'po ua përmend emrin, duhet të mësojnë të respektojnë punën, mësimin, djersën e punëtorëve, për të mos bredhur poshtë e lartë gjoja si patriot, për t'i ndihmuar të tjerët të "ngirten" kur nuk janë vet të ngritur, as sa i përket edukatës elementare për t'u sjellur si njerëz, për të respektuar, e lere më ngritjen ideologjike e revolucionare. Për këto them se kam prova. Të edukuarit yrush edhe ku nuk janë të thirrur, janë në gjendje ta njohin veten dhe dinë se sa janë në gjendje të kontribuojnë.

"... si rreth (mendohet Rrethi i dys., sqarimi nga unë) aty dukej mirë se lokalizmi ka rrënjë të thella dhe njerëzit janë të ushqyer fort me atë ndjenjë për të mos thënë të ngopur apo të tejngopur", më shkruaje në vazhdim. Duhet të mbaj përgjegjësi unë për këtë? Para se të diskutohet për përgjegjësinë, do të pyeja: si është e mundur të bëhen vlerësime aq të sigurta që në "mbledhje të parë". Më duket se nuk është reale. Nëse janë të bashkuar, nëse u kanë dal zot punëve më së miri (Nuk di ndonjë klub, jo vetëm të emigrantëve ekonomik, por edhe të atyre politikë dhe të migruarëve, të ketë patur kaq jehonë.), nuk do ta vlerësoja për lokalizëm. Siç ke mundur të vresh, vetëm dy veta në

takim janë të një ane. Lokalizëm të bartur nga atdheu nuk ka, as që ka mundur të bie në sy gjatë atyre 5 viteve të shkuara. Atëherë, ka mundësi se mbyllja dhe fanatizmi, reagimet edhe emocionale, kur është në pyetje Klubi, janë të kuptueshme, së paku për mua që ia njoh jetën në çdo qelizë dhe i njoh të gjithë anëtarët si në shuplakë të dorës. Mu për këtë arsye kam pas thënë se në atë Klub, me ata anëtarë e ndjejë veten të familjarizuar. Është e damshme. Jo. Të tillë lokalizëm do të kishim dëshiruar në të gjitha qendrat e Evropës dhe përtej oqeanëve, kur t'i shtojmë kësaj edhe faktin se ishte klubi i orëve të para që ju kundërvu politikës diskriminuese jugo-sllavomadhe. Po të ndalesha edhe më gjatë, kisha për të shkruar njaft edhe për kontributet, për aktivitetet, që në rrethe tjera veç mund të ëndrohen. Pastaj dëshira që edhe në rrethe tjera të ketë klube të ngjashme, duke qenë të vetdëshim, se pos të mirave tjera të shumta, edhe presioni nga ana e organeve jugosllave do të zvogëlohet, pasi për një kohë ishte i vetmi në botën e jashtme, i shtyri të sakrifikojnë sa asnjë rreth për t'u ardhur në ndihmë bashkatdhetarëve që t'i marrin ose t'i hapin klubet e reja atje ku nuk kishte. Mund të vlerësohet kjo për lokalizëm?! Jo! Çka mund të vlerësohet lokaliste atëherë? Më duket se lokaliste të është dukur krenaria që ndjenë, ose mos hapja dhe rezervat. Sa për krenarinë, është e kuptueshme, sado që është e dëmshme. Kurse mos hapja dhe rezervat, gjithashtu janë të kuptueshme për mu. Kanë sakrifiku shumë. U janë bërë dredhi të mëdha, por i kanë përballuar. Kjo bënë që të kuptojmë se edhe në raste kur nuk lypset, janë emocional, reagojnë ashpër... Ndoshta mendimin tëndë ua ke thënë edhe atyre në takim me "lokalizmin..." Nëse jo, po u pa e arsyeshme, duhet t'ua themi që të diskutojnë edhe ata vetë.

Për statuse e klubeve thue se kemi diskutuar në ... Pse ma rikujton, apo vetëm për të rrezikuar më shumë. Ne kemi diskutuar, por nuk do të thotë se përbëjmë ndonjë mbretëri absolute – kemi diskutuar ne dhe s'u dashka diskutuar më, as në bazë, për t'i lypur mendimet e tyre nëse kemi vendosur drejtë. Bile, kur ndodh të dalin të tilla probleme, të bie ndërmend mendime të reja, prandaj do të ishte dashur që diskutimet dhe vendimet (nëse kemi marrë...) do t'ishte dashur të formulohen, për t'ua dërguar në baza për diskutime, dihet rrethit të ngusht dhe anëtarëve, sidomos atyre që kanë përvojë në çështje të klubeve. Të bëhet, nëse është lëshuar gabimisht, ose pse nuk na ka ra ndërmend. (Dua të them se lëshimet po na i imponojnë rrethanat, situata dhe kushtet...). Po i them këto, pse vet fakti se nuk kanë dashur t'i japin informatat, na bënë me dyshua se nuk duhet t'i kërkojmë (pata shkruar në këtë drejtim edhe më lartë.). Atëherë nuk është dashur të kërkohej, por të diskutohet se a duhet të ipen apo jo, duke i ndihmuar të binden, nëse diskutimet tona kanë qenë të drejta. Kështu me radhë, është diskutuar edhe fotoja e satrapit. Nëse nuk kam harruar, ne patëm diskutuar se në klube të reja nuk prish punë nëse e kanë fotografinë e satrapit, por nuk tham se duhet vendosur në ato klube që e kanë hjekur. Guzojmë more, si jo të diskutojmë për çdo pyetje e çështje, por imponimet nuk janë formë demokratike e revolucionare, dua të them të bazës – anëtarëve të një klubi t'ua imponojmë vuarjen e çfarëdo shenje, edhe nëse na duket më e arsyeshme. Pra, duhet zgjedhur mënyrën e sqarimit, për ta gjetur mirëkuptimin. Fotografinë e satrapin Klubi në fjalë e ka hjekur para se të shpërthejnë demonstratat në Kosovë. Sa të gëzuar kanë qenë që atëherë. Tani, në këto çaste, kur asgjë s'duket se ka shkuar më së miri (duke filluar prej shoqëruesit), nuk është dashur të diskutohen të gjitha përnjëherë. Nëse më bindni se unë nuk kam të drejtë pse mendoj kështu, i tërheq mendimet prapa. Por, duhet menduar mirë para se t'i përvishemi një pune, që të mos lëshojmë gabime për t'u alarmua gjendja në asnjë mes. Sa të dëmshme janë alarmime të tilla, vetëm ta dije. Presioni është i madh, psihoza është si në gjendje lufte, armiku vetëm po hulumton të çarat për të futur pyka. Sa lehtë mund të demoralizohen e

zhgënjehen bashkatdhetarët... Është në interes ton kjo? Sigurisht që do thojë jo. Por po e them me gjithë mend, se të tilla gjëra kur përsëriten, i kanë pasojat e veta.

"... atje qenka alarmuar shumë situata e mjaft gjëra të tjera", më shkruan në përfundim të letrës. Sa keq! Duhet të bëjmë sehir, të presim si do t'ia nxjerrin sytë njëri-tjetrit dhe ne të gjykojmë anash se kjo ose ajo palë, se ky ose ai individ kanë të drejtë ose duhet të japin llogari. Kjo po më duket disi edhe cinike – të bëhet shkaktar "takimi i parë" që të "alarmohet" situata dhe pastaj të informohet, pa shpreh së paku merakun, pa lere të thuhet se duhet të intervenojmë dhe ta bëjmë dert se si (kam shpresë deri sa të ketë ardhur kjo letër "situata e alarmuar" duhet të jetë zgjedhur drejtë, duke ndihmuar ju andej që jeni më afër.).

Letra gati sa nuk është mbyllur me fjalinë "... andaj duhet të shikojmë se kush me çka dhe për çka ushqen rrethin e vet". Nëse më lart faji më është hedhur tërthorazi, duke përdorur si urë vëllaun, nga kjo fjali mund të kuptohet se unë mbaj përgjegjësi për të gjitha. Ky është mendimi yt dhe e ke menduar para se t'më shkruash. Mendim të ngjashëm ke shpreh edhe në raste të mëparme. Tani, ose duhet të përgjigjem unë që vërtetë jam fajtor për të gjitha, ose duhet të përgjigjesh ti për akuzë, e cila sipas mendimit tim është e rëndë.

Së pari, unë detyrën e kam krye dhe shokëve ju kam thënë se nëse vie në vizitë ... (të kam menduar ty), atëherë duhet të dini se ka ardhur një shok që është i ngarkuar. Për të tjerat s'po zgjatem më pa marrë mendimin nga ju (mendoj edhe shokët tjerë) se propozimi im aprovohet apo jo. Pra, propozimi im, i formuluar më qartë është, fajsimet që më janë bërë përmes letrës tënde o janë të vërteta dhe unë duhet të jap llogari, o janë akuza dhe duhet të japësh ti llogari. Kurse edhe mendimet tjera duhet të zërthehen, për çka janë të nevojshme informatat nga takimet në rrethet dhe mendimet e shokëve në rrethe. Sa për të dhëna plotësuese mbi personat e sipërmërtuara, po qenë të nevojshme, mund të kompletoj diç, por duhet patur parasysh se për punë të tilla harxhohet koha. Në rastin e Reshatit, ashtu ashtu jam i domosdoshëm, pasi kam marrë disa letra na ai, por jo vetëm pse kam marrë disa letra.

Ndahem me përshëndetje revolucionare, duke të dëshiruar shëndet të mirë e punë të mbarë!

-PËR NJË REPUBLIKË SHQIPTARE NË JUGOSLLAVI!

-RROFTË LËVIZJA PËR REPUBLIKËN SOCIALISTE SHQIPTARE NË JUGOSLLAVI!

SHOKU (Ibrahim Kelmendi)

PS: Kopjet e letrës do ua dërgoj edhe shokëve, pasi pos mendimeve që janë vetëm në nivel të përgjigjes, janë edhe disa mendime propozime për të cilat duhet t'i shprehin mendimet dhe qëndrimet e tyre edhe shokët. Veprohet kështu (pasi e shoh të arsyeshme) në pamundësi për t'u takuar, për kushte që dihen.

Diskutimi i letrës me shokë a simpatizantë, ose me radhët e bandës..., që nuk i takojnë Rrethit tonë (mendoj...), pa u dhënë pëlqimi, është shkelje e rëndë e konspiracionit parimor.

Mundësisht t'i firmosësh letrat në të ardhmen, pse preferohet dhe është më e sigurt.

Mirëupafshim.

14. Letra e 7 majit 1983

Në mërgim..., më 7 maj 1983

Të dashur shokë,

Në pamundësi që të takohemi (siç patëm menduar...) po ju shkruaj, edhe pse në këto rrethana nuk është gjithaq e përshtatshme dhe sigurt.

Festën e 1Majit nuk e "festuam" si duhet. Duke ditur se për cilën festë është fjala, nuk bëmë atë që duhet ta bëjmë dhe që kishim mundësinë, por më shumë sikur ia lam stihisë e spontanitetit. Nuk e di kush duhet të mban përgjegjësi (...), por organizimi nuk ka qenë në nivel.

Së pari, nuk kemi lëshuar fare Thirrje. Ky është lëshim! Pastaj është dashur të këshillohen bashkatdhetarët në rrethe, që të organizohen sa më mirë për të dalë në demonstratat e rretheve të tyre, të thirrura nga sindikatët dhe partitë e organizatat politike në rrethe. Sa për Thirrjen që duhej të bëhej, edhe pse isha në punë e sipër që ta bëjë, pata telefonuar dhe më qe thënë se më mirë të shkruhen në nivel (është menduar ana teknike – të radhitet teksti në "kompouser") dhe në secilin rreth do dërgohet një Thirrje, atje, në rrethe t'i shumëzojnë e shpërndajnë. Kurse për traktin (të përpunuar atë të vitit të kaluar dhe të aktualizuar) u pa e udhës të përkthehet në gjuhët gjermane e suedeze varianti që patëm formuluar, ndërsa në gjuhën franceze do ta merrnin shokët e Zvicrës mbi vete.

Thirrja nuk doli fare. Siç më tregoi shoku..., kanë patur shumë punë. Përndryshe së e besoj, por llogaritë duheshin bërë me kohë – puna duhet bërë; nëse duart e disave nuk mbërrinë, atëherë duhet ngarkuar kush mundet ta bëjë. Trakti në gjuhën suedeze u shtyp në 4500 ekzemplarë (të cilin e financoi...), kurse në gjuhë gjermane është shtypur në 15 000 ekzemplarë (dhe ka kushtuar 1100 DM., siç më është thënë.). Për traktin në gjuhë gjermane kemi patur vështirësi. Pasi unë isha në Veri ..., ku gjendem tani, nuk kisha mundësi ta bëjë përkthimin (në gjuhën gjermane nëse përkthej, është i domosdoshëm korigjimi final nga folësit e asaj gjuhe.). Rasti për udhëtim m'u dha kur bashkatdhetarët nga këndeje udhëtuan për të marrë pjesë në koncertet e Ansambllit të RPSSH. Përndryshe, pasi më ka dalur viza, nuk do kisha mundur të hy në rfgj. Më në fund mbeti që për shtypje e shpërndarje të interesohen shokët e Rrethit të Barit. Pra, nuk pata mundësi të interesohem për shtypjen e traktit, që të bëhet me çmim sa më të lirë (siç kemi shtypur herave tjera.). Shokët jo vetëm që nuk ishin shumë të sprovuar, por në pyetje ishte edhe koha, prandaj e arsyeshme qe që të pranojmë të paguajmë 1 100 DM (për radhitje, shtyp e palim). Shpërndarja përpak dështoi në detale, edhe pse mundësit ishin ideale. Por, më në fund janë shpërndarë.

Sa i përketë organizimit, që të delet sa më masovikisht dhe të organizuar, thënë të drejtën nuk ju përkushtova, pos këndeje ku isha. Në Bruksel pata dërguar letër (po dërgoj kopje të sajë), përmes së cilës ju shkrova se ç'duheshin të bënin! Edhe në Bari, po ashtu, të organizuar mirë (me Parollën KOSOVA – REPUBLIKË! dhe parolla tjera), kishin patur sukses. Për rrethe tjera nuk di.

Shokë,

shoku Salih më ka shkruar letër më 24 prill. Unë ia kam kthyer përgjegjen ashtu si më është dukur e arsyeshme. Të zgjatem edhe me këtë rast nuk më duket e arsyeshme, pasi jam zgjatur mjaft në përgjegjen në fjalë (nëse nuk e kam tepruar.). Por këtë rast, siç len të kuptohet, po ua dërgoj nga një kopje, që ta analizoni edhe ju se a kemi vepruar më së miri dhe si duhet t'ia bëjmë. Kur ju shkruaj kështu, nuk mendoj se

duhet t'ju kthehem gjërave në të kaluarën (pasi vendosëm...), por vetëm të ndalemi të përmbajtjet e letrave. Mua nuk më duket e parëndësishme që të merremi me disa probleme që janë shtruar në letërkëmbim (jo vetëm pse jam objekt sulmi – "personazhi për të cilin flitet shumë" – i fushatës në fjalë, edhe pse kjo është serioze), pasi me kalimin e kohës mund që ka pasoja.

Më duket e domosdoshme se disa personave (që janë motorr i fushatës), si Xhaviti, Fazliu, Isaku... në RFGJ (psikopatin Besim e kemi qitë e lënë..., siç shprehet populli) dhe Reshati me disa në Belgjikë (për çështje të Belgjikës mendoj se duhet të merremi në të ardhmen – unë do përpunoj disa kujtime e materiale, me shkrim, ca më shtruar) ka ardhur koha t'ua tregojmë vendin, ose të dimë çartë se si duhet të sillemi dhe çfarë qëndrimi duhet të mbajmë ndaj tyre. Them kështu pasi këta tre në rfgj. janë nxe në teneqe dhe nuk po prajnë së shpifuri, siç po duket, kryesisht kundra meje. Mund që kanë arsye burrat e botës, prandaj le të urdhërojmë të pleqërojmë. Më duket se uj ka kaluar mjaft nën urë për të parë se sa është i pastër dhe nëse nuk është krejtësisht i pastër kush është duke e turbulluar. Po sjelli një rast konkret, si ilustrim se çfarë pasoja ka mundësi të lindin. Xhaviti, Fazliu dhe ai i Parisit (pasi s'po më kujtohet emri po e quaj siç po praktikohet) kanë shkuar në vizitë në familjen X. në Bari, pasi në mbrëmje ka patur edhe koncert. Aty kanë gjetur disa shokë tjerë. Ai i Parizit ka filluar nga "biseda" (siç më tha ai pastaj, mbi gjëra të përgjithshme). Xhavitit ju a dukur e arsyeshme të filloj nga të tiat... Ka mbërritur gjer në atë gjendje sa gati i kanë nxjerrë jashtë (pasi u është sqaruar se të tilla bisedime nuk bëhen në familje.). Asaj radhe isha edhe unë në atë anë dhe më duhet të ik pa e parë koncertin (e kisha parë njëherë natën e mëparme), por vetëm se kisha shkuar shkaku i traktit. Kur më njoftuan se ç'kishte ndodhur, m'u duk e arsyeshme të ndalem (edhe pse shokut që kisha me vete do t'i humbte puna të nesërmen). I takova, së pari atë të Parisit dhe në pyetjen time se ç'kishte ndodhur, filloi të justifikohet... (se na qenka i ngarkuar të luaj atë rol...). I thash se gjëra të ngjashme nuk guzojnë të ndodhin në atmosferë familjare dhe ca biseda të ngjashme. Po kështu, i thash se nëse diç nuk është në rregull, atëherë duhet të gjendet mënyra dhe rasti që të sqarohemi (nëse mundemi.). Fazliu ma zgjati dorën me zor (me atë gati sa nuk jemi zënë keq më parë...). Kurse Xhavitin e ndava me një anë. Sa injorant që m'u duk. Prap manovrimet të vjetra. Kur i thash se nuk kishte bërë mirë që ka shpifur në një atmosferë të tillë, duke provokuar zënje fizike, atëherë si skile zu t'më justifikohet se unë nuk e fillova, ne jemi shokë, ka vetëm disa cikrrime për të cilat duhet të sqarohemi... I thash t'i lërë të vjetrat dhe po pati të qahet se i bëjë të padrejtë le të formon një rreth të shokëve (të cilët do t'i zgjedh ai vet) dhe të ulemi... Pastaj, varësisht nga rezultati, nëse të kërkohet, del e shpif, por të dihet – bëhemi kundërshtarë!

Po kështu asaj radhe më ra të dëgjoj diç shumë të ulët. Gjoja e ka rrahur dikush Sonjën (në banesë të Xhavitit...) në "emër të Lëvizjes...!!" Shpifjet hapeshin sikur unë e kam organizuar rrahjen (ndërsa Xhaviti e ka zbatuar...). Sa gjëra të ulëta thash kur dëgjova dhe po them edhe tani! Sikur s'na ka mbetur tjetër pos të rrahim një qyq! Po pse përhapen gjëra kaq të ulëta? Për këto dinë më së miri tani për tani Xhaviti (Ramabaja)!

Edhe në Hamburg ka patur "manovrimet", prapa të cilave qëndron banda Isak, Xhavit, Fazli... Përkundra të gjithave, siç kam shkruar në përgjegje, shoku Salih në një tubim për çështje të klubit, i ka patur si shoqërues (kështu po shprehem pasi po më duket se është e qëlluar.). Në rreth johomogjen, shoku Salih e ka pa të arsyeshme t'ju thotë se vetëm ai na qenka i autorizuar dhe se po të vijnë të tjerë s'u dashkan dëgjuar fare. (Këto janë burim nga dorë e dytë, prandaj i marrë me rezervë – të dorës së parë i çmoj ato që do të thotë vet shoku Salih.). Nëse është e vërtetë se ka thënë diç të

ngjashme në ambient jo homogjen (duke qenë i shoqëruar me përcjellës të lartpërmendur), atëherë qfaq dyshimin se në pyetje ka qenë Meti (i cili në atë Rreth ishte dhe ka dhënë kontribut të nivelit dhe të pamohueshëm). Te ky dyshim që të vihet mundësoi fakti se në shumë takime të bashkatdhetarëve të Hamburgut ka marrë pjesë Meti (të cilit i kisha thënë se duhet të interesohet që bashkatdhetarët të mos përçahen dhe të këshillohen së çka duhet të bëjnë për t'ua marrë klubin veglave të konzullatit.) dhe aty janë konfrontuar me Isakun. Në fakt janë konfrontuar tjerët, por ky shpesh ka ndërhyrë duke dhënë mendimin e vet mbi fajësimin e kundërfajësimin reciprok, pa qenë plotësisht i sigurt se kush është duke thënë të drejtën., por më shumë duke lënë alternativë në atë mënyrë sa prap të jenë për atë se duhet të mbesin shokë, të bashkëpunojnë për ta marrë klubin në dorë. Dhe edhe këtu shprehu mendimin se shoku Meti është i pjekur dhe duhet të angazhohet e jo të izolohet (edhe pse për izolim të tij më së shumti është fajtor ai vet, besa edhe rrethanat...). Pastaj, derisa mu shoku Salih më qortoi se përse kisha kërkua nga Isaku të angazhohet për klubin (çka nuk kisha vepruar ashtu fare – unë e vizitova pasi më thanë se shumë veta drejtpërdrejtë o tërthorazi nuk po i lenë të vinë në klub, gjegjësisht të anëtarësoheshin, pasi në prag ishte tubimi zgjedhor. Me atë rast i pata thënë se mban përgjegjësi për ata bashkatdhetarë që drejtpërdrejtë o tërthorazi nuk i len të merren me çështje të klubit, pasi dihet se çfarë interesimi kishin më parë. Ai, siç doli kur më qortoi shoku Salih, i paskësh thënë se gjoja kam kërkuar që ai me çdo kusht të angazhohet për klubin...), ai vet e kishte marrë në takim me veti dhe e kishte thënë Isaku vet se nuk do merrte pjesë në takim, por vetëm e paskeshin lutur (Salihu me Xhavitin, nëse kam mundur të mbaj mend, në pyetje ka qenë edhe Fazliu). Po e potencoj edhe njëherë, të gjitha këto janë të dhëna nga personat jo gjithaq të besueshëm (të cilët donin të shfrytëzonin rastin në çdo situatë, edhe kur nuk ishte ambienti, kur isha për koncert, t'më flisnin, duke shprehur edhe paknaqësi.). Po shtoj, nuk po merakosem fort për thash e thëna, por më shumë e kam hallin se në atë rreth punët po na ecin si gaforrrja.

Që të shkruaj edhe më detalisht për personat në fjalë nuk kam as "vullnet", pos nëse kërkohet. Kështu si i njoh, i njoh që në orët e para dhe fillimisht me secilin (pos me Reshatin) kam patur të bëjë nga afër me ta. sa për Isakun, as që ka nevojë. Ai, më duket ka mbërri në shkallë të Besimit. Shtoj, me budallaqe edhe ia kalon, por është më i rafinuar. Për Fazliun, nuk e di nëse dikush tjetër di më shumë, por nuk më bëhet të besoj se aktivitetet patriotike e kanë nxjerrë kënde (pasi iu paskësh dashur të ik...). Kjo ka rëndësi, por pasi nuk kemi të dhëna të sakta, atëherë duhet të bazohemi në sjelljet e tija që në orët e para kur erdhi. Jam më se i bindur se ai e keqpërdori respektin që kishin bashkatdhetarët e Deçiqit për rini të Kosovës. Me kalimin e kohës filluan t'i dalin në shesh maniret dhe dal nga dal të distancohen nga ai po ata që e kishin respektuar dhe ishin kujdesur për te. Pasi ishte në moshë për të studjuar, e këshilluem që të regjistrohet në fakultet dhe për këtë u ndihmu. Por, sigurisht që kusht ishte gjuha. Edhe mundësitë që të ndjek kurset e gjuhës në fakultet ju siguruan. Në dritë doli përtacia e tij për të mësuar, që provonte ta maskon me "nevojën" për t'u endur posht-lartë, pasi u kërkua të përhap patriotizëm. Por, pasi ai vet nuk ishte i ngritur (i mungonte fjalori, pasi siç lente të dukej, nuk kishte lexuar fare më parë as gjatë shkollimit të mesëm...), tërthorazi u këshillu se duhet të ulët për të studjuar, duke ju bërë e çartë se shumë gjëra të përgjithshme për bashkatdhetarët janë të njohura, prandaj duhet të përgatitet më në nivel, pa munguar t'i thuhet se edhe si kuadër në të ardhmen lypsen shokë të përgatitur. Duket se këto këshilla, të dhëna në frymë shoqërore e vëllazërore i keqkuptoj, duke menduar se qëllimisht ju mohokan aftësitë... Kam bindjen se kështu i ka lindur urrejtja, që më vonë të shendërrohet në vijë dhe kështu t'i gjejë "bashkëlufëtaret" për t'më

shpallur "luftë". Që në çastet e para, kur këto dukuri po merrnin këmbë, e kritikova. Po kështu, kërkova si të domosdoshme të dalim para shokëve në rreth, për të parë se kush është në gabim dhe sigurisht që të përmirësohet. Kësaj i iku, kurse anash nuk prante së përhapuri shpifje se si unë ia kisha "zënë diellin". Pasi sipërfaqësisht kemi biseduar, thuaja më shumë veç e veç (edhe me shokun Salih) edhe për Fazliun, duket se është e domosdoshme të shiqohet në nivelin tonë se mos unë jam në pozita të gabueshme (që është më e dëmshme se sa të jetë Fazliu), kurse nëse është Fazliu, atëherë si duhet t'ia bëjmë. Në këtë drejtim më së shumti ka për të thënë shoku Salih (të cilit Fazliu duhet t'i ketë folur shumë për "padrejtësitë" që ia kam bërë dhe për "gabimet" e mia. Fjalën gabime e futa në thonjëza, jo pse nuk kam bërë ndonjë gabim, por për bindjen se sa ka mundur të shpif Fazliu nuk kam bërë gabim...).

Më i ndërlikuar më duket rasti me Xhavitin, pasi është më i rafinuar. Te rasti i Xhavitit asnjëherë nuk kam mundur ta shlyej dyshimin që ma kanë imponuar disa vrojtime të bëra. Thuaja, që në orët e para kur erdha në mërgim njoha Xhavitin dhe pata bashkuar aktivitetet. Por ja, krijova bindjen se ai njeri nuk po kontribon më shumë se sa q'i duhet për maskim, edhe pse kapacitet dhe mundësi kishte që të kontribonte më së shumti, pasi për çudinë më të madhe shumë rrallë punonte, ose thuaja nuk punonte fare. Kohë të gjatë jetoi në konvikt të grave (motrave medicinale), ku ishte e ndaluar për burra... Jetonte te një gjermane, me të cilën tani po "bashkjeton". Në një kohë pat pruar shoqen (gruan) nga Kosova. Më vonë mësova se ishte ndarë me të (për arsytet që s'i di dhe nuk më interesuan gjithaq, edhe pse nuk ishte e tepër të dija, pasi e çmoja për shok të idealit, që miltonim në të njejtat radhë...). Me kalimin e kohës bënte edhe mashtrime të pakuptueshme (se punët shkonin mirë në rreth...). Por provat vërtetonin të kundërtën. Kështu lindi ftohje mes nesh, njëherit edhe distanca. Sa i përket klubit na dukeshin se po bëheshin manovrimet të pakuptueshme, në të cilat u përzie më vonë edhe Sonja... Të dy së bashku bënin manovrimet në relacione edhe më të përmbledhta se sa klubi, pra sa u përket radhëve revolucionare, përkatësisht LRSSHJ-së. Në sy më së qarti binin dezinformatat dhe dezinformimet në Rrethin e "tyre", shpesh nga pozitat se janë me LRSSHJ-në "demaskonin" atë. Po kështu, manovrimet të ngjashme na binin në sy kur i bënim vizitë klubit "Kosova", siç na ndodhi me një rast – që të konfrontoheshim para masës... Pa u deteluar, është një rast që unë nuk e kam të qartë. Por edhe veprimtaria e tij, sidomos me çfaqje të disa filmave, nuk ma mbush mendjen se çdo gjë është në nivel dhe e pastër...

Ato që shihen qartë ke të tretë, janë mendjemadhësia dhe fodullëku, janë pseudointelektualizmi dhe intrigat, kurse të Isaku e Xhavitit edhe dëgjenerimi (Të i pari jo vetëm se nuk po i ka sukses sa duhet, se përndryshe, vetëm një pjesë e asaj që ka treguar vet, me njëfarë "krenarie" po të jetë e vërtetë, atëherë dëgjenerimi i tij gjatë kohës së studimeve në Pragë – ku janë kushtet, pasi edhe sistemi kushtëzon dëgjenerim në përmasa të gjëra... – është vërtetë i turpshëm. Të i dyti, pos "banimit" në konvikt të grave dhe fakti se ka lëshuar gruan shqiptare e po bashkëjeton me një gjermane, nuk më ka rënë më shumë të dëgjoj.).

Bazuar në të kaluarën e tyre dhe në "maniret" e tanishme (nuk janë në pyetje manire, por gabime të larmishme të bëra vijë...), më duket e pamundshme, e dëmshme dhe e palejueshme që këta persona të aktivizohen në atë nivel, sa në rrethet e "tyre" të ngarkohen për t'i drejtuar aktivitetet. Nëse thëmë kështu, nuk shkel parimin se çdokush që është që viseve shqiptare nën Jugosllavi t'u njihet Statuti i Republikës duhet të jetë me ne. Të jesh me gjithëmend për ta fituar Statutin e Republikës është krejt tjetër nga ajo që të maskohesh, jo vetëm për një interes. Pra, nuk kanë me qenë të rralla rastet që

do të na konfrontojnë, kur rrugaçët, aventurierët, të dështuarit do provojnë ta shfrytëzojnë rastin për t'u "rehabilituar". Ndërsa sa për veglat që janë në shërbim të UDB-së, të cilat kanë për detyrë të përdorin maskat më të përshtatshme për të depërtuar në radhët tona, nuk duhet të harrojmë në asnjë çast. Kam përshtypjen sikur në këtë drejtim, kushdo që tregohet entuziast... sikur ia hapim derën menjëherë. Harrojmë faktin se armiku nuk pushon asnjë çast, prandaj ata që janë në shërbim të armikut, nuk do na tregojnë se janë në shërbim, as që kanë brira për t'u parë, por maskohen si dinë e mundin (duke dhënë kontribute të llojllojshme e aktivitete të "lakmueshme"...), që të na "përqafojnë" sa më shterngueshëm, për të na kafshuar pastaj sa më idhët... (Një pësim të hidhur kemi prapa, nga i cili jemi të detyruar të mësojmë shumë.)

Sa për vigjilencën që kërkohet në këtë situatë, as që më duket e nevojshme të ndalem, pasi është e vetëkuptueshme. Por, sikur e kemi lëshuar ca. Na ka përfshirë liberalizmi evropian dhe po mendojmë se këndeje armiku do na le të qetë. Pra, siç mund të vërehet, sikur këndeje nuk është asnjë vegël e UDB-së, që sillet rreth, shitet më patriot se kushdo dhe pastaj... Unë nuk di se çfarë interesash kanë ata që na shkaktojnë pengesa të tilla, pos që luftën kundër armikut ta qesim në plan të dytë, kurse thash-e-themet t'i kemi në plan të parë, për të humbur kohën se si duhet të veprojmë në gjendje të tillë. Sikur ka rënë në harresë një rast, të cilin unë po e rikujtoj në këtë rast, nga i cili mund të nxjerrim mësim (e në të njëjtën kohë edhe t'i përkushtohemi që ta sqarojmë, nëse dikush di më shumë.). Pra, është fjala për njëfarë "revolucionar" Shefqetin, i cili natën e fundit të jetës së shokëve (më 16 janar 1982) ishte "mysafir" (kështu më duket ka qenë prezentuar) nuk u lajmëru fare, as që të vijë të shpreh ngushllimet... Ku mbeti nuk e di. Nëse është "zhdukur" fare, atëherë po tregoi si qe njohur me shokët Jusuf e Bardhosh, që të shkon pastaj shpesh në vizitë. Fillimi se si qenë njoftuar ka dy varianta (në fakt ka vetëm një, por nuk jam shumë i sigurt.). Varianti i parë është se, duke u interesuar shoku Bardh për ata që iknin nga trojet tona që t'u ndihmojë të organet gjermane (pasi ishte përkthyes zyrtar), ka mundësi ta ketë njohur. Por varianti i dytë më duket më i sigurt, pasi e kam përjetuar. Fjala është për një koncert në Sindelfingen, të cilët bashkatdhetarët e patën prishur. Në atë koncert si më aktivi për të thyer nga qenka treguar "Shefqeti". Bashk me shokët tjerë që të diskutohet se si vajti puna gjatë koncertit edhe "Shefqeti" ka shkuar në banesën e shokëve Jusuf e Bardhosh. Prej ati rasti patën mbetur "shokë"... "Shefqeti", "absolvent i albanologjisë" (kështu më duket se prezentohej?), nga "Bllaca" (e Lumthatit, siç na thoshte), nuk di ku gjendet dhe çfarë bënë... Këtë shembull nuk e solla që t'i përkushtohemi për ta zbuluar, nëse edhe tjerët nuk dinë se ku ka vajtur ky farë "Shefqeti", pasi nuk ishim të kjo temë (për këtë, që t'u biem në gjurmë kriminelëve nuk kemi prajtur së hulumtuari, pra kemi angazhuar bashkatdhetarë që të pyesin në Bllacë për këtë farë "Shefqetin", por për sa kanë mundur të informohen sikur nuk ekzistueka...), por më shumë desha të tregoj se si mund të afrohen veglat e armikut, nëse "Shefqeti" është vegël...

Nëse potencoj rëndësinë e vigjilencës, nuk kam ndërmend të kontribojmë që të na përfshi ankthi e frika duke lindur një lloj epidemie. Por që të na infekton liberalizmi evropian (siç ma pat thënë shoku Isë me një rast – se "radhët në mërgim kanë qenë të ndikuara shumë nga liberalizmi evropian...") Nëse nuk e kam mbajtur mend ose kam përdredhur diç kërkoi falje, por kështu më duket se më ka thënë.) nuk guzojmë.

Edhe pse u ndala bukur gjatë ke rasti i personave në fjalë, e them se nuk marrë asgjë si armiqësi individuale, mes meje e tyre. Që kur jam ushtar i popullit (të tillë e di veten!) në asnjë hap nuk jam për atë që të merrem me hakmarrje individuale, për t'i shuar revoltën e ndonjë urrejtje që ka mundur të më lind. Mendoj dhe jo vetëm se mendoj, por konkretisht jam për atë, që të mos merremi me ndonjë aventurë

vetëkënaqëse, por që damton luftën në planin global. Pa e zgjatur, do kisha propozuar që vetëm në nivel intern të dimë si do t'ia bëjmë dhe çfarë qëndrimesh do marrim. Që të demaskohen haptas në emër të LRSSHJ-së nuk duhet, pasi nuk dimë edhe përfundimisht se çfarë është duke i shtyrë dhe damtohet lufta. Më duket efektive t'i përmbahemi proverbit popullor: "qentë le të lehin e karavani le të ec". Fazliu e Xhaviti do të ishte dashur të reflektojnë, pasi ka mundësi të jenë anëtarë, ose ta dinë veten për anëtarë të LRSSHJ-së. Në fakt Fazliu që anëtarësuar taman në fazën kur organizatat po bashkoheshin, kurse Xhaviti ishte anëtar përpara i ... dhe ndonjë vendim për përjashtim nuk ka qenë marrë, por edhe që të çmohet si anëtar në kuptim të plotë të fjalës nuk është qmuar; më shumë është lënë anash si i ashtuquajtur anëtar pasiv për arsye që mund të vetkuptohen. Kështu i dijë unë. Mund që ekziston mundësia të jenë të anëtarësuar me plotë kuptim të fjalës. Mbi këtë mund të na informon shoku Salih. Atëherë nëse janë anëtarë, duhet doemos të tregojnë mbi të gjitha, se për çfarë arsye shpifin e trillojnë pa biseduar së pari mes veti që të merret qëndrim i prerë (të dënohet ai që është për t'u dënuar...), të cilit duhet t'i përmbahemi të gjithë.

Më shumë nuk do të zgjatesha kësaj radhe, pa ditur edhe mendimet tuaja, por që është serioze, s'do mend të thuhet. Unë nuk jam për atë që të na ndodhë si me Besimin, Ahmetin, Nuhiun... edhe pse për asnjërin nuk di se është marrë ndonjë qëndrim i prerë, në bazë të cilit do dinim se si duhet të sillemi ndaj të tillve.

Se cilat pasoja rrjedhin po nuk ju përkushtuam seriozisht mund të ndriqoj me shembujt që do sjelli.

Se cili ishte Besim Rexha (alias Shpat Gjirokastra, siç e kishte "pseudonimin" të vënë në zile të banesës...) ne dinim. Mbanin qëndrim në distancë por taktikor. Përfundimisht na dukej i sëmurë... Ai provonte kudo të përhap dezinformatë për shokët e vranë, gojarisht por edhe me shkrim (ka edhe prova.), duke shpifur gjëra të ulëta. Pasi u vranë shokët ai provoi ta ngatërroi krrabën, sikur na paskësh qenë shok i tyre i ngusht, që prej atyre pozitave të më lufton edhe mu, pasi gjer më atëherë nuk i kishte pasur sukses. Për çudi e pat gjetur ajamin... Me kalimin e kohës e njohën të gjithë, ata që së njehen dhe që e patën njohur, por heshtnin. Si ka shkuar pastaj nuk e di, por ajo çka është më e dëmshme, në prani të tij e me të janë biseduar shumë gjëra... Tani, po ai Besim, na del dhe e shpall LRSSHJ-në për "fashiste" (për çudi në Klub të Bielefeldit...!!) dhe gjëra të ngjashme. Komentimi do të ishte i tepërt dhe i panevojshëm.

Për mjekrrën çfarë të thuhet. Deri sa ishin shokët gjallë, bënim "dua" (siç do shpreheshin fetarët) që të mos na e pret rrugën, se e gjithë puna shkon mbrapsht... Kur pa prit pa kujtuar ia dual t'i marrë në dorë të gjitha dokumentet... Pos kësaj, me aparata ndër më modernët, të fotografon vazhdimisht brenda në banesë të shokëve, në marshime e demonstrata... Se kishte "manire" të çuditshme, nuk ka qenë vështirë të shihen që në vështrim të parë. Se ku gjendet tani dhe ku do dal më vonë nuk e di saktisht, por krejt gjëra të pastra nuk do t'i quaj...

Për të "shenjtin" Nuhi (i cili binte i fundit dhe zgjohej i pari gjatë ditëve kur prisnim vendimin e regjimit jugosllav për t'i dërguar kufomat e shokëve në atdhe...) nuk di shumë pastaj. Por në kohën e mëparme gjer ku varrosen shokët dija. Ai, hiç më pak as hiç më shumë, gjatë gjithë ceremonisë gjersa shokët u varrosën dhe pastaj, sillej si "padron"... Tani na është përjashtuar (nëse nuk gabohem.).

Mund t'i qesim të gjitha pas shpine tjesht e thjesht? Jo. Ata vërtetë kanë mundësi të na luftojnë më së shumti, pasi, edhe nëse nuk kanë qenë vegla të armikut, nga inati tani mund të bëhen. Dhe dihet sa janë në gjendje ta informojnë, nëse nuk e kanë informuar...

I solla këta shembuj për të parë se cilat pasoja rrjedhin kur bie vigjilenca. Prandaj nuk kemi nevojë të na ndodhin në të ardhmen. Kemi shokë punëtorë të mrekullueshëm, të cilëve nuk mund t'ua gjesh ndonjë shibël dhe që janë ngritur e përgatitur mjaft mirë, të cilëve mund t'u besohen aktivitetet në rrethe dhe të tjera punë që duhet të kryhen, pa patur nevojë të rrezikojmë me "badihavgjinjë" (po i përfshi disa llumpë...)... Nuk do ta fsheh se në të shumtën e rasteve punëtorët po qmohen "të thjeshtë" dhe të "papërshtatshëm" për aktivitete, kurse po na bindin "badihavgjinjtë", të cilët edhe ato aktivitete që i bëjnë (nëse nuk i bëjnë për t'u maskuar...), atëherë i bëjnë nga mërzia, pasi nuk dinë si ta kalojnë kohën duke mos punuar asgjë... Në këtë drejtim, shokë, qalojmë shumë dhe është koha e fundit t'i përkushtohemi kësaj dukurie! Përndryshe, hiç s'do vonon e do na nxjerrin në bisht të lahutës bashkatdhetarët punëtorë... (Ndonjë rast tjetër, kur t'më premtan koha, kam patur ndërmend t'i përkushtohem kësaj teme, që me këtë rast u prek shumë shkarazi. Po e them këtë, duke m'u dukur e arsyeshme që qes ndërmend që mendoni edhe ju, nëse shihet e arsyeshme.)

* * *

Ka mundësi që të jenë dërguar në Redaksi të ZK letra mbi Mbrëmjen e mbajtur në Bruksel, për t'u ankuar ose për të treguar se si unë ua "përzi" punët. Pasi nuk po kemi mundësi të takohemi, më duhet të shkruaj, edhe pse sikur ta kisha lënë në një përskrim të gjërë (që më duhet ta bëjë mbi emigracionin, dihet atë që është popullor...), do t'ishte më mirë. Por, atje po dërgohen edhe letra tjera dhe kur të grumbullohen shumë, atëherë mund të thuhet: "ç'është me këtë shok, kundër të cilit të gjithë po ankohen..." Po shkruaj edhe me arsye se gjendja gati sa nuk ish alarmuar...

Atje pata shkuar pse m'u dha rasti të udhëtoj pa shpenzime (kjo nuk është edhe aq e arsyeshme ta përmend), pse kisha nevojë që gjatë rrugës t'i rregulloj ca gjëra dhe njëherit pse bisedova me shokë (përmes telefoni), të cilët, më thanë se ishte e domosdoshme që të shkoj. Kur mbërrina (një natë më heret) m'u duk më e arsyeshme të mos takoj shumë veta. Shokët që ishin në Këshillin e Mbrëmjes (pasi bashkatdhetarët kishin zgjedhur një Këshill që do vendoste për përmbajtje të programit), pasi u ishte dhënë referati që kishin punuar 4-5 veta, siç më thanë, ma dhanë ta korigjoj. Pasi që e lexova, m'u duk se nuk ishte në nivel, bile se disa gjëra ishin sa aventuriste aq edhe të dëmshme. Që të korigjohej m'u duke e mundshme, prandaj ju thash se do të rri pa fjetur (edhe pse edhe dy netët e shkuara kisha fjetur shumë pak), që ta shkruaj një tjetër duke i marrë nga ai referat ato pjesë që mund të mirreshin. E paramendoja se do lindin mosmarrëveshje, jo me Këshillin, po me tjerët që duan të shfrytëzojnë çdo rast për të hjedhur mish dhije. Që ta shkruajmë me maqinë thirra shoqen Shqipe (e cila kishte profesion daktilografinë...), pasi nuk kishte mbetur kohë. Ajo më tregoi se referatin e kishte shkruar i shoqi, bashk me te e disa shokë. Po kështu propozoi që të bisedoja me shokun (bashkëshortin) e sajë, pasi ka mundësi që ai të nxjerr komplikime. Erdhi. Në kohën e drekës, kur po drekonim te një anëtar i Këshillit të Mbrëmjes, e biseduam çështjen e referatit dhe u dakortuam se u deshka shkruar i riu. Bile, sikur shprehu njëfarë "gëzimi" që kisha qëlluar andej për ta shkruar të riun. Me atë rast, deri në atë çast të gjithë anëtarët e Këshillit, pos njërit që s'e kishim takuar ende, ishin dakortuar, bashk me dy autorët kryesor të referatit të mëparmë.

Në kohën kur duhej të shpallej e hapur Mbrëmja, më ra në sy se ziheshin mes tyre anëtarët e këshillit në njërën anë dhe autori kryesor i referatit të mëparmë, me të cilin ishim dakortuar çdo gjë në drekë (ku ishin të pranishëm bashkshortja e tij me

shokun e Këshillit dhe të shoqen.). Sa të nervozojnë gjëra të tilla, thjesht pabesi e ulët. Shkova të bisedoj. Në atë mes i përziente hundët (të shprehem ca brutalisht...) ai i Parizit, që ndiente veten kompetent (pa ditur fare si qëndronin punët, por ja që i kish thënë autorit të referatit të mëparmë se ju duhet të vendosni, pa ua imponuar askush nga jasht...). I ndava mënjane ca, edhe autorin që biseduam në drekë dhe u thash prerë: "është tejet e turpshme të bëhen gjëra kaq të ulëta, pasi në drekë u dakortuam, i gjithë Këshilli e ka aprovuar dhe ti shoku M... na del tani të provokosh skandal..." Kur pa vendosmërinë u dakortu.

Reshati, me natyrë prej qypi... kishte zënë vend në një qoshe dhe shiste poza. Ishte i shoqëruar me të panjofshëm... Nuk bisedova fare më shumë se sa ta kryej një formalitet, pasi vërtetë ishte mbushur kupa – edhe bisedat e ditëve të fundit i kishte përdredhuar, siç thotë populli sy më sy, duke më shkruar letra "historike" plot me dallavere...

Ati të Parisit ia tërhjeka vërejtjen që të mos hy në biseda konstruktive, dua të them të nivelit sikur ai për disa orë do t'i rregulloi budallëqet e viteve, pasi, siç i thash, edhe nuk i njeh problemet e njerëzimit edhe nuk ke eksperiencë me dredhi të tyre. Por më duket se nuk iu ka përmbajtur këshillës që ia bëra.

Të tjerëve u thash se është fare e paarsyeshme ta merrni shkas referatin për t'u përçarë edhe më shumë se sa ini. Po kështu u thash se është e dëmshme ta nxjerrin hapur se kush e ka shkruar referatin dhe ua ka "imponuar". "Nëse u duket se u është bërë e padrejtë, ju pata propozuar, merrni të dy referatat dhe postoni RZK (Redaksisë së Zërit të Kosovës-shën i Xh. D.), duke i shkruar se si ka ndodhur, por sa më singërisht, dhe do merrni përgjegje se cili referat ka qenë më në nivel, edhe pse nuk keni nevojë, pasi dukeni se për aq u punon arsyeja..."

Nuk e di kush dhe përse po zien gjellë të ndytë e të helmosur në atë Bruksel, por kam përshtypjen se në të ardhmen do kemi telashe, pasi, siç ma thon parandjenjat, aty është një klan i dërguar, që ngerdhuzen sipas rastit mes veti për ta kafshuar të tretin... (Dëshiroj të mos kem të drejtë...!) Por të shohim...

* * *

Kështu si e kemi LRSSHJ-në paregjistruar askund jasht, mendoj shtetët e P., vërtetë që do hasim çdo herë në vështirësi. Janë kohë të tilla dhe situatë e tillë, që as luftën tonë të drejtë nuk mund ta propagandojmë sa duhet e si duhet dhe as ndonjë lidhje e kontakt vështirë që mund të vendosim. Aty ku kemi adresën dhe konton, sikur më duket pa perspektivë të sigurt... Prandaj është koha e fundit kur na duhet definitivisht të vendosim për ta regjistruar LRSSHJ-në dhe të hapet pastaj Fond zyrtar. Në këtë drejtim jam konsultuar, kam hulumtuar e jam këshilluar. Si kush i parë është që të kemi Program e Status (të cilin duhet përkthyer në gjuhën e shtetit ku do të regjistrohet Lëvizja). Pastaj duhet patur disa njerëz, në emër të cilëve duhet regjistruar Lëvizja. Sipas të gjitha gjasave ligjet më demokratike dhe hapësira më e gjërë duket këtu (ku jam momentalisht). Të mendoni në këtë drejtim dhe të vendosim.

* * *

Për një propagandë konstruktive të çështjes sonë, nëse mendohet efekti dhe në bazë të kontakteve të ndryshme, kam ardhur në përfundim se është i domosdoshëm një Buletin informativ (i kohëpaskohshëm), sa për fillim në tri gjuhë. Sipas të gjitha parashikimeve (edhe pse nuk i kam bërë të gjitha llogaritë), nuk do kushton shumë dhe do kemi mundësi ta nxjerrim në tri gjuhë (anglisht, frangjisht e gjermanisht. Edhe

suedisht e kemi më së lehti, por gati nuk ka nevojë, pasi anglishtja e zavendëson.). Ka kohë që po bëhen përpjekje, sidomos në sigurim të adresave të deputetëve të të gjitha shteteve evropiane (të Perëndimit), të gjitha gazetave, bibliotekave, partive e organizatave politike, individëve që kanë krijuar personalitete, shkrimtarëve, filozofëve, etj. Por të gjithë së bashku, do të duhej të bënim shumë në këtë drejtim, pasi afirmimi i çështjes sonë është detyrë prioritare për ne që jemi jasht. Si përfundim, po propozoj që të nxjerret një Boletin informativ në gjuhë të huaja (i kohëpaskohshëm – kur të kemi siguruar materialin e domosdoshëm...). Edhe këtë propozim (ide) kam ndërmend të shkruaj më gjerësisht (ka mundësi që po lë shumë punë për herën tjetër dhe s'do ta përthejoj dot...).

* * *

Këto ditë del nga shtypi broshura "Shpërngulja e shqiptarëve" e ribotuar, teknikisht më në nivel dhe me disa korigjime, bashk me një Psthënie. Ribotimi i saj u pa e nevojshme nga fakti se në SHBA-të nuk ishte e njohur thuaia fare. Ishte shpërndarë nga Hysen Tërpeza, por fatmirësisht në numër të vogël dhe në nivel të dobët. Pasi patëm biseduar me disa shokë, ata patën shpreh interesimin. Edhe botimi qe rregulluar të bëhet atje (duke u treguar i gatshëm i njëjti bashkatdhetarë që kishte botuar në gjuhën angleze),por u "arsyetu" më vonë se për shkaqe teknike nuk e bëri botimin e sajë. Tani financimin e bëri ... dhe do të dali në 2000 ekzemplarë. Menjëherë do t'i dërgojmë një numër të madh në SHBA-të. Do të ishte mirë t'ua postonim ca edhe Shoqërisë "Bajram Curri" në Australi. Nga se kushtuan (bashkë me traktin e 1 Majit) 5 000 Kruna suedeze, e pamë të udhës t'i vemë çmim që t'i nxjerrim së paku shpenzimet dhe pse jo të dali ndonjë përfitim: çmimi (solidar) 3 dollarë SHBA.

Duke parë rëndësinë që kjo broshurë të botohet në gjuhën turqishte, është bërë përpjekje që ta përkthen ndonjë shok a bashkatdhetar në Turqi. Për arsye të panjohura ... nuk është bërë, prandaj është angazhuar një shok që ta bënë, siç do ta lexoni edhe nga letra... Në mbarim të kësaj jave referati do të jetë i përkthyer, kurse sa për Parathënie të aktualizuar ende nuk është gati. Unë kam dy propozime sa i përket botimit: i pari është që të botohet në dy gjuhë (në njërën faqe shqipe kurse tjetrën turqisht, që t'u ngjallë interesim bashkatdhetarëve për të bërë krahasim dhe kështu të mësojnë edhe shqip; i dyti për arsye teknike të botohet vetëm në turqishte, pasi duke u bazuar në situatën politike në Turqi, thuaia se duhet bërë përhapja ilegalisht (po kështu, duhet pasur parasysh organet dhe opinionin turk.). Mendoni se cili nga variantët duhet zgjedhur, duke menduar se sa për aprovimin që të botohet nuk do vëhet në dyshim. Bile, vetëm duhet të çuditemi pse nuk është përkthyer gjer më tani...!

* * *

Krahas ca botimeve që po përgatiten, propozoj që të botohet edhe drama e shokut Jusuf "Procesi". Botimin do duhej bërë për dy arsye, pos të tjerave që dihen. Arsye e parë është se mund t'i teket ndonjë tekayti që ta botoi, çka nuk duket e drejtë dhe do ishte e dëmshme... kurse arysea e dytë është se është literaturë shumë konkrete dhe në këtë rrëmujë të arrestimeve, prej së cilës dramë mësojnë se cilin qëndrim duhet të mbajnë para gjyqeve fashiste. Rëndësi tjetër do të ishte edhe një Parathënie e shkruar mirë. Kurse botimi duhej të bëhej në formatë sa më të vogël (në letër sa më të hollë) që të jetë lehtë për ta futur në Kosovë (kuptohet, edhe në viset tjera shqiptare në Jugosllavi.).

Duke përfunduar kësaj radhe do më duket e arsyeshme të flas edhe mbi një dukuri, nga e cila po kushtëzohet puna jonë e suksesshme në Evropën Perëndimore e më gjerë. Fjalën e kam për kuadrat, për të cilat po ndihet nevojë e madhe, shumë e madhe. Ta zëmë, që ta afirmojmë dhe propagandojmë luftën e popullit tonë, si e drejtë që është, të opinioni botëror duhen shkrime e njerëz, pos mjeteve materiale, siç duhen edhe për aktivitete tjera... Ka punë shumë dhe ne vetëm një pjesë jemi duke i dalur zot (shpesh herë shkel e shko...), prandaj duhet të mendojmë me seriozisht mbi të gjitha, sidomos mbi sigurimin dhe ngritjen e kuadrave. Janë gjëra që duhet t'ju përkushtohemi shtruar, me seriozitet e sinqeritet, pasi këtu unë vetëm shkarazi sa preka probleme shumë të mëdha, për mendimin tim.

Të veçanta (Në vazhdim do shkruaj mbi disa gjëra të veçanta, prandaj si kopje që po dërgohet letra, nuk do të jenë të njejtat në vazhdim.):

Shoku (Ibrahim Kelmendi)

15. Letra e 3 qershorit 1983-F

Shumë i dashuri shoku F.,

letrat nga ti i mora. Nuk po vonoj fare të të shkruaj, por jo që t'u përgjegjem atyre. Më shumë desha të të bëjë me dije se i ka marrë, pasi do merakoseshe. Përgjegjen do ta shkruaj me një rast tjetër, pasi të kam kohë – momentalisht jam shumë i zënë me një punim, ca të zgjeruar, për një broshurë në gjuhën turqishte, pasi referatin e Qubrilloviqit, "Shpërngulja e Shqiptarëve", veç e kanë përkthyer shokët. Para se të përkthehet duhet ta aprovojme përmbajtjen për botimin, prandaj, posa ta kem kryer do ta dërgoj një kopje.

Këndeje punët shkojnë mirë, por shqiptarë nuk ka shumë. Përsa është numri i shqiptarëve, marrë në përqindje, punët shkojnë shumë mirë, sidomos sa u përket ndihmave Fondit. Më parë, për shokë tjerë, përmes H. kanë dërguar ndihma solide, tani siç më bënë me dije, janë duke grumbulluar ndihma të reja. Kurse financimin e traktit dhe të broshurës së Qubrilloviqit (2000 ekzemplarë, me Pasthanie të zgjeruar), mendova traktin e 1 Majit në gjuhë suedeze, i kanë financuar këndeje.

Për ato që shkruaja, vetëm me arsye dhe pa ndonjë nxitim e pezëm. T'i kapërcejmë ca gjëra, për t'ju përkushtuar vetëm atyre që janë me rëndësi, por vetëm ato që janë të kapërcyeshme. Më gjatë do shkruar, siç shkrova më lartë, herën tjetër, por edhe shumëçka, pasi siç munda të kuptoj, gjatë të shkruarit, më shumë ke dashur të shprehish indinjatë ndaj ca dukurive të këqija, se sa t'i shtrosh me gjakftohtësi dhe qartë. Sikur të kishe mundësi të më shkruaje gjëra ca më konkrete në atë drejtim, pasi për ato që shkruaje, sidomos sa i përket Nu. nuk i kam kuptuar.

Për H., si edhe nga materiali, nuk e shkarkoi veten nga përgjegjësia, por të siguroi dhe mbaj përgjegjësi edhe për udhëtimet e mija me te, edhe për udhëtimin konkret që kishe zënë në gojë, pasi ajo shoqja është gru me kunorë e shokut tjetër (gruaja e dytë, në atdhe ka një grua shqiptare me fëmijë, por sipas ti dhe të tjerëve, ajo qenka "dakortu" që ky të marton edhe atë...) të cilën e muarën me vete për t'i tejkaluar vështirësit gjatë rrugëtimit...

Sa i përket punimit që ceka, shumë do të më duheshin të gjitha gazetatat ilegale që janë botuar, duke u nisur nga Lajmëtari..., ZK, Bashkimi, Liria. Sikur t'i kesh të

grumbulluara, m'i dërgo – të siguroj se posa ta kem kryer punën me to do t'i postoj mbrapa!

Sa për merakosjen për të më ndihmuar, unë mendoja se ke nga të Fondit, por jo me të holla personale, pasi e di shumë mirë si qëndron me to, sa shpenzon e përse, prandaj mos ki merak.

Ndahem duke të përshëndetur dhe uruar lindjen e Kosovares! Asaj i dëshiroj rritje të shpejt e të mbarë – në liri! E përshëndet shoqen dhe uroje për mu për Misionin e sajë si Nënë Shqiptare. I përqafoj voglushët!

–PËR NJË REPUBLIKË SHQIPTARE NË JUGOSLLAVI!

–RROFTË LRSSHJ-a!

I yti me besnikëri (Ibrahim Kelmendi)

PS. Numrin e ZK rrite për 20 copë tani për tani, pra i dërgo 50 copë në këtë adresë. Mirëupafshim.

(Letër Faridin Tafallarit dhe Qendrës Ekzekutive, 3 qershor 1983; Faridin Tafallari, Terror-Dhimbje-Qëndresë, Tiranë 1997, f. 413-414)

16. Letra e 3 qershor 1983 - S

I dashur shoku S.,

Në mërgim..., më 3 qershor 1983

ca me vonesë po të shkruaj për t'ju përgjegjur letrës së 17 majit, të cilën unë e mora pak me vonesë (për shkak se nuk isha aty ku m'është postuar.). Sipas mendimit të shokut Isë, mendim përkatës nga shokët tjerë nuk kam, përmbajtja e letrës dërguar ty (më 4 janar 1983 e mban datën) dhe letrës për shokë të QE (më 7 maj) duhet të diskutohet në tryezë, të merren qëndrime. Edhe mu po më duket e arsyeshme të veprohet ashtu, por siç po shifet mundësitë janë mjaftë të zbehta për t'u takuar. Nëse do të kem mundësi (e tani për tani duket se jo), atëherë më duhet edhe më tutje të shërbehem me letra, që të komunikohemi. Mu për këtë arsye, kësaj radhe vetëm shkarazi po të përgjigjem në letrën që kam në tryezë....

Kur është fjala për personazhin për të cilin flitet më së shumti, më duket unë kam biseduar për lisa dhe tim më flet për fshisa, siç shprehet populli. Duket qartë një bishtërim përfid, por dua të dëshiroj se jo me qëllim. Rrethin e të interesuarëve e zgjeron aq shumë, sa fare nuk ka të bëjë me realitetin. Unë, lum shoku, kam shkruar për klanin, bandën e kufizuar të individëve, të cilët edhe i kam emërtuar. Ata janë kreatorët e fushatës, e cila do t'u dështoi! Kurse për rreth më të gjer, edhe pse janë munduar ta zgjerojnë, nuk mund të bëhet fjalë; kështu kam bindjen tani për tani! Sa për fërkimet, nga ana ime janë ruajtur në rreth shumë të ngusht, aq të ngusht sa vështirë që ka depërtuar diçka; mendimi im ishte se vetëm armikut i konvenon të dij për fërkimet... Nëse ato janë përhapur nga tjerët, kreatorët do marrin përgjegjësinë.

"Për bandën që e quan ti, duhet të mendosh jo pak, por shumë më seriozisht (...) a nuk bënë që edhe te ata të shtrijmë klimën e harmonisë?...", më shkruaje në vazhdim. Kur të kam shkruar, vërtetë kam menduar seriozisht dhe qëndroj pas asaj, pasi i njoh shumë heret. Unë jam që të shtrijmë klimën e harmonisë te të gjithë shqiptarët e ndershëm e patriotë, por në rastin konkret, para këti rasti, është punuar, bile edhe bashkëpunuar shumë afër (me të katërtit në rfgj.). Në fushatat më të reja, motor i së cilës janë pikërisht ata, e që dinë mirë edhe ti, nuk është asgjë stihike, apo hiçgjë. Gjatë gjithë kohës kam mbajtur qëndrim vrojtues e pritës (mendoj jashtë rrethit tonë) dhe edhe më tutje do mbaj, deri sa të marrim qëndrim. Edhe të tjerët i kam këshilluar të mos reagojnë as si ata e meritojnë. Të shohim, ndoshta sa ta hetojnë se po demaskojnë veten edhe

mund të pushojnë. Unë tani për tani nuk jam në korent. Gati po më duket më e arsyeshme t'u përkushtohem vetëm detyrave të mia. Kur të marrim vendim të caktuar, atëherë duhet t'i përmbahemi!

Në përfundim të letrës shpreh besimin te personat në fjalë, duke qenë shumë i sigurt. Po më çudit bindja jote, e formuar për një kohë relativisht të shkurtër dhe në një hapësirë bukur të papërshtatshme. Po pres nëse ke prova për të më bindur. Kurse për fërkimet me rryma të ndryshme do të duhej të na informosh, pasi na duhet një pasqyrë, në mos për tjetër, të dimë se me cilat rryma kemi të bëjmë në rrethe të caktuara, kur do na qetë puna. Sa për bazën, kam bindjen se nuk qëndron puna keq, edhe pse nuk jemi duke e zgjeruar sa lypset; nuk di ta kem keqpërdor ndonjëherë dhe nuk e kam ndërmend!

Vërtetë do të duhej të takohemi, por unë nuk po kam mundësi – pasi me organe gjermane të kufirit, nuk po më ec fati, pasi lejes së qëndrimit i ka dalë afati; në raste të tilla janë shumë të rrept, se kur hynë njeriu për herë të parë. Posa të jem rregulluar do të ju bëj me dije.

Edhe letrën e 4 majit e kam marrë, por siç shkrova më lartë, me vonesë të konsiderueshme. Letra mban datën e 4 majit, kurse unë e kam marrë shumë vonë, bashkë me atë të 17 majit (nëse nuk gabohem). Sa i përket takimit, shkrova mjaft, kurse sa i përket komunikimit me letra, e bëra. Po pres përgjegje.

Sa i përket Programit dhe Statutit që shkruaje, konturat janë shtruar në ZK, nr. 3 (1983). Edhe në tubimin që kishim, mbet si e vetëkuptueshme se shoku Isë do të punon, pasi disa herë e potencoi dhe ne nuk e kundërshtuam, do të thotë u dakortuam. Ai, si përgjegjës edhe për ZK, ka parë të arsyeshme këto konjuktura (kontura-shën i red.) t'i boton. Mu më duket më e arsyeshme sikur të diskutoheshin përpara dhe të aprovohej botimi në ZK. Të shohim se çfarë do të thotë shoku Isë. Tani, që janë botuar, të takon ty të diskutosh me shokët (anëtarët), kuptohet, ta organizosh diskutimin, por edhe për një punë kaq me përgjegjësi duhet pyetur të gjithë, se si dhe në ç'mënyrë duhet të bëhet diskutimi dhe vlerësimi. Për mendimin tim do të duhej të kompletohet i tëri për t'u diskutuar e aprovuar, duke e shoqëruar me një material shoqëruar-udhëzues, për mënyrat e diskutimit, të grumbullimit të vërejtjeve dhe propozimeve, që përfundimisht të studjohen dhe të nxjerret Programi dhe Statuti i LRSHJ-së.

–PËR NJË REPUBLIKË SHQIPTARE NË JUGOSLLAVI!

–RROFTË LRSSHJ-a!

Të përshëndet shoku (Ibrahim Kelmendi)

17. Letër Faridin Tafallarit, 17 qershor 1983

Ibrahim Kelmendi: "Kohë pas kohe po hy borxh, duke të shkruar se do të shkruaj më gjatë njëherë tjetër. Këtë borxh po e rrisë edhe kësaj radhe, pasi vërtetë jemi të zënë me punë konkrete. Më 19 qershor shkon për vizitë kryeministri i Suedisë në Jugosllavi. Atij i kemi shkruar letër dhe me të po informojmë opinionin. Ka gjasa se do të flasë për çështjen tonë. Letrën e kanë firmosur shumë bashkatdhetarë dhe sipas informatave të tërthorta, do të arrij efektin e vet. (Kopjen e letrës ta dërgoj herën tjetër).

- Për një Republikë Shqiptare në Jugosllavi!

- Rroftë LRSSHJ-a!

Përshëndetje nga Shoku (Ibrahim Kelmendi)" (Letër FT, 17 qershor 1983; (Faridin Tafallari, Terror-Dhimbje-Qëndresë, Tiranë 1997, f. 414-415)

18. Letra e 30 qershorit 1983

Shumë të dashur shokë,

Suedi, më 30 qershor 1983

pasi më ra në dorë Qarkorja (pa datë, por mua më erdhi më 29 qersh.), edhe pse më poshtë përdoret shprehja "letër-informative", e lëshuar nga Redaksia e ZK, pa u vonuar po çfaq mendimet dhe do bëjë edhe propozime, të cilat jo shumë me vonesë do t'i përpunoj. Veproj kështu pasi ende nuk e kam siguruar "Platformën..." e "OSBPK", mungesa e së cilës nuk po më pengon tani për tani, që t'i çfaq mendimet e propozimet, pasi siç po shifet më poshtë, sipas mendimit tim, do të jetë e tepërt analizimi i saj, po që se bazohemi në parimet organizative. Bile menjëherë do shtroja pyetjen: pse kemi nevojë, edhe anëtarët, ta analizojmë atë "Platformë..."? – siç është propozuar në Qarkore. Nëse anëtarët e LRSHJ duhet ta analizojnë "Platformën..." në fjalë, atëherë do vetëkuptohet se me pëlqim që LRSHJ-së është formuar "OSBPK", por vetëm se na qenka shtrembëruar vija (nga keqpërdorimi i besimit i atyre që na qenkan ngarkuar) dhe tani u dashka studjuar për t'u ndrequr, ose edhe për t'u marrur mbrapa... Pastaj, kur kërkohet që "Platformës..." t'i bëhet vlerësim nga gjithë anëtarët e LRSHJ-së, vetëkuptohet se LRSHJ-a duhet t'ua siguron anëtarëve atë; është kontradiktore në njërin anë të pengohet shpërndarja e materialeve që nxjerrë "OSBPK", kurse në anën tjetër të kërkohet vlerësimi nga anëtarët atë që s'e kanë dhe s'kanë nevojë ta kenë. Unë mendoj se vetëm një grup shokësh do duhej të ngarkohej me studimin e "Platformës...", dhe atë vetëm për nevoja interne të Lëvizjes, duke i bërë të gatshme analizat, por pa u nevojitur për nevoja demaskimi tani për tani, sa për nevoja të pastajme, nëse kjo bandë nuk do të merr mbrapa formimin e "OSBPK", e cila provon të mashtron lexuesit e painformuar se gjoja e kanë formuar "sipas dokumenteve të 17 shkurtit..." ose, nëse nuk do prajnë së minuari Lëvizjen nga "brenda", atëherë kur bëjnë lojëra të tilla "në emër të LRSHJ-së".

Kur përmenda parimet organizative, mendova se vetëm Lëvizja ka të drejtë të formoi organizata të tjera, sipas nevoje dhe kushteve, por asesi individët, për hatër të aventurave "revolucionare" (kështu po shprehem tani për tani, mbase janë edhe "lojëra" armiku). Në këtë rast, secili që di të kupton sado pak, mund të vie në përfundim se Lëvizja nuk ka të bëjë asgjë me të tillë horra, pos që ua ka dhënë shansën, po qenë siç lypset, të bashkohen.

Po të flitet shtruar, ashtu siç kërkohet, për t'i quajtur gjërat me emër të vetin, duhet pranuar se është injorancë e ulët kjo farë "loje" dhe është e mallkuar ajo kohë që duhet të shpenzohet për diç të tillë. Për vlerësime të tilla nuk duhet kushedi çfarë njohurive teorike, mjaftojnë kundërthëniet që ata kanë shkruar në "organin" (pa numër, që u shpërnda në gjysmën e dytë të qershorit 1983) e "OSBPK", i cili bazuar në përmbajtje, është kokë e këmbë "organ" i isht (që në fakt len të kuptohet se nuk është bashkuar) PKMLSHJ.

Se duhet demaskuar kjo "organizatë", më përkatësisht ajo bandë njerëzish dallkaukë, as që do duhej të çfaqet ndonjë dilemë, pasi në veprimtari minuese e kësaj natyre, "në emër të LRSHJ-së", shihet edhe nga i verbëti dhe dëgjohet edhe nga i shurdhëti. Por më rëndësi është të vendoset se si.

”Para se të ndërmerret fushatë demaskimi, do të lypsej edhe njëherë të kthehem i ’dokumenteve’ (që përmendin ata – të 17 shkurtit), të cilat, mendoj dokumentat, duhet t’i ketë LRSHJ-a në dispozicion, që të ecim me hapa të sigurtë, pasi armiqtë kanë më së shumti sukses atëherë kur shfrytëzojnë lëshime e gabime, që ndonjëherë shpëtojnë.

Sidomos në këtë drejtim shumë ndihmojnë shokët që kanë marrë pjesë në ato bisedime. Ose, mund që mjafton se të gjitha janë shpifje që mund t'i bëjnë vetëm tipa të tilla.

Sa u përket individëve që luajnë këtë "lojë" dhe PKMLSHJ, nuk kam nevojë të ndalem, pasi edhe nuk më është kërkuar të di. Besoj se shokët Salih e Fahri dinë dhe kjo do ndihmonte. Them këtë, pasi "trajnerët" e ekipës janë sjell shumë në atë teren, bile e kanë patur si "çerdhe"... banesën e shokëve Jusuf e Bardhosh, ndër ta kryesisht Nuhiu, i cili shfrytëzoi në maksimum oportunitetin dhe naivitetin e disave...

Për shpjegim, kur ishim për bisedime me shoqen B. te shokët, në shtëpi të shokëve Jusuf e Bardhosh, se në cilin nivel dhe si duhet të bashkëpunojmë për ta vazhduar luftën, ashtu siç ishte bashkëpunuar përpara, ishin të pranishëm, - jo vetëm të pranishëm, por mund të thuhet edhe dirigjues..., - Nuh. (Nuhi Sylejmani) dhe Nexh. (Nexhati - Osman Osmani, siç e quanin atë tip të mbyllur e të heshtur...). Unë nuk munda ta kuptoj se Nexh.-Osman Osmani ishte i PKMLSHJ. Krijova bindjen se ishte kuadër i ri, i dërguar nga brenda nga LN... (LNÇKVSHJ) dhe siç më dukej, nga disa shokë të rinj dhe fare të pa eksperiencë (të cilët gjithë kohën silleshin andej...) ky Nexh., sa për Nuh. të mos flasim, kur ai bënte ç'të donte..., dëgjohej shumë."

Potencova këtë rast, nga frika se mos gjatë bisedimeve, nëse janë zhvilluar aty dhe nga ata që gjendeshin aty, të mos u ketë lëshuar ndonjë shpëtim (më 17 shkurt), që të kenë mundësi të thirren "në emër të tyre", pasi edhe gjendja ishte shumë, ta quaj specifike. Nëse edhe në këtë drejtim nuk ka ndonjë "kashtë", për të cilën duan të kapen themeluesit e "OSBPK", që të mos mbyten..., atëherë demaskimi i tyre nuk duhet vonuar fare, ngase nuk ka nevojë të rezervohet kohë për të dhëna e vlerësime – fshati që shihet nuk don kallauz. Në rastin e kundërt duhet të mendohet si duhet të veprojmë. Por, as në këtë rast, nuk ka vend për hutim; derisa Lëvizja nuk formon vet sindikatë a organizatë tjetër, atëherë nuk do mend të thuhet se është kundër parimeve organizative nëse individët bëjnë "aventura", duke u thirrë "në emër të LRSNJ-së".

Sikur kam përshtypjen se kjo bandë don të bisedoi, jo si të tillë që janë, por si partnerë, bile partner që dirigjojnë e impononë, pasi shtiren sikur kanë masën prapa. Do të shkoj edhe më larg, duke guxuar të bëjë një sypozim tejet serioz, të cilin, në të ardhmen do detyrohem ta tërheq nëse nuk sigurohen provat, ose do shndërrohet në një të vërtetë. Shpërndarja e "organit" "Punëtorët", është bërë nga një rreth i caktuar njerëzish (duke mos përjashtuar edhe ndonjë anëtar të LRSNJ-së, si rrjedhim i mashtrimit, nivelit të ulët të vigjilencës ose edhe të nivelit të ulët organizativ...), të cilëve disa herë ua kemi zënë emrat, si intrigantë, përçarës, "thash e themgji", fodullë, dezorientues, etj., pse jo duke u thirrë në "intelektualizmin" e tyre, për t'i dirigjuar punëtorët, duke lënë të kuptohen se janë të "ngarkuar nga LRSNJ-a". Unë nuk përjashtoi mundësinë që këto vegla (po i quaj kështu), duke qenë në shërbim të një padroni, janë dirigjuar nga ai të dalin hapur, pasi kanë mashtruar veten se është momenti, duke menduar se e kanë situatën në dorë, së paku në kurbet. Po të jetë e vërtetë kjo, kuptohet se do kemi dame, por pa fije droje shumë lehtë do të demaskohen, pasi masa (i mendoj bashkatdhetarët e vetëdëshëm), pas të cilëve sigurisht qëndrojnë edhe ajo pjesë, që në shiqim të parë sikur duket pasive), mezi pret që të tillët t'i thërrasim me emrin e tyre hapur, duke u nisur edhe nga fakti se ata u kanë ardhë në maje të hundës punëtorëve.

Sipas mendimit tim, i pari do të duhej të na vinte në korent shoku Salih, pasi ai duhet të ketë mundësinë i pari për shpërndarje të çfarëdo materiali dhe nga kush shpërndahet. Bile, do të më duket fare e pakuptueshme nëse mbi shpërndarjen e

materialit në fjalë nuk janë porositur së paku anëtarët që të mos mashtrohen për ta shpërndarë, duke i bërë me dije ata se nuk është nga LRSNJ-a. Tani shoku Salih do të duhej të përgatit raportin se kush në cilin rreth ka shpërndarë dhe për çfarë "arsye", pasi mund të ketë edhe nga ata që janë mashtruar e keqpërdorur...

Propozimi tjetër do të ishte që në këtë numër të ZK të botohet së paku një sqarim i vogël, ku do të thuhej se materialet që kanë dal në qarkullim nga "OSBPK" nuk kanë të bëjnë me LRSNJ dhe "dokumenta" në të cilët ata thirren, nuk ekzistojnë. Në vazhdim do të duhej të shkruhej: Qëndrimet e LRSNJ-së lidhur me të gjitha këto do t'i bëhen të njohura së shpejti opinionit. Sikur të kishim mundësi që tani t'i shprehim qëndrimet, do të ishte më mirë, pa u bërë vonë.

* * *

Duke u bazuar në manovrimet e disa tipave dhe të "lojës" që po luhet, mund të vihet në përfundim se shumë ka "kontribuar" oportunizmi i disave ndaj të tillëve, të cilëve, më në fund u është mundësuar të guxojnë të dalin ku kanë dashur, në meset ku nuk do të duhej të guxonin fare. Shumëherë, edhe kur kemi patur prova për punën minuese e dezorientuese, sikur me qëllim bëheshim qorra e të shurdhër, me shpresë se nuk janë siç po veprojnë dhe se do mësohen të ecin mbarë, për t'u inkuadruar në radhët e LRSNJ-së, që të "rriten" ato. Mbase ka nga ata që mendojnë se për kërkesën Statut Republike në kuadër të Federatës Yu. "hahen" të gjithë. Krahas kësaj, dukshëm vërehet përgatitja teorike jo në nivel, sidomos sa i përket anës teorike në përgjithësi, qoftë sa i përket organizimit, qoftë teorisë që shpjegon se çka kërkojmë, përse kërkojmë, si duhet ta kërkojmë dhe ç'perspektivë ka çështja kombëtare, si dhe teorinë mbi taktikën, në shërbim të strategjisë dhe strategjinë. Këtë më së miri e shpjegon mungesa e Programit dhe Statutit të LRSNJ-së, konturat e të cilave u botuan në nr. e fundit të ZK, që të hapet diskutimi i anëtarëve dhe në fund, përfundimisht të hartohen e aprovohen. Edhe në këtë drejtim nuk më ka rënë asnjë aktivitet përkatës te anëtarët. Mbi shumë çështje nuk kemi teori të çartë përkatëse, ta zëmë sistemi shtetëror jug. dhe Republika Shqiptare; punësimi në vend dhe Republika Shqiptare (çfarë propozimi përkatës ka LRSNJ-a lidhur me punësimin në Kosovë, duke i kthyer të gjithë mërgimtarët, që dëshirojnë të kthehen); borxhet ndaj botës dhe obligimet e Republikës Shqiptare (pasi shumë borxhe janë marrë në emër të investimeve në ekonomi e bujqësi në Kosovë, por nuk dihet fare ku janë "avulluar"...); zhvillimi i kulturës kombëtare në Republikën Shqiptare; qëndrimet e qarta të LRSNJ-së ndaj kolonistëve, të cilët edhe sot e kësaj dite janë në nivel të misionit për të cilin janë sjellur; programi i këthimit të të shpërngulurëve me dhunë për në Turqi e gjetiu; niveli i marrëdhënieve me partitë politike të botës dhe bashkëpunimi me to, duke filluar nga partitë komuniste (m.l.) e deri te ato reacionaret, si dhe ndaj qeverive etj. Kur përmenda sistemin shtetëror jug. dhe Republikën shqiptare, ta zëmë, nëse konkretizohem me shembuj, që dalin nga vështirësitë e përditshme. Është fjala për qëndrimet e Lëvizjes ndaj satrapit Tito, kur nga skena jugosllave, qoft nga mendja e titistëve, rankoviqistëve, "liberalëve", "demokratëve" dhe popujve, është duke u "zbehur" ai "personalitet"... Pa patur vendime të qarta, shoku Salih e ka hedhur propozimin se u dashka vendosur fotografia e satrapit në klube të punëtorëve dhe kur ka hasur në rezistencë, pakuptueshëm është tërhejkur, sikur të thoshte: le t'i shfrynë emocionet dhe pezmin e shkaktuar ku të duan e si të duan dhe në fund t'i kthehem edhe njëherë. Kurse mu më shkruante: "pa më të voglën frikë do t'u hymë diskutimeve më të thella se sa e një fotoje (mendohet fotoja e satrapit Tito – sqarimi im)". Në rregull. Diskutimeve duhet t'u hymë me vend e rend, që të merren aprovime ku duhen dhe kur të dalin në masë, të dalim të qartë, e nëse masa nuk aprovon mendimet, atëherë o duhet të

provohet të sqarohet, o nuk janë në rregull dhe me krenari duhet marrë mbrapa atë vendim që nuk aprovon masa. Unë e përgjithësova ca, por diç nga ky përgjithësim ka edhe ai rast. Dhe tani, prap, më shkruan: "Momentalisht kyçi i problemit në korrespondencën tonë shtrohet situata në Dys., ku po raportohet në mënyra të ndryshme e edhe unë e ti nuk po mund të mirremi vesh për këtë pikë. Teorikisht shumë mirë, por në praktikë jo, sendet ndryshojnë për 180 shkallë." Ndoshta edhe nuk i përket temës, për të cilën shkruaja, së paku në shiqim sipërfaqësor, por në fakt po; është tamam mungesa e ngritjes përkatëse, qoftë e imja, qoftë e jotja dhe pasojë e formave të ulëta organizative që keni ndjekur dhe sipas të gjitha gjasave, jemi duke ndjekur. Sa i përket anës sime, unë shokët i kam bërë me dije dhe vërtet tani nuk jam në korent të ngjarjeve në atë rreth, por në këtë drejtim pata shkruar ca më gjerësisht prandaj është e tepërt po t'i përsërisë ato, sado që mund t'i ndryshoj në nyansë ose në të shprehur. Të gjitha së bashku, pa patur nevojë të zgjatemi më, lënë të kuptojme se sa po qalojmë sa i përket përgatitjes sonë në nivel të misionit.

* * *

Në letrën e 7 majit (1983), që ua pata dërguar, bëra ca propozime në mes të cilave edhe botimin e një boletini informativ në gjuhë të huaja (të kohë pas kohshëm dhe me emrin "Kosova"), përmes të cilit do të trajtohej çështja shqiptare në Jugosllavi në nivel shkencor, pasi çështja shqiptare në Jugosllavi nuk mund të trajtohet bindshëm me anë të trakteve e letrave (të cilat duhet të praktikohen prapë, pasi ato kanë kuptimin dhe efektin e vet). Kjo do mundësonte në të njëjtën kohë që Lëvizja të merret për më serioze dhe përfaqësuesja e vetme legjitime e interesave shqiptare në Jugosllavi. Asnjë përgjegje konkrete nuk pata marrë për këtë dhe propozimet tjera, që në fakt duhet të merret qëndrim ndaj propozimit të cilitdo shok, pos përgjegjes nga shoku Xhemë, ku thoshte: "Edhe për buletin mendoj ashtu, por kur është në pyetje trakti i fundit (mendohet trakti i 1Majit në gjuhën gjermane – sqarimi im) që u shpërnda këtu diçka nuk hahet, njëherë na tha se kushton 600 marka dhe se kjo punë qenka vendosur, po atë shumë të hollave e kërkonte në fillim edhe Z., pastaj na del se ajo na qenka dy herë më e madhe pra aq sa t'i kërkojë për një gazetë të tër... Kjo tingëllon aq më keq kur tash na kanë ardhur informata prej Br. për keqpërdorim të hollash nga ana e Z..." (nga letra që më ka shkruar shoku Xh., më 16 maj 1983).

Së pari mund të jenë mosmarrëveshje në mes nesh sa i përket çmimit, pasi koha ishte e shkurtër dhe në prag të pushimit nuk kishim alternativë, sidomos për shokë që nuk kanë eksperiencë të madhe me çështje shtypi. Shifra prej 600 DM ka qenë parallogari sipas meje. Kurse shifra e dyfishtë janë shpenzimet reale dhe unë nuk kam as më të voglin dyshim. Pavarësisht nga kjo, edhe sikur ai shoku të kishte keqpërdorur besimin, nuk mund të përdoret si arsyetim për të dhënë mendim të tillë për diç aq parimore, siç më duket mua nxjerrja e një boletini informativ në gjuhë të huaja (sado që i kuptojë vështirësitë dhe vështirë që do kemi mundësi t'i dalim zot.

Unë po e përsëris këtë propozim, me shpresë se do shpreh secili mendimin e vet, duke mos mjaftuar vetëm me "po" e "jo", por edhe për të dhënë ide rreth saj.

* * *

Gjer tani letër të përbashkët (po e quaj kështu këtë formë të letërkëmbimit) kam marrë vetëm nga shoku Fahri (letra e 28 majit 1983). Nuk e di sa duhet të jetë praktike, por në mungesë të takimeve, të kushtëzuara nga largësia dhe dokumentet, është thuaja e vetmja mënyrë që të mbetemi në kontakt të nivelit që punën ta qojmë përpara. Halli

është te adresat, sa janë konspirative ato. Unë mendoj se në letra të përbashkëta të kthehen përgjegje të përbashkëta, të cilat mund të luajnë rolin e bisedimeve që do të bënim në takime, duke marrë edhe vendime. Shokut Fahri i pata kthyer përgjegje, përkatësisht letër ku kryesisht doja ta njoftoj për marrje të letrës, duke i shkruar shkurt ca fjalë mbi letrën (prandaj s'më duket e tepërt nëse këtë letër do t'ua dërgoj ca me vonesë edhe ju shokëve tjerë, pasi ka të bëjë me letrën e përgjithshme.).

Për, sa u përket letrave të përbashkëta, nëse do praktikohen, mendoj se duhet shkruar vetëm mbi gjëra që duhet të na përkasin të gjithëve, kurse për gjëra të veçanta le të përdoret letërkëmbimi me shokun përkatës.

Në letër shoku Fahri, kryesisht nga shkruante për sjelljet e disa njerëzve, të cilët i kanë rënë në sy, para se ata të dalin hapur, siç kanë dalur. Këtë informim e vlerësoj, por duhet ikur pasioneve. Sa ndihmon informimi i tillë, bind në fakt se të njejtit njerëz mund t'i shkruajnë redaksisë së ZK, kuptohet edhe letra të "stolisura", dhe shokët e Redaksisë, duke mos patur mundësi t'i njofin të tillët ashtu si janë, mund që ju përgjegjen atyre që kanë shkruar (pse jo, për të zbuluar se çfarë përgjegjesh kthen Redaksia në letra tjera, që shkruhen me qëllime të mira, pra, për t'i zbuluar këshillat që Redaksia ua jep lexuesve...), në përmbajtje të letrës, duke mos ditur se janë letra qëllimkëqia... Ose, në atë rreth mund ta nxjerr puna e rruga ndonjë shok tjetër, dhe sigurisht që ka mundësi të gaboi duke mos i njofur bashkatdhetarët, të cilët më heret mund t'i ketë njohur si të mirë... Sigurisht në rrethet ku shokët gjenden më gjatë mund t'i njofin bashkatdhetarët e ati rrethi më së miri, kjo ndihmon shumë sa i përket çështjes organizative. Kuptohet, nuk do duhet marr me mend se ne, gjatë informimeve të tilla mund të nisemi nga ndonjë inat personal, tek a huq, ose që ndonjë gabim të tjerëve ta fusim nën mikroskop, kurse ndonjë gabim ta fshehim, për hir të ndonjë simpatie a afërsie. Të gjitha këto do të duhej të jenë të huaja për ne. Kurse, përderisa informon ndonjë nga ne shokët, nuk duhet barasvlerësohet me letrat që mund t'i dërgojnë provokatorët e lloj-llojshëm, derisa dihet se ndonjëri nga shokët nuk ka devijuar, ose nuk ka ndonjë hile në informim që bënë. Përndryshe, sikur të kemi siguruar prova se ndonjëri nga ne bënë informime mbi tjerët, duke fshehur mbrapa ndonjë hile, duhet të jap llogari të rrept, pasi dezinformimet mund të sjellin pasoja të rënda në punën tonë të mbarë.

Sa më përket mu, siç shkruante shoku Fahri, unë nuk e kam shkarku veten nga përgjegjësia që më takon, lidhur me H. dhe degjenerimin e tij, përkatësisht mashtrimin që na ka bërë, ndërsa për rastin konkret të vizitës që i kemi bërë shokut F., i kam shkruar (dhe mund të lexoni në letrën që po ua dërgoj).

Shoku Fahri shkruante edhe për përgjegjësinë me të cilën është ngarkuar. Jam i mendimit se ai sektorin e tij duhet ta mbikëqyr dhe drejtoi, duke u ndihmuar në fillim nga shokët që kanë eksperiencë, derisa ai ta zotëron, edhe pse kam bindjen se nuk do mbetet keq, pasi gjatë viteve të fundit është marrë shumë me aktivitete praktike dhe ka treguar zotësi. Në këtë drejtim do të ishte e nevojshme të bëhet informimi mbi gjendjen materiale, për të ditur sa është plafi, që të shtrihen këmbët. Më shumë një informim i tillë do ndihmonte, sikur të dimë se a janë duke u ndihmuar familjet e shokëve në burgje dhe shokët brenda. Kjo e dyta nuk është e domosdoshme të dali, pasi në atë drejtim konspiracioni duhet me qenë rigoroz, dhe a ka mjete që të ndihmohen, nëse do na bie rasti të gjendet ndonjë bashkatdhetar që do përcillte ndihmat e domosdoshme për familjet në fjalë. Nëse në këtë drejtim jemi fare mbrapa, ose për shkak të mundësive ndihmohen vetëm familjet në regjione të caktuara, kurse në ndonjë regjion, ku ato mund të jenë më të domosdoshme, mbeten fare pa to, duhet të insistojmë që ta rregullojmë më në nivel punën, pasi shumë lehtë, në ndihma, mund të biem në provim. Sikur të mos

bëhet fare, në mungesë të mjeteve, atëherë duhet ndërmarrur fushatë, pse jo edhe përmes ZK dhe përmes shokëve në rrethe.

[Ka mundësi se do gëzoheni që po i jap fund, por më ndjeni, edhe unë jam lodhur para jush, më shumë se ju, që të shkruaj, prandaj merreni durimin që ta lexoni këtë letër, së paku njëherë, gjer në fund (kam shpresë se do t'i përshtateni ndonjë mahije të ngjashme që do t'i shkruaj kohë pas kohe)]

– PËR NJË REPUBLIKË SHQIPTARE NË JUGOSLLAVI!

–RROFTË LRSJ--a!

Përsëndetje revolucionare (Ibrahim Kelmendi)

PS. Sa i përket strehimit, ende nuk jam rregulluar. Sa po më mundon, pasi disi jam lidhur dhe kjo po pengon edhe në punë, pos që isha mësuar "nomad".

Mirëupafshim

19. Letra e 12 gushtit 1983

Shokëve të QE

Suedi, më 12 gusht 1983

Të dashur shokë,

pasi ca me vonesë mora letrën nga shoku Xhemë (të datës 31 korrik të këtij viti), të cilën e keni marrë edhe ju të tjerët, po marrë mundin të ju shkruaj.

Sa për gjendjen në Kosovë, vërtetë këndeje qenka shumë larg, prandaj edhe shumë pak ka mundësi të informohem. Shumë mirë që shoku Xh. ka marrë mundin të na informoj, sado shkarazi, mbi gjendjen. Kështu do të duhej të praktikohet, për arsye se përkatësisht na duhet të veprojmë dhe të drejtojmë veprimtarinë. Edhe mbi disa aktivitete që janë bërë ose duhet të bëhen, nuk kam çfarë të them, pos: na duhet të gjitha forcat t'i përqëndrojmë në punë - o sot o kurrë! do të thoshte populli.

Sa mirë që po vika shoku nga T. (Turqia-shën i Xh. D.). Me te duhet biseduar për aktivitetet në T., pasi shumë pak, ose hiç, po dëgjohet për kontributin dhe aktivitetet patriotike atje. Pastaj, duhet të bisedohet që t'i kompletin disa adresa më të rëndësishme të njerëzve qeveritarë dhe personaliteteve që kanë ndikim në jetën politike e kulturele të vendit, në mënyrë që t'ua dërgojmë buletin (për të cilin po bëhet kaq bujë, e populli thotë gjithashtu: "kur murmuron shumë mos prit shi"). Sidomos të bisedohet me te që të angazhohen shokët, nëse ka nga ata që shkruajnë, për të shkruar punime për buletin. Edhe lidhur me broshurën e Qubrilloviqit, "Shpërngulja e shqiptarëve", të bisedohet; broshura është përkthyer, kurse punimi, në vend të parathënies, me përmbajtje përkatëse është në përfundim. Desha të them referat në vend të broshurës. Me rëndësi është se si do ta shpërndajmë. Mënyrën për ta futur brenda një numër të caktuar, aq sa kanë mundësi t'i shpërndajmë, besoj se e kemi gjetur. Edhe këndeje na duhet një numër i madh. Pos shqiptarëve nga T., na duhet t'ua shpërndajmë qytetarëve nga T., që janë shumë të angazhuar e të organizuar dhe që kanë ndikim të madh brenda. Por, këtyre duhet t'ua shesim. Ndoshta nuk kanë mundësi ta shpërndajmë (as ilegalisht, shkaku i gjendjes). Atëherë na duhet siguruar adresat, të cilat shokët do t'i nxjerrin nga librat e telefonave.

Sa për grupin e "udbasho-patriotëve", siç i quan shoku Xh. (Xhemë=Xhafer Shatri-shën i Xh D) vërtetë duhet menduar dhe jo vetëm menduar, por edhe vepruar. Unë qëllimisht këtë shprehje e vura në thonjza, pasi, sipas mendimit tim, një kombinim

i tillë nuk është i mundur, kur mendohet patriotizmi shqiptar; ose udbashë ose patriotë, të dyja nuk shkojnë së bashku. Tani kanë nxjerrë nr. 2 të "organit" "Punëtorët", të cilin ma dërgoj shoku F. (Faridin) dhe më shkruante: "nëpër vendet që është dërguar (mendohet "Punëtorët") me postë apo me anë të ndonjë individi, nuk ka pasur sukses, pasi në shumë vende e kanë bllokuar dhe ashtu ka ngelë". Mirë, do të thoja, sa u përket vendeve që dihet se dërgohet dhe te ata kemi ndikim. Por, si qëndron gjendja me ata, të cilëve u dërgohet dhe ne nuk dimë, bila ka mundësi që t'ua dërgojnë bashkatdhetarëve që kurrë nuk kanë marrë as ZK (Zërin e Kosovës-shën i Xh D), pasi ka munguar kontakti. Sigurisht që aty do të ndikon, pasi në shkrimet e tyre bëjnë falsifikim të paskrupullt - kur thirren në LRSNJ-në. Se do të mashtrujnë ndokend, nuk ka dyshim. Them këtë duke u nisur nga fakti, ose më përkatësisht, nga një arsye, pos të tjerave: Në radhët e mërgimtarëve është bërë punë e madhe në ngritje të vetëdijes kombëtare. Te një shtresë kjo vetëdije është evoluar, pasi nuk kanë qenë bazat në nivel. Si rrjedhim, pasi nuk kanë patur kohë e mundësi të mësojnë diç edhe nga teoria dhe mënyrat e të organizuarit, duke u nisur nga ajo se çfarë u është thënë vazhdimisht mbi gjendjen dhe përgjegjësinë e secilit, do të donë të organizohen, pa menduar shumë se për çfarë organizate është fjala. Pikërisht këtë gatishmëri mund ta shfrytëzojnë këta bataçinjtë. Sigurisht që secili do të dëshironte të anëtarësohet në radhët e LRSNJ. Por, pasi nuk do ta gjen mënyrën se si duhet të inkadrohet në radhët e LRSNJ-së (meqë në këtë drejtim ende nuk e kemi nivelizuar punën, mendoj sa i përket organizimit, për t'i organizuar në radhët tona të gjithë ata që dëshirojnë, kuptohet nëse janë në nivel, duke bërë edhe sistemim në bazë të përgatitjes e gatishmërisë, - mbi këtë temë kam ndërmend të shkruaj një herë tjetër, pasi ka kohë që më duket e arsyeshme t'i shpreh mendimet e mija të dala nga leximi i literaturës përkatëse), mund që nga nxitimi do gabojnë të anëtarësohen në OSBPK. Kjo bëhet aq më e vërtetë, kur t'i kemi parasysh falsifikimet e tyre dhe mënyrat e organizimit të cilat i aplikojnë, për të cilat unë nuk di më shumë se sa është biseduar. Unë edhe njëherë kisha për të kërkuar që të informohemi për mënyrën e depërtimit (të Nexhatit=Osman Osmanit-shën i Xh D) në RFGJ, pse jo edhe në T. (të Abdullahut), si dhe për bisedat që janë zhvilluar, pasi është afër mendësh që ai farë Nexhati, duke qenë shumë kohë së bashku, bile në banesë të shokëve (të Vëllezërve Gërvalla-shën i Xh D), ka mundur t'ua hedh shokëve tanë, meqë siç ka mundësi të dyshohet, gjatë gjithë kohës në anën e tyre duhet ta kenë patur Nuhiun, i cili gjatë gjithë kohës, hundët i ka patur kudo... Një informim i gjerë dhe i shtruar, ma analiza përcjellëse, mirë të përpunuar, do na duhej për informim intern të radhëve të LRSNJ-së. Do të ishte dam i madh që në ZK t'u kushtohet shumë vend. Nëse nuk mbërrin (pasi nr. 5 mund të jetë në përfundim), desha të them sikur kjo letër t'ju binte në dorë para se të delte numri i ardhshëm i ZK, do të propozoja që vetëm një njoftim i shkurtër do të mjaftonte, se "Punëtorët" nuk ka asgjë të përbashkët me ZK dhe se "sindikaten..." nuk e ka formuar LRSNJ-a, por është duke u bërë falsifikim i paskrupullt. Kjo mënyrë e luftimit do të ishte më e suksesshme, pasi të tillëve, shpesh duke i demaskuar, ua rritë vlerën (dihet te armiku). Ma merr mendja se qëllimi përfundimtar i tyre duhet të jetë: të na fusin në polemikë, pasi demaskimit që do t'u bënim, do t'i përgjigjeshin me "demaskimin" e tyre ndaj nesh dhe kështu, përgjithësisht, i gjithë ky "uj" shkon në mullirin e armikut tonë klasik. Pa dyshim se një pjesë të popullit gjëra të tilla do e demoralizojnë. Pra, më duket e suksesshme t'i lëmë të lehin, duke u mbaruar sikur nuk na prishë punë, kurse në plan të brendshëm, intern, të izoloohen e demaskohen, duke ua vuar rrethin që të mos kenë hapësirë për të lëvizur. Përfundimisht nëse kemi prova të bollshme se janë vegla të UDB-së, atëherë duhet gjetur krejt tjetër mënyrë... Do të ishte e domosdoshme sikur veprimtarisë së Nuhiut t'i bëhet një analizë e thellë, sidomos në rrethin ku ai ka lëvizur e "vepruar". Shokët e atij rrethi mund që do t'u kujtohen "lëshime" të Nuhiut, të cilat janë bërë vazhdimisht, në

kohën kur nuk është dyshuar se ai mundet me qenë vegël. Ne nuk duhet të na befason fare fakti se UDB-ja ka dy kategori agjentësh: një për veprim të aty për atyshëm, kurse kategoria tjetër duhet të infiltrohet, së pari në radhët e popullit, pastaj të organizatave patriotike-përparimtare, për të vepruar kur t'u duhen. Pra, UDB-së nuk i bëhet e tepërt të paguan vite me radhë agjent, të cilën nuk kanë nevojë të japin kontribut, për t'ua nxjerrur kymetin pas shumë viteve shumëfish. Është fare e mundshme, që bashkë me punëtorë, që në fillim, të ketë dërguar edhe ndonjë vegël, të cilat do "shkriheshin" në radhët e punëtorëve, për të dalë tani... "Lëshimet" e Nuhiut nuk janë lëshime që do bënte punëtori i "thjeshtë" (siç praktikohet të përdoret gabimisht ky term). Ato "aventura" duhet të kenë qenë të planifikuara, prandaj të ndalemi për t'i analizuar. Kurse për punën e dy të tjerëve, që kanë ardhur si usta, të shohim – asgjë për atë dynja...! Do të ishte fare e paarsyeshme, sipas mendimit tim, të thuhet "kallupçe" se deri në këtë kohë ka qenë në rregull, por që ndryshoi pasi ka shpirt prej karrieristi, cili do që të jetë. Me fatin e popullit nuk luhet! Dhe, nuk guzon të arsyetohet asnjë dhëlpëri, qoftë e Nuhiut apo e kujtdo qoftë, pavarësisht se shoku i kujt gjer në cilën kohë ka qenë!

Sa për Br., se kush duhet të përfaqëson Klubin e tyre, do t'ua përcjellim propozimin tonë, kurse ken do zgjedhin ata, le të shohim.

Ata tani kanë shoqatë mirë të organizuar dhe nuk bënë që t'ju imponojmë asgjë, por le të vendosin si t'u duket më së miri për ta. Edhe unë jam për shokun Sab., pasi ai gjer më tani ka qëndruar i paluhatshëm.

Sa për shërbim Informativ, ai ka qenë i nevojshëm, bile i domosdoshëm më herët. Shoku Mu. besoj se mund të kontribonte shumë, pasi edhe natyra e profesionit dhe përgatitjes shkencore mund të garantojnë për një specialist të mirë. E keqja është se ai nuk është angazhuar sa do të duhej të ishte në gjendje, besoj më shumë si rrjedhim i rrethanave të revolucionaritetit të zbeht, të pafarkuar. Por, ai vet duhet të jetë në gjendje të mos bie viktimë (është shprehje jo e qëlluar) e asnjë gjendje, por të bëhet i zoti që të mbizotëroi të gjitha vështirësitë. Mu për këtë po u pa e arsyeshme, duhet të bisedohet me te, pasi për Shërbim Informativ ai më ka biseduar shumëherë, se është i domosdoshëm për LRSNJ-në.

Për radhët tona brenda, që ato të zgjerohen e forcohen, do të thoja se është detyrë mbi detyrat, pasi atje përfundimisht do të ndahet "mejdani". Secili duhet të kontribuoi në këtë drejtim.

Sa për bisedat që ka patur shoku Xh. (Xhafer Shatri-shën i Xh D) me Shaqën, nuk kam çka për të shtuar. Më duhet vetëm të them se shpesh nxitohemi, pa arsye. Duhet t'i njohim mirë shokët mbi të cilët do peshojmë. Pas takimit..., kur shoku S. shkoi te Shaqa, sikur mu duk nxitim, pasi isha në korent nga ata që bëjnë punët, se ai shumë ua pshtjellon punët në shumë rrethe. Kudo ka udhëtuar, prej klubi në klub, duke ua pshtjelluar punët dhe më në fund duke ia lanë namin vetes për punët që s'i kishte bërë, por vetëm se i kishte sabotuar. Mu për këtë arsye, janë të domosdoshme konsultimet e përbashkëta kur është në pyetje ndonjë bashkatdhetar që do të duhej të ngarkohej me aktivitete, thuaja organizative, me përgjegjësi për ndonjë rreth. Pos asaj, vetë pata eksperiencë të keqe me te. Më bëri mirë dhe e muar vesh krejt pazari, edhe pse ishte me rrezik përkatës. Të gjitha duhet patur parasyshë.

Për personin që kërkohen informata, do të sigurohen. Nëse është një që mendoj tani për tani, me po atë emër (për mbiemrin nuk di, por me atë emër nuk njohim tjetër), atëherë është një patriot "aventurist". Tani do të duhej të jetë në burg, nëse nuk është gënjeshtër që ai të kthehet në Jug. Ka qenë në klanin e Gani Azemit e Reshatit, si drejtues të Komitetit për Kosovën, bashkë me Enver Hadrin e Emin Fazliun me

bashkëpunëtorë... Por, ta lëmë për herën tjetër, pasi ka mundësi të mos jetë ai dhe unë të shkruaj kot.

Pasi i shkova letrës me radhë, atëherë duhet t'i përgjigjem pyetjes konkrete që më është shtruar, lidhur me mbështetje në "forcat tona" dhe investime.

Se çfarë ke shkruar në "shkresë-rregulloren" e QE (po e fut në thonjza, pasi prapë nuk po më duket termin i përshtatshëm) unë kam harruar. Nuk kishte me qenë keq ta kem një kopje, pasi, edhe pse e pata lexuar, po bindem se e kam harruar (e rregullorja nuk guzon të harrohet). Kurse, nëse është Rregullore e QE, – për çka nuk di, pasi do të duhej të diskutohej e aprovohej, por mund që është bërë pa praninë time, për çka unë dakortohej, – ma merr mendja se nuk duhet të potencohet se "e kam shkruar unë". Nëse është menduar formulimi gjer në aprovim, atëherë bën të shprehesh ashtu. Por nëse është vërtetë Rregullore e plotëfuqishme, atëherë – jo. (Kjo nuk do të ishte si temë, por meqë po përgjigjem në letër, nuk do më zihet për gabim ose të vlerësohem për cikrimitar, nëse shpreh mendimin për ndonjë lëshim, për të cilin unë mendoj se është lëshim.)

"... duhet të mbështetemi vetëm e vetëm në forcat tona dhe askund tjetër...", na shkruaje shoku Xh. Së pari, shkaku i paqartësisë, do të shtroja pyetjen: kush jemi ne, përkatësisht "në forcat tona" dhe të tjerët, përkatësisht "askend tjetër"? Siç e dimë, ne jemi në radhët e LRSHJ-së, të ngarkuar me përgjegjësitë që kemi. LRSHJ-a, siç kemi bindjen, është Organizatë që qëndron në ball, për t'i prirë e për ta udhëhequr popullin. Si rrjedhim forcat e LRSHJ-së nuk mund të ndahen nga forcat e popullit tonë. Në rastin siç je shprehur, forcat tona mos jemi menduar vetëm ne të QE, duke mos u llogaritur as anëtarët e LRSHJ-së dhe radhët e gjëra të saj, kurse të tjerët janë masat popullore. Ndoshta edhe nuk kam kuptuar si duhet, prandaj do të mjaftonte sqarimi sa do i shkurtër. Nëse është kështu siç e kam kuptuar, atëherë parimisht është gabim edhe Rregullorja e QE, sa i përket këtij formulimi. Mbështetja e LRSHJ-së në forcat e veta do të thotë mbështetja në forcat e popullit. Nëse zemra i takon një trupi, atëherë ajo është në atë trup dhe jo që të dalë nga ai trup për të jetuar "në forcat e veta". Po kështu nëse Lëvizja është Organizatë pararojë e popullit tonë, – ndryshe edhe nuk e mendoj, – atëherë vetëkuptohet që populli e mban, ose si te rasti i zemrës e trupit, asnjëra nuk e mbajnë njëra tjetrën, në kuptim të ngusht të fjalës, por asnjëra nuk rron pa tjetrën; secili për vete ka funksionin e vet. Të konkretizohem edhe ca.

LRSHJ-a ka një pjesë të radhëve të veta edhe jashtë atdheut, në mesin e qindramijëra mërgimtarëve. QE është një nye e LRSHJ-së që kordinon e udhëheq punën, kuptohet jashtë, duke e lidhur me atë brenda. Të gjithë mërgimtarët përbëjnë një pjesë të konsiderueshme të popullit. Bile, do të thosha një shtresë vitale, qoftë sa i përket moshës, qoftë punësimit, pasi më shumë ka shqiptarë të punësuar në prodhim jashtë trojeve të tyre se sa në trojet e tyre (po kuptohet se fjala është për trojet shqiptare nën Jugosllavi.). Parimore do të ishte që ne, pasi jemi në ball të kësaj shtrese të popullsisë, të mbështetemi te ata dhe bashkë me ta, ta ndihmojmë revolucionin brenda. Siç dihet, një prej faktorëve që të fitojmë janë edhe mjetet materiale. Bile, në kohët e sotme moderne mjaft me rëndësi. Por faktori kryesor janë njerëzit. Atëherë për QE do të ishte detyrë që të organizojnë në nivel, në mënyrë që bashkatdhetarët të përvetësojnë vetëdije të ati niveli, për të ditur se janë ushtarë të popullit e të atdheut. Kur të jen të vetëdëshëm për këtë, se secili e ka borxh t'i dal zot popullit e atdheut, duke i ndihmuar, për çka jemi të thirrur, atëherë si nuk do të ndajnë diç nga djersa për ta përgatitur këtë luftë. pra, djersa kushton më lirë se gjaku. Dhe pikërisht se sa do të sakrifikojnë dhe a janë në gjendje të sakrifikojnë edhe jetën po u kërku, për indeks të tregimit kemi

sakrificat që bashkatdhetarët do bëjnë në djersë. Sikur ne ta kordinojmë punën në nivel, atëherë pse të mos kemi mjete të mjaftueshme, bile edhe të tepërta, kur jetojmë në gjirin e qindramijëra bashkatdhetarëve. Për ta vërtetuar këtë që them sjell shembull: a vërtetë nuk jemi në gjendje në krejt botën e jashtme t'i sigurojmë 1.000 bashkatdhetarë që do t'i sakrifikojnë së paku 50 DM (dhe valuta të tjera) nga rroga e tyre mujore. Sigurisht që ka mundësi, pas LRSHJ-a është popullarizua shumë në radhët e mërgimtarëve. Ata, edhe më shumë në numër kanë dal në demonstrata. Kuptohet se secili ka qenë i vetëdijshëm se sa po sakrifikon, jo vetëm materialisht. Sa ka të tjerë, sikur organizimi të ishte në nivel në rrethe, duke patur celula në çdo rreth dhe duke i ndihmuar që ato të jenë në nivel të misionit të tyre, dhe përfundimisht duke patur bindje të pa lëkundshme se ato ndihma nuk keqpërdoren, të cilët nuk do të kursenin edhe më shumë, e jo vetëm atë shumë ideale që e përmenda. Por më duhet të shtroj pyetjen se pse nuk po ndodhë kjo? Përgjegjja mund të ipet e shkurt dhe e qartë: ende nuk i kemi kordinuar punët në nivel, sa çdo gjë të funksionoj si duhet dhe të vihet në binarët e vet për të funksionuar, të them vetëvetiu. Pastaj, po që se nuk e kemi kordinuar punën në nivel, edhe pse gatimëria te bashkatdhetarët shihet, duhet ta them hapur se bukur në nivel jemi kompromituar pa nevojë, duke patur bashkatdhetarët përshtypjen se edhe secili rrugaç militon në radhët e LRSHJ-së. Kurse ne me kohë ua kemi lëshuar disave frejtë nëpër këmbë (disa vërtetë kanë nevojë për frejtë), duke u nisur nga motoja "ishalla, mashallah", siç shprehen me pleqët, ose thënë më përkatësisht i kanë marrë frenjtë nëpër këmbë (pasi kanë qëlluar hamshorë të hasdisur...). Ai bashkatdhetari që punon 10 orë në ditë dhe thuaja që padroni i qëndron me kamxhik mbi kokë, do të mendon me vete: "të jap ndihma për ata që mbrëmjeve bëjnë qejfe diskotekave, për ata që punë e pa punë, ose thënë më përkatësisht pa punë e pa punë endet poshtë e lartë, për atë që shkon i veshur, i lëmuar, si pëllumb, siç i thonë një fjale, pa punuar e fituar fare, për atë që është "xhymert" pa fituar vet fare, për atë që nuk i shihet ndonjë hajr, por vetëm sillet si fodull dhe mundohet t'ju imponohet si i dishëm e komandant, besa edhe për asi, për të cilët hiç për gajle nuk e kanë të degjenerohen, pasi që na qenka "normale" dhe "biologjike..." etj., etj. Mund të thotë ndonjëri, se nuk ka nga bashkatdhetarët që kanë përshtypje të tillë. Unë do t'i thoja ati, kuptoi ato që nuk të thuhën, ato që bashkatdhetari i ndershëm e patriot i mban brenda dhe ia gërryn shpirtin dhe jo vetëm ato që i thotë, pasi shpesh ndodhë të folë vetëm sa për formë. Pastaj, pse një shumicë e madhe nuk i kanë punët ku i kanë fjalët. Mund që unë nuk pata të drejtë më lartë dhe do të kisha dëshiruar të mos kem të drejtë, por diçka nuk është krejt në rregull, për çka duhet të mendohemi mirë e mirë, përndryshe një numër kaq i madh i bashkatdhetarëve, që për fatkeqësi është në botën e jashtme, është forcë e madhe, është ushtri e tërë. Pikërisht në këtë drejtim m'u duk e arsyeshme të investojmë, që punët t'i vëmë në vijë, që organizimin ta përsosim, që te populli të fitojmë besimin e duhur, etj. Po ia arritëm këtyre, pa patur nevojë të mashtrujmë veten, do të shihnim se sa do ndihmoheshim.

Gjer tani të gjitha aktivitetet i kemi financuar jo nga "forcat tona", por nga djersa e mërgimtarëve. Edhe mjetet e nevojshme për investime sigurisht që do jenë djersë e mërgimtarëve, pra djersë e të "tjerëve". Këto nuk mund t'i neglizhojmë.

Mendimi ishte që t'i përmbledhim forcat që të bëjmë botime të shumta e kualitative, që të ndihmohen me gjithë mend familjet e të vrrarëve e të arrestuarve dhe të ndihmohen shokët. Nëse nuk kemi mjete, ose frikësohemi se do t'i harxhojmë dhe s'do kemi pastaj as për punë elementare, atëherë duhet organizuar fushatë, duhet që bashkatdhetarët të thirren, edhe përmes ZK (përmes të cilit fare rrallë i kemi thirrë për ndihma dhe asnjëherë nuk ka patur ndonjë artikull, pse jo edhe kryeartikull për ndihmat

dhe solidaritetin popullor, si kusht për ta fituar luftën...). Por, po t'i investonim ato mjete që do t'i investonim në ekonomi, atëherë do të bindeshim për përfitime të vërtetë. Një punë aq e madhe që do të duhej të bëhej, do bindte bashkatdhetarët në përmasa të gjëra se LRSNJ-a është Organizatë e zoja e cila do ta udhëheq popullin në rrugën fitimtare, prandaj edhe duhet të ndihmohet. Këto punë nuk po bëhen; shoku për propagandë ankohet se nuk po marrin, shoku për çështje organizative arsyetohet se nuk po ka mjete as për udhëtim, unë që do t'i gjeja mënyrat për të udhëtuar (pasi në punën time do të ishte i domosdoshëm qëndrimi i përkohshëm në shtete të ndryshme, për të marrë kontakt me gazetarë, personalitete dhe organizata), ankohe për shkak të dokumenteve të udhëtimit, etj. Shoku për propagandë ka të drejt të arsyetohet se nuk mbërrin, por a vërtetë duhet t'i mbërrin të gjitha ai në atë fushë; edhe të formuloj shkrimet që shkruan vet, edhe t'i redakton ato që mund t'i vinë edhe t'i shtyp pastaj vet dhe sigurisht të bëjë punë finale që bëjnë grafikët, për ta qarë përfundimisht në shtyp Organin ose ndonjë punim tjetër. Pastaj, është në pyetje edhe korespondenca. Në këtë drejtim, a vërtetë nuk kemi mundësi të sigurojmë kuadër (ta zëmë ai që do të dij të daktilografon në "kompozer") të specializuar që do mundet t'i mbërrin të gjitha, çka lypset për t'u shtypur, apo nuk duam, pse ndoshta duam t'i monopolizojmë të gjitha punët... Pastaj, kur kemi mundësi të sigurojmë mjete për të investuar në ekonomi, e ato duhet të jenë bukur të mëdha, si nuk paskemi mjete solide që shokut S. (Xhafer Durmishit-shën i Xh. D.) të ia paguajmë udhëtimet e domosdoshme për çështje organizative, nga e cila varen shumë sukseset e LRSNJ-së, sigurisht edhe e ndihmave materiale. Përfundimisht do të thoja: "ekonomistët" e mirë, në këtë situatë kaq të ngarkuar, do të investonin edhe kafshatën e gojës drejtpërdrejtë në veprimtarinë patriotike, prej ku kemi përfitimet më të mëdha. Pra, isha për ate, që nëse ndërmarrin fushatë për të mbledhur ndihma, atëherë jo për të investuar në ekonomi, por në veprimtarinë patriotike-revolucionare, e cila garanton fitime të mëdha, e cila ngrit vetëdijen e mërgimtarëve për të kuptuar se duhet të sakrifikojnë, qoftë materialisht, qoftë edhe me jetë.

Deri këtu ishte vështrim nga një kënd. Vështrimi nga këndi tjetër do të ishte: po që se arrisim të sigurojmë "pavarësinë" materiale, pa patur nevojë t'i "shtrim" dorën popullit, atëherë kjo "pavarësi" mund të bëhet e rrezikshme - të krijojmë shprazëti në mes të LRSNJ-së e radhëve të mërgimtarëve. Mund që atëherë do ta kemi mundësinë të mbyllemi dhe të "qëndisim" mendime në letër, duke "bombarduar" popullin pastaj me gjithë ato mendime të "qëndisura" mirë (por të pa shpirt revolucionar, pasi janë "qëndisur" duke qenë të mbyllur dhe të "pavarur"...). Ne në atë rast do bëhemi "shpirtmirë" ndaj sakrificave materiale të mërgimtarëve, të cilave më nuk do të kemi nevojë t'ua "shtrim" dorën dhe të cilët do t'i ruajmë nga ky "harxhim", por do të arrijmë tjetrën, që bashkatdhetarët vetëm teorikisht të inkuadrohen në luftë, me ç'rast kanë mundësinë të fitojnë bindjen se nuk qenka e nevojshme të sakrifikojnë ata fare, pasi çdo gjë e bëjkan të tjerët, ata që mbështeten në "forcat e veta". Pastaj, mos vallë mendohet që aktivitetet tona revolucionare t'i mvarim nga përfitimet që do të sjellin investimet? Nëse po, atëherë është e gabueshme dhe aktivitete të tilla do të jenë tejet sterile, pasi atyre nuk do t'u vij era djersë të popullit, por aftësi prej matrapazëve, nëse edhe këto do t'i kem (për çka do të ndalem më posht.). Pos kësaj, sukseset e këtyre aktiviteteve do të jenë në relacion të drejt e përfitimet që mund të arrijnë investimet e vogla ndaj atyre miliardëshe...

Pa u zgjatur më, pasi po të isha më i pushueshëm do të zgjatesha edhe më shumë dhe ndoshta do të isha më i çartë (tani ka vajtur 3.20 e mëngjesit), po shtoj: shprehja "disi reagoi" nuk është e përshtatshme, pasi mund t'i jipen nënkuptime. Unë nuk pata reaguar disi, por pata shpreh mendime të çarta, se cilat investime janë në rend (Vërtetë

investimet e para do të duheshin bërë më herët për ta patur në qarkullim Veprën e shokut Adem, dramën e shokut Isuf, përmbledhje punimesh e artikujsh në një vepër të përbashkët të shokëve të vuarë e punime të tjera. Këto investime do bindnin bashkatdhetarët se LRSNJ-a merret me punë të mëdha dhe është e zoja për to. Por jo, pos ZK dhe të broshurës së Qubrilloviqit, në manifestime e demonstrata LRSNJ-a nuk ka asnjë material serioz për të nxjerrë mbi tavolinë dhe për t'u ofruar bashkatdhetarëve...). Dhe pasi të jetë investuar ku është më aktuale, po të bënim edhe punën tjetër përcjellëse, që të "shkriheshim" në radhët e mërgimtarëve për t'i lexuar së bashku gjithë ato materiale, për t'i analizuar ato dhe për të nxjerrë bashkarisht mësimet e nevojshme, do të shihnim si do të shkonte puna. (Më falni se shpesh po bie të përsërisë, por ja që po më duket se nuk jam i çartë sa duhet dhe nuk po mund t'i them më të përmbledhura mendimet që kisha.)

E marrim sikur unë të mos kem reaguar kurrësi dhe tani po i përkushtohem kushteve dhe mënyrës së investimit dhe vështirësive reale përcjellëse.

Nga njohuritë që kam në fushën e ekonomisë politike dhe të tregtisë, në botën kapitaliste, ku mbretërojnë ligjet e Xhunglës (të konkurrencës, siç quhen ato), kur investon duhet patur parasysh se duhet rrezikuar – o për të fituar o për të humbur. Të gjithë që investojnë nuk fitojnë. Tani për tani, gjatë gjithë kohës jam duke u kujdesur (pasi pa dyshim duhet t'i nënshtrohem shumicës!). Së pari në emër të shokut H. nuk ka mundësi zyrtare që për një kohë të gjatë të investohet në asgjë. Ai do ta bëjë kërkesën për strehim dhe ajo do të zgjatë në rastin e tij nja 4-5 muaj (pasi nuk ka edhe aq shumë prova, por varet shumë nga gjeturia dhe mënyra e të paraqiturit). Edhe kur të aprovohet strehimi i tij, prapë nuk ka mundësi të investon në emër të vet; sado që duket liri e liberalizim në shiqim, nuk është ashtu. Organeve ju intereson ku kush i merr mjetet për të investuar, pasi dihet për kriminalitetin në ekonomi. Pos këtyre, çfarëdo që të hapet, duhet patur kualifikim përkatës (për restorant duhet me qenë kuzhinier ose kamarier, që ke vërtetim se je marrë me këtë punë. Për këtë që them tani nuk jam mirë i informuar.). Kryesorja e të gjithave është gjuha e vendit; si mund të organizohet diç kur nuk dihet gjuha. Për ta mësuar gjuhën në nivel, me përkushtim serioz, shokut H, do t'i duhen më së paku tri vjet të mira.

I përshkrova vështirësitë sipërfaqësisht jo për të bërë të pamundur çfardo investimi, por pse janë në pyetje ndihma që jep populli dhe me to duhet ditur vepruar, pra, duhet ditur se ku po investohen. Unë do të thoja se e vetmja mundësi për të investuar dhe për të fituar, pasi për atë arsye po investojmë, është që të bashkëpunohet me bashkatdhetarë që kanë eksperiencë, dhe që janë besnik dhe të çështjes. Për shokun H. duhet gjetur mënyrën se si të rregullohen dokumentat, e pastaj, nëse vërtetë do bëhet investim në ekonomi, të gjendet bashkatdhetari me cilin do të bashkëpunon, ose siç quhet në ekonomi do të koperon. Në këtë mënyrë ka mundësi që t'i mbetet kohë për t'ju përkushtuar punës me të cilën është ngarkuar, pasi ka punë shumë me rëndësi, së cilës edhe nëse gjithë kohën ia përkushton prapë është pak. Në këtë drejtim unë do të hulumtoj dhe kam biseduar me bashkatdhetarë, njëherë për njëherë për mënyrat e investimit dhe fitimet që dalin dhe si është e mundur të bëhet. Pastaj, kur të dimë konkretisht se sa mjete do t'i investojmë dhe kur i kemi në dispozicion, atëherë mund t'i përkushtohem konkretisht.

Përfundimisht, pasi jam ende te kjo temë, do të shtroja pyetjen se a ka mundësi të komprometohemi, pasi një gjë e tillë vështirë që mund të mbahet fshehtë? A mos kundërshtarët, po që se i bien në erë, do të na sulmojnë – ja çfarë bëjnë me ndihma të popullit ata të LRSNJ-së.

Sa për shkrimet, jam i vetëdijshëm se ende nuk mund të shkruaj artikull, i cili nuk ka nevojë të redaktohet. Unë do të dëshiroja ta kem këtë aftësi, por pasi nuk e kam, nuk mendoj se është keq të shkruaj si di dhe pasi të redaktohet, besoj se do të del diçka. Se duhet lënë një pjesë e jetës në shkrim, unë nuk e di si lehet, por një gjë hetoj në disa raste: se i tëri djerësit dhe ndiej nxehtësi çuditërisht të madhe, të cilën e hetoj në pauza ose kur të kem përfunduar së shkruari. Pra, me të gjitha forcat e mendjes e zemrës mundohem të shkrihem në çdo punim, që ata t'i bëjë mundësisht të marrin frymë, por u dashka edhe mjeshtëria, e cila, shpresoj, me kohën arrihet, pasi një proverb gjerman thotë: "die Übungen machen Meister" (Ushtrimet mbarojnë mjeshtër).

Gjatë të kthyer prej andej isha në rrethin e Dys. Bisedova me shumë nga bashkatdhetarët, por në pamundësi që t'i bashkoj së bashku, në mënyrë që të kemi mundësi të bisedojmë më shtruar dhe të nxjerrim përfundime. Me veti kisha shoku Mu., në mënyrë që të jetë në korent dhe të dij se si qëndron situata. Secili në një mënyrë ose në një tjetër mendohej të çfaqsohej, çka është e vetëkuptueshme për të tillë që nuk kanë kulturë të njëmendët revolucionare, në mënyrë që kur bëhen analiza kritike, të fillohet çdo herë prej vetëvetes. Pra, si të themi faji edhe kësaj radhe duhej mbetur jetim. Por, unë përfitova përshtypjen sikur është vepruar me qëllim të shpartallimi, nga disa aty brenda. Ndërsa disa nga ta mendonin se nga jashtë u është hedh mish dhie. Sipas të shumëve fajin më kryesor e mbante shoku Hys, i cili, përkundër marrveshjeve, çështjen e fotografisë e paskësh nxjerrë në masë, pra në klub. Përndryshe, vendimet kishin qenë që një diskutim i tillë të mbahet për një kohë intern dhe pastaj, pa u pajtuan ata të udhëheqësisë, ta nxjerrin në diskutim që masa të vendosë. Unë me atë kyvetin tim, i cili shpesh po mbivlerësohet (pasi edhe Reshati më shkruante se më dinin për zot andej në Br.), apelova që ta forconin bashkimin dhe të mos e humbnin mirëkuptimin e toruan në asnjë situatë. Më konkretisht, për t'ia lidhur lëmezat mirë edhe nuk m'u duk e arsyeshme, pasi do të ishte i pranishëm pezmi emocional. Sipas tyre ata i kishin punët mirë në klub, ku kishin shtuar diciplinën e vigjilencën dhe sidomos të bindnin se e kanë marrë me seriozitet punën. Edhe në këtë drejtim ankoreshin në Hys. e Bacin, sidomos në Hys., pse i paskësh lëshuar aktivitetet paushall dhe ka bërë ose nuk ka bërë si ju ka tek, pa u konsultuar as pa mbajtur asnjë tubim me kryesinë. Unë, thënë të drejtën u befasova, pasi krejt ashtu se merrja me mend. Me Hys. bisedova në rreth të ngusht fare dhe u pa, e kjo më ka pas rënë në sy shumë më heret, se vërtetë nuk ka dhënë kontributin që është pritur nga ai. Por, njëherit tërheqa vërejtje se nuk ka vend për revanshime, edhe të moskuptimeve familjare; kryetari i tanishëm është kusheri i Hys., por disa kanë inate tmerrësisht të mëdha, me baza nga natyra familjare, të cilat unë i njihja qysh para viteve. Prandaj apelova te shoku Qam. (kryetari i ri), që të ketë kujdes në atë drejtim. Kështu që, edhe shokut Mu. i tregova se kishim biseduar që ai duhet të angazhohet edhe më shumë, bile edhe për kritikën se përse është duke ndenjtur anash. Pra, ai duhet të takohet me shokun S. që të bisedojnë më konkretisht se çfarë duhet të bëjnë në anën e Veriut. Po duhet patur parasysh se nuk ka kuptim që të ngarkohet edhe në Bielefeld, pasi gjendja nuk qëndron si duhet. Ndërsa sa për në Hamb., ai vazhdimisht i ka ndihmuar, edhe pse ndonjëherë e ka patur vështirë.

Qe dy herë më shkruan bashkatdhetari Sadik nga Br. Ai ankohet në njëfarë Ujkanin (unë do t'i kopjoj letrat dhe do t'ia dërgoj atij). Tani kishte marrë letër nga "një shok tjetër i Redaksisë", siç më shkruan, "le që gjërat ishin abstrakte por edhe puna jonë nënçmohej gjë që nuk pranohet" (citim i letrës). Unë në mënyrën time iu kam përgjegj (prandaj edhe pse kopjimi po kushton shtrenjtë, po fotokopjoj edhe përgjegjen, dhe po ia dërgoj Redaksisë, pasi fjala është për te.). Unë mendoj se nëse për këtë bashkatdhetar

nuk kemi ndonjë informatë konkrete, duhet të afrohet. Sikur të gjendet gjuha e përbashkët, është një njeri me përvojë të madhe jetësore, sidomos në fushën e arsimit. Që të ketë një punë, e kam ndërmend t'ia dërgoj librin e Obradoviçit "Agrarne reforme i kolonizacije Kosova" që t'i bëjë një recension të gjërë për buletin. Të shohim, pasi ai thirret se është historian, ndoshta në këtë fushë mund të angazhohet.

Ai gjithashtu ka shtruar pyetje konkrete: "Të lutem a din gjë për Këshillimin që u mbajt dhe pse nuk u ftua shoqëria jonë apo mos dikush tjetër e ka përfaqësuar?" (citim red.) Unë thua ja i ika përgjegjes direkte, pasi disi edhe nga gjithë ai rreth të mos jet askush i pranishëm, mu duk një lëshim, ose ndoshta një e metë në punën tonë.

Nga një gjerman ka një letër serioze, ku më shkruan gjërësisht se ka ndërmend të shkruan një libër mbi Kosovën, por jo diçka senzacionale. Pra, sipas letrës, ka ndërmend të shkruan një libër objektiv dhe atë në bazë të kriterëve marksiste. Unë jam i mendimit se duhet ta ndihmojmë pasi di se është rast shumë serioz. Por në letër kërkohet ndihmë nga ana jonë, sidomos në udhëzime dhe sigurim të materialit, bile është i mendimit që librin ta shkruajmë bashkarisht. Unë pasi e njoh mirë, ju kam përgjegjur se ne jemi të gatshëm për të ndihmuar dhe bashkëpunuar, kështuqë edhe në këtë drejtim na duhet të përqëndrohemi. Nga shoku S. do ta kërkoja kopjen e librit "Historia e zhvillimit industrial të Kosovës" (disi titull të ngjashëm, nga Dr. Tahir Abdyli, nëse nuk gabohem), që ta pata dhënë. Do ta kthej prapë, por tash për tash nuk po e gjej kopjen që kisha. Ajo kopje do të na duhet për librin në fjalë, që do ta shkruajmë me shokun gjerman, ose më konkretisht, që kemi ndërmend të fillojmë së shkruari.

Sa për buletin "Kosova", do të duhej të përqëndrohemi për të shkruar. Unë po shpresoj se do marrë kontakt me ndonjë shok në Kosovë, që të na vie ndonjë punim prej andej. Për përkthim në gjuhë franceze ende nuk kam ndonjë përgjegje, se a është gjetur mundësia për përkthime.

Kishte me qenë mirë që tani, kur shumë bashkatdhetarë kthehen prej pushimeve, të sigurohet ndonjë informatë nga ta, sidomos sa i përket "lëvizjeve" të Ushtrisë Jugosllave. Tani ajo ka ndërmend të bëjë manovra në Rreth të Shkupit. Kurse gjendja me Bullgarinë është ashpërsuar shumë, sidomos në fushën e propagandës. Bullgaria festën e Ilindenit, më duket 80 Vjetorin, e ka shpallur festë kombëtare në Bullgari, duke mohuar ekzistimin e kombit maqedon. Kjo gjë ka goditur sidomos klikën serbomadhe, e cila sipas interesave, "shpikë" kombe si të ishin këpurdha... Në këtë drejtim një koment shumë i ngarkuar ka qenë në Radio Beograd (më 11 gusht, në orën 22.00). Pra, pa përtes, të vizitohen bashkatdhetarët që janë kthyer nga pushimi dhe të pyeten. Ndonjëri duhet të mos e heton interesimin tonë, por informimi të sigurohet nga biseda e "lirë".

Përfundimisht, më duket se është koha kur të punohet në hartimin e Programit dhe Statutit të LRSNJ-së, për t'u lëshuar në diskutim për aprovim. Tani duhet të shfrytëzohet rasti i ardhjes së ati shokut nga T. (Sabri Novosellës nga Turqia-shën i Xh D) dhe kështu, në një kolektiv të përmbledhur, të hartohet.

Besoj se ua kam hequr merakun me të shkruar dhe të tillë letër jo një në javë, por as një në muaj nuk keni për ta dëshiruar, pasi duhet kohë për ta lexuar. Por të mos ndodhë që të mos e lexoni. Më falni, nuk pata kohë ta shkruaj më të shkurt, siç e thotë një dijetar. Dëshiroj që të hakmerreni, duke shkruar edhe më gjatë secili nga ju.

– Për një Republikë Shqiptare në Jugosllavi!

– Rroftë LRSNJ-a!

Përsëndetje revolucionare

Ilazi

PS. Mundësisht fotokopjet të firmosen original dhe jo firmosja të kopjohet nga origjinale. Pra, pasi të fotokopjohen të firmoset edhe origjinali edhe kopjet për secilin.

Të veçanta:

Shoku F. (Faridin Tafallari-shën i Xh D), materialet që m'i dërgove i mora. Për lenta, momentalisht nuk i kam, pasi janë dërguar diku tjetër. Por, trego cilat të duhet, që t'i dërgojmë vetëm ato. Tani së fundi ka mbërri edhe kaseta e vizitës së shokut R. Alia në qytetet e Veriut. Besoj se e di edhe ti se ç'detyrë të vështirë ke që t'u kundërvihesh atyre plehrave andej. Por mos u dorzo. Do të dëshiroja çfarë qëndrimi po mbajnë shokët tjerë, sidomos ata të "mercedesit" dhe ata nëpër ato fshatra përreth.

E përshëndet shoqen, vëllaun, kojshin dhe sidomos fëmijët!

Mirëupafshim.

20. Letra e 25 gushtit 1983

PËR NJË REPUBLIKË SHQIPTARE NË JUGOSLLAVI!

Suedi, më 25 gusht 1983

Të dashur shokë të QE,
vetëm nga shoku Xhemë mora përgjegje, ose më mirë të them mora letër për afërsisht në intervalin kohor që propozoi ai në lidhje me komunikimin e rregullt mes nesh. Mirë do të ishte të shkruajnë që të gjithë, sadopak.

Sa i përket mbështetjes në forcat, çdo gjë e qartë. Unë jam duke bërë hulumtime. Për ndonjë të dhënë konkrete nuk po ju shkruaj, se si ka mundësi të bëhen investime, pasi edhe nuk janë të nevojshme. Kur të di diç konkrete, për akcion, atëherë ju shkruaj që të miratoni.

Këtu nuk i kam përgjegjet që ia kam kthyer ST, por sa t'i siguroj, do t'i dërgoj kopjet. Mendoj se ju kam përgjegjur siç do lypsej. Ndërsa së fundi i kam shkruar edhe Kryesisë së Bashkësisë së Prindërve Shqiptarë nga Kosova "Idriz Seferi". Edhe atë kopje do ta siguroj për arhiv.

Nga vizita "përtej gardhit" janë kthyer disa. Dua të them se më ka rënë të dëgjoj shumë gjëra të mira dhe të këqia. Por, tani po shkruaj për disa gjëra, pa qenë i sigurt në vërtetësinë e tyre. Përndryshe, lirisht mund të them se disa gjëra kanë turpëruar emigracionin punëtor, i cili në opinionin e atjeshëm gëzon respekt të lartë, sidomos rasti i turneut të Ansambllit... dhe pritja kanë bërë të veten. Kjo ka rëndësi të madhe.

Gjatë gjithë kohës me vizituesit ku ka qenë edhe familja e shokut Drini, bashkatdhetarët janë kënaqur që kanë patur ata në mesin e tyre. Por, sipas të gjitha gjasave, shoqja e shokut Drini, duhet t'u ketë folur disave se Ilazi është Davidi në radhët e LRSJ-së, pra Iljazi i bënka të gjitha të këqijat... Pastaj, Salihu na qenka luftëtari më besnik, por Ilazi ia saboton punën..., kështu ngjashëm. Nuk kanë munguar edhe "argumentet". Ndër "argumentet" më të freskëta ka qenë edhe mosvajtja e bashkatdhetarëve të Shtutg. në vizitë, të cilët i kam penguar unë të mos shkojnë. Pa e zgjatur, – por të jemi në korent se kanë ndodhur gjëra shumë të këqija, për të cilat më gjerësisht doemos më duhet të shkruaj herën tjetër, – mendoj se shokët Salih e Fahri duhet t'i shkruajnë shoqes për unitetin tonë (nëse mendojmë se e kemi, unë mendoj se e kemi siguruar maksimumin e unitetit të mundshëm, i cili do të rritet gjatë pune e lufte të përbashkët!) dhe ta sqarojmë më mirë, pasi disa gjëra, që unë mendoj se i kemi kapërcyer, nuk do të duhej të përsëriten. Ato do na dëmtojnë shumë, pasi në vizitë në të ardhmen do të shkojnë vazhdimisht bashkatdhetarë nga këndeja dhe unë s'do të dëshiroja, – për këtë lypset edhe mendimi juaj, – të dëgjoj sërish gjëra si kësaj radhe.

Edhe njëherë, bëjë propozim që shokët Salih e Fahri t'i shkruajnë shoqes së shokut Drini dhe ta sqarojnë, ose të kërkojnë nga ajo që për një kohë të mos bisedoj me vizituesit gjëra të ngjashme, përderisa të mos kemi siguruar prova, më përkatësisht, përderisa të mos ketë prova se Iljazi ka bërë gjëra të këqija...

Po kështu, propozoj që shoku Salih t'i shkruan edhe për grupin rreth gazetës "Punëtorët", sidomos për kretenin Nuhi, që shoqja të jetë në korent. Atje nga disa vizitues të Mynihut janë futur disa "Punëtorët" dhe u janë shpërndarë kosovarëve, të cilat u janë mbledhur pastaj... Të gjitha këto janë me rëndësi të madhe, pasi gjëra të tilla mund të keqpërdoren shumë, andej për "vizitë" do të dërgohen edhe vegla nga kënde, të cilëve të tilla fjalë u duhen për të mbjellë përçarje. Nuk kishte me qenë e tepërt, që një letër e tillë, po u vendos të dërgohet, ta kishim kopje.

E thash, mbi këto që shkrova, kësaj radhe po shkruaj fare shkurtimisht. Por herën tjetër do të shkruaj më gjerësisht, pasi t'i kem siguruar të gjitha verzionet e atyre që kanë ndodhur atje, për të nxjerrë një mendim se si vërtetë ka mundur të ndodhë dhe kush nga kënde është shkuar për të "nxitur" gjëra të tilla.

Për veglat teknike do të interesohem. Por, e keqja është se aparatet fotokopjuese për letër normale, formati A3, janë të mëdhenjë dhe pos kësaj, janë të ndërlikueshëm teknikisht, kështu që lehtë priset e fare vështirë ndreqet.

Sa për veglat që ishin cekur, do të bëjë edhe unë diç në atë drejtim. Do të kemi mundësi të zbulojmë se ku gjendet edhe ai farë Ibrahim Elezaj.

Për akcionet..., shkruar në fillim të letrës, le të mbetet çështje e tyre. Nga kënde çdo këshillë nuk mund të dekonspirohet, siç mund të ndodh edhe nga korrespondenca.

Nuk po zgjatem më kësaj radhe. Sa për shpërngulje dhe kolonizim nga trojet shqiptare nën tutelën e Maqedonisë, është duke shkruar një shok i atyre anëve. Ndoshta do të shkruan edhe ndonjë gjë tjetër.

Po përfitoj rastin të shkruaj edhe për disa gjëra, sidomos mobiljet e familjes së Drinit. Shoku Fahri dhe Salih do të duhej të interesohen se ku gjenden. Pastaj të marrin kontakt se kur kanë një kamion të thatë në dispozicion që ato të gjitha t'ia dërgojmë shoqes brenda, pasi atje mobiljet janë shumë shtrenjtë dhe nuk duhet lënë ato të shkojnë posht kur janë.

Parollën që përdora në fillim, të cilën e kam përdorur edhe në letra të tjera, a është e drejtë? Mos kishte me qenë edhe më e drejtë PER REPUBLIKËN SHQIPTARE NË JUGOSLLAVI! Ose, që të dya nuk duhet të praktikohen fare dhe përse.

Përsëritje revolucionare, Iljazi

PS. Shoku Naim ka marrë sot zyrtarisht strehimin dhe është i lirë të lëviz. Me te do të duhej biseduar, pasi kam përshtypjen se për disa gjëra nuk është gjithaq i qartë. Sidomos kjo rezultoi nga bisedat që pata dje me te dhe me Ismajlin (i cili, duket se është tradhtuar nga nervat, në mos tjetër gjë (ai, ka mundësi, ka përzier mbarë e mbrapsht kur ishte në vizitë "përtej gardhit"...). Sidomos kur janë në pyetje investimet, pasi Naimi muar strehimin, nëse do të bëhet ca më serioz e punëtor, mund të bëhet diçka edhe përmes ti. Ati i kanë ardhë prap pesë numra të "Punëtorët", por nuk i ka shpërndarë fare.

Mirëupafshim. (Ibrahim Kelmendi)

21. Letra e 15 shtatorit 1983

PËR NJË REPUBLIKË SHQIPTARE NË JUGOSLLAVI! Suedi, më 15 shtator 1983

Të dashur shokë të QE,

E pata shkruar një letër që me 10 të këtij muaji, por nuk e dërgova. Arsyen po ua tregoj tani: po më duket se kulturën revolucionare e shoqërore nuk e kemi në nivel që kritika të kuptohet siç lypset dhe ta arrin efektin e vet, kështu që shpesh po ndodh e kundërta – po hidhërohemi e inatosemi në njëri-tjetrin edhe më shumë, pra, kritika po e arrin efektin e kundërt. Mu për këtë arsye, po më duket më e arsyeshme që tani për tani – gjer sa të mësohemi ta kuptojmë kritikë objektive të njëri-tjetrit – të shkruaj me ton më të but. Por, edhe kështu, jo pa të drejtë, frikësohem se jam më i ashpër se sa do të lypsej në këtë situatë e këto rrethana, por që të heshti, nuk heshti dot. Ndërsa, pse nuk marrë përgjegje, edhe ajo është një lloj përgjegjësie për ata që nuk përgjegjen.

Në ndërkohë mora letër nga shoku Xhemë, të cilën e ka postuar më 31 gusht (e që mua më erdhi me vonesë, duke u dashur të vij postim pas postimi...). Por, më parë dua të ndalem ke ca çfaqje të kohëve të fundit, sidomos pas kthimit të Milaimit (të Parisit) dhe të tjerëve nga vizita e pushimi...

Ato që ndodhën kohëve të fundit, e kam fjalën të fushata e Milaimit dhe Xhavitit, janë çfaqje, të cilave duhet t'u përkushtohemi doemos. Por kjo do të bëhej më mirë sikur shokët të na tregonin çfarë dinë për atë fushatë, veçmas shokët Fahri e Salih, që kanë qenë të pranishëm me një rast. Unë kësaj radhe po bazohem në ato që m'i tha shoku Meti përmes telefoni (me ç'rast, për shkak të shpenzimeve, nuk kemi mundur të bisedojmë gjerësisht.).

Në seminar disa gjëra qenë sqaruar, edhe pse, për mendimin tim, nuk ka qenë tubim i ati niveli, që të merret me të tilla bisedime dhe marrje vendimesh (si ai se cili qëndrim duhet marrë ndaj AP dhe shokëve të tij dhe si duhet luftuar e demaskuar ata, e të tjera bisedime), pasi aty ka patur edhe nga ata që nuk militojnë në radhët e LRSJ-së dhe si të tillë që janë, nuk meritojnë. Sidoqoftë disa gjëra qenë diskutuar. Kurse në tubimin tonë të pastajmë, u sqaruam edhe më mirë, duke marrë vendime përkatëse. Ndër to ishte edhe fotografia e satrapit.

Përkundra të gjithave, po përsëriten disa dukuri që duhet tejkaluara, ose që duhet shtruar ku është vendi që të diskutohen rishtas e të merren vendime përkatëse, po që nevoja, dhe jo të përsëritet e njëjta, që në masa heterogjene të ndodhin ato që patën ndodhur dhe që ndodhën. Kësaj radhe edhe më konkrete është "misioni" i Milaimit, i cili, po sa u kthye nga vizita..., filloi nga sulmet LRSJ-së, por tani më si sigurt, pasi derdelisej "në emër të PPSH-së". Këtë gjë më mirë se askush dhe më e mirëseardhur se për çdo kend, diti ta shfrytëzon dhe e priti Xhaviti, për të cilin më nuk do të flas, pasi fjalët po i merr era, kurse shoku Salih edhe më tutje ka bindjen se është shok i mirë (Nëse nuk e mendon bukurinë, atëherë nuk ka pse të mos ndryshon edhe atëherë kur shfaqjet e dënueshme i përsërit, edhe pse në seminar na u desh t'ju ruhem... dhe t'i përkushtohemi pajtimeve, që, sipas të gjitha gjasave, janë shkelur...).

Sa kanë të drejtë shqiptarët e Kosovës, të strehuar në atdhe, ashtu siç ju desh shokëve të strehohen në Perëndim, të çfaqin kritika e mendime për LRSJ-në, as që mund të vëhet në dyshim. Por, nëse ato ndodhin, atëherë nuk ka nevojë askush të dërdëlisë rrugëve të botës. Kritikën e mendimet për LRSJ-në, për vijën e përgjithshme politike, nuk duhet nxjerrur rrugëve, për interesa të ngushta egoiste. Të gjitha kritikën, propozimet e mendimet, duhet të dërgohen për analizim, ku duhet, për të marrë qëndrim ndaj tyre. Pastaj duhet të njoftohen ata që kanë kritikuar dhe kanë dhënë propozime e mendime. Nëse nuk kënaqen me përgjegje, duhet edhe njëherë të ankohet se përse nuk

është i kënaqur. Dhe nëse sërish nuk do të jetë i kënaqur, ai që është anëtar, duhet ta bëjë çështje në celulën që militon. Asesi nuk duhet të dalë kokë në vete për të dërdëlisur rrugëve. Pse dalja e tillë, para se të merren vendime dhe pastaj, është e dënueshme – është punë grupazhi e frakcionizmi.

Edhe Milaimi, nëse ka dëgjuar ndonjë kritikë, këshillë a propozim, është dashur t'i njoftojnë shokët që janë në nivel të përgjegjësisë (të cilët ai i ka njohur, pasi ata dhe jo Xhaviti, e patën nxjerrë në ball të demonstratave dhe patën garantuar, nëse mund të shprehem kështu) dhe jo të dekonspirohet para Xhaviti, i cili mezi ka pritur dhe, mendoj, e ka nxitur që së bashku të marrin fushatë "demaskimi" e sulmi. Kanë qenë më se të sigurt, sidomos Xhaviti, se rast më të volitshëm nuk mund të presin, duke menduar se pasi Milaimi është kthyer nga vizita..., çdo gjë që flet do ta flet pse është "këshilluar"..., e lere më se ai vet nuk është kursyer të derdelis "në emër të Partisë...". Sa janë të vetëdijshëm që të dy se çfarë do të thotë që rrugëve të derdelisëh "në emër të Partisë...", me siguri janë. Prandaj, për mendimin tim, ashtu kanë dashur, të them tani për tani, pse ashtu ua ka lypsur egoizmi i tyre i ulët e naiv (duke menduar se nuk kanë vendin e "merituar" në Lëvizje, dhe këtë, për arsye se i pengojnë persona të caktuar...).

Si po shihet, në pyetje është komprometimi i Partisë..., nuk ka diskutim. Tjetër është ajo se përse. Bile që të bënë diç tillë, askush nuk mundet më mirë se Milaimi, lulet e të cilit (nëse nuk gabohem) ju dhanë shokut Enver në Tribunë të 1-Majit dhe foli edhe në Televizion Shqiptar (ato që keni dëgjuar). Prandaj më duket serioze. Mu për këtë arsye, propozoj që të analizohet e gjithë puna dhe sjelljet e Milaimit, duke marrë përfundimisht qëndrim përkatës, pasi disa të meta janë parë tek ai edhe më parë. Nuk kam nga t'i ik edhe propozimit tjetër, që nën llupë të merret Xhaviti, me të mirat e të këqiat, duke i peshuar dhe duke dalë të çartë se çfarë qëndrimi duhet të merret për ta. Por, si edhe pritet, duhet secili nga ne, për të dytë, t'i thotë ato që dinë.

Për qëndrimin e shokëve Fehmi e Salih, kur ishin në Dyseldorf, gjithashtu duhet të bëhet vlerësimi përkatës, por pasi të na informojnë vet se çka është biseduar dhe çfarë qëndrimi kanë mbajtur, njëherit të japin mendimin se a kanë qenë të domosdoshme të tilla bisedime të atij niveli. Shtoj, për gjendjen e krijuar në Dyseldorf doemos duhet analizë dhe përfundimisht duhet të përgjegj dikush. Kështu së paku mendoj unë. Nuk e fsheh pakënaqësinë se kemi patur një rreth e një atmosferë, që ka qenë për shembull, prandaj ato që më ka rënë t'i dëgjoj, fatkeqësisht duhet të na prekun të gjithëve. E them hapur, se edhe armiqtë më të mëdhenjë, që nga formimi i atij klubi, çdo herë e kanë humbur betejën me turp...!

Shoku Salih, pa të drejtë më ngarkoi më përgjegjësi pse nuk ishte angazhuar shoku Meti. Tani që ai po provon të angazhohet, nuk e diç cilin qëndrim është duke mbajtur shoku Salih; në vend që të bisedojnë së bashku se çfarë duhet të bëjë në disa rrethe shoku Meti, ai prap provon ta siguron atë se Xhaviti është në rregull edhe atëherë kur hedh të gjitha plehërat e botës në LRSJH-në dhe Meti e mbron (ndoshta jam i dezinformuar, e nëse po, atëherë duhet të jap llogari Meti.). Shoku Salih do të duhej të thotë se përse vepron kështu. Mos është në pyetje mosbesimi ndaj Metit (nëse po, duhet të thotë), përndryshe pos kontributit të vlerëshëm, nuk e ka fare cilësinë të përshtjell e të bëjë gabime aq të hatashme, sa të disave që vet ua kemi dhënë shansat...

* * *

Të dashur shokë,

pasi letër mora vetëm nga shoku Xhemë, po konkretizohem për t'ju përgjegjur. Por, njëherë duhet të prek disa lëshime të shokut Xhemë, si, "nuk po u përmbahemi vendimeve tona për letërkëmbim" dhe shkruarjen në detale të disa gjërave, që nuk janë

të domosdoshme, pasi edhe letërkëmbimin nuk e kemi të sigurt – besoj se adresat na janë dekonspiru dhe djajtë edhe këndeje ecin me fenerë, kështu që shumëçka mund të dekonspirohet. Pra, ose unë nuk po kuptoj se si merret ndonjë vendim, ose nuk është marrë vendim i prerë për letërkëmbim. Sidoqoftë, edhe unë jam i mendimit se letërkëmbimi duhet të jetë në nivel, ashtu siç duhet të ipet përgjegje e merituar për çdo pyetje dhe propozimet që bëhen, duhet shprehur mendimin konkret ndaj tyre, në mënyrë që të shkohet përpara. Në disa propozime ende nuk kam marrë përgjegje nga të gjithë, e kjo pritje e panevojshme, në këtë situatë, është për çdo kritikë. Sikur të dinim së paku arsyeën...

Në letrën e 31 gushtit shoku Xhemë ka bërë propozime, sidomos sa i përket çështjes organizative. Unë mendoj se për gjendjen kaotike të pranishme në kurbet, askush nuk mban përgjegjësi para nesh. Ama, përfundimisht për disa gjëra duhet patur teori dhe ajo është më kryesorja, përfundimisht LRSHJ-a duhet të del me Program e Statut. Unë pata menduar, kur u botuan në ZK konturat e Programit Politik të LRSHJ-së, se ishte formulim që duhej të shërbente për diskutimet në radhët e LRSHJ-së, nga të cilat duhet të dali përfundimisht Programi e Statuti i LRSHJ-së. Për mungesën e Programit e Statutit, mendoj, askush nuk e mban përgjegjësinë para të gjithë anëtarëve të Komitetit Qendror (të Përkohshëm - pasi deri sa të jepen mundësit që të bëhen zgjedhje të rregullta demokratike, ashtu duhet të quhet, apo ndoshta nuk po kam të drejtë në këtë mendim). Sigurisht që në mungesë të Programit dhe Statutit është vështirë të funksionon organizimi, ashtu siç mund të bëhen lëshime të tjera, sidomos sa i përket vijës politike (asaj që është shtruar në Komunikatën, të lëshuar me rastin e bashkimit, për të cilin Bashkim, prap KQ duhet të mendon, sidomos sa u përket shokëve të PKMLSHJ.).

Se ka shumë gjëra të pasqaruara, tregon edhe letra që mora nga KHP (Komiteti "Hasan Prishtina" në Turqi - shën i Xh D). Ata QE e quajnë KE (Qendrën Ekzekutive e quajnë Këshill Ekzekutiv - shën i Xh. D.), kurse mua më quajnë sekretar të Sekretariatit për çështje të jashtme. Duhet përfundimisht të përputhen emërtime të tilla dhe të mos ngatërrohem me tituj (sado që më duket formale, ka rëndësi që të përputhen emërtimet).

Të kthehem konkretisht te propozimet e shokut Xhemë. Shoku Xhemë shkruan se "duhet formuar qelulat tona kudo". Me këtë pajtohemi të gjithë dhe është, thuaja, e vetëkuptueshme, por si. Kjo është pyetje që duhet të shtrojmë për t'ju përgjegjur. Çështja organizative ju besu shokut Salih, me bindje se është i përgatitur për t'i dalur zot këtij misioni, ose, se shpejt do të aftësohet gjatë punës. Se si qëndron gjendja dhe çfarë rezultati ka arritur, dinë ai më së miri. Por në shiqim të përcipët, nuk duket se qëndrojmë mirë sa i përket organizimit, nga i cili varen të gjitha sukseset tjera, si të përgatitjes së kuadrove, po kështu propaganda, grumbullimi i mjeteve financiare dhe ndihmave si dhe shpërndarja e tyre, sigurimi i informatave nga atdheu, etj., etj. Ndonjë punim për çështje organizative, se si duhet të organizohet dhe si do të duket fillimi i aktiviteteve të organizuara të anëtarit rishtas të anëtarësuar në radhët e LRSHJ-së, nuk na ka rënë në dorë për analizim dhe që të shprehim mendimet tona. As nga shokët tjerë diçka e kësaj natyre, qoftë edhe nga shokët brenda, nuk është vuar në qarkullim. Siç do bindemi të gjithë, në këtë fushë kryesore qëndrojmë mbrapa dhe është shprazëti e madhe sa i përket teorisë organizative. Kurse sa për sektorët tjerë, gjendja nuk qëndron hiq më mirë, me përjashtim, ndoshta, të propagandës - të daljes së ZK, i cili i ka të metat e veta (unë kam ndërmend posa të më dalë kohë, t'i shpreh disa mendime, se në cilin nivel qëndron ZK dhe çka duhet bërë që të dal edhe më i mirë. Kurse sa i përket punës sime, mos vet. Hiç mirë. Më shumë se kudo, mungon eksperiencia përkatëse. Besa nuk është në natyrë të shqiptarit të jet diplomat në "nivel", pasi të jesh diplomat në

"nivel" sot, në këtë situatë, do të thotë të jesh mjeshtër i finesave edhe dredharake e mashtruese, kurse në natyrën shqiptare është sinqeriteti dhe parimet. Pastaj, si shumë po pengon mosnjohja e gjuhëve të huaja (gjuha gjermane nuk mjafton, do të duhej të zotërohej edhe serbishtja, sidomos anglishtja e frengjishtja.). Por, sikur të ia arrimë të nxjerrim Buletin në nivel, do të kemi më lehtë që çështjen shqiptare në Jugosllavi si dhe Lëvizjen t'i bëjmë të njohura në botë.

Pastaj shoku Xhemë shkruan: "Është e domosdoshme që të formohen komitetet e vendit, apo (...) përgjegjësit e caktuar për një regjio..." Si edhe në rastin e parë, sa u përket qelulave, është po e njëjta prapambetje. Ndonjë propozim që bëhet, nuk shtrohet si të jetë e mundur të realizohet, por më shumë pasurojnë arsenalin e propozimeve, që përfundimisht, shumica, edhe ngelin propozime. Bile, mund të na ndodh për të njëjtën dukuri të bëhen disa herë propozime të ndryshme, duke harruar se mos ndoshta në një letër dikur është bërë një propozim po për atë çështje dhe po nga i njëjti shok. Kjo vërteton edhe spontanitetin e stihinë në punë e mendime, që në rastin tonë po kushtëzohen nga mungesa e Programit e Statutit, në suaza të të cilit do të ndaleshim të mendojmë dhe të shtrojmë teori komplete që i duhet një organizate siç pretendon të jetë LRSJ-a. Kurse sa për punim që e paskemi, ndonjë tjetër pos DETYRA TË NGUTSHME, i cili, si i tillë, edhe nuk ndihmon shumë. Me rastin e anëtarësimit të anëtarit të rij, duhet të dihet fare mirë t'i thuhet se cila dicitlinë, cilat aktivitete, çfarë sakrificash e presin. Pastaj, celula duhet të furnizohet, vazhdimisht me materiale analizuese e detyra, që të jetë e freskët dhe tërheqëse, nëse mund të shprehem kështu, jeta organizative. Jo, jo, mbeten të analizohen thash-e-themet, duke tërhequr me pavetëdije secilin në të njëjtin batak, dhe kështu, u vije radha demoralizimit, dëshpërimit dhe përçarjeve. Prandaj si e si, për rrethanat në kurbet, duke patur parasysh nivelin e bashkatdhetarëve, do të ishin më praktike Komitetet e rretheve (prej 3 anëtarëve), që do kordinonin aktivitetet dhe organizimin në rreth. Them Komitetet, për arsye se kështu si janë, vështirë se një militant do të jetë hallkë funksionuese në nivelin që kërkohet. E po të kërkohet vetëm një, atëherë me andje po iket që të zgjedhet punëtor "i thjeshtë" (siç përdoret gjer në banalitet kjo shprehje – pasi e kundërta e të thjeshtëve, e përbërë, e komplikuar... nuk ekziston – pasi edhe nuk janë të thjeshtë në kuptimin e fjalës...). Më shumë po preferohet i dituri (që na mungojnë, pos nëse mashtrohen në etiketime që disa i bëjnë vetes...), llafazan (nga këta ka sa të duash...), aventuristat revolucionar, të cilët me kalim të kohës po dalin gjizë... Kurse sikur të vendosnim për Komitet, atëherë do zgjedheshin tre punëtorë, bënë edhe të përgatitur teorikisht, ama besnik, të sinqertë, të sakrificave dhe të fjalës, siç i ka kalitur jeta e vështirë. Me kalim të kohës, shumë shpejt, duke u ndihmuar reciprokisht, do bëhen Leva që i duhen Lëvizjes.

Shoku Xhemë përmend rrethanat e volitshme jashtë atdheut, ku nuk po vika UDB-ja për ta zënë derën. Kjo është më se e vërtetë, por i vërtetë është edhe fakti se bashkatdhetarët UDB-ja po i pret që në kufij dhe kanë qindra kilometra që udhëtojnë duke qenë nën përcjellje të rreptë të policisë... Prandaj thuaja po mjafton një informues në një rreth të gjerë, i cili ka patur mundësinë njëqind herë të infiltrohet, ndoshta jo drejtë e në radhë të organizuara të Lëvizjes (pasi nuk janë), por në radhë të bashkatdhetarëve, të cilët, në shiqim të parë, lënë të kuptojnë sikur janë të organizuar, pasi shumë nga ato punë bëjnë haptas (Bile edhe idhëtarë e klubeve me fotografi të satrapit e me konzullatat jugosllave, hiç nuk ngurojnë që kohë pas kohe në klube të hedhin tema për "diskutim", që do duheshin të diskutohen në mënyrë interne vetëm në celula, të organizuara mirë...). Prandaj do t'i thoja shokut Xhemë: le të ruhet nga infektimi me liberalizëm të vendit, me atë liberalizëm që me të drejtë jemi kritikuar, se

ishim infektuar më parë. Për mendimin tim, sa i përket punëve organizative dhe vet organizimit, jashtë do të duhej ilegalitet më i thellë se edhe brenda, pasi atje shkrihet njeriu në popull, kurse këtu nuk të përcjellin vetëm të UDB-së, por edhe të policive e agjensive të vendit dhe të tjera.

Sa u përket AP, Nuhiut dhe shokëve rreth tyre, sa nuk po më pëlqen të dëgjoj gjëra të tilla. Sikur na i kanë ngrën kokrrat, siç shprehet populli. Unë do propozoja që përfundimisht të merret qëndrim i çartë nga baza e gjer te KQ dhe jo t'i ngjas lojës. Në seminar që biseduar shumë, nuk e di çfarë pasoj. Ndoshta vetëm se janë informuar dhe masin puls të tonë... Përfundimisht, duhet të dinë se kanë punë me patriotë revolucionarë, të vendosur e seriozë, dhe do shihni se a do guzojnë të bëjnë lojra të tilla. Dhe jo vetëm për seminar, por edhe në takimin e QE, sikur u sqaruam prandaj çfarë nevojë kanë manovrimet, nëse guzojë t'i quaj ashtu. Nëse punët kanë shkuar në rregull, atëherë kuptohet fare se puna e tyre është tradhëti. Nëse është tradhti, siç duket, pse të mos demaskohen si të tillë, por të lejojmë që të na e hanë shkopin nga dora!

Është koha që t'i përkushtohemi Buletinit KOSOVA. Duhet shumë shpejt të sigurohen punimet. Kurse, prap vështirësia është, se konturat e Programit politik, të botuara në ZK, nuk mund të trajtohen Program Politik, përderisa përfundimisht nuk janë program (me këtë rast edhe në artikullin e ZK, numrit të fundit, është shkruar sikur ato kontura kanë qenë Program i LRSHJ-së.). Unë vetë nuk jam në gjendje, së pari të shkruaj në nivel që kërkohet, pastaj të shkruaj aq shumë. Por që të organizoj përkthimin, jam duke u përpjekur. Po kështu, edhe për botim duhet të mendojmë. Ka ardhur koha, që përfundimisht, të kemi shtypshkronjë tonë, sado të vogël, pasi shpenzimet do të jenë shumë më të vogla se sa rjepjet që na bëjnë shtypshkronjat e huaja, të cilat edhe nuk i ke në dispozicion kur të duash dhe në raste të shpejta.

Besoj se shkrova mjaft, nëse jo edhe tepër (e halli që shokë Fahri e Bacalok punojnë punë.).

Përsëritje revolucionare

PS. Po ua dërgoj Komunikatën, të lëshuar në gjuhë angleze dhe të dërguar ku kemi patur adresa. Fjala është për Komunikatë lidhur me manovrat ushtarake, "Jedinstvo-83". Besoj se nuk do kundërshtoni e kritikoni për përmbajtje, por nuk ka patur kohë për konsultim e aprovim.

Mirupafshim! (Ibrahim Kelmendi)

22. Letra e 10 tetorit 1983

PËR NJË REPUBLIKË TË SHQIPTARËVE NË JUGOSLLAVI!

Të dashur shokë të QE

RFGJ., më 10 tetor 1983

mora të shkruaj pa prituri përgjigjet, që edhe mund t'i keni nisur. Por, sikur kam përshtypjen se ju shkruaj tepër dhe po tregohem mospërfillës ndaj dëshirës suaj që të shkruaj më përmbledhur; faji është se nuk po di dhe jo pse nuk po du.

Mora letër nga shoku Xhemë, nga shoku Salih ka kohë që nuk kam marr, nuk di pse nuk po shkruan.

Sa i përket përshtypjes së shokut Xh., se "vuaj nga shtro e mos mbulo", mund të ka diç të vërtetë, bile edhe më duhet të pranoj, ama nuk besoj se është rrjedhim i ndonjë vuajtje që nuk i bije në fije, sa rrjedhim i faktit se është duke na munguar kultura revolucionare për kritikë dhe autokritikë të nivelit.... E shoh të arsyeshme, në këtë

gjendje, të mos nxjerri sytë sytë duke dashur t'i qesi vetullat! Edhe ju duhet të bindeni se i ruhemi njëri-tjetrit, se mos nuk kuptohet kritika dhe vërejtjet drejt dhe po hidhërohet... Në këtë drejtim po kontribuon edhe njëfarë mospërfillje për t'u përgjegjur në letra, veçanërisht nga shoku Salih, prandaj do të ishte mirë të na shkruan pse vepron kështu.

Më duket me rëndësi të ndalem edhe te një dukuri që më ka rënë në sy, sidomos te unë që po shkruaj ca më shumë. Për të tilla letra do të duhej më shumë kohë, se koha që po u përkushtojmë në këto rrethana, kuptohet, në mungesë të kohës dhe si rrjedhim i preokupimeve të shumta. Prandaj, mund që do të lëshohet ndonjë gabim. Ndonjëherë kur më del kohë të lexoj ndonjë nga letrat që ua dërgoj, shumëçka do riformuloja dhe do shtroja më ndryshe sikur të kisha kohë. Mu për këtë arsye, do më dukej e vetëkuptueshme të kemi dhe këtë dukuri parasysh, që të mos lind ndonjë keqkuptim.

Shoku Xh. me të drejtë e mundon fakti se bëhet ndonjë vërejtje, në hava, siç do thoshte populli, për përmbajtjen e ZK, përderisa nuk konkretizohet dhe nuk bëhen propozime konkrete se çfarë duhet përmirësuar. Bile, shumë më mirë do të ishte sikur të shkruheshin artikuj, në vend të propozimeve se si duhet të ishin ata që do shkruan tjetri. Me gjasë, është një fazë kur disa krijues janë në formim e sipër, dinë më shumë të kritikojnë se sa të krijojnë. Por ka edhe kritikë, siç ndodh në letërsi, që dinë vetëm të kritikojnë e vlerësojnë, por jo që të krijojnë vet. Unë për veten time për përmbajtjen nuk kam bërë vërejtje sa për stilin, që më është dukur i lartë, fare letrar. Me këtë nënkuptoj se në shumë artikuj, sidomos kryeartikuj, stili është i nivelit të ndonjë reviste letrare dhe jo i Organit të organizatës së masave, Lëvizjes, Pararojës. Nëse është e vërtetë kjo, kuptohet se përmbajtja do kuptohet vetëm nga rreth i caktuar i lexuesve, që kanë kulturë për të lexuar e kuptuar secilin stil. Në këtë përfundim kam ardhur edhe nga përgjimet në teren, siç praktikohet të thuhet, me ç'rast më ka rënë në sy në përmasa serioze se bashkatdhetarët ose nuk i lexojnë artikujt kryesor, ose i lexojnë vetëm një herë me mundim të madh, por fare pak u jetë nga ai lexim. S'ka dyshim se edhe sikur të shkruhet në stil popullor, në përmasa të mëdha bashkatdhetarëve u mungon fare shprehja për të lexuar e kuptuar, por ama një shtresë që tani nuk është në gjendje t'i lexon e kupton artikujt kryesorë, do të ishte në gjendje atëherë dhe kështu, do ndihmonte shtresat tjera, masat më të gjera, duke aplikuar leximin dhe diskutimet në grupe. Këtu luan rolin e vet, shumë, çështja organizative, që militantët në rrethe ta praktikojnë këtë formë të punës, që është më praktikja për të ndihmuar masat në ngritje të vetëdijes kombëtare e revolucionare.

Pa patur mundësi të ndalem më gjatë, sa i përket stilit, do të shkruaja atë që shumë herë e kemi thënë edhe gojarisht, se mënyra e të shkruarit të Leninit e Enverit, veçanërisht artikujt e shkruar gjatë revolucionit dhe Luftës Nacionalçlirimtare në organet e kohës, për rastin tonë, do të duheshin të ishin busull se si do të duhej shkruar për masat, pa vuajtur nga pseudofilozofimet se teoria filozofike e revolucionit nuk mund të shtrohet në gjuhën e thjeshtë dhe nuk është teori që kuptohet nga njerëzit e thjeshtë.

Në letrën e parafundit duhet ta kem shkruar se me një rast të veçantë kam ndërmend të ndalem mbi një analizë më konkrete mbi propagandën tonë në përgjithësi, duke filluar nga organet e mëparme, deri në ditët tona. Në atë analizë kisha idenë të bëjë vështrim kritikë, kuptohet në hallin tim, dhe mbi kontinuitetin e "kthimet" e mëdha; para shpërthimit të demonstratave, pas shpërthimit dhe pas bashkimit. Mendoja se ndonjë ide që mund të më lindte, sidomos mendimet në formë të civateve të klasikëve të marksizëm-leninizmi (**PËR MENDIMIN TIM EDHE SHOKU ENVER HYNË NË RADHËN E TYRE!**), do na ndihmonin për propagandën në të ardhmen.

Se është duke bërë punë të madhe shoku Xh., nuk ka nevojë ta them (jo pse frikësohem se mund t'i rritet mendja e të qoroditet.). Bile, sa i përket punës së gjithmbarshme të QE, sektori i propagandës, fatmirësisht, është më funksionali dhe më i suksesshmi. Por nuk do leja pa u ndalur me këtë rast edhe te përmbajtja, pos që shkrova diç për stilin. Nganjëherë sikur krijoj përshtypje se ZK i nënshtrohet një cenzure që nuk lejon të shkruhen gjërat më konkretisht e më shtruar, më me guxim edhe për tema të "ndërlikuara"... Sikur u vihet vërdallë temave me rëndësi, duke thënë në çdo artikull ngapak, por jo në një kryeartikull "troç", me ç'rast duhej të shtrohej teoria e revolucionit për rastin tonë. Pra, kryeartikujt, pos nja dyve, nuk më duken se janë kryeartikuj për Organ të Lëvizjes, si pararojë e popullit në luftë, të cilët do ishin busull që masat të kuptojnë situatën tani dhe si do të zhvillohet në të ardhmen, në mënyrë që të kuptojnë se nuk ka rrugëdalje tjetër pos të jetojmë me situatën, prandaj edhe të dijnë se çdo të thotë dhe si do të duhet të jetojmë me situatën. Në kësi kryeartikujsh, nëse populli sqarohet se cilat rreziqe kombëtare i ka përpara dhe çfarë sakrificash janë të domosdoshme, nuk frikësohet – edhe pse duket sipërfaqësisht – por bëhet i vetëdijshëm se nuk ka shumë alternativa, prandaj i duhet të përgatitet; përgatitja më efektive është pranimi i organizimit sa më të gjerë dhe jo format e mëparme për kryengritje popullore të karakterit lokal, e ndonjë karakteri të ngjashëm, pasi armiku ka bërë përparime të mëdha në të gjitha drejtimet dhe nuk është ai i mëparmi. Kuptohet, këtu duhet patur parasysh edhe ngritjen e vetëdijes ose mashtrimin e popujve që përmbajnë klikat e "tyre", që shtypin popullin tonë.

Për të luajtur rolin e vet Organi ynë, atje ku nuk mund të mbërrijnë militantët e LRSHJ-së, duhet të shkruhet mbi qëndrimin "pritës" në këtë situatë. Ekziston mundësia që pas ngjarjeve aq të mëdha, pas gjithë asaj gjakderdhje, të demoralizohen masat në përmasa serioze, pasi armiku nuk do të pushon të përhap demagogji mashtruese, se "sakrifikuam kot", se "jemi ngritur para kohe", se "armiku është i fortë dhe ne po ngucim grajzin me krande", etj. demagogji të ngjashme. Mu për këtë arsye, për ta mbajtur në nivel, bile edhe për ta rritur moralin e masës, duhet të shkruhet e propagandohet se "pritje" është e domosdoshme, pasi regjimi, pos terrorit që ushtroi menjëherë, duhet të jap përgjegje, nëse mendon të stabilizon gjendjen sa i përket kërkesave të popullit tonë. Kurse "pritja" nuk duhet të jetë pasive, por aktive; duhet të kuptohet tamam si armëpushimi në front, që me shpejtësi të madhe të përgatitet gjithë populli për sot, pas minutit nga minuti që po kalon, dhe për nesër! Heshtja dhe mosdija çfarë duhet t'i themi popullit në kohë të "pritjes", ul moralin e popullit, rrit demoralizimin, duke i lënë fushë veprimi armikut, rritë pasigurinë, pesimizmin, oportunizmin, anarshizmin... Është e domosdoshme të dimë t'i themi popullit atë që kërkohet nga ne, përndryshe duhet pranuar se nuk jemi në nivel të përgjegjësisë, përkatësisht LRSHJ-a nuk ka asij militantëve që ta ngrisin në nivel të Pararojës, me plot kuptim të fjalës.

Zbërthimi i teorisë së revolucionit për rrethanat tona, është domosdoshmëri, për t'u përgatitur për praktikën! Që të mund të zbërthehet, duhet së pari të njifet. Në rrethanat tona, shumë veta që janë në gjendje ta bëjnë këtë shumë më në nivel se sa po ndodh gjer më tani, ose nuk kanë kuptuar ose nuk janë të thirrur, ose nuk i kanë mundësitë, pasi organizimi nuk është në nivel. Pikërisht për këtë arsye, do të thoja se janë të domosdoshëm ideologët, siç praktikohet të quhen, që do të shtronin teorinë e revolucionit për rastin tonë shumë të ndërlikuar. Them të ndërlikuar, pasi edhe është. Jetojmë në shtet shumëkombësh. Kombet më të mëdha në përmasa relativisht të mëdha, janë të mashtruara nga klikat imperialisto-shoveniste "të tyre", dhe kjo luan rol. Ato klika janë në pushtet, kurse klika "jonë" është klikë marionete, me përjashtime

individësh. Sikur, ta zëmë, populli serb të kishte vetëdije më të lartë popullore e sociale dhe të ngritej në demonstrata masovike, derisa të mos bëhej rrezik serioz për sundimin e klikës së "vet", në asnjë mënyrë nuk do të ndodhte gjakderdhje e përmasave, si në rastin tonë. Ose ta marrim një shembull tjetër. Sikur Lenini të mos ishte rus dhe të provonte me një klasë punëtore të ndonjë kombi të robëruar që mund t'i përkiste, me siguri që nuk do të korrite sukseset që ka korrur, jo pse nuk mund të ishte aq i zgjuar, por pse vet përkatësia do të luante rolin e vet; të shkruarit në gjuhë kombëtare të kombit të robëruar, ose do ishte ndaluar fare, ose nuk do kuptohej nga klasa punëtore e popujve tjerë, aq më pak e popullit shtypës, nëse mund të shprehemi kështu. Mu për këtë arsye, më shumë se në ndonjë rast tjetër, duhet përkushtim më i madh që të shtrohet teori që garanton zbatim të suksesshëm në praktikë.

Nuk ka nevojë të thuhet se në këto rrethana militantët e LRSNJ-së, pavarësisht nga përgatitja, nuk do mbërrinë të kenë ndikim në të gjitha anët e atdheut, përkatësisht nuk do të mbërrinë aq shpejt organizimin e radhëve të veta. Atëherë i mbetet Organizatës të zvendësoi, pjesërisht, këtë pamundësi, që organizimi të bëhet nga vetvetja, së pari duke rritur bindjen se organizimi është i domosdoshëm dhe se duhet të organizohen, edhe nëse nuk janë në lidhje të drejtë për drejtë me LRSNJ, përmes militanteve, pasi në rreth mund që nuk është formuar ende komiteti i rrethit. Kështu shkrimet në ZK duhet të konkretizohen në atë nivel, sa mos të goditet konspiracioni, për të mësuar armiku se si mund t'i kap. Shokët e shoqet në rrethe duhet të kenë kuptuar se duhet të gjejnë organizimin e përshtatshëm, duke marrë me mend se si do t'i organizonte Komiteti i Rrethit. Me kalimin e kohës, hiç të gjatë, në punë do të gjendeshin kontaktet, për t'u "shkrirë" nga grupet në vete, ose nga grupet e celulat e Lëvizjes, të organizuara nga vetvetja, në radhët e LRSNJ. Kështu do t'i pritej rruga anarzhizmit, fraksionizmit dhe aventurierizmit, në përmasa aq të mëdha, sa vështirë që këto të fundit do mund të nxiernin kokë ndokund, në përmasa që do damtonin çështjen, pse, sado që fillimisht asgjë nuk lind qëllimisht, më vonë sëmuren vetvetiu dhe vështirë që do të shërohen; krijohet thuaja vetvetiu bindja se ky ose ai grup duhet të luan rolin e pararojës, duke mos qenë në gjendje të dinë se revolucioni, cilido qoftë, nuk është shëtitje korze, që mund të përsëritet kur t'i teket ndokujt, mjafton që t'i ketë teshat e mira për të dalë në shëtitje. E për t'ua ardhur në ndihmë atyre që organizohen në vete në rrethe deri sa të kenë lidhur kontakte me radhë të LRSNJ, duhet që taktika të shtrohet në shkrimet e Organizatës, deri në përmasat sa të mos damtohet praktika e përgjithshme e revolucionit.

Shumë me rëndësi është të shkruhet konkretisht për situatën, për rrethanat, pra, për faktorët objektiv e subjektiv. Lexuesve të ZK, përmes tyre edhe masave më të gjera, duhet t'ju bëhet e qartë se sa seriozisht, në përmasa të mëdha, fitoret janë të kushtëzuara nga gjendja brenda shtetit dhe faktori ndërkombëtar, përkatësisht nga niveli i mashtrimit të popujve nga klikat e "tyre" dhe kundërthëniet në mes popujve dhe brenda popujve – kundërthëniet klasore – si dhe për situatën ndërkombëtare me kundërthëniet e saja dhe pozitën e rolin e regjimit që shtyp popullin tonë në politikën ndërkombëtare. Po të konkretizohemi, atëherë duhet të kemi parasysh kundërthëniet sipërfaqësore demagogjike dhe kundërthëniet e vërteta, sidomos të superfuqive dhe të regjimeve në njërin anë, dhe kundërthënies së proletariatit dhe të popujve me klikat e "tyre", borgjezinë ndërkombëtare e superfuqitë imperialiste, të bllokuara. Praktika na mëson se për reaksionin ndërkombëtar, për blloqet, luftërat kanë rëndësi, për ndarje të sferave të influencës e interesit, për sigurimin e blloqeve, si dhe për të tërhequr vëmendjen e opinionit, duke synuar mashtrimin e popujve dhe frikësimin, që secili popull të gëzohet se ato bëhen diku larg tyre dhe po nuk skllavëruan, mund që do të goditen. Pastaj,

historikisht vërtetohet se sa është e aftë klika serbomadhe t'i shfrytëzon të gjitha kundërthëniet ndërkombëtare, duke bërë politikë prej kurve që shkon në shtrat të atij që paguan më shumë e që është momentalisht më i fortë... Sikur të arrinim që të bëjmë të vetëdijshëm masat për gjithë këta faktorë, atëherë nuk do të kishim pasur nevojë se mund ta përdorte ndokush mish për top, duke shndërruar Kosovën tonë në ndonjë Liban, ku luftëra lokale për hesape edhe të të mëdhenjve, do bënte kërdinë. Me popull me vetëdije dhe mirë të informuar, mund të praktikosh taktikën më të suksesshme në shërbim të strategjisë, duke arritur fitore me sakrificë sa më pak që të jetë e mundshme. E kjo është një ndër detyrat kryesore të Pararojës - LRSNJ!

U zgjata ca në mendime të përgjithësuar, duke dashur të kontriboj që skeleti i Organit të LRSNJ të bëhet skelet i një organit, siç i takon roli, kur është Organ i pararojës së një populli. Shoku Xhemë, sigurisht, jo vetëm që mendon, por është duke bërë punën në redaktim të ZK, prandaj, me eksperiencën që po siguron, mund që ka mundësi t'i përkushtohet punës që të redakton një ZK, tamam Organ të LRSNJ, që çdo herë rritë kualitetin – për t'i dalur zot misionit që i është ngarkuar. Po kështu, secili nga shokët, sidomos shokët në atdhe, duhet të bëjnë gjithçka për ta ndihmuar shokun Xhemë, me këshilla, por më shumë me shkrime. Me këtë rast, nuk po harroj veten, se duhet ta qortoj veten, përkatësisht duhet t'i mallojë paaftësitë e mia; dihet se që biseduar që vazhdimisht do të duhej të merrem me rubrikë të përhershme, të ashtuquajturën politikë ndërkombëtare. Por ja, me ndihmë e madhe po më duket që shokut Xhemë të mos i marrë kohë për të lexuar artikujt që s'do meritonin të botoheshin, e jashtë lëkure s'u dilka.

Rasti i Enver Hadrit

Shoku Xhemë na shkruan se ka shkruar EH letër "korrekte". Sikur t'i kisha të dyja letrat, kuptohet kopjet, ndoshta do të shkruaja më trupshlirë. Por edhe kësaj radhe nuk po ngurroj të ndalem më afër, tani për tani duke u bazuar në ato që na shkruan shoku Xhemë.

Menjëherë do të them: me të tillë që të gjitha forcat e mendjes e zemrës (duke mos qenë edhe fukara nga to) i kanë shkrirë vetëm kundra interesave të kombit e atdheut (flas për kohën që kur dij se çfarë veprimtarije ka ushtruar), duhet të jemi shumë të matur dhe të përpikt! Ka raste kur tradhtarët, fraksionistët, aventurierët... mund të na imponojnë kompromise (që pas Leninit janë të mundshme, ose kur njëri ka të drejtë, ose kur bëhet për të evituar një të keqe më të madhe; mendoj se e kam cituar përafërsisht), kur bindemi se ata kanë pas vete shumë veta të mashtruar dhe na duhet taktikë që t'i shpëtojmë të mashtruarit, për t'i luftuar e izoluar me sukses të parët. Por, kur të tillët janë të demaskuar e të izoluar, duke ju falenderuar punës së ulët të tyre dhe mospërfilljes e sqarimit të masave, nga ana jonë, atëherë nuk ka nevojë të ipet asnjë shansë për të filluar nga fillimi, me taktikë më perfide, në punën e fëlliqur minuese e antikombëtare!

Mjafton të them kësaj radhe se ka qenë njeriu më i dëmshëm dhe marifetxhiu më i madh, që pa mëdyshje, gjithë veprimtaria e tij ka qarë uj në mullijtë e armiqve të popullit; i ka zënë aq mirë presat, sa asnjë pikë nuk i ka shpëtuar në mullirin e popullit. Sikur t'i bënim analizë propagandës së gjithmbarshme, sidomos intervjuve që u ka dhënë gazetave e televizionit belg, ndoshta edhe atij francez, mashtrimeve për të plaçkitur të holla, provave që ta komprometoj demonstratën që bëme në Bruksel, e të tjera, që ka shumë për të, atëherë nuk do të duhej të nxitohej t'i kthente përgjigje korrekte shoku Xhemë, pasi e gjithë veprimtaria, se jo vetëm se ka qenë armiqësore, por

më efektivja për interesa të dollancëve me shokë, pasi në të njejtat ditë bëheshin intervjutë e të dyve, për t'i shërbyer e EH konferencës për shtyp të Dollancit!

Sikur qemë gëzuar që me të tillë nuk kemi punë, pasi na ishin në gjendje të bënin atë që ua kishin ngarkuar padronët! Por, ja, nuk "avullokan" të tillët kollaj-kollaj...

Pse jo, mund të përmirësohet secili që me vetëdije të ulët bënë gabime, mund edhe të mëdha, duke u bindur se ka qenë në rrugë të gabuar, kundër interesave të çështjes kombëtare. Këtë rol duhet ta luan LRSHJ; që t'i ndihmon të gabuarit. Në këtë rast jam shumë skeptik – vështirë që një kuadër i ati "kalibri" është penduar; shumë do të kisha dëshiruar të kem një armik më pak! Ama, duhet që prej të tillit të pritët një metamorfozë aq radikale?! Nuk besoj se është e mundur, vetëm nëse ka vendosur nga koka të ngulet në këmbë, por për të na bindur do të duheshin prova të tjera më serioze se sa një letër "korrekte". Për këtë arsye, jam i mendimit, pa patur nevojë të humbim kohë për ta bindur njëri-tjetrin, të presim të jap prova të tjera më serioze, që gjithashtu nuk duhet të na detyrojnë që ta përqafojmë aq shpejt; për veprimtari të mbarë kombëtare a fushë të gjerë, që s'e ka monopolizuar LRSHJ. Ai mund të kontribuon, por nuk kemi nevojë t'i japim shansën që pas një kohe të kompromiton, përkatësisht të provon kompromitim e LRSHJ. E provat më bindëse do të ishin, së pari t'i demanton të gjitha intervjutë në ato mjete të informimit ku i ka dhënë, pastaj të shkruan një autokritikë aq të rrept, sa në mënyrë të shtruar ta dënon veprimtarinë e vet, duke u detaluar në detale më kryesore. Kjo nuk do t'ia ulte vlerën – që se ka, por përkundrazi, do ia jepte shansën ta rritë vlerën nga vlera e nën zeros. Autokritika do të duhej të botohej në ZK, për t'ju treguar të përafërmve se ka mundësi përmirësimi dhe se populli prap pranon në gjirin e tij shpirtshitur, që pendohen që në temel!

Kësaj radhe do të shfrytëzoja rastin që në emër të Redaksisë të mos korrespondohet me tradhtarë, fashistë e zogistë, edhe atëherë kur ata mund të shkruajnë letra "korrekte", për qëllime të caktuara - armiqësore! Disa herë e kam thënë gojarisht, ndoshta kështu do na bëjë të mendojmë më shtruar nëse kam të drejtë. Lufta më e mirë kundër armiqëve e kriminelëve të popullit, agjentëve të shërbimeve të huaja, nëse nuk aplikohet demaskimi, atëherë është mospërfillja. Me ta nuk kemi nevojë të mirremi, pasi assesi nuk do të mundnim t'i neutralizojmë; për atë punë janë të regjur e stërregjur, e as t'ua mbushim mendjen që me plotë kuptim të fjalës të mbështesin popullin tonë. Vetëm hjekësive dhe asgjë më shumë nuk duhet pritur nga ta, prandaj pse kemi nevojë t'ua japim as shansën më të vogël për të na hjekësuar. Do të thoja, gjithashtu, se shoku Xhemë përpara do duhej të konsultohej, pa u bërë merak se mund të shkojnë edhe 10 ditë pa u përgjegjur, pasi edhe vonimi në vete është provë për të parë sinqeritetin e tyre; kur nuk e kanë me gjithë mend shkruajnë rishtaz dhe shajnë e kërcënojnë. Prandaj, për këtë përgjigje, do të thosha se është e nxituar, kurse në raste tjera të jemi ca më të dicituar!

Prapashtica...

Shoku Xhemë, duket se sa i përket Prapashticës me shokë, ngadal do bëhet aferë. Në rastin e tyre "shtruam e mbuluam" dhe duket prap mbërdhimi, pasi mbuloja duket se qe vetëm një quhall i holl, i qkyer...

Të mendojmë ca me përgjegjësi dhe ndoshta mos jemi duke treguar oportunitet të pa tolerueshëm, ose, përfundimisht duhet të vendosim që secili të ecë në rrugën e tij, ata me "Lëvizjen..." e tyre, kurse ne me tonën, duke sqaruar lexuesit për të gjitha. Sikur po më duket se dëshirojmë të bëjmë politike arriviste, duke dashur që LRSHJ, në vend

të pararojës, të bëjë manovrime politike me dreqin e të birin, vetëm që të jetë kulmi i të gjithave, edhe i plehrave (mos qoftë thënë nga goja ime!). Lëvizja do të jetë pararojë vetëm nëse bënë politikë parimore! Kjo gjendje po më mundon dhe do të propozoja që njëherë e bindur të marrim qëndrime, që do t'u përmbahemi. Por përpara duhet të bëhen të gjitha provat që të mos u mbesim borxh në asnjë mënyrë, pasi ata, rreth e rrotull po ankohen se nga ana jonë nuk po pranojmë të bisedojmë.

Disa raste tjera

Kohëve të fundit jemi dëshmitarë të faktit se disa rrugaçë e aventurier kanë dalur hapur e më me guxim, "në emër të Lëvizjes" luftojnë Lëvizjen. Për secilin rast do të ndalemi veç e veç, përndryshe, kur të vijë deri atje sa qentë të na e hajnë shkopin nga dora, atëherë na mbetet të hahemi me qenë... Mu për këtë, do të duhej sidomos lidhur me Xhavitin të mendojmë përfundimisht, pse ai është katalizatori i disave që janë zgjidh nga zingjirët dhe gjithashtu, marrëveshja që qe arritur, është shkelë; ne duhet t'ju përmbahemi vendimeve, përndryshe do vojtemi si gra të këqija! Kësaj radhe po dërgoj një material për një shtojcë vetëm për ZK që shpërndahen jashtë. Propozoj që të diskutohet, nëse aprovohet botimi, të redaktohet edhe më përshtatshëm. Sikur të mos ndërmerret diç e kësaj natyre në këtë drejtim, do bëhemi si defi i magjupes, siç praktikohet të thuhet prej nesh.

Propozoj gjithashtu që shoku Salih të tregon se si ka shkuar Mbledhja në Bielefeld, ku është treguar oportunitizëm më i ulët se në rastet tjera; aty Ganiu i ka përsëritur ato që ka thënë diku tjetër, duke mos folur së paku që t'ju jepet të kuptojnë të pranishmëve se ato që ai, Ganiu i ka thënë, nuk janë mendime që aprovon LRSNJ.

Në Bremen para dy ditëve është mbajtur mbledhje e 45 bashkatdhetarëve, bashkë me vicekonzullin e Hamburgut; sa qartë që është parë puna e Xhavitit, kurse ai farë plaku, që Xhaviti e kishte marrë me vete në seminar, ka apeluar te "vëllau" Gazmend (vicekonzulli), që të rregullohen ligje për të mos mbajtur deviza në bankat e Perëndimit, por të dërgohen të gjitha menjëherë për ta ndihmuar Jugosllavinë të dalë nga kriza... Nëse me të tillë mendohet të shkojmë përpara, duke i bërë leva të LRSNJ, atëherë s'di ç'të them tjetër, pos: vaj halli...!

Këtu do të shfrytëzoja rastin të them se "heshtja" e shokut Salih nuk është shoqërore; nuk tolerohet që gjitha këtyre letrave që shkruhen, shumë ka edhe vërejtje e kritika ndaj shokut Salih, t'ju përgjigjet me mospërfillje...! Unë do të vazhdoj të shkruaj, edhe pse nuk praktikohet askund, në asnjë relacion, që disa letrave të mos ju përgjigje fare, në pritje se shoku Salih do të tregon arsyen pse nuk shkruan.

Lidhur me makinat

Gojarisht pata rastin të bisedoj me shokun Salih, të cilin e bëra me dije me mundësitë që ekzistojnë. Ai m'u përgjegj se qenka në rregull dhe duhet të ndërmerret fushatë. Kurse unë, pasi dha ai atë propozim, desha të vazhdoj ca edhe lidhur me çështjen materiale, nga e cila janë të varura shumë aktivitete e suksese.

Së pari, kur na duket e arsyeshme ta bëjmë një punë, që varet kryesisht nga mjetet materiale atëherë nuk duhet të varet nga fushata që do organizohet; mjetet duhet të jenë në dispozicion dhe në bazë të tyre të planifikohet, kurse fushatat duhet të organizohen kohë pas kohe, që të gjenden mjetet për sahat të lik. Në kuadër të kësaj, do të duhej të shkruhej një artikull në ZK lidhur me ndihmat e gjertanishme dhe mbi ndihmat e domosdoshme për të ardhmen, duke u ndalur më gjatë mbi domosdoshmërinë e solidaritetit vëllazërorë, brenda dhe jashtë, si kusht për të ngritur moralin, për t'i

forcuar familjet e të vararëve dhe të burgosurve, për të financuar propagandën dhe aktivitetet e domosdoshme, në interes të çështjes.

Konkretisht sa u përket makinave. Format A3 të vogël në madhësinë që ka menduar shoku Xhemë, bile që kam shkruar edhe unë nga Veriu (duke mos mundur të mirrem vesh), nuk ka. Vetëm A4, duke rregulluar që disa pjesë të copëtohen. Format A3 është përafërsisht 150/70/110 cm (gjatësi, gjerësi, lartësi). Është diku rreth 250 kg. Edhe për përjashta, duhet të blehet në shtetin që do të përdoret. A4 e re, rreth 15 000 DM. A3 gjithashtu e re, 25 000 deri në 30 000 DM, por varësisht nga prodhimi (firma), të gjitha teknikë Offset. Disa shokë ekspertë këshillojnë që të blehen pak të bajtura, kështu që A3, funksionale për disa vjet pa patur nevojë për ndonjë riparim serioz, mund të sigurohet me 12 000 deri 15 000 DM, kurse A4, gjithashtu pak të bajtur, më 5 000 deri në 7 000 DM. Varet nga rasti e fati dhe aftësia prej matrapazi, por ka shokë të sprovuar. Nëse formohet organizatë dhe lajmërohet zyrtarisht në gjyq, për nevoja të organizatës mund të hapet shtypshkronja, pa patur nevojë të regjistrohet që të paguhet tatim. Mjete për t'i përgatitur pllakat, duke llogaritur në kamerë të përdorur, kushtojnë diku rreth 5 000 DM. Kurse çdo pllakë, me të gjitha shpenzimet, gati kushton 10 DM. Letra në asnjë shtet nuk kushton më lirë se sa në RFGJ.

Mendon seriozisht që të mos ketë nevojë të bredh kot shitoreve e qyteteve, pasi edhe materialisht qëndroj fare keq. Jeta, gjithashtu, në asnjë shtet nuk është më lirë se në RFGJ, kam parasysh shpenzimet postale, çmimet e dërgesave, të telefonit, etj., si dhe gjërat e konsumit të përgjithshëm. Por, RFGJ ka qeverinë më të poshtër, tani për tani, ndërsa aktivitetet dhe politizimi i masave askund nuk është më i madh se në RFGJ. Besoj që janë këto disa të dhëna që ndihmojnë në marrje të çfarëdo qëndrimi.

Pranoni përshëndetjet revolucionare e vëllazërore nga
Iljazi (Ibrahim Kelmendi)

PS. Bashkë me letrën po ua dërgoj materialin për një artikull për t'i fshikulluar ata që e meritojnë.

Artikullin nuk mbërrina ta përfundoj ende.

23. Letër e Ibrahim Kelmendit për Faridin Tafallar, 3 janar 1984

PËR REPUBLIKËN SHQIPTARE NË JUGOSLLAVI!

Konstanz, më 3 janar 1984

Shumë i dashuri shoku Fahredin,
jam mirë. Ti dhe familja qofshin mirë. Ndoshta të erdhi ca keq kur m'i vuan prangat, por s'kemi ç'tbëjmë; Derisa jemi të detyruar të bredhim rrugëve të botës, kështu e ka. Kryesorja është se unë jam fare i pafajshëm dhe si i tillë, besoj, së shpejti do të dal, nëse ende sundojnë ligjet e vendit dhe jo dëshirat e ministrit të Punëve të Brendshme, Z. Zimmermanit.

Gjer më tani jam i gjykuar të më dërgojnë në Jugosllavi. Unë jam ankuar, kurse edhe avokati ka bërë të veten. Shumë më mirë do të ishte sikur të gjeje që në fillim avokat të mirë në qytet, këtu. Por të shohim si do të ndodhë. Gjasat nuk janë fortë të mira, pasi po shihet ku po shkon Gjermania...

Sido të ndodh, të mërzitemi nuk kemi pse, pasi kështu do gëzohen ata të regjimit.

Më mirë do të ishte ta festonim Vitin e Ri 1984 së bashku....

Të përqafton Shoku
PS. Nuk ka nevojë të mësojnë mbi arrestimin tim edhe të tjerë bashkatdhetarë,
pasi kjo është gjë e vogël dhe kalimtare.
Të mira dhe sukses në këtë Vit!
Mirupafshim
Harrova të the: Sikur t'i kishe telefonua shokut këtu (Hasim Mjakut-shën i Xh.
D.) që të m'i blen ca ndërresa, një peshkir dhe vegla për rroj. (Letër e Ibrahim
Kelmendit për Faridin Tafallarin)

24. Qarkore x. Janar 1984

(Shokëve të QE – për diskutim, përmirësim e aprovim)

QARKORE

Po afrohet 2-Vjetori i formimit të LRSNJ-së dhe ende nuk kemi Program Politik e Statut të Organizatës sonë. Mungesa e tyre po vështirëson veprimtarinë, njëherit po kushtëzohen gabimet. Fajin për mungesë të tyre duhet ndarë të gjithë, nga baza e gjer në Komitet Qendror. Lehtësim kemi vetëm kur marrim parasysht rrethanat, të kushtëzuara nga ilegaliteti i thellë, nga vrasje e arrestimet, si dhe nga vështirësitë që sjell me vete Bashkimi.

Tani, të gjitha komitetet e celulat në rrethe, si dhe të gjithë militantët e LRSNJ-së, duhet të fillojnë nga diskutimet – të japin propozime e mendime, nga do dali përfundimisht Programi e Statuti i Lëvizjes. Themelet e Programit duhet të jenë Komunikata mbi Bashkimin (lëshuar në "Zëri i Kosovës", nr. 1, 1982), si dhe kërkesa e mirëfillta të mbarë popullit, të vulosura me gjak e sakrifica dhe të njohura tani për mbarë botën. Në ndihmë duhet marrë edhe variantin e kontureve të Programit (të botuara në ZK, nr. , 1983).

Diskutimet le të fillojnë menjëherë, për të mos i vonuar rezultatet.

Gjatë diskutimeve duhet të mbizotëron fryma patriotiko-revolucionare, duhet të merren parasysht të gjithë faktorët, nga të cilët varet shumë se çka do kërkojmë, si do kërkojmë dhe si do fitojmë. Fryma e vëllazërimit me popujt liridashës të Jugosllavisë e të botës nuk guzon të vihet në dyshim – populli ynë liridashës ka dashur e çmuar të gjithë popujt liridashës të botës, kurdoherë, duke ua dëshiruar lirinë...

Është momenti të tregohet pjekuria e menquria patriotiko-revolucionare, vetëdija ideologjike e politike, si dhe historike, shpirti i internacionalizmit, i durimit revolucionar dhe sakrificës, edhe të jetës, kur e kërkon çështja e popullit e atdheut – liria dhe të drejtat. Nuk guzojnë të na i errin sytë shovenizmi, revanshizmi – këto duhet luftuar, së pari në radhët tona, në gjirin e popullit tonë!

Të tregohemi bijë e bija të popullit, t'i dalim zot misionit e çështjes, ashtu siç kërkohet nga populli e historia!

Komitetet, celulat e militantët e LRSNJ-së në botën e jashtme, pos diskutimeve, le të fillojnë nga fushata për grumbullimin e të gjitha adresave të bashkatdhetarëve në botën e jashtme, të anëtarëve të familjes, të fëmijëve në shkolla dhe jashtë, çfarë statusi (punëtor i "përkohshëm", i migruar në Turqi e gjetiu, azilant, etj.). Këto adresa, po që se grumbullohen me sukses e shpejt, pos tjerash ndihmojnë për të dhëna statistikore, meqë armiku po fsheh të dhënat e vërteta.

Detyrë e përhershme është që të zgjerojmë, kordinojmë e forcojmë radhët e LRSNJ-së, për t'i dalur zot me sukses misionit!

Rezultatet e diskutimeve duhet të jenë dhënë më së voni gjer në fund të shkurtit, 1984. Kurse fushata për grumbullimin e adresave duhet të vazhdoj çdo herë.

– PËR REPUBLIKËN SHQIPTARE NË JUGOSLLAVI!

–LAVDI TË RËNËVE PËR LIRI E TË DREJTA TË POPULLIT E ATDHEUT!

–RROFSHIN POPUJT LIRIDASHËS TË MBARË BOTËS!

–RROFTË LËVIZJA PËR REPUBLIKËN SHQIPTARE NË JUGOSLLAVI!

Më x Janar 1984 Komiteti Qendror i LRSHJ-së
(Ibrahim Kelmendi)

25. Letër e Ibrahim Kelmendit për Faridin Tafallarin, mesi i janarit 1984

I dashur shok, (Faridin Tafallari) (rreth mesit të janarit 1984)

pata menduar se do të vij andej dhe kështu do ua jap në dorë letrat. Por, jo vetëm s'mu bë puna të vij, por as nuk mu dha rasti të takoj ndonjë bashkatdhetarët që t'i sjell në dorë, kështu që jam i detyruar t'i postoj.

Në ndërkohë, ke mundur të dëgjosh mbi vrasjen e dy shokëve (Rexhep Malës e Nuhi Berishës - shën i Xh. D.). Meqë ndodhi kjo, do kisha dëshiruar të mos kisha shkruar këto letra në këtë mënyrë, por para se ta marrë veshë, veç i kisha lëshuar në postë për Plakun e shokun Xhemë.

Mirupafshim (Ibrahim Kelmendi)

PS. Po të mundoj që t'ia përcjellësh Salihut. Sikur të siguronte një adresë, ku do t'ia postoja.

26. Letra e 11 janarit 1984

PËR REPUBLIKËN SHQIPTARE NË JUGOSLLAVI!

Në mërgim..., më 11 janar 1984

Të dashur shokë të QE

u bë kohë e gjatë, që kur nuk kam marrë letra nga asnjëri. Pakuptimisht, se si u ndërpre shkëmbimi i letrave. Po jo pse nuk kishim çka të shkruajmë. Më parë pse këtë formë të shkëmbimit të mendimeve dhe të konsultimeve e marrëveshjeve nuk e përvetësuem, për ta vazhduar në nivel. Ka mbetur të shpresohet se ndoshta në të ardhmen nuk do përsëritet praktika e mëparme. Them ka mbetur të shpresojmë, meqe nuk e kemi ndërmend njëherë e mirë t'ju përmbahemi vendimeve që marrim, pa patur nevojë të shkruaj se që kemi gajle për lëshime të vogla, që qojnë shumë shpejt drejt lëshimeve të mëdha.

Si zakonisht, duhet bërë me dije se kam marrë letër nga shoku Salih, të cilës do t'i përgjigjem shumë shkurt, para se të ndalem së shkruari mbi çka kisha ndërmend.

Do të thoja letra është përshkrim sipërfaqësor i aktiviteteve tona në të kaluarën, sikur të mos i dinim të tjerët. Mendoj se në këto rrethana të shkruhet kështu, ka mundësi të dekonspirohemi, nëse kemi çka të dekonspirojmë. Pra, nuk kam gjë kundër historikut të tillë, po më shumë frikësohem se mos ndonjërit një këso letër mund "t'i hup", ose t'i shpëton ndonjë lëshim tjetër, për t'u dekonspiruar pa nevojë, pasi një pjesë bukur e gjërë e historikut edhe nuk i ka hyrë në punë.

Se kjo letër i dërgohet edhe një shoku, me emër Aliu, nuk e kuptoj. Për mendimin tim, përderisa shoku në fjalë nuk është në QE, nuk duhet të marrë të tillë letër. Pastaj, që të veprohet kështu, së pari duhet lypur pëlqimi i të gjithë shokëve të QE. Përfundimisht, për çfarë i lypset atij kjo letër, këtë duhet të na e sqaroj shoku Salih. Nuk besoj t'i jetë dashur doemos për ndonjë aktivitet.

Se si është zhvilluar takimi i parë, atëherë kur formonim QE në Evropën P., më së miri mund ta dimë nga procesi, nëse është mbajtur fare. Por u pa qartë se vështirë që do të mirëkuptoheshim, për ta qar punën përpara. Meqë shoku Salih përmend shkarazi "diskutimet që nuk u lidhej koka", duke vërtetuar këtë me rastin e Brukselit, atëherë do të duhej të thotë diç më shumë, po të ketë patur qëllim të sqarohet ndogjë, e jo vetëm për të radhitur shembuj, që të shtrohet tereni. Sa për Milaimin, ngjashëm ka vepruar edhe në rrethin e veriut, për mendimin tim, duke u vuar në shërbim të Xhavitit. Për raste të ngjashme, për mendimin tim, me shumë mban përgjegjësi ai që ia ka dhënë shansat Milaimit të hazdiset në atë nivel, se sa edhe vet Naimi, të cilin s'ke si ta marrësh në përgjegjësi (përderisa të mos jetë fare militant i radhëve të LRSJ, siç e thotë ai). Kështu, në këtë rast, shokët Ujkan dhe Plak mbajnë përgjegjësi për mundësitë që atij ju dhanë për ta begenis vetë dhe pastaj të derdelis. Por, nuk dij mos janë dy qëndrime, nëse Naimi vihet në shërbim të Xhavitit dhe shoku Salih tregon indiferenca të atyre përmasave; përderisa Milaimi është sjellur keq në rrethin e Shtutgartit dhe ajo nuk i ka pëlqyer shokut Salih, se e akceptonte veprimtarinë e Xhavitit, i cili në fushatën e tij "demaskuese" kundër "klikës K." e kishte për ushtar Milaimin. Duket se edhe nuk ka nevojë për shpjegime, pasi shumëçka është e vetëkuptueshme.

Sa i përket rastit të Dys., mendoj se nuk kemi nevojë prapë t'i rikthehemi. Nëse po, atëherë nuk ka nevojë të shkruhet shkarazi me nënkuptime, por të shprehen mendime të plota e të shtruara. Nuk është praktikë e mirë të përmend diç si rastësisht, – sa për ta larë veten, – dhe të kalohet, duke lënë përshtypjen se po qe nevoja, më përkatësisht, "nëse për këtë do të jem i detyruar", kam për të thënë shumë më shumë, sikur ata që u tha nuk është asgjë në krahasim me atë që do të thuhet po u "detyru". Bile, edhe për këtë rast, kopja e letrës që i është dërguar shokut Mërgim, u dashka dërguar vetëm shokut Ujkan, kurse ne të tjerët të ecim si Muqa pas dahive. E sa për dorëheqje, në raste të tilla, duhet të kuptohet më parë si shantazhe në relacionin tonë këndeje, kurse andej në Turqi të krijohet atmosferë e tillë, sikur ja çka më bëjnë këndeje, sa nuk kam ç'të bëjë tjetër pos të tërhjekem...

Nuk jam i mendimit se takimet doemos duhet të kenë njolla të zeza, siç na shkruan shoku Salih. Kurse njolla e zezë e takimit në fjalë është vetëm hilja që na i qenka kurdisur shokut Salih, duke e shprehur edhe në këtë rast me metaforë e alegori të panevojshme. Unë nuk e dij "kush e ka shkaktuar dhe në drejtim të kujt është munduar ta lëshoj."

Për demaskimin e fraksionit, unë nuk do të thoja se është bërë me sukses, nëse duam të mendojmë për më larg se sa na arrijnë duartë e këmbët. Demaskim i suksesshëm do të bëhej vetëm kur të shkruhej në ZK, se së paku duhet njoftuar lexuesit se cilat marrëveshje nuk qenë arritur atëherë, me rastin e bisedimeve për bashkimin e organizatave. Po kështu edhe rasti i kthimit të Milaimit nga Sh., tani dihet se sa kemi qenë së bashku dhe se nuk është vepruar si duhet. Kur them këtë, mendoj se nuk janë bërë të gjitha provat që diç e tillë të evitohet pa dalur në masë, kurse në cilat relacione gjatë asaj kohe kanë qëndruar Milaimi e Xhavitit dhe ku ia kanë dhënë herë-herë edhe më larg me "demaskimet" e tija Xhavitit, dihet. Përkundra të gjithave, Xhavitin e kemi "të shenjtë" dhe të tilla gabime duhet të kapërcehen gjithsesi, më shumë për arsye se ai

ende është duke m'u dashur... Mund që në këtë qëndrim nuk ka menduar shtruar shoku Salih, për të ardhur në përfundimin se motorit të Milaimit gas i ka dhënë Xhavitit.

Sa i përket mbledhjes së parë të Bashkësisë së klubeve e shoqatave shqiptare në Ev. P., unë do të kërkoja procesverbalin, ose që ai të fotokopjohet, për të parë se si ka shkuar mbledhja. Kulmi i mosrespektimit të mendimeve të mia lidhur me Xhavitin arrihet aty; unë sa herë kam qenë kundër zgjedhjes së tij në ndonjë forum me përgjegjësi, duke qenë i bindur se nuk është i përshtatshëm, prap se prap me inscenim të shokut Salih i zgjedhet në Bashkësi, më duket si këshilltar për klubet e Veriut. Meqë nuk kam qenë i pranishëm, për të shkruar edhe më konkretisht, do të duhej o procesi, o referimi i shokut Fahri. Bile, meqë jemi këtu, nuk do të ishte keq të informohemi se çfarë perspektive dhe si i ka punët Bashkësia.

Pak romantizëm i panevojshëm, me rastin e evokimeve të kujtimeve "për grupet e tyre", me rastin e ardhjes dhe qëndrim të përbashkët me shokun Mërgim. Aman, siç shprehen fetarët, a nuk jam duke marrë unë vesh fare, apo janë në pyetje tregimi i përrallave. Së pari a është e domosdoshme të evokohen kujtime të tilla. Mendoj se në atë relacion nuk është koha për të bërë evokime, që në këtë rast jipet mundësia të kuptohet se janë arritur fitoret për të cilat luftohej dhe është koha e evokimeve. Është koha kur duhet të kuptojmë nga teoria, se në situata të tilla nuk duhet të evokohen kujtime të tilla as në mes të shokëve, meqë mund të merren me mend edhe pasojat. Meqë kanë qenë "grupet e tyre", po vetëkuptohet se shoku Salih nuk ka marrë pjesë, atëherë pse lejon që shoku Mërgim t'ia evokoj ato mendime, përderisa ai nuk është i vetëdijshëm se gabon – then konspiracionin, si rrjedhim i dëshirës për të treguar për të kaluarën e tij, që tërthorazi të ushtrohet ndikim te ai që dëgjon, ose edhe për ta freskuar frymën e grupazheve, që, kur të propozoj paritetin më vonë, të aprovohet pa vështirësi. Pastaj, sa jo praktike po tingëllon shprehja "për grupet e tyre në Kosovë", "për pikëpamjet e njejta dhe të ndryshme", sikur shoku Salih të mos militonte në të njejtat radhë...

"Situata vjen deri aty sa Mërgimi merr guximin (nënv. nga unë) dhe e quan U. spiun të UDB-së në shtëpi të vet." Së pari shprehja "merr guximin", më duket se nuk është përdorur me vend në kontekst të mendimit që ka dashur ta shpreh shoku Salih. Përndryshe, kështu si është përdorur shprehja, më shumë ka karakter pozitiv, ndërsa për mendimin tim, në vend të kësaj shprehje është dashur të përdoret shprehja "në budallak", ose diç të ngjashme, përderisa shoku Salih është i bindur se shoku Ujkan nuk është spiun i UDB-së. Pastaj, pasi është shkruar letra në kohën kur nuk kemi mundur të takohemi, më aktualja dhe më kontestuesja ka qenë pikërisht që kësaj radhe të ipen mendime konkrete lidhur me ato që na ndodhën në këtë relacion. Por shoku Salih e sheh të arsyeshme të na shkruan "nuk po zgjatëm më tepër, se nuk i takon kësaj letre të merret me përmbajtjen e asaj mbrëmjeje."

Po vazhdoj me radhë, duke dëshiruar që shoku Salih të mos hidhërohet pse po i përgjigjem kështu kësaj letra (ku fitohet përshtypja sikur jam duke korigjuar hartim të nxënësit). Sa lëshimet i ka fjalía në vazhdim. Së pari, akuza e shokut Mërgim ishte se shoku Ujkan është spiun i UDB-së, kurse si shkruan shoku Salih, "se a është U. spiun i UDB-së apo jo", është dyshim. "... duke i quajtur thëniet e tija të pamjaftueshme për akuzë të një shkalle të tillë...", më duket se kësaj radhe shoku Salih ka dashur të shkruan, ose është dashur të shkruan "... duke vlerësuar provat e tij të pamjaftueshme dhe jobindëse për akuzë të një shkalle të tillë..." Për ta zbutur budallëkun e shokut Mërgim fjalía vazhdohet me vlerësimin që QE bëri rreth shkrimeve në ZK. Mund që shoku Salih nuk ka vazhduar të shkruaj ashtu me qëllim, ama kuptimi i formulimit na del i tillë, sikur të thuash e zbuta tërësisht me ngjyrë të zezë, por meqë e stërpika me ca

pikë të bardha, është lara-lara. Do të thotë shkrimi në letër vetëm në njërin drejtim shkoi gjer në fund dhe u muar me atë që nuk e kishte ndërmend të merrej letra në fjalë.

Po përse provohet të manipulohet mungesa e Plakut në takimin e komisionit më 18 dhjetor 1984 (duhet të jetë 1983 shën. i red.), nuk po marrë vesh. Ne nuk kishim mundësi të shkonim ke Plaku, kurse Plaku nuk mundte të dali këndeje. Çdo gjë e qartë. Atëherë pse kemi nevojë të nxjerrim spica. Me këtë rast nuk e kam të qartë se a i ka rënë procesverbali në dorë Aliut, për të patur nevojë shoku Ujkan t'i thotë se "nuk ka qenë një shok i tij të cilin nuk e kanë njoftuar, duke shtuar në fund, se edhe pse ai nuk ka marrë pjesë, nuk ka dert". Të shohim çfarë do shkruan shoku Ujkan, ama pyetjes se i ka rënë në dorë Aliut procesverbali duhet të përgjigjen shokët Fahri e Ujkan. Nuk po kuptoj pse duhet të ngjajnë gjëra të tilla në këtë relacion. Aliu nuk do të duhej të futet në "lojë" nga asnjëra anë, as për të marrë këtë letër, siç shkrova në fillim, por as për t'u biseduar në tel. diç e tillë, përderisa ai nuk është anëtar i QE.

Në vazhdim kemi të bëjmë me një paqartësi të re (sido që të formulohet, ne vet, tani për tani, kuptojmë se çfarë është dëshiruar të shprehet, ama sikur të lexohen nga dikush që nuk është në korent me ngjarjet, vështirë që do kuptohet se çfarë është dëshiruar të thuhet.). Sikur shoku Salih flet për tubim që nuk ka marrë pjesë, por vetëm është varur nga leximi i procesit, që nuk e ka lexuar, shkaku i lodhjes. Pos që do të duhej të dihen vendimet e vlerësimet, meqë ka qenë i pranishëm, procesi gjatë të mbajtur, por edhe në fund është lexuar.

Sa për dështimin e tubimit të planifikuar, përderisa nuk ekziston vullneti për t'u takuar dhe përderisa të mos organizohet udhëtimi, meqë i dimë vështirësitë me të cilat ballafaqohemi, – pa patur nevojë të gjitha këto të bëhen para vendkalimit kufitar, "her po dal e herë s'po dal", – sigurisht që pezullohet takimi.

Për bisedën tel. të 29 dhjetorit dhe për përmbajtjen përkatëse nuk po shkruaj. Po më duket e arsyeshme të pres përgjegjen nga shoku Ujkan. Më gjatë më duket e arsyeshme të ndalem mbi "krizën", mbi të cilën na shkruan shoku Sali, në vija të përgjithshme. Shoku Salih na shkruan: "Nëse puna patjetër shtrohet ose-ose (nënv. nga unë) atëherë unë nuk jam aq naiv sa ta kuptoj se ajo ka të bëjë vetëm me një person apo dy, me një fjalë, ajo do të përfshij një rreth të gjerë dhe me këtë do të përfundoj një epokë në luftën e Kosovës dhe do të filloj një e re. Në këtë rast nuk do të triumfojnë parimet por fryma e rrethit." Së pari, në një përfundim vihet ose kur bëhen mbivlerësime të personave, ose kur të jetë punuar në atë drejtim, që kur të vij "fondi" të mund të ndodh diç e tillë, ose edhe kur injorohet baza. Kjo e fundit mund të jetë e vërtetë vetëm atëherë kur anëtarët e LRSJ-së të ishin aq naiv, sa të shkonin pas personave dhe jo pas çështjes – pas LRSJ-së. Sa për supervlerësime individuale, kjo kaherë është e pranishme. Kurse për t'i dalur i vërtetë një kësi vlerësimi, mos shoku Salih ka keqpërdorur besimin për të përshtatur formën organizative, që të jetë e mundshme diç e tillë.

Nëse nuk është mbivlerësim i "ose-ose", duke lidhur të ardhmen e LRSJ për persona, nuk di çfarë hilesh janë duke u fshehur, përkatësisht se çfarë punëve minuese janë bërë gjer tani, në mënyrë që të shkatërrohet LRSJ-a. Hajde more, të shkohet aq larg, sa të thuhet se tre persona, qoftë edhe garat e tyre, po kushtëzokan të "përfundon një epokë në luftën e Kosovës, për të filluar një e re"! Besa po më çudit! Kurse sa për shprehjen epokë, më duket se është përdorur rastësisht, pasi nuk i përshtatet kontekstit të fjalisë e as etapizmit të historisë së sotme. Përgjegje ime përkatëse e këtij vlerësimi, përkatësisht këtij parashikimi, do të ishte: ata që do provojnë të përçajnë LRSJ, jo vetëm që nuk do të kushtëzozin fundin e fillimin e epokave, por të flaken jashtë

LRSNJ-së si shkelës të vendimeve për Bashkim, do demaskohen, çka jam fare i besueshëm se vetëm ndonjë anëtar që ka lejuar të dresohet dhe jo të jetë militant i vërtetë i LRSNJ-së, do t'i shkoj mbrapa ndonjë bajraktari për bajrak! Mashtrohet secili nëse mendon se kemi të bëjmë me anëtarë a popull naiv, i cili shkoka çdoherë si dhentë pas ogiqeve! Me këtë rast po dëshiroj nga zemra që ky vlerësim, që na e sjell shoku Salih në letër, të mos ketë kurrfarë bazash, të mos jetë i vërtetë!

Sa për ngjalljen, përkatësisht "ringjalljen e ndonjë fryme sentimentale", besa nuk po kuptoj. Duket se shprehja sentimentale është përdorur pa vend, meqë nuk besoj se shoku Salih mund të jetë për atë, që të kapërcejmë "krizën", për të "ringjall frymë afërsie sentimentale".

Për propozimet që pata bërë më 18 dhjetor do të ndalem, ndoshta më poshtë, ose ndonjëherë tjetër.

Për Organin e LRSNJ-së, "Zëri i Kosovës", besoj që janë dhënë vlerësimet dhe është thënë e gjithë ajo që është dashur të thuhet. Është koha e fundit që të mos mbetemi duke u marrë me thash-e-theme, dua të them me vlerësime e vlerësime, propozime e propozime, vendime e vendime, dhe asgjë të mos ndryshon, asgjë të mos praktikohet ashtu si kërkojnë rregullat e normat, ashtu si bëhen vendimet. Kurse për propozim konkret, s'kam çfarë të them, meqë Aliun unë nuk e njoh fare. Ndërsa sa për formën e punës, që të korigjohen artikujt përmes letrave, më duket e papraktikueshme. Vetëm nëse shoku Ujkan ia arrit të kompletonte kolektiv të përshtatshëm për t'i dalur zot punës siç dëshirojmë, mund të presim suksese më të mëdha.

Edhe pse më parë kam shkruar, meqë janë botuar konturat e një variante të Programit, – kokë në vete, – le të organizohet diskutimi në celula, nëse edhe ato kanë propozimet e veta, kritikën dhe ndryshimet, në mënyrë që pjesëmarrja e aprovimit të Programit e Statutit të bëhet nga një rreth, mundësisht, sa më i gjerë. Për këtë arsye do propozoj që përmes Organit të thirren të gjithë militantët e LRSNJ-së për t'i shpreh mendimet, për t'i dhënë propozimet, ose për të formuluar variantet e tyre për Programin e LRSNJ-së. Nuk do më dukej e tepërt që edhe ata që nuk kanë patur mundësinë të jenë militantë të anëtarësuar, por që ndjejnë veten simpatizantë, ta bëjnë të njëjtën punë, por kur t'i përcjellin mendimet e tyre, ta bëjnë me dije se janë vetëm simpatizant. Sa u përket celulave, do të duhej të vij në shprehje forma e zgjedhur organizative, për të organizuar diskutimet.

Për organin e ri, sidomos për paritetin që u vendos, kam ndërmend, po më premtoj koha, të shkruaj njëherë tjetër, më gjerësisht, duke përpunuar edhe materialin që kisha ndërmend të lexoj në atë tubim, por që nuk u pa e arsyeshme, kryesisht shkaku i kohës.

Meqë jam duke i shkruar me radhë letrës që po i përgjigjem, sërish po kthehem te Programi. Në takimin që kishim më 18 dhjetor, po dihet se në vitin e kaluar, patëm një mosmarrëveshje me shokun Salih lidhur me diskutimet e tija "durcheinander" (përkthimi në fjalor gjer. shqip. të Zef Simonit është "rrëmujë", "pshtjellim", kurse mua m'u duk e përshtatshme shprehje, meqë desha t'i vlerësoj bisedime të tilla të pshtjellueshme, kaotike, të ngjashme me figura të artit modern, ta zëmë kur njerëzve ua fusin kokat nënsqetull dhe nuk ua lënë në vend, ose i gjymtojnë...), ku na foli për Programin, përkatësisht për formulimin e Programit nga ana e shokut Mërgim. Nuk diç pse nuk ju duk e arsyeshme të na thotë se ia kanë korigjuar shokët..., kur unë nuk e besoj, ndoshta as vetë shoku Salih nuk e beson, ose më përkatësisht, pse ka nevojë të përsërisim "akrobacione" të tilla me qëllime të caktuara. Dhe përfundimisht, pasi nuk kam nevojë të sjell ato që thoshte, po përsëris çka na shkruan: "Ky (mendohet varianti i Programit, i punuar nga shoku Mërgim, pra i I.K. -shën i red.) që ia kanë korigjuar (më

lartë thuhet disa shokë, besoj që po kuptoni se cilët shokë mendohen) për skelet i ka konturet e botuara, me disa ndryshime të vogla, që më duket me shumë të meta dhe aspak i përshtatshëm që të botohet si program politik." Në atë rast, kur shoku Sali bënte këso vlerësimesh, bazuar në projektin që kishte shkruar ai dhe në thënien e tij se si asnjëherë nuk ka lexuar ndonjë program politik të ndonjë organizate, pos një të Partisë, në fakt të Lidhjes "Komunistische Bund Westdeutschlands" (kështu më duket se na ka thënë. Këtu më duhet të shtoj se shoku Salih nuk e njeh gjuhën gjermane për konverzime të thjeshta, e lëre më të kupton përmbajtjen e Programit politik, që ashtu ashtu është i formuluar në gjuhë e stil mjaft të zorshëm për t'i kuptuar ata që nuk e zotërojnë gjuhën), e pash të arsyeshme t'i them se nëse është korigjuar nga ata shokë (unë nuk e kisha patur në dorë ende për ta parë), atëherë nuk e ke hallin të bësh të tilla kritika. Edhe në këtë rast do të them pa ngurrim: mjerë për ne që nuk po ia dimë kaqikun vetes, por gjithsesi ngulim këmbë të shkruajmë a të themi diç, që shpesh është mjaft absurde!

Në përfundim të letrës shoku Salih na shkruan për datat, 17 shkurt apo 15 maj, duke u ndalur prapë te "allashvereshet" e rëndomta që po zhvillohen zakonisht në biseda telefonike. Mendimi i shokut Salih lidhur me këto dy data, se nuk na qenkan për natyrë të tij të dorës së parë, sikur më duket neglizhim i rëndësisë aq parimore. Kurse me data që ende je në to, do të thoja për rastin konkret, nuk ka si të merret historia. Në këtë rast kontestuese është si të shkruhet në Program Politik, përkatësisht cila datë – dhe kjo ka rëndësi të madhe, pasi ndryshimi i datave përcjelllet me shkelje të Komunikatës së lëshuar me rastin e Bashkimit. Unë jam për ata, nëse duhet të vendoset ndonjë datë në Program Politik, atëherë të mbetet ashtu si është në Komunikatë.

U gëzova më shumë se ju, se përfundova, jo vetëm nga shprehja e mendimeve në formë përgjegje, por edhe me analiza të tjera përkatëse. Dëshiroj të mos keqkuptohem, ashtu siç do të dëshiroj që të marrë përgjegje të nivelit në letrat e mija, me kritika të të gjitha llojeve, bile edhe të stilit e sintaksore, pasi më ndihmojnë në përvetësimin e zëjes së të shkruarit.

Të dashur shokë,

sado që jam në presionin se nuk duhet të ju shkruaj gjatë (meqë më keni kritikuar), po vazhdoj së shkruari, jo pse po dëshiroj, por më shumë pse po më duket e arsyeshme, nëse merrë për bazë gjendjen që na është krijuar, sidomos edhe përgatitjen tonë, përkatësisht mospërgatitjen tonë në nivel, për t'u dalur zot si duhet përgjegjësive, me të cilat jemi ngarkuar, përkatësisht kemi ngarkuar veten.

Se nuk na kanë shkruar punët mbarë, siç kemi dëshiruar ose edhe siç kemi parashikuar, nuk do mend të thuhet. Prova më e mirë është një këso letre që kemi marrë, por më shumë do të thosha se mosmbarvajtja më shumë është kushtëzuar nga gabimet, lëshimet e shkeljet, të cilat në të shumtën e rasteve, nuk kanë qenë fare të domosdoshme, pra, janë fare të paarsyetueshme; po shtoj, për fat të keq, jo vetëm që nuk po mësohet nga gabimet, lëshimet e shkeljet, por po hargjohet energji për t'i mbrojtur e arsyetuar ato.

Që njëherë e mirë të jipen ca vlerësime përfundimtare, së paku unë që të jem në gjendje, do të duheshin informime konkrete të shokëve Mërgim, Ujkan e Salih, si dhe shënimet e letrat përkatëse të shokëve të vranë, dua të them për bisedimet që patën filluar në frymë fare shoqërore e revolucionare, por që mbaruan keq me rastin e bisedimeve në Turqi. Duhet të pranojmë se fryma e tanishme atje e ka bazën, prandaj, për mendimin tim, shokët në fjalë duhet ta bëjnë atë punë, dhe jo të fjalosen kohë pas

kohe, si gratë e këqija, siç përdoret ndonjëherë, kur të ipet rasti, atëherë kur takohemi dhe provohet që njëri tjetrit t'ia zë kokën me marifete e marifete. Për këto që themi tani, nisem kryesisht në ato fjalosjet e gjata në mes shokëve Mërgim e Ujkan. Por më shumë nga fakti, se tërthorazi janë rrëzuar gurë mbi shokun Kadri, përkatësisht ju kanë mbështetur faje e faje për mbarimin e bisedimeve të atëhershme në atë formë, kur më ai nuk është në gjendje të thotë fjalën e vet. E unë, si dëshmitarë i disa takimeve dhe mirëkuptimeve, me bazë në luftën e përbashkët, sidomos në mes shokëve Jusuf e Kadri, dhe në bazë të njohurive mbi aftësitë dhe revolucionaritetin e secilit nga personat, përkatësisht shokëve, dua të them se keqkuptimet që patën lindur, janë më shumë rezultat i paaftësive, i nervave, i fodullëkut, i mosnjohjes së teorisë së revolucionit të shokut Mërgim, i cili ka qenë i ngarkuar për bisedime të atij niveli. Ndoshta pasi të na shkruan shoku Mërgim, kam mundësinë të konkretizohem edhe më shumë, por edhe kësaj radhe, nuk po ngurroj t'i shpreh ca mendime, që më vonë më duhet t'i thelloj, duke shpresuar se shënimet e letrat dhe faktet e tjera, që kanë të bëjnë lidhur me bisedat për bashkim, do na vihen, përkatësisht do më vihen në dispozicion, për këtë rast, kryesisht po bazohem në sjelljet e diskutimet e shokut Mërgim, si dhe në disa punë që ai ka bërë më parë, si, nëse nuk gabohem, ngarkimi i shokut Salih të merret me ato punë që u muar një kohë në Bruksel, pa njohur gjendjen as njerëzit, ose korrespondenca, për të mos thënë edhe anëtarësimi (për këto do na njofton vetë shoku Mërgim), me Musa Hotin, që kur ai ka rënë në burg. Kjo e fundit nuk mund të mbulohet, meqë kam lexuar vetë letër të tillë, bile pjesërisht me dorëshkrim të shokut Mërgim, me gunën e tij (sa për penën, nuk di shumë, pos për ato që përmenda e që s'më duken në rregull), me natyrën e tij complete për të biseduar për gjëra me përgjegjësi të madhe, sikur mund të marrë me mend se si kanë mundur të zhvillohen bisedimet mes ati dhe shokut Kadri, ku ka qenë i pranishëm edhe shoku Bardhosh. E përsëris, që t'i konkretizoj mendimet edhe më shumë, pres që të na shkruani, pa patur nevojë të bazohem në bisedat "rafall" në mes shokëve Mërgim e Ujkan, që më shumë i ngjanin natyrës sikur bisedohet në afekt. E potencoj, do ndihmon të sqarohemi njëherë e mirë, pasi gjitha bisedimet e marrëdhëniet e pastajme, sidomos pas vrasjes së kobshme, kanë qenë nën hijen e mosmarrëveshjeve në mes shokëve Mërgim e Kadri, dhe asesi si rrjedhim i keqkuptimeve në mes të shokëve Jusuf e Kadri, pos atyre që prap, kanë mund të kushtëzohen nga ajo bisedë. Jam për atë që të mos ngurrojmë për të vlerësuar bisedimet para vrasjes, mendoj ato për Bashkim, qoftë edhe keqkuptimet e mosmarrëveshjet, ndonjëherë janë përmendur edhe hilet. Kurse për secilin që provon të përvetëson merita se është iniciatori i bisedimeve të pastajme për bashkim, jo vetëm se më duket ligështi e ulët, por më duhet të them se duhet t'i përvetëson edhe hilet prej matrapazi, pasi po shihet se në ato bisedime nuk janë hyrë individët me sinqeritet të pastër – më shumë janë në pyetje "akrobacione" dhe mendjemadhësitë për të bërë kapital personal, me hy në histori...

Sa për organizimin e pastajm, për aq sa jam në korent, më duhet të pranoj, fatkeqësisht, se nuk ka qenë në rregull, përkatësisht as që mund t'i bihej në fije. Për këtë nuk vërtetojnë vetëm pshtjellimet në emërtime, por edhe forma e zgjedhjeve, përkatësisht të formimit të KQ, i cili më shumë është fantazuar. Thënë të drejtën gjer vonë nuk kam dijt se jam anëtar i KQ, e kur kam mësuar më është prishur qejfi, meqë e merrja me mend se çka mund të bëjë ai KQ, në të cilin jam anëtar unë; thjesht: dëshiroja që anëtarë të jenë shokë e shoqe që kanë qenë shumë herë më të ngritur e që janë shumë në Kosovën tonë martire, kurse ngarkimi im me përgjegjësi më lente të kuptoj se bëhet më shumë si shkak i gjetjes sime këndeje. Kështu së paku dëshiroja. Duke kaluar koha kuptoja edhe më shumë. Tani mund të them, fatkeqësia më e madhe nuk ka qenë pse ne

nuk kemi qenë të ngritur në nivel, por pse shpesh kemi mbivlerësuar veten dhe mosaftësitë për t'u dalur zot punëve si duhet kemi provuar t'i fshehim pas fajit të njërit ose tjetrit, i cili vazhdimisht ka penguar që secili punën e vet ta kryej siç do ta kryente po të mos pengohej, përkatësisht po të mos arsyetohej se po pengohej...

Vrasja e shokëve bëri të mundur që radhëve tona t'ju shtohet autoriteti. Kam përshtypjen sikur kjo na mashtror, që pastaj të mbiçmojmë veten para bashkatdhetarëve (nuk po konkretizohem në emra e raste, meqë nuk dëshiroj të arrihet efekti i kundërt), të luajmë rol të revolucionarëve, ndër më të mëdhenjtë dhe të luhet roli që ata, bashkatdhetarët, të krijojnë përshtypje se para fjalës së tyre, përkatësisht tonën, duhet të përkulen dhe të mos e vënë asnjëherë në dyshim, pra as atëherë, kur ata janë të bindur se nuk është në rregull gjithçka. Më një fjalë, atë autoritet, në përmasa të caktuara, e kemi keqpërdorur. Dhe, duhet thënë edhe kjo: është ai autoritet që ne na mban, përndryshe, sikur bashkatdhetarët të njihnin realitetin, do na respektonin shumë më pak. Pastaj, duke keqpërdorur atë autoritet dhe rrethanat që u krijuan, qenë të mundshme disa "manovrimet", duke mos qenë të kritikohen ato, prap si rrjedhim i atij autoriteti, që keqpërdorej.

Se çka u munduan të arrijnë individët pas vrasjes, mund të themi se është e vetëkuptueshme në përmasa të mëdha për ne tani. Por, gradualisht, ata që kanë provuar t'i akuzojnë e difarmojnë të tjerët, kohë pas kohe po demaskojnë veten. Skeleti i gjithë asaj pune përçarëse-miskine është, brenda kohe shumë të shkurtër mund t'i mvishet mishi, për të patur të konstruktuar trupin e plotë...

Edhe kjo klimë e ky ambient, pasojnë se të gjithë asaj gjendje të ndërlikuar, që na robërojnë edhe sot e kësaj dite. Dhe, është koha që duhet të mejtohem thellë, se duhet gjetur zgjidhje më e përshtatshme e më jetëgjatë. Por, kur është mot i vrenjtur, nuk kemi nevojë të rrezitemi në diell.

Klimën e pranishme vazhdimisht e ka ngarkuar mospuna, mosaftësitë, mosukseset. Kur është dashur të raportohet për punë, për sukseset, pa patur nevojë të detalohem, dihet se si kemi raportuar. Moskënaqësia e psihoza e pranishme ngarkoheshin edhe më shumë, kur dëgjoje raportime të tilla (ndonjëherë edhe jo të sinqerta), përndryshe, sikur të na bindnin ato raporte se po korrim sukseset e mundshme maksimale, do të ngjallej optimizmi, do na hapeshin perspektivat, do na shtoheshin aftësitë për të menduar e vepruar. Sigurisht që kemi korrur edhe suksese, që nuk kemi nevojë t'i përmendim këtu, për të cilat mund të themi se kanë qenë më të mëdha se sa mund të merreshin me mend, sikur të dihej se në çfarë ambienti punohej, çfarë rrethanash mbretëronin, për të cilat, siç mund të kuptohet nga të shkruarit më lartë, kemi dhënë edhe ne jo kontribut të vogël që të arrijmë në atë nivel.

Pa patur kohë e mundësi të zgjatëm sa do më duhej, duke i shtruar mendimet edhe më, po konkretizohem në ndonjë veçori e rast, në ndonjë gabim e lëshim, në njërën anë për të konkretizuar ato që shkrova, kurse në anën tjetër, për të ndihmuar që të bindemi njëherë e mirë se duhet të ndryshojmë në gjumëçka, nëse duam që klima të përmirësohet. Për këtë po ndalem në aktivitetin e punën e QE, duke u konkretizuar në sektor.

Meqë po më duket më së lehti, po ndalem te çështja materiale. Si mund të punohet në këtë sektor, kur ende nuk është raportuar se me sa mjete disponojmë, në mënyrë që të dijmë sa kemi mundësi t'i shtrijmë këmbët. Vetë shoku që është ngarkuar me atë përgjegjësi, Fahriu, ka gjasa se dinë më së paku. E kush din, fare, bile shoku Fahri, se si qëndrojmë me Fondin e Ndhimave, a është duke u ndihmuar ndokush, kush është duke u ndihmuar, a kemi mundësi të ndihmojmë më shumë... Pastaj, kush dinë se

nga po vijnë ndihmat, në mënyrë që me ata që ndihmojnë, të bashkëpunohet më afër, pasi gatishmëria për të ndihmuar tregon shumë për nivelin e vetëdijes, kuptohet edhe të aftësive për të milituar pastaj në radhët e LRSHJ-së. Ose, ndoshta mos vetëm po bëjmë iluzione, edhe atëherë kur nuk grumbullohet as minimumi i ndihmave të mundshme. Nëse është e vërtetë kjo, atëherë duhet marrur aksione e gjetur forma për të mundësuar grumbullimin e ndihmave. Përfundimisht, përse i është ikur raportimit mbi gjendjen financiare, edhe atëherë kur disa herë është kërkuar, ose përse nuk i është dorëzuar puna shokut Fahri? Nuk ka nevojë të thotë asgjë në këtë drejtim shoku Fahri, për të na bindur për këtë që them unë. Nëse më duhen të holla urgjentisht, nuk kam pse t'i telefonoj shokut Fahri, më duhet ose shokut Ujkan ose Bacës Plak. Edhe më konkret është rasti më i ri, lidhur me rastin e Shtutgardit. Të hollat që janë paguar për garancion janë ngritur nga kreditë individuale. Nëse ka ndodhur kështu, është e gabueshme, nëse shiqojmë vetëm nga aspekti ekonomik. Për të ngritur gjithë atë kredi, duhet paguar kamatë e madhe, kurse nëse të hollat e veta merren nga banka, për t'u kompenzuar prap si në rastin e parë, me fushata të grumbullimit të ndihmave. Gjithë dami nuk është aty. Të shohim edhe çfarë pasoja tjera kemi nga këto gabime. Padashur, diku në thellësinë e qenies, "lulëzon" pakënaqësia për "mosbesim", në rastin tonë të shoku Fahri. Meqë kaloi kohë e gjatë, pa marrë në duar punën e vet, sigurisht që ka patur njëqind herë mundësi të vij në përfundim të tillë, se ndaj tij nuk ekziston besimi në nivel. Pastaj, edhe më herët ka patur grindje lidhur me Fondin. Tani, kur që sa kohë është ngarkuar me atë përgjegjësi, lejohet mundësia të dyshohet se diç, një hile, fshehet pas, pasi, ka mundësi të thirret në kontinuitetin e vendosmërisë për të mos i lëshuar të hollat nga dora, përkatësisht Fondin aq shumë të popullarizuar. Në ndonjë rast, kur lind ndonjë grindje, mund të përdoret si shembull kjo dukuri. Unë dyshoj se me këtë rast është bërë gabim në këtë nivel, vetëm rastësisht. Mos ndoshta qëndrimi jo i drejtë është rrjedhim i "kujdesit", për të mos lënë shansën që të ndodh si në rastin e Nuhiut. Sidoqoftë, më të këqijat janë dyshimet e pashprehura, pasi ato bluajnë përbrenda, kurse të shprehurat nuk kanë mundësi të bluajnë gjithaq. Për të vazhduar hala. A nuk lejohet mundësia të bëhen edhe manipulime të tilla: Përderisa mjetet i ka në dorë Plaku, janë në duar të shokut Xhemë, përkatësisht të atij "klani". Nëse bien në dorë të shokut Fahri, atëherë me to do të manipulon shoku Salih. Përfundimisht, gjendja ka arritur në atë nivel, sa, po m'u deshën të holla nga ai Fond, të ngurroj për të lypur, pasi gati sikur më duken se ua lypit të hollat private – që më ipen si ndihmë karitative-kristiane. Kështu ngjashëm tingëlloj në bisedë tel. që pata me shokun Xhemë pai u lëshova. Ai më ofroj ndihma, por sikur ato më ofroheshin vetëm tani, që jam viktimë dhe jo atëherë kur më duheshin, për të evituar që kjo të mos ndodh. Mund që këto rrjedhin nga nikoqirllëku i tepruar, ose për faktin se mjete nuk ka, por që nuk na thuhet, për të na dëshpruar. Cilado që të jetë, është e gabuar.

Besoj se u zgjata mjaft, për të hapur shteg për kritika pa rezervë por edhe për autokritika.

Sa për sektor të organizimit të brendshëm nuk di çfarë të them, meqë asgjë, pra as punë, nuk më ka rënë në sy. Dëshiroj të kemi korrë suksese. Por, për të arritur suksese, duhet përgatitur kuadra që këtej, ndonjë bashkatdhetarë fare të pakompromituar, edhe të mbaj lidhje, por edhe të hedh farë organizative mes patriotëve e revolucionarëve në Kosovë, pasi po dihet më se pa organizim të nivelit, jo vetëm që nuk qohet përpara revolucionit, por edhe po arrestohen shumë bijë e bija të Kosovës martire, thuaja që në hapat e parë të veprimtarisë së organizuar.

Për sektorin e propagandës, thuaja, kemi biseduar gjerësisht. Kam mbetur borxh që për këtë sektor të bëjë analiza më të hollësishme me shkrim. Pos lëshimeve që janë

kritikuar, e pranoj se ka qenë sektori më aktiv dhe më i suksesshmi. Për disa punë që janë marrë përsipër nuk janë kryer. Ndonjëherë thuaja më vështirë e kemi të gjejmë arsyetime, se sa të kryejmë punën. U bë kohë e gjatë që është biseduar për broshurën mbi shpërnguljet. Përfundimisht ka filluar të botohet në vazhdime. Por shumë më praktike do të ishte botimi i saj si broshurë. Kështu edhe me romanin e shokut Adem Demaçi, tani ka zënë të botohet në vazhdime, për çka mund të them se nuk është fare e arsyeshme. Nëse mendohen lexuesit brenda, vështirë që do arrijnë të kompletojnë e as ta përcjellin. E nëse nuk kane mundësinë këtë, vetëm emri i madh i shokut Adem nuk duhet të na bind se u dashka botuar ZK për ta bërë më atraktiv, sikur njëmend nuk po shitet. Botimi i romanit, nëse i kushtohet çdo herë një faqe e ZK, do të zgjat 2-3 vjet. A njëmend është e logjikshme të presin lexuesit për ta patur komplet romanin, nëse do kenë mundësi ta rregullisht gazetën e tyre ilegale. Nuk do mend të thuhet se ky roman, bashkë me të gjitha tregimet, është dashur kaherë të botohet. Më vjen keq të duhet të shprehem ca më brutal, sikur nuk i vije erë e mirë kësaj zhagitje të paarsyeshme, kur dihet interesimi i lexuesve dhe kur dihet se me shitjen e tij do nxjerrim përfitime. Pra, që të botohej shumë më heret, mu më ka penguar mungesa e një parathënje të aktualizuar dhe të politizuar, përmes së cilës duhet siguruar ndikimi i dëshiruar. Sa për romanin si roman dhe tregimet, drejtë për së drejti, te masat e gjëra s'ka çka të ndikon, pasi nuk kanë kushedi çfarë përmbajtje të jashtëzakonshme. Shih pra, në mungesë të parathënies, u shty botimi. Sikur bile të thuhej se nuk mund ta shkruaj, ndoshta do bëheshin përpjekje për t'u gjetur ndonjë mundësi që të shkruan ndokush atë parathënie, ose të shkruhet ca më dobët. Kjo nuk ka ndodh. Secilën herë, që kur është biseduar dhe është aprovuar botimi i tij, zotimet nuk janë kursyer se do të kryhet puna. Kjo vlen edhe për dramën e shokut Jusuf. Kjo bile, është literaturë shumë e përshtatshme aktuale, kur po bëhen kaq shumë arrestime. Mund që edhe ndokujt do t'i kujtohet se kryesisht ky faktor e shtyri që t'i përkushtohet shkrimit të sajë. Them se edhe koha është në pyetje, ama që të radhitet në kompozer, nuk është e domosdoshme se duhet ta bëjë vetëm shoku Xhemë. Sa për mrekulli e nxori në makinë të rëndomtë shoqja Bule dramën që ka shkruar shoku Mërgim. Pamëdyshje se do të bënte edhe radhitjen e "Procesi", sikur t'i ishte thënë.

Se si qëndrojmë konkretisht me çështjen organizative këndeje në Perëndim, këtë duhet ta dinë më mirë shoku Salih, ama nëse bazohem në letrën e tij, nuk duket se organizimi është bërë në baza të shnoша. Organizimi në baza të shëndosha do jepte provimin në raste kur ndonjë fraksionist nxjerr kokë. Po kështu, sikur organizimi të ishte në nivel, gjendja e krijuar do merrej në shënjestër dhe ndaj nesh do ushtrohej presion tjetër që, ose të përmirësohemi, ose të lëshojmë vendin për më të përgatitur e më punëtorë. E si mund të funksionon organizimi përderisa asnjë material, ama asnjë material intern nuk është shpërndarë, që anëtarët të dinë se çfarë do me thënë me qenë i organizuar, ose ndonjë material i konkretizuar për rastin tonë mbi teorinë e revolucionit a mbi teknikën e konspiracionit. Nëse ka ndonjë anëtarë të organizuar në nivel, nuk diç çka e mban atë të lidhur për LRSHJ-në. Mos vetëm vizitat kalimtare zavendësojnë këshillat, qarkoret, direktivat e gjërat përkatëse, të cilat do mbanin gjallë jetën në celula, do ta bënin më atraktive qenien si militant dhe jo që të goditen nga stërkeqja e monotonia në vete. Se mos militantët kanë marrë në dorë ndonjë punim se si duhet të ndikojnë te masat, se si duhet të afrojnë rreth vetes kandidat, për t'i anëtarësuar kur të jenë të bindur se meritojnë, etj., etj. Ndoshta është bërë ndogjë në këtë drejtim, por ne nuk na kanë rënë në duar ato materiale. Do të ishte gabim. Në njëfarë forme, vetëm kur kryejmë punët e caktuara që dalin nga detyrat, duhet të jemi vetë anëtar të ndonjë celule, për t'u marrë me aktivitetet e "thjeshta" të anëtarëve të "rëndomtë". Vërtetë nuk diç ku të

bazohem për të thënë se në organizim konkret janë duke shkuar punët mbarë. Në rastet kur po kam mundësi të vërej, shoh se në rrethe, meqë po dihen dobësitë, po shfrytëzohen ato, përkatësisht po keqpërdoren. Bashkatdhetarët fare të papërgatitur, me ndonjë manir, që është i pranishëm në raste të shpeshta të përkushtimit çështjes patriotike, në formë të vetëkënaqësisë, sikur ngarkohen me përgjegjësi. Ata pastaj keqpërdorin atë që bashkatdhetarëve tjerë t'ju shesin taraf, se ja ata na qenkan me patriotët në rreth, ke të cilët LRSHJ-a ka më së shumti besim dhe jo ju. Nuk ka dyshim se duke ua ushqyer maniret dhe vetëkënaqësinë, edhe aktivizohen me entuziazëm, por që është i dëmshëm për punën e mirë e të gjatë. E kur të ndodhin raste të tilla, meqë me bashkatdhetarët këndej nuk është punuar gjithaq, sigurisht që të tjerët sikur ftohen nga rrjedhime të tilla. Rasti më tipik janë Qamili dhe Aliu. Se po dëgjuan ndonjëri nga shokët se i pari ka qenë punëtor lidhur me klubin, pa ditur për huqet, ose edhe papërgatitjen për t'u ngarkuar me përgjegjësi që nuk ia përthekon kaqiku, nguten kush të përfiton më parë, duke e propozuar shpejt e shpejt ose duke ia ushqyer pikërisht tërpinë për ta lavdëruar. Pra, kam përshtypjen, sikur duhen të përshtatshëm bashkatdhetarët, te të cilët po u the se ti je më i miri dhe lavdrime të tjera, thejnë qafën. Sikur po vlerësohen duka e sharmi dhe jo cilësia e vendosmëria, shpirti i sakrificës.

Sikur më ka rënë të dëgjoj nga shoku Salih, se tani për tani është përqëndruar vetëm në çështje të formimeve të klubeve. Kurse sa i përket formimit të celulave, krijimit të komiteteve në rrethe, përgatitjes së ndonjë ndihmësi, asgjë, së paku nuk ka mundësi të vërehet dhe aq sa jemi njoftuar. I kuptoj vështirësitë me të cilat është i ballafaquar, si kufizimi i lëvizjeve, ndoshta edhe mungesa e mjeteve elementare, bile sa për udhëtim.

Por nuk besoj se moskuksesi në këtë fushë të jetë kushtëzuar vetëm nga ky faktor. Mendoj se autoriteti i LRSHJ-së të bashkatdhetarët ka qenë i madh, nga rrjedh se shumë janë që do dëshironin të gjenin format e mënyrat për të kontribuar më shumë, meqë janë bukur të qartë se vetëm duke qenë të organizuar sa më në nivel, mund të japin atë që pritet nga ta dhe jo në mënyrë stihike e spontanisht.

Kur është fjala te klubet, te formimi, nuk diç a guxojmë të jemi të kënaqur, dihet, fjalën e kam tek shtetet tjera, pos Zvicrës. Përfundimisht, sa u përket shenjave e simboleve jugosllave, ende nuk jemi të qartë e as nuk kemi marrë vendime konkrete. Këshillimi që qe mbajtur, sa u përket shenjave e simboleve jugosllave, duket se është keqkuptuar, ose keqinterpretuar. Në këtë rast po sjell një shembull tipik. Gjersa në Hamburg luftojnë klika e Hashimit (kryetarit të klubit "Kosova"), në Bremen i është lënë në dispozicion ta komandoj me klanin që ka klubin në dorë. Çfarë klubi është hapur në Bremen, në çfarë lokali dhe çfarë aktiviteteve, besoj sa të ulëta, aq sa edhe vet konzullata nuk do të kujtohej. Për klube të tilla, që të hapen, zakonisht janë paguar veglat shqiptare që punonin si "nëpunësa" në konzullata. Edhe tani, po të mos i pengojmë, klube të tilla do të hapin ata vet, por ja që atyre nuk u shkojnë bashkatdhetarët, atëherë nuk duhet t'i mashtrojmë ne për t'ua lëshuar në dorë. Vërtetë më duket skandaloze të përkrahet klani, përfundimisht në vepër prokonzullatës, që të hap klub në lokal, ndër më të degjeneruarit, për të sabotuar lokalitë e nxjerrë nga Komuna në shtëpi të kulturës. Të presim e të shohim ku do të na nxjerr kjo "taktikë", të cilës njëherë përnjëherë nuk do t'i them "mashallah".

Bashkësia e Klubeve dhe Shoqatave Shqiptare në Evropën P. ende është në fillim. Ka gjasa që fillimi nuk është gjithaq i mbarë, prandaj e ka ca vështirë pastaj. Mendoj se Bashkësia duhet të merret më seriozisht, pasi është formë e veprimtarisë

legale, pas të cilës duhet të qëndron veprimtaria ilegale, pa lëshuar asnjëherë format demokratike të aktiviteteve, të praktikueshme në vend.

Gjendja hiç më e mirë nuk qëndron as në sektorin, me të cilin jam ngarkuar. Arsytimi që kam dhënë që në fillim, se nuk jam i aftë për t'i dalur zot sa duhet e si duhet, nuk guxon të jetë çdo herë arsyetim për mospajtim. Koha po kalon dhe sikur puna të merret me përkushtim, doemos duhet përvetësuar sado pak zejen, për t'i dalur zot punës. Kryesorja në këtë sektor është që të kemi njerëz me njohuri të gjëra, sidomos që zotërojnë ndonjë gjuhë, të ashtuquajtur botërore. Edhe ju do të jeni po të mendimit se të tillë nuk kemi. Nga ata që zotërojnë gjuhët, që janë shumë më heret në kurbet, vështirë që do gjejmë të sinqert për punën tonë, pasi ata më parë janë zezë me punë të tjera, punë të tyre... Nxjerrja e buletinit KOSOVA u shty së tepërmi. Por, edhe kur pata propozuar nxjerrjen e tij, kam thënë qartë se vetë nuk e ndjej veten të ati niveli, sa të shkruaj unë vetë artikuj. Unë mendoja se do ia dal me shokë e shoqe të organizojmë përkthimin, organizimin e botimit dhe shpërndarjen. Për çudi nuk u lajmërua askush në Redaksi të ZK për bashkëpunëtor, qoftë për të përkthyer, ose për të shkruar artikuj. Kjo vërtetë po më çudit. Sikur më bënë të dyshoj se askush në Kosovë, ose nuk është në korent, ose nuk ia dinë rëndësinë kësaj pune, ashtu si na e muar mendja ne. Si duket nuk po jemi të zot të kordinojmë lidhjet. Kurse edhe pse nuk është lajmëruar askush si përkthyes, edhe kjo çudit, ose ndoshta është lajmëruar ndokush, por nuk është parë e arsyeshme të vehem në korent. Për këtë mund të informoj shoku Ujkan. Vështirësi tjetër është statusi i qëndrimit. Krahas kësaj edhe mungesa e mjeteve për të udhëtuar e qëndruar në shtete të ndryshme, ku kohë pas kohe gjenden lidhjet e mënyrat për të depërtuar. Ta zëmë, shumë i domosdoshëm do ishte qëndrimi mujor në Austri, për të gjetur mundësitë e kontaktimit me gazetarë e specialistë të çështjes së Ballkanit, të cilët punojnë nëpër institute. Se sjell suksese, bind qëndrimi në Suedi. Kështu ndodh edhe me Italinë. Këto dy shtete kufitare janë lënë anash, edhe pse dihet nga historia se sa janë të interesuara këto dy shtete për çdo gjë që ndodh në Ballkan.

Pjesërisht, me thonjë e me dhëmbë, jam munduar të grumbulloj material, e edhe të përkthej, që më në fund të bëhet e mundur nxjerrja e buletinit. Por, nuk di si do duket e arsyeshme të sigurohen mjetet për botim. Nëse kemi mjete dhe ne pengohemi në punë të mbarë kryesisht në mungesë të tyre, atëherë është gjynah i madh, për të mos thënë sabotazh, sado që "ruajtja" e tyre mund të bëhet për ditë më të vështira. Thuaja edhe këtu vlejnjë ligjet e ekonomisë: efekti, përkatësisht përfitimi që mund të arrihet duke investuar sot një markë, në mot nuk arrihet edhe sikur të investohen njëqind, pasi, pos tjerash, kalon ajami. Mund që edhe ju do jeni të këtij mendimi.

Sa për bombardimin me letra, memorandume e peticione, organizatat e qeveritë, jemi mbrapa. Së pari nuk e zotëroj gjuhën e stilit të shkruarit të tyre – e ato kur të dalin nga dora, nuk kthehen prapa. Pastaj, sikur duket më efektive të lidhim kontakte me personalitete, që ato të flasim për çështjen tonë. Po kjo vlen edhe për gazetarë. Sa për marrëdhëniet me organizata, shtrohet pyetja se a nuk duhet të kemi parasysh gjendjen tonë specifike. Të lidhim marrëveshje për bashkëpunim me partitë komuniste, mos nuk është në kundërshtim me kërkesën Republikë Federative. Unë mendoj se po. Në këtë drejtim më së shumti pengon edhe mungesa e Programit Politik, të cilin duhet ta përkthejmë në gjuhë të huaja, si dhe ilegaliteti i LRSNJ-së.

Kohëve të fundit kam patur disa kontakte me rëndësi, për të cilat do të njoftoj ndonjëherë tjetër.

Meqë nuk po më pëlqen të kritikoj veten, po me tonin që kritikoj ndonjërin nga ju, kërkoj që këtë ta bëni ju, duke më këshilluar e dhënë ndonjë propozim a ide në aktivitetet e suksesshme që duhen arritur në këtë sektor.

Të dashur shokë,

pas demonstratës në Bruksel nuk ju shkrova. Tani sikur kam harruar se çka kam dashur të shkruaj – gëzohuni, përndryshe do zgjatesha edhe ca faqe.

Së pari, siç jam shprehur edhe më parë, nuk di se si është ardhur gjer te vendimi për ta thirrë atë demonstratë. Meqë shoku Ujkan ka vendosur që demonstrata të thirret, duke u nxituar t'ju shkruaj letër në logun e "mërgatës së qyqeve", do të duhej të na informonte se kenë ka angazhuar. Kësaj radhe, të mos përsërisë së koti, do doja së paku kopjet e letrave të shkëmbyera me atë rast, sidomos ato që ka ndërruar me z. E. Hadrin dhe letrën që i është dërguar Shoqatës "I. Seferi".

Kësaj radhe ndodhën marifete e marifete, "akrobacione" e sabotazha. Pa e zgjatur, për demonstratë kemi patur dy leje, një të njërit që e ka marrë shoku ynë, atëherë ku E. Hadri ka bërë kërkesën duke u thirrë se është ngarkuar nga Redaksia e ZK, atëherë kur me të njëjtën punë është ngarkuar edhe Shoqata.

Edhe pse unë isha në vend, kur isha i vendosur kundra dredhive të dredhagjive, funksionin telefonat. Herë shoku Ujkan e herë shoku Mërgim (për këtë të dytin e lë hapur që të shkruan ai vet), "korigjonin" gabimet e mia, duke qenë mijëra kilometra larg dhe pa njohur realitetin, por më shumë duke u ndikuar në dezinformime. Gjatë gjithë kohës klani Enver me kompani, bashkë me Reshatin, kanë luajtur rol miskin. E unë, në atë pozitë të vështirë, që ta majorizoj gjendjen e ndërlikuar, duhej të mbaj të fshehur se lejen për demonstratë e ka nxjerr edhe Enveri, përndryshe, do mbetej atë ditë vetëm Enveri plus co të demonstroj "në emër të Komitetit për mbrojtjen e të drejtave të njeriut".

"Akrobacionet" e Enverit s'më demoralizonin, pasi atë e njihja, por më demoralizonte mosbesimi i shokut Ujkan, i cili përkundër që bukur shtruar kisha shprehur mendimet e mia për E. Hadrin, prap nuk po bindej, por vazhdonte ta ngarkon të derdelisë "në emër" të Komitetit... Nëse kuptoj nga punët me të cilat po merremi, kur është në pyetje udhëheqësi i ndonjë organizate, pavarësisht cilës, nuk është në kompetencat e shokut Ujkan, kokë më vete, të nxitohet për të kthyer përgjegje. Së pari letër e tillë, pasi të jetë parë se më takon mu, do duhej të më dërgohet. As unë kokë në vete nuk do guzoja të kthej përgjegje, pa shtruar për diskutim në QE, kur dihet se në pyetje është një organizatë dhe ne, së bashku, duhet të vendosim se çfarë qëndrimi duhet të marrim. Për mendimin tim këtë nuk vlerësoj për lëshim, por shkelje të Komunikatës dhe të parimeve të vetëkuptueshme të LRSJ-së. Tani nuk e kam pranë Komunikatën, por di se çfarë qëndrimi është marrë kundër forcave separatiste (për rastin konkret, E. Hadrin, pa dyshim se nuk e çmoj fare për seperatist..., nipin e Kryezive, Cana Beut...). Ndoshta ti shoku Ujkan do arsyetohe se je bazuar në atë që ka shkruar dhe në "qarkoren" që ka lëshuar. Aq më keq – tregohet papjekuri politike.

Disi ia kam dal të siguroj kopjet e letrave që ka shkruar E. Hadri "në emër" të Komitetit, veçmas është për befasi (por jo te unë), se ai i shkruan vetëm Partisë Komuniste Belge (pro BS) dhe asnjë organizate humanitare. Po kështu, ajo përralla se Enveri do angazhon organizatë humanitare (ia kam harruar emrin) për të nxjerrë leje për demonstratë, mund të të kujtohet, unë se pata përbij.

Përfundimisht, u rrokullisën punët si u rrokullisën, se një letër pata përgatitur për PKB, pastaj donim t'i shkruanim edhe kryetarit të komunës, duke e bërë me dije opinionin për të tilla dredhi, përkatësisht duke i informuar gazetatat (gazetarët e të cilave E. Hadri i njeh dhe ia botojnë intervjuat, kur padronët kërkojnë nga ai, por kur është

momenti të shkruhet për çështje të popullit, saboton.). Me këtë rast do dërgoj edhe kopjen e asaj letre, meqë nuk është vonë të bëhet punë e tillë.

Dëshiroj të mos kem patur të drejtë që kam dhënë propozimin parapërgjashtim nga QE, ama për një kategori letrash edhe më parë kam tërhequr vërejtjen. E sa për lojën me ballon, ndodhi ashtu si e prisnim, por më vjen keq që mundësoj shkeljen e refuzimit tim, duke të mashtruar, për të dalur në fund bllof. Më ndjej, sa keq kam që na ndodhin gjëra të tilla, edhe atëherë kur ua marrë kokrrën në sy se çfarë hilesh bëjnë këta saroshë. Për sabotazhe që të mbesim fare pa trakt dhe marifete të tjera, nuk po bjerr kohë. Nuk di çfarë do thuani ju, por unë e ndjeva veten të lënë vetëm, përball llave të ujërve, bile me anë të telefonave sikur ndërsehej; sa herë ma ka përmend Reshati se ka telefonuar me shokë në Turqi...

Lidhur me propozimin për përjashtim të shokut Mërgim nga QE, arsyetimet janë dhënë në tubim dhe janë në procesverbal. Por, po konkretizohem ca, sidomos lidhur me korrespondencën me M. Hotin. Që kur isha në SHBA më ra të lexoj letra që shoku Mërgim i kishte dërguar Musës, e si për t'i shfrytëzuar për punën e tij, kishte dërguar kopje në SHBA. Atëherë nuk njiheshim dhe nuk dija se kush ishte ai i mashtruar, siç mendoja atëherë. Kur më ra të shoh të njejtën firmosje te drama, m'u kujtu. Pata keq. Letërkëmbimi kishte vazhduar. Kështu, në prag të demonstratës patëm ca mosmarrëveshje, pasi sipas Musës, ai duhej të vendoste se çfarë kishte për të thënë LRSHJ-a në këto raste. Siç dihet, në raste të tilla nuk pranoj të shkel mbi parime, prandaj edhe ia tregova vendin, sidomos sa i përket demonstratës, për pastaj mbet të merremi vesh. Pas demonstratës, kur isha, sa për formalitet dhe për t'i treguar se nuk jam i bashkuar me te, Musa na lexoj një letër, ku tërësisht ishte shkelur konspiracioni i LRSHJ-së. Përmes letre Musa informohej, njëanshëm, mbi gjendjen para Bashkimit dhe mbi Bashkimin në LRSHJ. Ruajta gjakftohtësinë dhe nuk thash asgjë, mbarohesha sikur nuk dija asgjë prej gjëje për ato që na lexoi ai. Por të tjerët, që ishin të pranishëm, kishin përshtypjen se Musa është anëtar i KQ i Lëvizjes. Besa, thënë të drejtën, kur pata fatkeqësinë t'i dëgjoj ato që na foli shoku Mërgim, dyshova se ka mundur ta "fut" Musën në KQ, që në fakt e dinte si diç personale... Nga shoku Mërgim do të kërkoj kopjen e asaj letre dhe të gjithë korrespondencën reciproke me Musën, me mendim se letrat që shkruan anëtari i KQ në emër të LRSHJ-së nuk janë personale dhe kur të lind dyshimi duhet të vehen në dispozicion për kontroll. Me këtë rast, nëse shoku Mërgim nuk e ka njohur Musën, do provoja ta informoj, ashtu si di. Në rast të kundërt, do të dëshiroja të më ndihmon për të ndryshuar mendimin e qëndrimin, nëse ai është i bindur se çdo gjë është në rregull sa i përket atij, dihet duke pasur prova, ashtu siç kam unë për bindjet e mija. Gjithashtu e shoh të arsyeshme të merret qëndrim konkret për këtë rast dhe nëse shoku Mërgim ka anëtarësuar Musën, unë propozoj që Musa të ç'anëtarësohet. Do shkoj edhe më larg, përderisa nuk ka prova që vërtetojnë të kundërtën, Musa nuk do militon në radhët e Organizatës që militoj unë!

Edhe njëherë: propozoj që Programi Politik, përkatësisht konturate Programit, të shkruara nga shoku Ujkan, sa për orientim, të vëhet në diskutim. Për këtë unë do shkruaj një variant të një qarkoreje (nëse mund të quhet ashtu) për komitetet, celulat e militantët e LRSHJ-së, për diskutim, duke dëshiruar që të fillojmë edhe nga puna e tillë. Nëse nuk ia kam qëlluar formulimit, le të riformulohet, por mendoj se kjo punë duhet bërë, pasi Programi i LRSSHJ-së duhet të jetë vërtetë i LRSHJ-së dhe jo vetëm i disa personave, edhe nëse ata janë të ngarkuar me përgjegjësi të caktuara.

Vërtetë jam zgjatur, por kështu doja kësaj radhe. Të shohim se sa jemi të armatosur me kulturë revolucionare, për t'i kuptuar kritikën si kritika, që ndihmojnë në përmirësim të punës, dhe jo si hile. Kam ndërmend, posa të më premtën koha, të nxjerri

në maqinë materialin që pata përgatitur, shpejt e shpejt, për tubimin e 13 Nëntorit '84 (duhet të jetë 1983-shën i red.) duke i shtuar ndogjë, bazuar në gjendjen që u krijua pastaj.

Pres që secili të merr qëndrim përkatës, duke mos përsëritur asnjëherë planet pas shpinde, përderisa bëjmë pjesë në të njëjtin forum. Po kështu, nuk është patriotizëm e revolucionaritet i vërtetë, kur merren qëndrime për hatër, ose për ky ose ai është i "anës sime".

-shtojcë-
Shokë,

në momentet e fundit kur po përgatitja letrën për postim (fotokopjim), më ra ndër mend se më duhet t'ju bëjë me dije për disa ndihma që më janë dorëzuar dhe harxhimin e tyre.

Bashkatdhetari Huti, nga rrethi i Livadhisë, m'i ka dhënë 1740 DM. Ato i kam harxhuar në prag të demonstratës në Bruksel, për pagimin e shtypjes së pllakatave që janë ngritur mureve të Brukselit, për kompozimin dhe shtypjen (në dy gjuhë) të traktit të demonstratës, për pagimin e shpenzimeve të mbledhjes me gazetarë dhe për komunikatë, kam dhënë 120 DM (në fakt 100 Franga zvicerane) që t'i dërgohen nënës së A. A. dhe disa shpenzime të tjera shoqëruese, ndër to edhe udhëtimi në Francë, dihet jo për halle private.

Kur isha në M., Reposhi m'i dha 400 DM për ZK. Nga to bukur shumë pata shpenzuar që të bëja fotokopje të materialeve nëpër biblioteka të atjeshme dhe për t'i blerë ca libra e revista. Të tjerat thuaja gati i shpenzova pastaj, me rastin e rënies në burg...

Tani kam kërkuar nga Plaku të më dërgohen 1.000 Franga, që t'i kem në këto çaste të vështira... Më duhet ta paguaj avokatin për punën e tij të madhe; vëllau nuk e ka hallin, sepse edhe kafshatën e domosdoshme të fëmijëve do detyrohej t'ua merr, prandaj më duhet të gjej mënyrën se si duhet t'i paguaj borxhe që ai ka huazuar në ato çaste – ndoshta mund ta dini se vëllau ka katër fëmijë dhe, sigurisht, shumë na ndihmon edhe ne të dyve, dëshiroj t'i bëjë të gjitha këto jo vetëm pse ndjehet i thirrur nga përgjegjësia familjare...

Për ndihmat e Livadhisë nuk kam lajmëruar menjëherë, meqë nuk më është dukur aq me rëndësi. Pastaj, si rrjedhim i klimës së krijuar, dhe kur më ra të jem i pranishëm për të mësuar se këto ndihma ishin dekonspiruar, atëherë kur po pyeste shoku Y., heshta qëllimisht; besoj se nuk është e domosdoshme të vihet në dijuni shoku Y., pasi për të është kuriozitet të dij më shumë se sa i takon, e kurjozët na dëmtojnë. Kështu, edhe në të ardhmen, duhet gjetur mënyrën se kujt duhet thënë nuk dij, jo pse, për rastin konkret mungon besimi, por edhe superbesimi i panevojshëm e kurioziteti janë të dëmshme.

Nuk di sa jemi duke u përgatitur për përkujtim të 2-Vjetorit të rënies së shokëve. Nëse mund të mbërri (sigurisht që më me rëndësi do të ishte të kem kohë për shkrime të tilla), do shkruaj diç për atë mbrëmje. Do ishte e nevojshme që të gjejmë çka për të pagëzuar me emrat e shokëve. P.sh., do më dukej e arsyeshme që në kuadër të LRSHJ-së të themelojmë Ndërmarrjen botuese, duke e pagëzuar me emrin "Vëllezërit Gërvalla". Kështu edhe me emrin e shokut Kadri do duhej të pagëzonim diç. Mendoni edhe ju në këtë drejtim, se çka është më mirë.

Iljazi (Ibrahim Kelmendi)

27. Letra e 17 janarit 1984

PËR REPUBLIKËN SHQIPTARE NË JUGOSLLAVI!

Në mërgim..., më 17 jan. 1984

I dashur shoku Mërgim (Sabri Novosella-shën i Xh. D.),
po të shkruaj, edhe pse, mendoj, do të duhej të më shkruaje ti njëherë, së paku që të bësh me dije se si u ktheve.

Në ndërkohë, besoj, duhet të jesh informuar mbi mbledhjen që mbajti komisioni, më 18 dhjetor 1983. Nga procesverbal mund të lexohet për vlerësimet që u bënë në përgjithësi, si dhe mbi propozimet konkrete. Ndër to, meqë të shkruaj, ishte propozimi im që ti të përjashtohesh nga ...

Me këtë rast nuk do shkruaj për arsyet që më shtynë që të jap një propozim të tillë, pasi ato janë në procesverbal, sado që janë shkurt të shtruar. Këtu mund të shkruaj vetëm kaq: që të bëjë propozim të tillë nuk më shtyri vetëm ato që ndodhën gjatë takimeve tona, por disa gabime (kështu i vlerësoj) të tjera, sidomos korespondenca me Musën dhe presioni që provohej të më bëhej në prag të darsmës në Bruksel, duke u thirrë në bisedat telefonike që bëheshin me ty.

Që kur isha në SHBA më ra të lexoj letër, që ti kishe shkruar. Ishte pseudonimi yt dhe dorëshkrimi, pasi shumë rreshta kishe shkruar me dorë. Atëherë nuk dija ku t'ia nisë, sa i përket asaj letre, përkatësisht sa i përket korespondencës në mes të Omerit dhe Musës. Më vinte keq se nuk dija se kush është Omeri, që t'i shkruaj menjëherë se nuk duhet të korespondoj me atë njeri në "kullë", pos për të tjera arsye, edhe se të gjitha letrat kalonin jo vetëm nëpër duartë e një agjente.

Se si ka ardhur gjer te korespondenca mes jush nuk di, por jam i mendimit: nuk është dashur të korespondosh në atë nivel dhe në ato rrethana. Duke u bazuar në relacionet që mbretëronin përpara vrasjes së shokëve dhe para "veprës" së "heroit" të "kullës", ti atë "heroi" nuk duhet ta kesh njohur përpara, ose, nëse e ke njohur, nuk duhet të kesh patur marrëdhënje në nivel të përkatësisë në të njejtat radhë.

Se sa letra ke ndërruar nuk e di, por, meqë po bazohem në relacionet tona, po më duket e drejt të t'i kërkoj, së paku ato që kanë të bëjnë me LRSHJ-në, – ndërsa ato të nivelit privat dhe familjar nuk më duhen, – qoftë edhe si kopje. Nisem edhe nga fakti se "heroi" para se ta kryen "veprën" ka qenë me trup, i tëri diku tjetër, dua të them në organizatë tjetër. Kështu, së pari duhet të vinin në pyetje qëndrimet ndaj organizatave tjetër, përkatësisht relacionet, pasi "heroi" duhet të ketë qenë njëri nga "kokat" udhëheqëse. Sidomos, kontestuese është letra që na e lexoi shumë vetave, tani së fundi, të cilën, sipas të gjitha parashikimeve, duhet të ia kesh shkruar ti.

Në prag të darsmës, në një takim që patëm me disa të tjerë ku qe edhe "heroi", erdhi deri te keqkuptimi, që në fakt nuk mund të quhet keqkuptim. Në atë mbrëmje "heroi" na shitej si udhëheqës, përkatësisht njëri nga "kokat" e LRSHJ-së. Ishte tejet brutal në disa relacione, bile edhe cinik, sidomos ndaj meje, pse jo edhe ndaj LRSHJ-së – ta zëmë, kur thoshte se mund që do t'i thuhej nga Lëvizja (tekstualisht më duket të ketë thënë: "edhe nëse më ngarkon Lëvizja për të marrë pjesë në konferencën për shtyp, unë nuk do të pranojë të marrë pjesë...") për të marrë pjesë në konferencë për shtyp, por do ta refuzonte. Pastaj hyri nëpër "lakra" duke provuar tërë kohën t'i bind të pranishmit se ishte në "kokë" të LRSHJ-së, kuptohet duke mbajtur qëndrim perfid – sikur për shkak të konspiracionit nuk po lëshohej në biseda më konkrete, edhe pse thoshte gjithçka që mund të dinte, besa edhe trillonte. Kuptohet se mbajta qëndrim përkatës, duke ia bërë me dije se si do të duhej të sjellet, si bashk me disa që ishin aty, në darsëm, nëse do dëshironin të demonstrojnë në radhët e asaj darsme.

Edhe nga letrat që më ka shkruar, – ato duhet t'i kesh edhe ti, – del se ai nuk është vetëm anëtar i "thjeshtë" i Lëvizjes. Bazuar në të gjitha, shtrohen pyetjet: a është ai anëtar i Lëvizjes? Kush e ka anëtarësuar, ose kur është anëtarësuar? Mos është zgjedhur në ndonjë funksion?

Meqë ke korresponduar me te, më intereson shumë, jo vetëm mu, por të gjithë shokëve të QE dhe të Lëvizjes, duhet t'ju intereson se çfarë mendojnë lidhur me "heroizmin" e "heroit", konkretisht çfarë mendimesh ke ti? Kjo është shumë me rëndësi, edhe për arsye se mund të kem mendime të gabuara dhe kështu t'i kem bërë padrejtësi shumë të madhe, duke ruajtur distancën përkatëse, besa edhe duke "shpifur" e "dezinformuar" edhe ndonjë bashkatdhetar. Po kështu, menjëherë shtoj: përderisa të mos më jenë siguruar prova bindëse, do ruaj distancën e mëparme. Po ndodhi të kemi mbajtur qëndrim të gabuar, do t'i bij në gjunjë.

Shih pra, janë këto arsytet plotësuese, që më bindën se duhet të bëjë propozim për përjashtimin tënd, përndryshe, asnjëherë nuk do ta kisha ndërgjegjen se kam mbajtur qëndrim patriotik-revolucionar, siç i takon militantit të radhëve të Lëvizjes.

Sigurisht që mund të ndryshoj mendimin atëherë kur të jem sqaruar se nuk kam vlerësuar gjërat në nivel, meqë nuk kam qenë mjaft i informuar (në rastin konkret nuk foli për "më ka thënë ky e ai", "kështu e ashtu"), ose se jam nxituar, duke mos ditur se si qëndron realiteti. Mu për këtë edhe të shkruaj, për çka, besoj, do marrë përgjegjeja pa shumë vonesë.

Gjatë takimeve që kishim, disa herë u sjellën bisedat në mes tej e shokut Zeqë. Lidhur me atë takim, mendoj se duhet të informosh, pak më shumë se sa i ke shkruar "heroit". Them kështu pasi disa fjalë shpëtuan gjatë fjalosjes mes teje e shokut Ujkan, prandaj, pos për arsyerave të tjera, edhe të mos lejohet mundësia për manipulim me fjalët që nuk janë incizuar as mbajtur shënime. Sidomos, do ndihmonte shumë informimi ytë, pasi, me gjasë, vetëm ti je ndër të gjallët, që mund të informosh mbi bisedimet, ashtu siç janë zhvilluar.

Edhe shokut Salih i kam shkruar më heret, se duhet përfundimisht të informohemi se si kanë shkuar bisedimet e 17 shkurtit dhe 15 Majit, por ai nuk e ka marrë mundin. Prap, edhe mes nesh është kontestuese kjo çështje, për të cilën nga shkruan shoku Salih në letrën e 3 janarit të këtij viti, duke u thirrë edhe në letrën që i ke shkruar, ose keni biseduar. Duhet njëherë e qartë, sidomos ju pjesëmarrësit e bisedimeve, të merrni qëndrim prej patriotëve revolucionarë, që ta thuani të vërtetën e plotë, dhe jo të përgjysmoni, duke lënë mundësinë për manipulime e keqkuptime. Shkruaj kështu, pasi asnjëherë nuk po merret qëndrim i qartë lidhur me A.P. me bashkëpunëtorë, por, si të them, po zhagiteni, "ngreh e mos e këput", çka nuk do të duhej. Ose ai i ka shkelur vendimet, ose thirret në vendimet e arritura, ose ekziston edhe mundësia tjetër, se duke u nisur në besimin që është formuar, keni biseduar lirshëm, pa mbajtur shënime precize, ose edhe mund që bisedimet të jenë bërë "shkel e shko" dhe nuk dini se çfarë ka mundur t'u shpëton. E gjithë kohën po mendoj edhe për bisedimet e 15 Majit, për të cilat duhet që të jemi të qartë. Përndryshe, nëse "zhagitet" "ngreh e mos e këput", lirisht mund të krijohet përshtypja se janë takuar në mes vete "matrapazët", që t'ia hedhin njëri-tjetrit, kush të mundet sa më shumë...

Me këtë rast do të pyes, se a ekziston mundësia të ta postoj letrën që ua kam shkruar shokëve të QE (i ka 20 faqe), pasi, bazuar në situatën politike, mund që do ta marrin, ose së paku vetëm ta kopjojnë (e çka duhet më shumë?).

Në atë letër, sa i përket Programit, kam qortuar shokun Salih, se përse duhet përsëri të merremi, përkatësisht t'i përzimë, shokët "përtej gardhi"; na thotë e shkruan se "ia kanë korrigjuar shokët...", mendohet varianti që ke dërguar ti. Mu nuk po më pëlqen të provohet t'i implikojmë të tjerët..., prandaj i thash Salihut se nuk është e vërtetë, dhe

qëndroj në atë që kam thënë. Së paku, çfarë na duhet të merremi me "muhabete" të tilla, pa ndonjë nevojë, përkatësisht në budallëk. Kopje të variantit tënd më kanë dërguar. Tani kemi grumbulluar mjaft material dhe besoj e shpresoj se nuk do të shtyhet shumë që të aprovohet Programi. Por, jam për atë që edhe formulimi përfundimtar të shumëzohet për diskutime e aprovim, në komitete, celula dhe anëtarëve. Për këtë arsye, kam dhënë propozimin për një Qarkore (bile edhe e kam shkruar dhe ua kam dërguar shokëve që të diskutojnë mbi te, për ta përmirësuar poqëse e shohin të arsyeshme se duhet të lëshohet).

Meqë diskutimet për përmbajtje të ZK nuk kanë përfunduar tërësisht, të them, për shkak të rrethanave që po na pengojnë (jo për dëshirën tonë), shumë do na ndihmonte sikur të shkruaje një analizë me shkrim. Mendoj se në një analizë të tillë do kesh mundësinë të shkruash më shtruar mbi ato që ke thënë, sepse ka mundësi që, padashas të ka shpëtuar ndogjë që s'do dëshiroje ta thuash, ose të ka mbetur pa thënë atë që do të duket e arsyeshme, dhe ajo që të ka mbetur pa thënë, mund që ndihmon në marrje të qëndrimit sa më korrekt-përkatës. E pata thënë edhe atëherë, se komisioni nuk do të jetë në gjendje të bëjë vlerësime të nivelit (po dihet me çfarë aftësisish disponojmë...), prandaj, së paku unë pata thënë, është mirë të angazhohet edhe ndonjë shok e shoqe, që mund të bëjë një analizë të tillë.

Më duket se shkrova ato që kisha për të shkruar kësaj radhe, pa përdorë taktikën – "të them vetëm kaq kësaj radhe". Kështu do dëshiroja që të më shkruash edhe ti, për të gjitha dhe, sigurisht, nuk do ngurroj të përgjigjem, duke u konkretizuar më shumë, poqëse kërkohet.

Të dëshiroj shëndet e suksese në punët e mbara, ty dhe shokëve.

PS. Ma dërgo një kopje të broshurës "Shpërngulja e shqiptarëve" të V. Qubrilloviqit në gjuhën turke (duket se ke harruar që më pate thënë se do të ma dërgosh, ose ndoshta mashtrohem).

Nga një kopje të kësaj letre po ua dërgoj shokëve të KE (QE).

Mirëupafshim. (Ibrahim Kelmendi)

28. Letra e 19 janarit 1984

PËR REPUBLIKËN SHQIPTARE NË JUGOSLLAVI!

Të dashur shokë të QE,

Në mërgim..., më 19.01.1984

përpara kam letrën që ka shkruar shoku Xhemë (që mban datën 6 jan., përkatësisht kallnorit, siç e ka shkruar ai, të këtij viti). Është shkruar shkurt e qartë, për të cilën aftësi edhe po i lakmoj. Por, siç na janë imponuar rrethanat (pjesërisht ia kemi imponuar vetvetes), gjer në takimin e mundshëm, do të duhej patjetër disa gjëra të shtrohen përmes letrave. E vetmja e keqe përmes letrave është, se i frikësohem përgjimit të tyre nga të zijtë... Përndryshe, sikur më duket, me atë rast po ekziston mundësia të mendohemi dhe t'i shtrojmë ato në letër, duke patur mundësi të peshohen. E kundërta po ndodh në takime, së paku në takimet gjertanishme, atmosfera në takime, përkatësisht puna, më duket të ketë shkuar si në mulli – pa rregull, ku bluhet pa rend e pa ujë. Shumë biseda kanë qenë në nivel aq të ulët, sa as ndonjë ndejë bisede të pasdarkave në fshat, netëve të gjata të dimrit, nuk u afroreshin, qoftë për nga përmbajtja e as për nga rendi. Flitej duke u menduar aty për aty. Si rrjedhim, tabloja e bisedave ngjante në artin modern...

Edhe unë jam për një takim, siç është shoku Xhemë. Por gjersa të bëhet i mundshëm, të parapërgatitemi. Për këtë na ndihmojnë letrat.

Teorikisht jemi të gjithë për mbytje të "fryma e poshtër dhe e dëmshme e grupeve" (Xhema), ndoshta edhe me gjithë mend po dëshirojmë, por ja, sikur të kishim sehire (siç shprehen ata që besojnë në mistifikime...), nuk po ia dalim dot. Mu për këtë, duhet të gjitha forcat e aftësitë, të mendjes e zemrës, duhet t'i konkretizojmë, që njëmend të mbytim atë frymë, vërtetë të poshtër. Dhe ajo, mbytet kryesisht me punë, që merr kohën më të madhe, për të mos tepruar për "lëshime". Kuptohet, gjatë punës, duhet gjithashtu të jemi sa më vigjilentë, për të lëshuar sa më pak gabime. Gabimet, kur krijohet klimë e keqe, mund të mos kuptohen si gabime të shpëtuar, por të bëra me qëllim...

Shoku Xhemë, pos që përsëritë se takimi është i domosdoshëm, do të duhej të shkruante se si është i mundshëm, për të mos na u përsërit ato që po na ndodhin nëpër gardhiqe.

Edhe unë jam jo vetëm i mendimit, se "ose një Lëvizje e fortë e unike", (do përmirësoja vazhdimin e fjalisë të shokut Xhemë) me "udhëheqësi dhe anëtarë të seleksionuar mirë e mirë, në çdo aspekt unik, që nuk përgatisin prapaska, por që i vishen punës-luftës si duhet..." (vazhdimin mund ta lexoni në letrën e shokut Xhemë.).

Këtu do të thoja, që për shokë e shoqe revolucionarë, militantë të Lëvizjes, po që se bien në burgje ose edhe japin jetën për çështje të popullit e atdheut, të mos përdoret shprehja "viktima". Meqë janë bërë arrestime dhe vrasje, duhet të nxjerrim konsekuenca për punë në të ardhmen, duke analizuar nëse është bërë ndokund ndonjë lëshim, në mënyrë që të ekspozohen dhe pastaj të arrestohen.

Lidhur me vrasjen e shokëve Rexhep e Nebih mirë që është lëshuar Komunikata menjëherë. Atyre u qoftë lavdi – lum populli që ka në gjirin e tij të tillë trima! Edhe pse nuk e mora Komunikatën, aq sa munda të mbaj mend kur m'u lexua në telefon, nuk m'u duk praktike të shkruhet se Shoku Nebih ka qenë anëtar Shtabi... (kështu diç ngjashëm). Thënë të drejtën, ndoshta edhe u nxitova kur ia thash shokut Xhemë atë mendim, por edhe tani, disi nuk po jam në gjendje të vlerësoj nëse është shkruar më shumë se sa do të ishte praktike, përkatësisht sa do kërkonte taktika e momentit. Vetë nuk do dija si do të shkruaja në atë gjendje.

Sa për "fraksionin" që përmend Salihu, unë kam shkruar ca më gjerësisht në letrën e kaluar, por kjo që shkruan shoku Xhemë këtu, është përmbledhur thukt e qëlluar, duke qenë edhe vet i të njejtit mendim.

Sa për "punëtorët që kanë mbetur rrugëve të botës...", nuk di çfarë të them. Së pari, ata nuk i nxuarëm ne. Pastaj, gjendja se shkonte e keqësohej, duke kushtëzuar shtimin e papunësisë së madhe në Kosovë. Nisur nga kjo, edhe perspektiva e kthimit të menjëhershëm për t'u punësuar, nuk ka qenë aq e ndritur. Ndoshta vetëm në mënyrën që t'ua plaçkitin edhe ato pak deviza që kanë mundur t'i ruajnë, do punësonin disa, në dam të papunëve në vend. E ata pastaj do të detyroheshin, gjithashtu, të marrin botën në sy (në Libi e gjetiu, ku është duke ua gjetur vendin klika e Beogradit...). Pra, marrë në interesin e përgjithshëm kombëtar, prap i njëjti rezultat, dua të them e njejtja e keqe, plus hallit të të rinjve për t'u bërë mërgimtarë – jetë shumë e vështirë. Meqë jemi optimistë se do fitojmë, sigurisht që vetëm në atë mënyrë është perspektiva më e mirë që të kthehen të gjithë. Prandaj, t'i ruajmë duhet, por t'i "kursejmë" duke i frikësuar..., nuk kemi nevojë, përkatësisht nuk duhet. Është koha kur duhet të qëndrojmë, të rezistojmë, t'i tregojmë botës se nuk mund të na nënshtrijnë, për çka duhet sakrifikuar!

Mendoni edhe njëherë mirë, se si është i mundur takimi. Unë, përfundimisht ende nuk kam të rregulluar asgjë, por aty ku do të vendosni të takohemi, do të jem, i

gjallë a i vdekur, siç do t'i thonë një fjale. Nuk do të gaboj si kësaj radhe, jo vetëm për fajin se nuk kam ditur si t'i ik asaj që kam marrë me mend dhe që kam mundur t'i ik...

Po ua dërgoj edhe kopjen e letrës, dërguar shokut Mërgim.

Iljazi (Ibrahim Kelmendi)

(Faridin Tafallari, Terror-Dhimbje-Qëndresë, Tiranë 1997, f. 416-417)

29. Letra e 19 marsit 1984

PËR REPUBLIKËN SHQIPTARE NË JUGOSLLAVI!

Në mërgim..., më 19.3.1984

Të dashur shokë,

shpejt e shkurt po ju shkruaj këtë letër.

Së pari, tani më ra në dorë "Organi" "Republika e Kosovës", që del si "organ i Komitetit – Deges së LRSSHJ: "Murat Mehmeti". Vetëm sipërfaqësisht ia hodha një vështrim. Po ua dërgoj nga një kopje që ta lexoni edhe ju, në mënyrë që pa vonuar të shprehni mendimin tuaj. Ma merr mendja se është një hap jo vetëm i gabuar i atyre që kanë vendosur ta nxjerrin, jo vetëm që ka shkelur çdo dicitlinë e rregull elementare, por edhe pse ka qëllime të mbrapshta e hileqare. Sikur të ishim distancuar nga "Punëtorët" me kohë, do të thoja se pa ndonjë ngurrim, që në numër të parë të ZK duhet të informojmë lexuesit se kjo pamflete nuk ka të bëjë me LRSHJ-në, praktikisht nuk ka komitet të ndonjë rrethi që quhet "Murat Mehmeti" (nëse me të vërtetë nuk ka të njëmendët, pos në qoftë se e ka formuar Musa Hoti; nëse ka formuar komitet të Lëvizjes Musa Hoti, atëherë jam kategorisht që mos ta njohim), e aq më pak është marrë ndonjë pëlqim për të nxjerr "organ" të tillë.

Pasi nuk patëm kohë për të biseduar, propozoj gjithashtu që artikujt që kanë shpërndarë Mërgimi e Musa Hoti, duke keqpërdorur simpatizantë të Lëvizjes, që mu më kanë rënë në dorë gjithsejt tetë, të mos pranohen se i ka nxjerr Dukagjini, "në emër të të cilit" janë shpërndarë. Sa për përmbajtjen e atyre artikujve dhe këtij "organi", mendojn se nuk duhet të shkruhet, pasi do të fillohej të polemizohet, ose do të kishte karakter polemizues njoftimi që do bëhej.

Tani jemi në prag të 3-Vjetorit të demonstratave të përgjakshme të Kosovës. Besoj se pos një kryeartikulli që duhet të botohet në ZK, do të duhej të organizohen aktivitete. Sa për demonstratë, pasi nuk ka ndonjë aktivitet ndërkombëtar, përkatësisht ndonjë tubim ndërkombëtar, nuk do më dukej e domosdoshme të thirret ndonjë darsëm. Sikur të kishim biseduar dhe përgatitur teren, marrë parasysh "disponimin" momental të opinionit austriak, sidomos do të kishte qenë mirë të thërrisnim një darsëm atje. Por, po e patë të arsyeshme, nuk do të duhej ta qesim në harresë ndonjë darsëm, ose t'i koncentrojmë forcat, që në mënyrë më të përgatitur se herave të tjera, të dalim në demonstratë, masovikisht, për 1 Majin, bashkë me proletariatin e vendit.

Klubi ED (Emin Duraku - shën i Xh D.) ka vendosur bashkë me 6-Vjetorin (si pretekst maskues) të shënon 3-Vjetorin e Demonstratave në Kosovë, me karakter të gjerë. Çfarë mendoni ju?

Pranoni përshëndetje revolucionare

Shoku (Ibrahim Kelmendi)

30. Letra për "Dukagjinin", 22 qershor 1984

Të dashur dukagjinas,

Hamburg, më 22 qershor 1984

... Lidhur me një ZK të jashtëzakonshëm, përkatësisht numër të jashtëzakonshëm, siç e quajtet, nuk di shumë se çka të them. Disa mendime ua thash edhe në telefon. Meqë nuk kam marrë ende ndonjë material, kot provoj të jap mendime konkrete. Por një do ta them, gabimet që mund të bëhen duke ju "përgjegjur" provokatorëve banditë nuk do t'i mbroj, nëse ato bëhen duke u nxitur dhe duke shkruar nga pozita prej të godituri. Këtë detyrohem ta them, pasi janë shumë gabime nga e kaluara, për të cilat para Skenderi kam tërënjë vërejtje, por që nuk ka bërë efektin e vetë. Dhe tani ky farë Skenderi ka mundësi të na kafshoj pikërisht në ato gabime dhe në të tjerat që do t'i bëjmë, nëse nuk do të jemi më të matur e më vigjilent se sa gjer më tani.

Nuk kam çka të shkruaj më shumë, kryesisht pse nuk kam kohë dhe nuk po mund të konkretizohem më shumë në këtë rast. Kam pritur që të më bije në dorë materiali i këtij ZK para se të vëhet në qarkullim dhe ndoshta do kisha mundur t'ju ndihmoj në formulim, duke dhënë edhe unë ndonjë ide.

... Me përshëndetje revolucionare, duke ju dëshiruar sukses në punët e mbara në shërbim të çështjes!

– Rroftë populli ynë heroik e liridashës!

– Rroftë LRSNJ, avangarda e popullit tonë!

I juaji Shoku (Ibrahim Kelmendi)

BIG BROTHER-i i Vitit 1984

1. Ai ishte më i sinqerti
2. Letër Shokëve dhe Shoqes së Komitetit Qendror të LRSNJ
3. RRETH HARTIMIT TË PROJEKTPROGRAMIT DHE PROJEKTSTATUTIT
4. Komiteti Qendror i LRSNJ i dërgon njoftim më të sinqertit
5. Letër për shokë e shoqe të "KQ", (15 shkurt 1985)
6. TË DËNOHET BASHKIMI I 17 SHKURTIT DHE 15 MAJIT 1982
7. BIG BROTHERI I VITIT 1985
8. LRSNJ tash e tutje LPRK, shtator 1985
9. Historiku i shkurtër i Organizatës Marksiste-Leniniste të Kosovës dhe veprimtarisë së saj revolucionare
10. BIG BROTHER-i PËR PARAROJËN
11. Komunistët të cilët ia bënë varrin shoqërisë socialiste
12. Miku i mirë në ditë të vështirë
13. PROJEKTSTATUTI I ORGANIZATËS MARKSISTE LENINISTE TË KOSOVËS (OMLK)
14. "ZËRI" I BIG BROTHERIT PËR PARAROJËN
15. I NDERUAR
16. PËRSHËNDETJE – ME RESPEKT

1. Ai ishte më i singerti

Mustafë Xhemali: "Vetëm kur jam arratisur nga Kosova në pranverën e vitit 1984, dhe veçanërisht në verën e atij viti, njohja me I. K., u bë aktive, në bashkëpunim të plotë dhe pothuajse krejt të natyrshme. Veprimtarinë e tij e kisha të njohur. Me rrëfimet e tij, ai vetëm më bindi nga afër se ai kishte qenë dhe ishte kapaciteti udhëheqës organizativ, i cili kishte mbetur i vetmuar, pa shokë që kishin nivelin e tij, guximin dhe këmbëngulësinë për të luftuar dhe ecur përpara, pa intelektual, dhe... me një dëshprim të madh, që ai e ndrydhte brenda vetes. Ai para meje ka qenë i hapur dhe pa ekuivok, pa makijazh dhe pa sforcim. Mbase me dhjetëra herë m'i ka përsëritur ngjarjet që më vonë do ta marrin formën e prozës së gjatë ATENTATET. E ka bërë këtë edhe në kuadrin e punës që bënim bashkë (ishim në udhëheqje të LRSSHJ-së e pastaj të LPRK-së e OMLK-së degës jashtë vendit si dhe në Redaksinë e ZiK-ut), por e ka bërë këtë edhe si para një shoku, miku, intelektual. Unë i besoja. Ai ishte më i singerti...."

Shikuar në aspektin tjetër IK në atë kohë, realisht ishte lideri politik kryesor në mërgatë, gjë që për mua, thjeshtë, e bënte të kuptueshme mosrespektimin e tij të plotë të rregullave dhe disiplinës që, ne, të cilët kishim ardhur në pranverën e vitit 1984 nga Kosova (shih f. 459), përpiqeshim t'i vendosim brenda LRSSHJ-së ekzistuese, LPRK së ardhshme dhe OMLK-së Djv, ato rregulla dhe mënyra pune me disiplinë të lartë, të përditshme, milituese dhe organizative ashtu siç kishim bërë brenda në Kosovë." (ATENTATET E ZBULUARA, Fjala promovuese më 14 prill 2007 në Dyzeldorf, Gjermani, për romanin e Ibrahim Kelmendit ATENTATET, botoi "Fokus", Prishtinë, 2007, www.pashtriku.org)

2. Letër Shokëve dhe Shoqes së Komitetit Qendror të LRSHJ

Të dashur shokë,
e dashur shoqe,
meqë u përpjeka dhe si dita e përfundova së shkruari, sipas mendimit tim kryeartikullin për ZK të ardhshëm, po ua dërgoj për diskutim e (mos)aprovim.

Përse veproj kështu dhe nuk ia dërgoj vetëm Redaksisë së ZK?

Për mendimin tim, kur është në pyetje ndonjë kryeartikull me këtë përmbajtje, në të cilin shtrohen pjesë të rrugës së Lëvizjes, duhet të diskutohet nga shokët e Dukagjinit (Komitetit Qendror-shën i Xh D), pasi vetëm mendimi e vendimi i Redaksisë nuk mjafton.

Kur njeriu nuk është mjeshtër i të shkruarit, sidomos punimeve të kësaj natyre, atëherë vështirë që mund të kufizohet që përpara se sa duhet të jetë i gjatë, gjegjësisht se si duhet të shkruhet sa më i shkurtër, më i përmbledhur, duke i thënë të gjitha që duhet thënë për atë temë, në kuadër të artikullit që i dedikohet, në rastin tonë konkret ZK. Vetëm kur u thellova në materie, pash se nuk mund të përmbledhem më shkurt. E që të shkruhet për këtë në mënyrë të zgjeruar e shtruar, mendoj se është dashur edhe më heret.

Kur kisha parasysh ZK, artikujt kryesisht informativ, që nuk i ka ngjarë organit, siç i ka takuar, atëherë kisha bindjen se lodhësia kot, pasi si i tillë nuk mund të botohet – do t'u merr vend lajmeve e rubrikës letrare... Ose kisha parasysh se do t'u merr atyre që do ta përmbledhin në përmasa, që të del i gjatë aq sa e lejojnë kriteret e Redaksisë. Por, në ndërkohë, duke konsultuar "Lirinë" dhe gazetat tjera, morra frymë lirisht se mund të shkruaj "lirisht", pa patur frikë se zgjerohem tepër. Përfundimisht doli siç do ta shihni, ashtu si diç e mund të shkruaj unë. Dual i gjatë pra (përafërsisht 63000 të rënda

makine; kryeartikulli i "Lirisë", "Lufta e popullit tonë është e drejtë dhe do të triumfojë", nr. 3, Maj 1981, ka së paku 75 500 të rënda makine).

Tani, siç e thash edhe në fillim, propozoj që të diskutohet e të (mos)aprovohet nga dukagjinasi, për t'u botuar ose si kryeartikull, ose si broshurë. Për të dy rastet është i domosdoshëm përpunimi i temelt (fatmirësisht tani kemi shokë të zotët për këtë punë) dhe të shohim, besoj se do të dali punim i qëlluar.

Të kthehem të mendimi që dhash në të përshkuar, se Organi i LRSHJ, ZK, nuk ka qenë organ i nivelit që i ka takuar. Për këtë që them, nuk dyshoj, por kam vështirësi të arsyetoj këtë që them, jo për tjetër sa për faktin se rrethanat kanë qenë të atilla që na kanë kushtëzuar diç të tillë, edhe atëherë kur mund të mos kemi dëshiruar ndonjëri. Me shpresë se punët do të vëhen në binarë (pasi bajraktarët, frakcionistët, likuidatorët na u shporrën nga qafa, me ç'rast dua të shpresoj se nuk do të na ndodh diç e tillë kaq e shëmtuar në të ardhmen), nuk po zgjatem më shumë në këtë drejtim, por vetëm do të apeloj që në të ardhmen çdo herë e më në nivel ZK t'i del misionit të vet si Organ i LRSHJ. E për të kushtëzuar këtë përmirësim, është e domosdoshme që kësi artikuj të diskutohen nga dukagjinasi dhe nga anëtarët e Redaksisë, por këta të dytit duhet t'u nënshtrohen vendimeve të dukagjinaseve (nuk kam nevojë të përsërisë se rasti i Numrit të "Jashtëzakonshëm", numrit 5 pra, nuk dëshiroj të përsëritet, përkatësisht duhet të angazhohemi më vendosmërisht që të mos lejojmë të përsëritet, sado kokëfortë që mund të tregohet ndonjëri nga ne – përfundimisht duhet të praktikohen me rigorozitet format demokratike të organizimit të radhëve revolucionare!)

Edhe njëherë mbi grumbullimin, sistemimin dhe bërjen me dije të të dhënave mbi të varrët, të burgosurit dhe të përjashtuarit nga puna e shkolla. Shoh se shumë pak e hiç interesohemi të kompletojmë këto të dhëna. Informatat nga ana e bashkatdhetarëve, nëse janë dërguar fare, atëherë janë dërguar në Redaksi. Por sistemimi i atyre të dhënave, me gjasë, nuk është bërë fare; ka mjaftuar të shkruhet në ZK shkurt, siç e ka shkruar dhe të mos sistemohen të dhënat tjera që kanë mundur të dërgohen në letrat që i janë dërguar Redaksisë. Listat që mi dha Xhema, flasin vet se sa emra kishin, si ishin të radhitura dhe a janë futur në përdorim. Tani është e domosdoshme të konkretizohemi në këtë punë, pasi në afirmimin e çështjes tonë tek opinioni ndërkombëtar, provat më kokëforta janë të dhënat e tilla. Sidomos, siç më thoshte edhe një gazetarë gjatë bisedimeve, rëndësi të madhe do të kishte grumbullimi i emrave të nxënësve të përjashtuar nga shkollat fillore dhe të mesmet. Prandaj, le të vendosim edhe njëherë që të ndërmarrim fushatë intensive për grumbullimin e të gjitha të dhënave, që kanë të bëjnë me të varrët, të burgosurit, të përjashtuarit nga puna, shkolla e studimet. Ata të ai nga Londra shkruajnë se me rëndësi për ta është dita dhe vendi i gjykimit dhe dënimi në bazë të cilit nen është shpallur. Po kështu, ata luten që t'ju sigurojmë artikuj nga gazetatat e ndryshme jugosllave, ku flitet për dënimet. Të kuptojmë se sa rëndësi ka botimi i një liste, në formë broshure. Por, sa për material plotësues, ta zëmë në vend të parathënies, pos letrës së të burgosurve, do të duhej edhe një punim tjetër; nuk e di çfarë mendoni edhe ju për artikullin – "Akuzojmë tiraninë", pra, duhet të mendohemi se si duhet t'ia bëjmë me Komitetin e Kosovës për Mbrojtjen e të Drejtave të Njeriut, pasi në atë artikull për atë Komitet bëhet fjalë.

Të shiqojmë nëse kemi forca për të nxjerrë borshura në gjuhë të huaja, meqë nuk po kemi forca për ta nxjerrë buletin e paraparë. Pra, duhet që të caktohem, kush cilën temë do ta trajton, dhe pastaj të merremi me përkthime, shtypje e shpërndarje. Le të analizohet ky propozim dhe të merret vendim i realizueshëm. Por, në të njejtën kohë, ata që do të merren me trajtim të temave të veçanta duhet të kenë parasysh lexuesin e huaj dhe jo lexuesin shqiptar.

Uroj të ju punon shëndeti si duhet dhe gjithashtu uroj të keni sukses në punë të mbara revolucionare

Në mërgim... më 30 gusht 1984

Pranoni përshëndetjet e flakëta revolucionare, Nënshkrimi (Ibrahim Kelmendi)

3. RRETH HARTIMIT TË PROJEKTPROGRAMIT DHE PROJEKTSTATUTIT

Komiteteve të rretheve, celulave e të gjithë anëtarëve të LRSSHJ-së (letër interne)
3/4 nëntor 1984

Të dashur shokë e shoqe,

Komiteti Qendror në dy mbledhjet e veta të parafundit caktoi komisionet për hartimin e Projektprogramit (PP) dhe Projektstatutit (PS) të LRSSHJ-së. Në mbledhjen e fundit (më 3/4-11-1984) KQ i diskutoi PP dhe PS ta hartuara nga komisioni i ngarkuar. Me këtë rast u vendos që PP të lëshohet në diskutim në të gjitha komitetet e rretheve dhe në të gjitha celulat e LRSSHJ-së, kurse PS të lëshohet në diskutim vetëm në komitetet e rretheve. Po kështu, u vendos që PP dhe PS t'u jepen për diskutim edhe organizatave e grupeve revolucionare e komuniste, që militojnë vetëm në Kosovë.

Anëtarët e KQ dhe komitetet në rrethe kanë të drejtë t'ua japin për diskutim PP dhe PS edhe atyre simpatizantëve (te të cilët kanë besim të plotë dhe pritjet që së shpejti do të anëtarësohen në radhët e LRSSHJ-së), nëse janë të mendimit se diskutimet, vërejtjet, sugjerimet e propozimet e tyre japin kontributin?

Diskutimet, nëpër tubime duhet të kryhen gjatë muajit nëntor, kurse rezultatet e diskutimeve, vërejtjeve, sugjerimeve e propozimeve duhet të dorëzohen më së largu gjer në fillim të dhjetorit (celulat dhe militantët që nuk militojnë në ndonjërin nga celulat, meqë ato në rrethe ende mungojnë, sugjerimet e propozimet e veta duhet t'ua dorëzojnë komiteteve të rretheve). Vërejtjet, sugjerimet e propozimet që do të vijnë pas fillimit të dhjetorit të këtij viti do ta kenë vlerën e vet, por nuk do të mund të merren parasysh, pasi në ndërkohë KQ dhe komitetet e rretheve do të mbajnë mbledhjen për të aprovuar Programin dhe Statutin e LRSSHJ-së.

Gjatë diskutimeve duhet të mbretëroj fryma e lartë e patriotizmit përparimtar dhe revolucionariteti, pjekuria e lartë ideologjike e politike, niveli i përgjegjësisë dhe demokracia e vërtetë revolucionare. Diskutimet duhet të bëhen të peshuara e të shtruara, kurse vërejtjet, sugjerimet e propozimet të jenë të përmbledhura, të thukta e koncize, tamam siç i takon nivelit të përgjegjësisë që duhet ta ketë çdo militant e militante e Lëvizjes. Ai që provon të ndrydhë frymën e demokracisë revolucionare gjatë diskutimeve, ai që provon që të tjerët të mos i lejojnë t'i shprehin lirisht mendimet, vërejtjet, sugjerimet e propozimet, do të shkelë një nga parimet themelore që ka Lëvizja jonë – demokracinë revolucionare brenda radhëve të organizuara të LRSSHJ-së.

Diskutimet rreth aprovimit të PP e PS të LRSSHJ-së janë të një rëndësie të madhe, pasi nga to do të dalin PROGRAMI e STATUTI i LRSSHJ-së, që do të thotë, do të dalë Programi i luftës, ideologjisë, politikës e taktikës që duhet të ndjekë Lëvizja jonë për të arritur qëllimin e vet të fundit – fitimin e Statusit të Republikës për Kosovën dhe të drejtat e tjera shoqëruese që do të parashohë PROGRAMI.

- Rroftë populli ynë heroik liridashës!
- Lavdi heronjve e dëshmorëve të rënë për liri e të drejta të popullit!
- Rrofshin popujt liridashës të mbarë botës!
- KOSOVA – REPUBLIKË!

- Rroftë LRSSHJ!
Përsëhendetje revolucionare,
Komiteti Qendror i LRSSHJ-së
(Faridin Tafallari, Terror-Dhimbje-Qëndresë, Tiranë 1997, f. 256-257)

4. Komiteti Qendror i LRSSHJ i dërgon njoftim më të sinqertit

NJOFTIM

Njoftohen shokët Xhafer Shatri dhe Ibrahim Kelmendi për mbledhjen e fundit të KQ të LRSSHJ.

Më 10.2.1985 KQ (Komiteti Qendror-shën. i red.) mbajti mbledhjen e vet të rregullt. Rendi i ditës ishte:

1. Analiza e Organit Qendror dhe shqyrtimi i propozimeve të Redaksisë për ndryshimin e "Zërit".
2. Raportimi për punën e forcave të organizuara në Kosovë.
3. Shqyrtimi kritik lidhur me sjelljet dhe punën e Xhafer Shatrit dhe Ibrahim Kelmendit.

Në mbledhje nuk ishin prezentë shokët Xhafer Shatri e Ibrahim Kelmendi.

Duke pasur parasysh situatën e krijuar në KQ të cilën e ka kapluar fryma e grupeve, frymë e cila është reflektuar edhe te forcat e tjera të organizuara jashtë dhe në Kosovë, andaj është e domosdoshme të bëjmë spastrimin e radhëve nga shokët të cilët janë të ngarkuar me këtë frymë përçarëse dhe të cilët po i shkaktojnë dëme luftës sonë.

Shoku Xhafer Shatri pas ardhjes në Zvicër i hyri punës në të madhe, duke kontribuar shumë në nxjerrjen e Organit qendror "Zëri i Kosovës". Vazhdimësia e daljes së "ZK" është e lidhur drejtpërdrejt me Xhafer Shatrin. Puna organizative e forcave të organizuara në Kosovë dhe fryti që del prej tyre është i lidhur edhe me Xhaferin. Por, në punën e tij Xhaferi bëri edhe mjaft gabime e lëshime politike, duke krijuar edhe frymën e mosbesimit ndaj njerëzve. Duke e parë situatën e krijuar, Xhaferi (Shatri-shën. i red.) dha dorëheqje me shkrim.

Derisa shoku Xhafer në punën e tij që bëri e përcollën edhe gabimet, në anën tjetër shoku Ibrahim Kelmendi nuk punoi fare, por u muar drejtpërdrejt me përcjelljen e punëve dhe gabimeve të Xhaferit; u muar me thash e thëna në mesin e punëtorëve. Bëri edhe dekonspirime të sekreteve të KQ të LRSSHJ-së. **Keqpërdori ndihmat për Kosovën**, duke mos sjellur në fond asnjë qindarkë. P.sh. të përmendim vetëm rastin e

I. Kelmendi: "Në xhepat e mijë të grisur nuk ka bir nëne (e as bir kurve), që do mund të kërkonte të hollat e tij ose të hollat e cilido kontribues, që do të thotë se nuk kam shpërdoruar e përvetësuar nga ato mjete për vete dhe as për familje." (Afishuar me: 23.03.2007 21:18, www.kosova.de)

Suedisë në praninë e katër vetave një familje shqiptare i dha ndihmë luftës sonë prej 50.000 korona, **prej të cilave nuk solli asnjë qindarkë**, si dhe ndihmat që dhanë familjet e tjera në Suedi; mbjellja e frymës përçarëse në vetë KQ; mospërgjegjësia ndaj punës; prishja me miq zviceranë; mosaktiviteti me të huaj dhe krijimi i ftohjes së tyre ndaj luftës sonë dhe organizatës sonë; qëllimi pretendues i formulimit të fjalisë: "Vërejtjet, sugjerimet e propozimet që do të vijnë pas fillimit të dhjetorit të këtij viti do të kenë vlerën e vet, por nuk do të mund të merren parasysh, pasi në ndërkohë KQ dhe Komitetet e rretheve do të mbajnë mbledhjen për të aprovuar Programin e Statutin e

LRSHJ-së" me të vetmin qëllim që të sabotojnë punën e diskutimit dhe shqyrtimit të PP dhe PS dhe në anën tjetër për të shfrytëzuar tubimin e zgjeruar për diskreditimin e Xhaferit me gabimet që ka bërë. Në KQ nuk qe vendosur të thirrej tubimi i KQ me Komitetet e rretheve të cilën gjë shoku Ibrahim Kelmendi e bëri pa dijen e shokëve duke u thirrur se gjoja qenka vendosur në mbledhjen e KQ, gjë e cila nuk ishte e vërtetë. Qëllimi i gjithë kësaj ishte ai që cekëm më lart, diskreditimi i Xhaferit para një tubimi më të gjerë. Kjo tregon se si disa njerëz veprojnë pas shpine pa u konsultuar me shokë, e këtë e bëri shoku Ibrahim Kelmendi.

Për shkak të krijimit të mosbesimit ndaj njerëzve, lëshimeve dhe gabimeve politike si dhe mbjelljen e frymës përçarëse KQ vendosi që të ndër marrë masa për nxjerrjen e KQ nga situata e krijuar dhe të bëjë spastrimin e radhëve nga mospunëtorët dhe përçarësit.

Kështuq KQ i LRSSHJ me shumicë votash 4:1 (katër me një) vendosi që shokët Xhafer Shatri dhe Ibrahim Kelmendi përjashtohen nga KQ i LRSSHJ-së, përderisa të mos e vërtetojnë të kundërtën me aktivitetin e tyre.

10 shkurt 1985 Zvicër

KQ i LRSSHJ (Komiteti Qendror i Lëvizjes për Republikën Socialiste Shqiptare në Jugosllavi)

(Faridin Tafallari, Terror-Dhimbje-Qëndresë, Tiranë 1997, f .253-254)

I. Kelmendi: "Në xhepat e mijë të grisur nuk ka bir nëne (*e as bir kurve*), që do mund të kërkonte të hollat e tij ose të hollat e cilido kontribues, që do të thotë **se nuk kam shpërdoruar** e përvetësuar nga ato mjete për vete dhe as për familje." (Afishuar me: 23.03.2007 21:18, www.kosova.de)

5. Letër për shokë e shoqe të "KQ", (15 shkurt 1985)

dëshiroj t'ju bëjë me dije se Njoftimin e mora dje, më 14-02-1985, lidhur me vendimin që kishit marrë në mbledhjen e rregulltë të "KQ", të mbajtur më 10-02-1985.

...Tani më duket e nevojshme t'i bëjë disa pyetje, që do të shërbejnë në sqarime plotësuese lidhur me vendimin që keni marrë:

- **A kam të drejtë të jem edhe më tej anëtar i komisionit për përgatitjen përfundimtare të Projektstatutit të LRSSHJ-së?...**

- A kam të drejtë të merrem me punime teorike, organizative e të aktiviteteve, të cilat do t'ia dorëzoja forumit udhëheqës më të lartë të LRSSHJ-së?...

- A mund t'i vazhdoj përpjekjet për regjistrimin zyrtar të LRSSHJ-së në njërin nga shtetet e Evropës Perëndimore?

- A do të vazhdohet të më jepen ndihmat e domosdoshme për të mundur të vazhdojë veprimtarinë në shërbim të LRSSHJ, deri sa të kem bindjen (si tani) se ajo nuk ka devijuar nga vija që përcaktohet nga Programi që aprovuam para pak kohe?...

Edhe njëherë - ju uroj sukses vetëm në punët e mbara, dalshim fitimtarë e fagebardhë në veprimtarinë tonë vërtet patriotike e revolucionare!

-Kosova – Republikë!

- Rroftë LRSSHJ!

Përsëndetje revolucionare Shoku (Ibrahim Kelmendi)

(Letër KQ të LRSSHJ, 15 shkurt 1985; Faridin Tafallari, Terror-Dhimbje-Qëndresë, Tiranë 1997, f. 419-420)

6. TË DËNOHET BASHKIMI I 17 SHKURTIT DHE 15 MAJIT 1982

KOMITETEVE DREJTUESE DHE KOMITETEVE TE RRETHEVE TE LRSSHJ-së
Shokë dhe shoqe,

Kohëve të fundit, në KQ të LRSSHJ-së, nga grupe individësh në botën e jashtme kanë ardhur kërkesa (gojore e me shkrim) me dëshirën për të ardhur deri te një bashkim. Këto grupe gjatë viteve 1982 e 1984 dolën nga LRSSHJ dhe një pjesë e tyre nxori organin “Punëtorët” e një pjesë tjetër nxori në Suedi gazetën me të njëjtin emër si të organit të LRSSHJ-së “Zëri i Kosovës” duke formuar një “Lëvizje” të re për Republikën e Kosovës.

Të gjithë ata që po kërkojnë bashkim nuk kanë shtruar asnjë kusht.

Duke e ditur dëshirën dhe vullnetin e mirë të elementëve dhe kuadrove të shëndoshë, patriotëve dhe revolucionarëve, posaqërisht nga radhët e klasës punëtore që punon dhe vepron këtej, si dhe duke e parë të nevojshme dhe parimore që secilit që dëshiron për të luftuar në një front të përbashkët për realizimin e kërkesave të popullit të Kosovës, t’i krijohet mundësia për t’u bashkuar në organizatën gjithëpopullore – LRSSHJ, KQ është i mendimit që t’i marrë parasysh këto kërkesa që janë bërë dhe, juve, shokë e shoqe po ua paraqesim si Propozim për diskutim këto KUSHTE që do t’u parashtronim këtyre grupeve për BISEDIME rreth bashkimit.

Grupet që kanë kërkuar bashkimin, a janë grupe me celula apo pa celula. Nëse janë grupe pa celula, atëherë nuk mund të shtrohem për bisedime si me palë. Nëse këto grupe me celula, e konsiderojnë veten organizata (pavarësisht se këto dikur qenë ndarë nga gjiri i LRSSHJ-së), le ta dëshmojnë ekzistencën e vetë dhe punën e tyre si organizata duke treguar rrjetin e tyre organizativ, si jashtë ashtu edhe brenda.

(Këtë punë verifikimi duhet ta kryej një komision i posaçëm i LRSSHJ-së, dhe pastaj (të vendosim se a të) të shtrohem apo të mos shtrohem për bisedime).

Gjatë bisedimeve rreth bashkimit si kushte do t’u paraqesim këto:

Të dënohet bashkimi i 17 shkurtit dhe 15 majit 1982, i cili ishte një bashkim krerësh e jo organizatash dhe nuk ishte aspak bashkim e organizim i masave. Një bashkim dhe organizim të masave, si jashtë ashtu edhe brenda, e patë shtruar drejtë në verën e vitit 1981 OMLK në “Teza rreth Frontit Popullor për Republikën e Kosovës” dhe në përpjekje e sipër për t’i vënë në jetë ranë shokët: Jusuf Gërvalla, Kadri Zeka dhe Bardhosh Gërvalla. Këto “Teza...” u shkelën pikërisht një muaj pas rënies së tyre, në bashkimin e 17 shkurtit 1982.

Të definohet se çfarë organizate po ndërtojmë: Parti a organizatë të masave apo front popullor i gjithë masave.

Të ndërpritet agjitacioni e propaganda dhe veprimet kundër marksizëm-leninizmit, veprime këto që shkojnë në dëm të unitetit dhe luftës sonë për Republikë.

Në bisedime të marrin pjesë nga tre përfaqësues prej secilës palë.

Në bisedime nuk mund të marrin pjesë krerët e bashkimeve të 17 shkurtit dhe 15 majit 1982.

Ndonjë bashkim eventual mund të bëhet dhe shpallet vetëm si bashkim i emigracionit përparimtar jashtë Kosovës dhe i organizuar në kuadër të një dege të jashtme të LRSSHJ-së që duhet të ndërtohet, zgjerohet dhe funksionoj brenda në Kosovë.

Nëse këto kushte, që do t'u vihen për bisedime atyre që po kërkojnë bashkimin do të diskutohen, plotësohen dhe të bëhen vërejtjet dhe orientimet e nevojshme edhe nga ju (që të aprovojmë unanimisht) ne do t'u hyjmë bisedimeve për bashkim; në të kundërtën duhet t'u themi qartë përse nuk duam as bisedime, as bashkim!

Përsëritjet revolucionare

KQ i LRSSHJ

Prill 1985

(Faridin Tafallari, Terror-Dhimbje-Qëndresë, Tiranë 1997, f. 255-256)

7. BIG BROTHERI I VITIT 1985

Hysen Gërvalla: *"Ashtu siç është e ditur, duke filluar nga data 17-02-1982, u bashkuan LNÇKVSHJ dhe PKMLSHJ; respektivisht, më 15-05-1982, këtij uniteti iu bashkangjiti edhe OMLK-ja. Këto grupe formuan organizatën e vetme, e cila vepronte nën emrin LRSSHJ.*

Duke u mbështetur në këto fakte, krijohet bindja se ky bashkim ishte vetëm formal e jo esencial. Këtë e dëshmojnë edhe ngjarjet të cilat pasuan dhe sollën deri te shpartallimi i Lëvizjes.

Mirëpo, siç thotë Lenini, bëhet një bashkim i cili dështon për të ardhur deri te një bashkim i fuqishëm (duhet të ndahemi që të bashkohemi!)

Prandaj është e domosdoshme të bëhet një bashkim i vërtetë dhe esencial i tri grupeve, respektivisht organizatave të lartpërmendura." (Letër e hapur TRI GRUPEVE RESPEKTIVISHT ORGANIZATAVE QË LUFTOJNË NËN EMRIN E LRSSHJ-së, 12 korrik 1985; Faridin Tafallari, Terror-Dhimbje-Qëndresë, Tiranë 1997, f. 262)

8. LRSSHJ tash e tutje LPRK, shtator 1985

NJOFTIM INTERN PËR ANËTARËT DHE AKTIVISTËT E LËVIZJES ME DISA NDRYSHIME QË DO TË BËHEN NË ORGANIZATËN E MASAVE LRSSHJ SI DHE NË ORGANIN E SAJ "ZËRI I KOSOVËS"

Shokë dhe shoqe!

Duke pasur parasysh se më 17 shkurt 1982, gjatë bashkimit të organizatave, u bënë gabime si në emërimin e organizatës së re ashtu dhe në formimin e saj:

Duke pasur parasysh, veçanërisht se duhet të përcaktohet qartë karakteri i organizatës dhe të organit të saj "Zëri i Kosovës", që nga 17 shkurti e gjer më sot, si dhe rrymimet ideologjike, politike dhe organizative brenda dhe jashtë;

Duke pasur parasysh se pasojat e këtyre lëshimeve dhe gabimeve në të kaluarën do të frenojnë ecjen përpara drejt Republikës së Kosovës;

Duke pasur parasysh edhe situatën që u krijua në ndërkohë nga veprimtaria e regjimit serbomadhi të Beogradit kundër Lëvizjes: Patriotët, komunistët dhe të gjithë lirishtetësit që veprojnë jashtë Kosove, vlerësuan drejt gjendjen jo të mirë të unitetit dhe të bashkimit, të kurbetçinjve dhe të të arratisurve dhe, përgjithësisht të Lëvizjes; vlerësuan drejt nevojën e bashkimit të të gjitha forcave të shëndosha patriotike e komuniste dhe që janë për Republikën e Kosovës, si dhe në anën tjetër, dëshirën e flaktë

dhe kërkesat e parreshtura që të kapërcehen të gjitha vështirësitë në luftën tonë të drejtë për Republikë në kuadër të RSFJ-së.

Në konsultime të dobishme sqaruese dhe parimore me të gjithë ata që donin bashkimin e vërtetë rreth parullës famëmadhe "KOSOVA-REPUBLIKË" si dhe orientimet e shokëve nga Kosova, u arrit një bashkim dhe unitet mendimi dhe veprimi. Kështu pjesa më e vetëdijshme e patriotëve dhe komunistëve të Kosovës që veprojnë jashtë, në muajin shtator të këtij viti, mbajtën MBLEDHJEN E PARË RIORGANIZUESE TË KËSHILLIT TË PËRGJITHSHËM, në të cilën morën pjesë edhe shokë të rinj në përbërjen e udhëheqësisë së organizatës dhe u vendos:

I

Organizata "Lëvizja për Republikën Socialiste Shqiptare në Jugosllavi" tash e tutje të emërtohet "LËVIZJA POPULLORE PËR REPUBLIKËN E KOSOVËS".

Termi LËVIZJE POPULLORE shpreh më mirë karakterin e organizatës sonë të të gjitha masave popullore, formën e organizimit të tyre. Ky emërtim përmban emërtimin e drejtë politik e organizativ në luftën për Republikën e Kosovës, ku duhet të përfshihen të gjitha masat popullore pa dallim klase, bindjeje politike, feje e krahine, ndërsa më parë lihej vend për shumë interpretime.

Të hiqet termi SOCIALISTE, sepse vetë fakti se detyrë e drejtpërdrejtë kërkesë e jona është Konstituimi i Republikës në kuadrin e RSFJ-së, pra në të njëjtin sistem ekonomik-shoqëror, e përjashton këtë term në emërtimin e organizatës gjithëpopullore. Në Lëvizjen Popullore për Republikën e Kosovës, do të bëjnë pjesë të gjitha organizatat dhe grupet ilegale komuniste, patriotike e revolucionare, pavarësisht nëse është Republika qëllimi i tyre i fundit ose jo, pavarësisht nëse janë ose jo për socializmin e vërtetë.

Në vend të SHQITARE duhet të thuhet e KOSOVËS, pasi termi SHQIPTARE nuk është i sakt, për emërtimin politik e administrativ të Republikës së Kosovës dhe si emërtim nuk parqet drejt ekskluzivitetin e përbërjes nacionale të republikës së ardhshme të Kosovës, njëkohësisht i jep material armikut të akuzoj se populli shqiptar në Jugosllavi po kërkon të shpërngulen të gjitha pakicat kombëtare nga trojet e banuara me shqiptarë. Përkundrazi, Republika e Kosovës do të jetë edhe e pakicave kombëtare që jetojnë në të dhe nga e cila do të kenë dobi. Pra, për emërtim më të sakt politik, administrativ e gjeografik të trojeve shqiptare të coptuara e të sunduara nga tri republikat: e Serbisë, e Maqedonisë dhe e Malit të Zi, duhet të përdorim termin REPUBLIKA E KOSOVËS.

Të hiqet termi NË JUGOSLLAVI, sepse kuptohet qartë se Republika e Kosovës kërkohet në kuadrin e RSFJ-së.

II

Lëvizjen Popullore për Republikën e Kosovës ta udhëheq KËSHILLI I PËRGJITYHSHËM, KRYESIA E KËSHILLIT TË PËRGJITHSHËM,

sepse:

Emërtimet për udhëheqjen e LRSSHJ-së: KOMITET DREJTUES, KOMITET QENDROR, nuk ishin adekuate për një organizatë me tipare të organizatës së masave. Kështu, këto emërtime për udhëheqjen e LRSSHJ-së nuk shprehin rolin e njëmendshëm për një organizatë të masave.

Termi KËSHILLI I PËRGJITHSHËM, për përbërjen e gjerë të udhëheqësisë së LËVIZJES PËR REPUBLIKËN E KOSOVËS (LPRK) është adekuat me rolin që do të

luaj në drejtimin e organizatës, ndërsa përbërja e ngushtë e kësaj udhëheqësie, KRYESIA E KËSHILLIT TË PËRGJITHSHËM, do të kryej detyrat praktike për orientimin, zbatimin dhe kontrollimin e punëve dhe rrjedhës së tyre në organizatë.

LRSSHJ, pavarësisht oshilimeve politike dhe organizative, megjithatë luajti rol të rëndësishëm në mobilizimin e masave, i bëri ato edhe më të vetëdijshme për rolin e tyre në bashkimin e forcave për t'i dalë krah për të luftuar për Republikën e Kosovës. Ajo dha kontribut sidomos në organizimin e demonstratave anekënd Evropës Perëndimore, edhe më gjërë si dhe në organizimin e tubimeve përkujtimore për shokët e rënë e të burgosur nga terrori shovinist serbo-maqedono-malazez. Prandaj, në këtë drejtim roli i LRSSHJ-së ishte i madh.

Këto ndryshime që po bëhen, Lëvizjen do ta ngrejne edhe më lartë në aspektin e vijës politike e organizative.

III

Gazeta "ZËRI I KOSOVËS", organ i organizatës së masave të vazhdojë të dalë me të njëjtin titull,

sepse:

Si emërtim të një organizate të tillë shpreh më së miri, edhe me titullin e vet, zërin e vërtetë të popullit shqiptar në Jugosllavi.

IV

Parulla "PROLETARË TË TË GJITHA VENDEVE DHE POPUJ TË SHTYPUR, BASHKOHUNI" të hiqet nga ballina e gazetës dhe të mos vihet kurrfarë parulle,

sepse:

Heqja e saj do të shkonte në dobi të përfshirjes dhe të bashkimit të të gjitha klasave e individëve me bindje të ndryshme politike e fetare, dhe nga ana tjetër nuk ka nevojë të vihet kurrfarë parulle, sepse vetë emërtimi i organizatës "Lëvizja Popullore për Republikën e Kosovës" shpreh më së miri qëllimin e kërkesës së popullit tonë.

V

Gjithashtu nga ballina e gazetës të hiqet pushka-shtizë në Flamurin Kombëtar dhe ky te vihet në një shtizë të zakonshme, mbajtur në dorë,

sepse:

Kërkesa e popullit tonë KOSOVA–REPUBLIKË nuk e nënkupton në vete dhe nuk është një kërkesë për ndërrimin rrënjësor revolucionar me armë në dorë. Konstituimi i Republikës së Kosovës, edhe pse është një hap përpara, progresiv, një hap revolucionar (në mënyrë revolucionare e kërkoi populli), por nuk është edhe vetë revolucioni. Ajo mbetet si qëllim, detyrë dhe si kërkesë demokratike e kombëtare që hap perspektivën e zhvillimit kombëtar dhe shoqëror të popullit shqiptar në Jugosllavi.

VI

Gazeta "ZËRI I KOSOVËS" të dalë si organ i organizatës "LËVIZJA POPULLORE PËR REPUBLIKËN E KOSOVËS".

Organi i LRSSHJ-së "Zëri i Kosovës" si gazetë që dalëngadalë mori tiparet e një gazete politike-informative për masat e gjëra është bërë një tribunë ku masat e gjëra

popullore e gjejnë veten, ku ato informohen për situatën aktuale, një tribunë ku qartë del domosdoshmëria e formimit të Republikës së Kosovës në kuadër të RSFJ-së.

Oshilimet që kishte, sidomos në formën e tij, ishin përpjekje për të gjetur me këmbëngulje vijën e drejtë e të qartë të detyrës që kishte mbi vete si organ për informim e mobilizim të të gjitha masave. Të metat që kishte në këtë drejtim, nuk mund ta zbusin rolin e madh që luajti deri tash "Zëri i Kosovës".

Me ndryshimet që po bëhen "Zëri i Kosovës" edhe më mirë do ta kryejë detyrën në propagandimin e drejtë e të qartë të vijës politike e organizative të Lëvizjes Popullore për Republikën e Kosovës.

* * *

Këto ndryshime janë rezultat logjik i fazës më të pjekur të luftës sonë dhe i kërkesës këmbëngulëse të popullit tonë që Kosovës t'i njihet statusi i Republikës në kuadër të RSFJ-së.

Të gjitha këto ndryshime që po bëhen në organizatën tonë dhe në organin e saj "Zërin e Kosovës", shprehin realisht si asnjëherë më parë thelbin dhe karakterin e vërtetë të luftës sonë, të kërkesave të drejta gjithëpopullore të popullit shqiptar në Jugosllavi për Republikën e Kosovës në kuadrin e RSFJ-së.

Është e qartë se vetëm bashkimi, uniteti i popullit rreth parullës "KOSOVA-REPUBLIKË", vetëm fryma vëllazërore e organizimit rreth saj janë vendimtare në realizimin e statutit të Republikës në kuadrin e Federatës.

Thirren të gjithë ata, të cilët vërtet duan të luftojnë për të mirën e Kosovës, për lirinë e saj, që të lënë mëritë, t'i flakin mënjatë urrejtjet e hasmëritë e tjera dhe pa dallim bindjeje politike, feje e krahine, t'i bashkohen luftës për Republikën e Kosovës.

RROFTË LËVIZJA POPULLORE
PËR REPUBLIKËN E KOSOVËS!
RROFTË "ZËRI I KOSOVËS"!
KOSOVA REPUBLIKË!

KËSHILLI I PËRGJITHSHËM I LËVIZJES POPULLORE PËR REPUBLIKËN E
KOSOVËS Shtator, 1985

(Faridin Tafallari, Terror-Dhimbje-Qëndresë, Tiranë 1997, f. 272-275)

Emrush Xhemali: "1985: Hysen Gërvalla kooptohet në Komitetin Qendror të LPRK-së." (20 vjet veprimtari 1982-2002)

9. Historiku i shkurtër i Organizatës Marksiste-Leniniste të Kosovës dhe veprimtarisë së saj revolucionare

Bërthama revolucionare, paraardhëse e OMLK-së, më 1969 u muar me organizimin e demonstratave të 27 nëntorit 1968, por realizimi i tyre për shumë shkaqe dështoi.

Ky dështim për bërthamën revolucionare ishte një mësim i mirë për luftën e mëtutjeshme. Kështu që posa dolën nga burgu ata më parë u morën drejtpërdrejt me organizimin duke formuar më 1972 "Grupin Revolucionar" (GR).

GR-ja duke aplikuar metodat marksiste-leniniste të veprimtarisë ilegale si dhe duke u bazuar dhe mbështetur fuqimisht në mësimet e klasikëve të marksizëm-leninizmit arriti që të krijoj një rrjetë të fortë dhe të qëndrueshme organizative, e cila jepte shpresa se më

në fund do të sigurohej një vazhdimësi e sigurtë e veprimtarisë revolucionare në Kosovë.

Me konsolidimin e radhëve dhe me sprovimin e anëtarëve në aksionet masive të shpërndarjes së trakteve dhe shkruarjes së parullave gjatë viteve 1973 dhe 1974, GR-ja u muar edhe më me intensitet në forcimin e propagandës së shkruar, duke nxjerrë edhe Organin e vet "Zërin e Kosovës".

GR-ja si e tillë arriti të nxjerrë vetëm një.. numër të Organit "Zëri i Kosovës", pasi që bërthama udhëheqëse revolucionare burgoset në maj të vitit 1974.

Pasi që GR-ja kishte aplikuar katërcipërisht metodat dhe mësimet marksiste-leniniste të veprimtarisë revolucionare ilegale, në këtë mënyrë edhe u ruajt kontinuiteti i veprimtarisë.

Për një kohë të shkurtër, shokët e mbetur ia arritën të rivendosnin lidhjet dhe të konsolidohen radhët dhe të hidhen në aksione të pandërprera. Një ndër këto aksione ishte edhe aksioni i madh i shpërndarjes së trakteve dhe shkrimit të parullave më 24 dhjetor 1974, në prag të gjykimit të Bërthamës Revolucionare të GR-së.

Edhe burgosjet e disa shokëve më 1975 nuk shkaktuan ndërprerjen e veprimtarisë, pasi që shokët e GR-së duke u mbështetur fuqimisht në mësimet marksiste-leniniste dhe në vijën e përcaktuar politike, ideologjike, strategjike e taktikën e GR-së që më 1972, shkuan më tej në intensifikimin e luftës, në përsosjen e teknikës konspirative dhe organizative. Duke arritur që më 1976 GR-ja, me zgjerimin e radhëve dhe me ngritjen e kalitjen e anëtarëve, të shndërrohet në "GRUP MARKSIST-LENINIST TË KOSOVËS" (GMLK).

Gjatë viteve 1976-'78 GMLK-ja merret me përpilimin e materialeve për ngritjen teorike, ideologjike, politike dhe organizative të anëtarëve të vet. Ndër këto materiale ishin edhe: "Për zgjerim të radhëve", "Udhëzime për konspiracion", "Takimet", "Mbledhjet", "Disiplina" etj.

Më 1978, me shtimin e vëllimit të detyrave dhe me zgjerimin e mëtutjeshëm të radhëve të GMLK-së, u paraqit nevoja e domosdoshme e organizimit në nivel më të lartë organizativ dhe e shndërrimit të GMLK-së në "ORGANIZATË MARKSISTE-LENINISTE TË KOSOVËS" (OMLK), pasi që Grupi si grup nuk ishte në gjendje të përthevojë e të kryej me sukses të gjitha detyrat që i dilnin përpara dhe që i parashtronte koha.

Komiteti drejtues i OMLK-së, duke ndier nevojën për ngritjen teorike, ideologjike e organizative të anëtarëve, në fund të vitit 1978 nxori numrin e parë të "Pararojës", Organ për radhët e saja të brendshme.

Për punën e drejtpërdrejtë me masat e gjera popullore të shtresave të ndryshme, para OMLK-së u shtrua si nevojë e domosdoshme edhe nxjerrja e Organit të masave, gjë të cilën OMLK e bëri në vitin 1980, kur edhe nxori numrat 1 e 2 të "Lirisë".

Ishte pikërisht "Liria", Organ i OMLK-së për masat e gjera, e cila bëri ndikim të madh tek masat, duke e ngritur në një shkallë edhe më të lartë vetëdijen kombëtare e klasore të popullit. "Liria" ndikimin më të madh e bëri në mesin e rinisë shkollore e studenteske, pasi që edhe ishte shpërndarë, lexuar dhe kërkuar më së shumti nga kjo shtresë e popullsisë.

OMLK gjer në janar të vitit 1982 nxori gjashtë numra të "Lirisë", kur edhe bëhen burgosjet masive në Kosovë, viktimë e të cilave ishin edhe shumë shokë të OMLK-së. Po në janar UDB-ja organizoi edhe likuidimin fizik të komunistit Kadri Zeka me vëllezërit Gërvalla, gjë të cilën e realizoi më 17 janar 1982 në Gjermani.

Mehmet Hajrizi: *"Në natën e 17 janarit 1982, në Untergruppenbach të Gjermanisë, kanë ndodhur tri ngjarje historike për Kosovën: në"*

bazë të Tezave të Frontit Popullor për Republikën e Kosovës, u arrit marrëveshja e tri organizatave çlirimtare shqiptare, u vranë tre sendërtuesit e atij bashkimi dhe **pushoi së vepruari OMLK...**" (Histori e një Organizate politike dhe demonstratat e vitit 1981, Tiranë 2008, f. 11) Mehmet Hajrizi: "*Më 1982, nga udhëheqja e saj, Organizata kishte të lirë vetëm Kadri Zekën, të cilit i binte barra e riorganizimit të radhëve dhe e realizimit të projektit të Frontit të bashkuar. Në krye të kësaj detyre, Kadri Zeka është vra bashkë me Jusuf dhe Bardhosh Gërvallën, më 17 janar 1982, pasi (sipas dëshmisë së bashkëveprimtarit të tyre, Ibrahim Kelmendit) kishin arritur marrëveshjen e bashkimit. Ata u vranë me qëllim që të dështonte bashkimi i radhëve të Lëvizjes.*" (E njëjta vepër, faqe 307)

Pas vrasjes së shokut Kadri Zeka dhe burgosjes së shumë shokëve të OMLK-së në Kosovë bëhet edhe shkëputja e shumë lidhjeve gjë që shkaktoi ngecjen e aktivitetit intensiv.

Në kohën kur shokët brenda merreshin me rivendosjen e lidhjeve, një shok i Grupit Revolucionar ia arriti të arratiset nga burgu dhe të dal në Perëndim. Shokët e Degës së OMLK-së në Botën e Jashtme e autorizuan shokun e arratisur nga Kosova që t'i përfaqësonte në bisedime për bashkimin e forcave me LNÇKVSHJ-në dhe Partisë Komuniste MLSHJ-në të cilat më 17 shkurt 1982 kishin formuar LRSNJ-në.

Edhe pse shokët e Degës së OMLK-së ia parashtruan pikëpamjet, qëndrimet dhe

Abdullah Prapashtica ("komunist" e ish-inspektor i UDB-së Serbe): "*Ka pas tentativa të armiqve për zhbërjen e bashkimit edhe atëherë! Zhbërja e bashkimit të LRSSHJ ka dështuar edhe atëherë dhe është e destinuar të dështojë edhe sot.*" (www.albaniapress.com, 2 maj 2011)

propozimet lidhur me bashkimin, shoku i autorizuar shkeli mbi qëndrimet e shokëve që e kishin autorizuar dhe ra nën ndikimin e imponuar të krerëve të LNÇKVSHJ-së dhe Partisë Komuniste MLSHJ-së, duke devijuar kësajsoji vijën politike, **ideologjike** dhe organizative të Organizatës Marksiste-Leniniste të Kosovës.

Mehmet Hajrizi: "*Berat Luzha ka vendosur lidhjet e Organizatës me Partinë Komuniste të Kosovës, që udhëhiqej nga Mustafë Xhemaili e Rrahim Sadiku, të dytë nga Komogllava, komuna e Ferizajit. Një tentim për kontakt kishte edhe me (Partinë Komuniste - shën im) PKMLSHJ, por takimi ka dështuar ngase ata nuk kanë dal në takim.*" (Histori e një Organizate politike dhe demonstratat e vitit 1981, Tiranë 2008, f. 363)
Pse nuk i ka dal në takim Abdullah Prapashtica, Berat Luzhës?
Sepse "*Martin Quni (...) Prej Hamzë Morinës e ka marrë 'Liria nr.1' të cilën ia ka dhënë Abdullahut, e ky e ka qortuar se lexon materiale të tilla, ngase siç deklaroi ky i akuzuar, nuk u për-puthet ideologjia.*" (Aktgjykimi i PKMLSHJ, P-K nr 167/72; Ethem Çeku, SHEKULLI I ILEGALES, Prishtinë 2004, faqe 678)

Por ky "bashkim" që u imponua më 15 maj 1982, nuk ishte edhe bashkim i organizatave në fjalë, por vetëm bashkim krerësh, dhe si i tillë nuk mund të ishte i shëndoshë e i qëndrueshëm. Ky "bashkim" me LNÇKVSHJ-në dhe PKMLSHJ-në do të

ketë pastaj pasoja të mëdha për Degën e OMLK-së në Botën e Jashtme, e cila ra nën ndikimin dhe manipulimet e shokut të porsaarratisur nga burgu.

Duke pasur besim të tepruar në aftësitë e tij, shokët e Degës së OMLK-së ranë në pozita oportuniste dhe toleruan për dy vjet me radhë manipulimet dhe manovrimet antimarksiste të këtij shoku. Kësisoj edhe u dezorientuan në veprimtarinë e tyre e në këtë mënyrë edhe ndikuan tek shokët brenda. Dezorientimi dhe dezinformimi i shokëve si brenda edhe jashtë, solli amulli në mendime dhe veprime.

Abdullah Prapashtica ("komunist" e ish-inspektor i UDB-së Serbe):
*"Ka pas tentativa të armiqve për zhbërjen e bashkimit edhe atëherë!
Zhbërja e bashkimit të LRSSHJ ka dështuar edhe atëherë dhe është e
destinuar të dështojë edhe sot."* (www.albaniapress.com, 2 maj 2011)

Duke e parë një devijim të tillë të vijës politike, ideologjike e organizative, shokët e Grupit Revolucionar që dolën nga burgu në vitin 1983, u morën me riorganizimin, konsolidimin dhe bashkimin e grupeve komuniste të mbështetur në parime marksiste-leniniste. Duke u marrë me këtë detyrë mjaftë të rëndë për kushtet e krijuara në Kosovë pas burgosjeve të mëdha, që ishin bërë pas demonstratave të Pranverës së vitit 1981, ata synuan formimin e një pararoje udhëheqëse të luftës duke u mbështetur në vijën politike, ideologjike dhe organizative të përcaktuar nga OMLK, si dhe formimin e "Frontit Antirevizionist", si front të gjerë të masave. Për një kohë shumë të shkurtër ata arritën të bashkonin një numër të konsiderueshëm grupesh komuniste dhe ishin në prag të realizimit të pikësynimeve organizative të pararojës dhe frontit, por arrestimet masive të dhjetorit 1983, vrasja e shokëve Rexhep Mala e Nuhi Berisha më 11 janar 1984 si dhe burgosjet e shokëve me Kadri Osmanin që pasuan në janar e shkurt 1984, shkaktuan ngecjen e veprimtarisë në këtë drejtim. Njëkohësisht me shpartallimin e lidhjeve të grupeve, celulave dhe individëve iu mundësua disa individëve në Perëndim të dezinformonin dhe manipulonin me shokët brenda. Sidomos dezinformimi që u bë shkaktoi një mosbesim te grupet dhe individët dhe u bë pengesë e një bashkimi të vërtetë komunist, bashkim i cili kishte gjasa të vendoste sërish një vazhdimësi kontinuale të veprimtarisë revolucionare në Kosovë dhe degëve jashtë.

Duke mos u arritur një bashkim i tillë komunist që edhe synohej nga grupet, celulat dhe individët, grupet, celulat dhe individët e OMLK-së u morën me riorganizimin dhe konsolidimin e radhëve të OMLK-së. Pas vetes ata kishin një mori aksionesh të suksesshme të kryera para vitit 1984, gjatë vitit 1984 dhe sidomos gjatë vitit 1985 e në fillim të 1986-ës.

Abdullah Prapashtica ("komunist" e ish-inspektor i UDB-së Serbe):
*"Ka pas tentativa të armiqve për zhbërjen e bashkimit edhe atëherë!
Zhbërja e bashkimit të LRSSHJ ka dështuar edhe atëherë dhe është e
destinuar të dështojë edhe sot."* (www.albaniapress.com, 2 maj 2011)

Në vitin 1984 deri në maj 1985 shokët e OMLK-së pos aksioneve konkrete u morën edhe me përhapjen aktive të literaturës marksiste-leniniste, "Zërit të Kosovës" dhe sidomos të botimeve të shumta të OMLK-së gjatë vitit 1985, botime të cilat tani në Kosovë janë me qindra në qarkullim.

Edhe pranë devijimit të vijës politike, ideologjike e organizative të OMLK-së nga përfaqësuesi i OMLK-së në bisedime me LNÇKVSHJ-në dhe PKMLSHJ-në, LRSSHJ e formuar faktikisht udhëhiqej nga Dega e OMLK-së në Botën e Jashtme.

Fakti se përfaqësuesit e LNÇKVSHJ-së dhe PKMLSHJ-së dolën nga LRSSHJ tregonte se Dega e OMLK-së kishte qenë dhe ka mbetur bërthama udhëheqëse e LRSSHJ-së (LPRK).

Në shkurt të vitit 1985 shokët e OMLK-së ishin ata që e përjashtuan shokun e tyre nga forumet e LRSSHJ-së për shkak të veprimtarisë së tij antimarksiste-leniniste dhe antilëvizje si dhe për shkak të përçarjeve të mëdha që shkaktoi me veprimtarinë e tij.

Abdullah Prapashtica ("komunist" e ish-inspektor i UDB-së Serbe):
*"Ka pas tentativa të armiqve për zhbërjen e bashkimit edhe atëherë!
Zhbërja e bashkimit të LRSSHJ ka dështuar edhe atëherë dhe është e
destinuar të dështojë edhe sot."* (www.albaniapress.com, 2 maj 2011)

Me përjashtimin e tij OMLK-ja u rikthye në pozitë e përcaktuara politike, ideologjike dhe organizative të përcaktuara qysh para vitit 1982.

Proletarë të të gjitha vendeve dhe popuj të shtypur, bashkohuni!" (Marrë nga libri i Faridin Tafallarit, Terror Dhimbje Qëndresë, Tiranë 1997, faqe 282-284)

Mehmet Hajrizi: *"Intelegjencia e Kosovës... duke qenë e re dhe në formim e sipër, nuk mund të kapte problemin në gjithë kompleksitetin e tij teorik..."*

Mehmet Hajrizi: *"... regjimi socialist pushtues po luftoj me socializëm"*

Berat Luzha: *"Përmes ngjyrimin ideologjik, kemi tentuar t'i kundërvihemi ideologjisë komuniste titiste."*

Teksti i betimit të Organizatës Marksiste-Leniniste të Kosovës: *"Në qoftë se e tradhtoj Organizatën dhe idealet e lirisë, mos i shpëtofta dorës së pamëshirshme të shokëve të."*

Mehmet Hajrizi: *"Në natën e 17 janarit 1982, në Untergruppenbach të Gjermanisë, kanë ndodhur tri ngjarje historike për Kosovën: në bazë të Tezave të Frontit Popullor për Republikën e Kosovës, u arrit marrëveshja e tri organizatave çlirimtare shqiptare, u vranë tre sendërtuesit e atij bashkimi dhe pushoi së vepruari OMLK..."*

"Më 1982, nga udhëheqja e saj, Organizata kishte të lirë vetëm Kadri Zekën, të cilit i binte barra e riorganizimit të radhëve dhe e realizimit të projektit të Frontit të bashkuar. Në krye të kësaj detyre, Kadri Zeka është vra bashkë me Jusuf dhe Bardhosh Gërvallën, më 17 janar 1982, pasi (sipas dëshmisë së bashkveprimtarit të tyre, Ibrahim Kelmendit) kishin arritur marrëveshjen e bashkimit. Ata u vranë me qëllim që të dështonte bashkimi i radhëve të Lëvizjes."

KQ i LRSSHJ (Zvicër): *"Gjatë bisedimeve rreth bashkimit si kushte do t'u paraqesim këto: Të dënohet bashkimi i 17 shkurtit dhe 15 majit 1982, i cili ishte një bashkim krerësh e jo organizatash dhe nuk ishte aspak bashkim e organizim i masave. Një bashkim dhe organizim të masave, si jashtë ashtu edhe brenda, e patë shtruar drejtë në verën e vitit 1981 OMLK në "Teza rreth Frontit Popullor për Republikën e Kosovës" dhe në përpjekje e sipër për t'i vënë në jetë ranë shokët: Jusuf Gërvalla, Kadri Zeka dhe Bardhosh Gërvalla. Këto "Teza..." u shkelën pikërisht një muaj pas rënies së tyre, në bashkimin e 17 shkurtit 1982."* (Faridin Tafallari, Terror-Dhimbje-Qëndresë, Tiranë 1997, faqe 255)

Ramadan Avdiu: *"Në Konferencën e parë të OMLK'së të mbajtur në mars të vitit 1989 ku kanë marrë pjesë edhe: Afrim Zhitija, Fadil Vata, Ali Ahmeti, Hajdin Abazi, Bardhyl Mahmuti, Behajdin Allaqi, Binak Berisha etj."*

(<http://pashtriku.beepworld.de/behajdinallaqi.htm>)



Die Mauer, Muri i Berlinit, 16 nëntor 1989 (shtatë ditë pas tërmetit)

Abdullah Prapashtica ("komunist" e ish-inspektor i UDB-së Serbe):
*"Ka pas tentativa të armiqve për zhbërjen e bashkimit edhe atëherë!
 Zhbërja e bashkimit të LRSSHJ ka dështuar edhe atëherë dhe është e
 destinuar të dështojë edhe sot."*

Jusuf Gërvalla: *"E ndër pallate të larta të kulturës
 Le t'bredhin qentë - mos e teprova
 Në ekuator le të rrëshqas Antartiku
 Brenda një nate le t'bashkohet Berlini"*

10. BIG BROTHER-i PËR PARAROJËN

Mehmet Hajrizi: *"Berat Luzha ka vendosur lidhjet e Organizatës me Partinë Komuniste të Kosovës, që udhëhiqej nga Mustafë Xhemali e Rrahim Sadiku, të dytë nga Komogllava, komuna e Ferizajt."* (Histori e një Organizate politike dhe demonstratat e vitit 1981, Tiranë 2008, f. 363)

PARAROJA ORGAN TEORIK DHE POLITIK I ORGANIZATËS MARKSISTE-LENINISTE TË KOSOVËS Nr. 2. 1986

Komiteti drejtues i OMLK-së duke e parë domosdoshmërinë e një organi të brendshëm, për ngritjen teorike, ideologjike dhe organizative të radhëve të organizuara, në vjeshtë të vitit 1985 vendosi të vazhdoi nxjerrjen e Organit të OMLK-së "Pararoja", numri i parë i të cilit u nxor në fund të vitit 1978 po për të njejtat qëllime.

"Pararoja" do të bëhet udhërrëfyese e denjë e luftës sonë në të gjitha lëmitë e veprimtarisë revolucionare. Ajo mbështetet fuqimisht në **mësimet marksiste-leniniste dhe do t'u qëndroj besnike deri në fund**. Ajo do të ndihmoj në ngritjen ideo-politike të anëtarëve dhe kalitjen revolucionare të luftëtarëve të lirisë.

"Pararoja" do të përkrahë dhe propagandoj çdo lëvizje maksiste-leniniste nëpër botë, çdo sukses të tyre në luftë kundër imperializmit e socialimperializmit.

Me anë të "Pararajës" luftëtarët e lirisë në Kosovë do të njihen për më së afërmi me luftën e popujve të ndryshëm për çlirimin kombëtar e klasor; me luftën e proletariatit anë e kënd botës kundër shtypjes e shfrytëzimit kapitalisto-revizionist.

OMLK e mbështet fuqimisht politikën e brendshme dhe të jashtme të PPSH-së, si politikën më të drejtë dhe më parimore, prandaj "Pararoja" do të mbështesë dhe përkrah çdo iniciativë të PPSH-së në lëmi të ndryshme brenda shtetit shqiptar ashtu edhe në arenën ndërkombëtare. Për këtë arsye organi ynë do të botoj rregullisht edhe materiale të rëndësishme të politikës së saj të brendshme dhe të jashtme. Me anë të këtyre materialeve anëtarët e OMLK-së do të ngrihen ideopolitikisht për rezonimin e ngjarjeve dhe ndodhive të ndryshme me përmasa botërore.

Ftohen të gjithë anëtarët, kandidatët dhe simpatizantët e OMLK-së që të marrin pjesë me shkrime në ngritjen cilësore të Organit "Pararoja". Orientimi në shkrime të jetë në fushat e veprimtarisë revolucionare dhe atë sidomos në çështje teorike-ideologjike, çështje organizative, propagandistike etj. Këto shkrime duhet të bazohen dhe mbështeten fuqimisht në mësimet e marksizëm-leninizmit.

Organi "Pararoja" do të dalë në çdo tre muaj.

REDAKSIA

(Faridin Tafallari, Terror-Dhimbje-Qëndresë, Tiranë 1997, f. 285)

Berat Luzha: *"Faktikisht, ne jemi vetëquajtur marksistë-leninistë, por realisht kemi qenë atdhetarë të mirëfilltë, idealistë. Nuk kemi qenë të indoktrinuar nga ideologjia. Kemi qenë veprimtarë të çështjes kombëtare... Pak ose fare pak jemi marrë me çështje ideologjike.*

...Rilindjen' e kam drejtuar pa asnjë problem të tillë ideologjik ...Përmes ngjyrimit ideologjik, kemi tentuar t'i kundërvihemi ideologjisë komuniste titiste. Edhe në këtë mënyrë e kemi goditur armikun." (Apostol Duka, Vrasje në Shtutgart, Tiranë 2008, faqe 220)

11. Komunistët të cilët ia bënë varrin shoqërisë socialiste

Sabilja thotë se Marksistë-Leninistët e OMLK-së janë ata që më së shumti luftuan kundër shoqërisë socialiste dhe mu për këtë kishin tepër jehonë në popullatën shqiptare. Me fjalët e saj pajtohet plotësisht ideologu i OMLK-së Mehmet Hajrizi.

prof. dr. Sabile Keçmezi-Basha: *"Organizata e cila pati më së tepërmi jehonë në qarqet e përgjithshme të popullatës shqiptare dhe e cila kontribuoi që rrjedhat e shoqërisë ish-socialiste në Kosovë të merrnin kah krejt tjetër, ishte pasardhësja e 'Grupit Revolucionar' që më vonë u shndërrua në Organizatën ilegale shqiptare 'Organizata Marksiste-Leniniste e Kosovës.'" (Mehmet Hajrizi, Histori e një Organizate politike dhe demonstratat e vitit 1981, Tiranë 2008, f. 316)*

Në mënyrë aq fenomenale dhe bindëse është zbërthyer kjo çështje sa nuk më ka rënë të gjej tekst më të kthjellët. I vetmi person që mund të ketë mendime më të sinqerta dhe inteligjente për 'komunistët' në fjalë është Vasil Stanilov i cili thotë se është e pamundur që në të njëjtën kohë të jesh inteligjent, i sinqertë dhe komunist.

Pse?

Sepse:

**Nëse je inteligjent dhe komunist, nuk je i sinqertë
Nëse je i sinqertë dhe komunist, nuk je inteligjent.
Nëse je inteligjent dhe i sinqertë, nuk je komunist.**

12. Miku i mirë në ditë të vështirë

Ramadan Pllana-Dëshmitari: *"Pra, një muaj, pas rënies heroike të dëshmorëve të lartpërmendur, më 17 shkurt të vitit 1982. Në Turqi, Sabri Novosella, në emër të LNÇKVSHJ-së, dhe Abdullah Prapashtica, në emër të PKMLSHJ-së, pa e përfillur OMLK-në, me të cilën, Jusufi e Kadriu, i kishin bashkuar aktivitetet nga viti '81, në prezencën paternaliste të diplomatit të shtetit shqiptar në Turqi, Bujar Hoxhës, -shpallin të formuar Lëvizjen për Republikën Socialiste Shqiptare në Jugosllavi (LRSSHJ)." (DËSHMI TË KOHËS PËR ORGANIZATËN PATRIOTIKE LNÇKVSHJ, www.pashtriku.org, 17 mars 2009)*

13. PROJEKTSTATUTI I ORGANIZATËS MARKSISTE LENINISTE TË KOSOVËS (OMLK)

...OMLK përfaqëson dhe mbron interesat e popullit shqiptar në Jugosllavi, udhëheq me LËVIZJEN POPULLORE PËR REPUBLIKËN E KOSOVËS...

... Statuti i OMLK-së nuk guxon të jetë vetëm një grumbull rregullash formale, por një armë e fuqishme ideologjike e organizative në duar të anëtarëve të OMLK-së, që t'i ndihmojë në çelikosjen e disiplinës dhe në edukimin revolucionar të tyre....

... Anëtari i OMLK-së ka për detyrë:

...k) të jetë kudo shembull i mirësjelljes e moralit revolucionar-komunist, të mos e ndaj kurrë fjalën nga vepra;...

... Anëtarët e rinjë të celulës, duke përfshirë edhe ata që i kanë takuar ndonjë grupi a organizate tjetër, duhet të japin betimin...

... BETOHEM PARA SHOKËVE TË MI NË FLAMURIN KOMBËTAR DHE NË FYTYRAT E KUJTIMIN E TË GJITHË ATYRE QË DREDHËN GJAKUN PËR LIRINË E ATDHEUT DHE PËR ÇËSHTJEN E REVOLUCIONIT PROLETAR, SE SI KOMUNIST E PATRIOT DO T'I PËRMBAHEM RREPTËSISHT PROGRAMIT DHE STATUTIT TË OMLK-së..." (Projektstatut i përpiluar pas vjeshtës së vitit 1985 në Zvicër)

14. "ZËRI" I BIG BROTHERIT PËR PARAROJËN -KRIMET E KUQE-

Prof. Abdyl Kadolli: "Lëvizja kombëtare shqiptare kurrë nuk ka pasur karakter ideologjik. Nëse ndonjëherë hapen dosjet e krimeve komuniste, numri i spiunëve e bashkëpunëtorëve të paguar e të papaguar do të dilte shumë i madh. Një Rezolutë e miratuar nga Kuvendi i Kosovës do t'i përkufizonte mirë këto krime antikombëtare e antinjerëzore, ndërsa një ligj nuk do të lejonte më në pushtet personat e kompromentuar.

Kështu, ne do të çliroheshin njëkohësisht edhe nga mendësia komuniste, edhe nga mendësia sllave.

Krimet e fashizmit dhe të komunizmit nuk qëndrojnë shumë larg njëra-tjetrës...

Ideologjia komuniste pati reflektime të thella në fatin tonë kombëtar. Komunistët shqiptarë kontribuan shumë në mbetjen me sllavët dhe nën sllavët. Janë të tmerrshme krimet komuniste të periudhës së pasluftës, kur gjatë Kryengritjes shqiptare u masakruan e ekzekutuan rreth 50 mijë shqiptarë." (KRIMET E KUQE, Zëri i Kosovës, 20 janar 2009, www.lpk-kosova.com)

15. I NDERUAR

Letër Xhafer Durmishit, 22 tetor 2011

I nderuar ish Bashkëveprimtari Xhafer!

Lexova rreth 300 faqet e para të kakofonisë ("librit") Tënde, të emërtuar "Lëvizja e Jusuf Gërvallës", sa për të mos injoruar fare, meqë ishim bashkëveprimtarë. Do përpiqem t'i shoh edhe rreth 700 faqet tjera.

Fillimisht dëshiroj të të falënderoj për mundin dhe përkushtimin, sepse kishe investuar energji të madhe (nëse e ke sajuar vetëm).

E mirëkuptoj hidhërimin dhe mllefën Tënd, por të kaluarën nuk mund ta ndryshoj, për hatër e qejf të askujt, po vetëkuptohet, siç e kam kuptuar, përjetuar e mbajtur mend.

Besoj, edhe Ti e di, se pata shkruar roman dhe jo libër historik e dokumentar dhe as memoare. Pata bërë njoftimin se janë nga mbamendja dhe përjetimet e kohës kur kanë ndodh dhe jo mendime e konstatime të kohës kur e kam shkruar romanin. Në vend të komentimit të menjëhershëm të kakofonisë Tënde, do t'i bëja ca pyetje, nëse ke kohë e vullnet për t'u përgjigjur:

1. Kur, ku dhe nga kush është themeluar LNÇKVSHJ'ja?
2. Ka ndonjë pjesëtarë të gjallë që ka sqaruar, që është përgjigj ose që do të përgjigjet në pyetjet e mësipërme?
3. Kush di për strukturën organizative dhe veprimtarinë e saj në Kosovë?
4. Përmes cilës lidhje dhe kur e ka anëtarësuar Sabri Novosella Jusuf Gërvallën?
5. Kur, kush dhe si të ka anëtarësuar Ty në atë Lëvizje?
6. Çfarë veprimtarie të organizuar ke ushtruar në Kosovë dhe a ke ndonjë të bashk-organizuar që e di veprimtarinë Tënde të organizuar në Kosovë?
7. Kush e ka nxjerrë Sabri Novosellën deri në kufi të RPS të Shqipërisë në fund të vitit 1979, kur është "arratisur"?
8. Di emrat e ndonjë anëtari të Komitetit "Hasan Prishtina" në Turqi gjatë vitit 1980-81, për të dëshmuar se nuk ka qenë vetëm emër fiktiv?
9. Beson Ti se Qeveria Shqiptare i pat dhënë vetëm 10.000, - USD, aq sa ia kishte kërkuar Jusuf Gërvalla përmes letrës dërguar Enver Hoxhës në vitin 1980, të cilat i erdhën përmes Sabri Novosellës?
10. Beson se Qeveria Shqiptare nuk i ka dhënë më mjete asaj Organizate përmes Sabri Novosellës dhe nëse i ka dhënë, i ka shfrytëzuar ato Organizata, apo i ka mbajtur për vete "udhëheqësi" Sabri Novosella?
11. Cila është veprimtaria e "bashkëveprimtarëve të ngushtë" të Jusuf Gërvallës në emigracion nga 17. 02. 1982 deri në vitin 1999, ta zëmë e jotja, Sabri Novosellës, Nuhi Sulejmanit, Xhavit Ramabajës, Besim Rexhës, Sadik Blakës, Misin Mavrës, Haxhi Berishës, Hafiz Gagicës, Fahredin Tafallarit, Demë Demaj (nuk po më kujtohen të tjerë që vetë - lavdërohen deri në monotoni)?

12. Kush duhet t'i ketë falsifikuar "raportet" e "letrat", kinse të dërguar nga Jusuf Gërvalla në vitin 1981 "udhëheqësit" Sabri Novosella dhe ku janë origjinalet e tyre?

13. Kush e ka tani arkivin e Jusuf Gërvallës?

Po shpresoj se do të kesh vullnet të mirë që t'u përgjigjesh këtyre pyetjeve?

Me respekt,

Ibrahim Kelmendi (facebook dhe www.pashtriku.org, 22 tetor 2011)

16. PËRSHËNDETJE – ME RESPEKT

Letër Xhafer Durmishit, 23 tetor 2011

Përshendetje (Xhafer Durmishi)

Edhe për refuzimin Tënd që të përgjigje në pyetjet që të bëra, të falënderoj, meqë edhe kështu ke dhënë një pjesë të përgjigjes.

Rëndom, kur publikohen libra, bile edhe gjatë promovimit të tyre, ju jepet mundësia të interesuarve të pyesin autorët.

Besoj, analistët e vëmendshëm kanë kuptuar se sa të nevojshme janë sqarimet rreth asaj organizate, sidomos rreth themelimit të saj. Mbaj mend të ketë thënë vet Jusuf Gërvalla, se ndonjëherë edhe UDB-ja ka themeluar organizata "patriotike", për të zbuluar patriotët që dëshirojnë të angazhohen. Bile pat shtuar, se edhe atyre ua kemi parë paksa hairin, meqë edhe përmes tyre është mbajt gjallë nevoja e organizimit të vërtet.

Thënë të drejtën, në kohën që trajton romani ATENTATET, dyshoja se ajo Lëvizje është pjellë virtuale e Sabri Novosellës, për të zbuluar patriotët që kanë gatishmëri për veprimtari çlirimtare. Me keqardhje e dhimbje me duhet të pranoj, se as pas 30 viteve nuk kam mundur të informohem, se ishte organizatë e themeluar prej të vërtetëve për qëllime fisnike. E, tani pata menduar si Ti je në gjendje për të dhënë sqarime, meqë Sabri Novosella të pat plasuar në emigracion (në Evropën Perëndimore) si pasardhës politik e organizativ i Jusuf Gërvallës dhe atë pozicion e ushtrove, deri sa të skartoj "ligji" i seleksionimit (gati 2 vite), pastaj pushove veprimtarinë, meqë nuk kishe më hapësirë...

Nga ana ime, me sinqeritet (deri në naivitet), kam shpjeguar për të gjithë veprimtarët dhe veprimtarinë e asaj kohe në emigracion, po vetëkuptohet, versionin autentik, bazuar në mendimet dhe vlerësimet e mia. Edhe tani dhe kurdoherë jam i gatshëm të jap sqarime plotësuese për të gjithë të interesuarit, për aq sa di dhe duke pas parasysh përkufizimin, se sa mund të thuhet në kohë e hapësirë të caktuar. Sidomos në prag të 30-Vjetorit të Lëvizjes (popullore), që, - bazuar në përcaktimin tim, - është me 17 Janar 1982, **e quaj të dobishme të ofrohen informata, dëshmi, dokumentacion, vlerësime, të debatohet rreth tyre, për të ndihmuar ndriçimin sa më objektiv të kaluarës sonë.**

Shpresoj, kemi krijuar distancë të bollshme kohore, për të diskutuar e për të shpreh mendime e vlerësime, pa inate, pa hile, sidomos pa armiqësime. Mirëpres angazhimin edhe të ish oficerëve të UDB-së dhe informatorëve të tyre, sidomos të atyre që me profesionalizëm kanë zbatuar ligjet përkatëse të kohës, siç i kanë zbatuar ligjet përkatëse të kohës, të miratuara nga të njëjtat struktura shtetërore, mësuesit, profesorët, nëpunësit, etj.

Uroj që debati të ketë nivel sa më të kulturuar e të kultivuar, pa fyerje e ofendime, me shpresë që secili dhe secila të jenë skajshmërisht të sinqertë.

Me respekt,

i.kelmendi@hotmail.com (facebook, 23 tetor 2011, 19.22)

ZËRI I JUSUF GËRVALLËS PËR PARAROJËN

1.

Jusuf Gërvalla: "Ç'kanë pra këta intelektualë që të çajnë kokën dhe t'i trazojnë të përbrendshmet duke dërdëllisur dhe duke mbajtur "ligjëratë" të ethshme sesi nuk po ia dalin dot në realizimin e të drejtave dhe të lirisë krijuese në kuadër të sistemit fashist jugosllav? Nuk po dinë, vallë, a nuk po duan të dinë se, kur s'ke si t'i gëzosh të drejtat elementare kombëtare, është puna më e kotë në botë të kërkosh të realizosh të drejtat për krijimtari shkencore, artistike e kulturore, që janë pararojë e lirisë së vërtetë kombëtare e shoqërore?" (Letër një shoqi intelektual, Bashkimi, prill 1980, faqe 2)

2.

Jusuf Gërvalla: Të mbërthyer ndërmjet shfrytëzimit të egër të Perëndimit e Lindjes dhe politikës antipopullore të udhëheqjes titiste, e cila interesat e vendit i ka shitur fare lirë te imperializmi e socialimperializmi, popujt e Jugosllavisë ndodhen në prag të një revolucionit popullor. Duke përfituar nga kjo situatë, si dhe nga niveli i lartë i vetëdijes shoqërore e kombëtare të shqiptarëve që lëngojnë nën thundrën jugosllave, FRONTI I KUQ POPULLOR, duke u bërë pararojë e luftës për LIRINE E PAVARESINE e shqiptarëve dhe për bashkimin e tyre me vendin amë, do të luftojë pa kompromis për të vjelë frytet e revolucionit, të cilat janë në pjekjen përfundimtare." (Programi dhe Statuti i Frontit të Kuq Popullor, maj 1980)

3.

Jusuf Gërvalla: "Busullë e vetme për të gjithë anëtarët e FRONTI I KUQ POPULLOR do të jetë lufta analoge e FRONTIT NÇ, i krijuar nga PKSHE në prag të Luftës së Dytë Botërore (prill 1942.) dhe historia e zhvillimit të PPSH, si pararojë. (FRONTI NÇ i udhëhequr nga PKSHE, sot PPSH, luftuan për çlirimin e tokave shqiptare dhe për ndërtimin e Socializmit të vërtetë në atë pjesë të tokave që përfshinë brenda kufijtë e Shtetit Shqiptar të sotëm, të cilit Fuqitë e Mëdha ia shkëputën arbitrarisht më se gjysmën e tokave shqiptare.)" (Programi dhe Statuti i Frontit të Kuq Popullor, maj 1980)

4.

Jusuf Gërvalla: "Nën kujdesin e Partisë së Punës të Shqipërisë, sot në Atdheun tonë socialist lulëzon një literaturë e begatshme revolucionare. Nga literatura e tillë, që duhet të përvetësohet në mënyrë të domosdoshme dhe të ngutshme, sidomos nga pararoja jonë revolucionare, donë veçuar këto pikëmbështetje kryesore: veprat e Marksit, Engelsit, Leninit, Stalinit e ato të marksist-leninistit dhe prijësit të madh shqiptar, shokut Enver Hoxha; historia kombëtare shqiptare, ajo e PPSH-së dhe dokumentat e PPSH-së; shtypi shqiptar, sidomos publikimet shkencore nga lëmi i historisë dhe ai i ndërtimit teorik dhe praktik të socializmit në Atdheun tonë." (Bashkimi bën fuqinë, Bashkimi, janar 1981, faqe 1, shtylla 2)

5.

Jusuf Gërvalla: "Revista "NIN" e Beogradit, nëpërmjet intervistash me funksionarë të lartë shtetërorë, nga numri në numër po e shtron çështjen e bashkëjetesës së popujve të Jugosllavisë në federatën jugosllave. Natyrisht, ndonëse ky paraqet një hap të çuditshëm të kësaj reviste, pas të cilit mund të supozohet se qëndron kryekëput

qeveria dhe i cili sigurisht fsheh ndonjë qëllim tinëzar, s'ka kurrfarë "rreziku" se mund të pyeten popujt e Jugosllavisë sa e duan dhe a e duan fare ata "bashkëjetesën". Sa për popullin shqiptar, e sidomos për pararojën e tij patriotike dhe revolucionare, nuk shtrohet fare çështja e bashkëjetesës me popujt e tjerë në kuadër të kufijve administrativë të Jugosllavisë. Kjo "bashkëjetesë" është e dhunshme dhe e paligjshme, sepse viset shqiptare në Kosovë, Dukagjin, Maqedoni, Mal të Zi e në Serbi janë vise shqiptare, që trungut të përbashkët shqiptar iu shkëputën në mënyrë të paligjshme, në kushte të errëta historike dhe kundër vullnetit të popullsisë vendëse shqiptare." ("Bashkëjetesa" e xhelatit me viktimën, Bashkimi, janar 1981, f. 9)

6.

Jusuf Gërvalla: "Mbi të gjitha, ndërsa është arritur që ata të pranojnë cilësimin e shpërnguljeve të mëdha për në Turqi si migrime politike, përkatësisht të terrorit dhe të dhunës, ata i propagandojnë migrimet e sotme të shqiptarëve thjeshtë si një dukuri të rëndomtë ekonomike, të parrezikshme, madje edhe të dobishme, duke i lidhur këto migrime me gjoja inkuadrimit të Jugosllavisë në "ndarjen ndërkombëtare të punës". Po dokrrat e tilla nuk pinë ujë te populli ynë i shumëvuahtur. Pararoja patriotiko-revolucionare e Kosovës dhe e viseve të tjera shqiptare e di mirë se ne, për aq sa është çështje politike - bile e një politike diskriminuese që kufizohet me fashizmin e racizmin - niveli jashtëzakonisht i ulët i zhvillimit ekonomik të viseve shqiptare, aq është politike edhe çështja e emigrimeve të sotme, që janë pasojë e drejtpërdrejtë dhe e domosdoshme e diskriminimit të tillë." ("Bashkëjetesa" e xhelatit me viktimën, Bashkimi, janar 1981, faqe 9)

7.

Jusuf Gërvalla: "Si gjithmonë, edhe sot, pararoja jonë revolucionare dhe mbarë populli ynë, me sy e me zemër jemi të drejtuar nga nëna Shqipëri dhe presim çastin që fatin tonë do ta lidhë sërish me fatin e saj, si një pjesë e pandashme, për tërësinë e së cilës është derdhur gjaku i bijve martirë të Shqipërisë ndër shekuj." (Lajmëtari i lirisë, tetor 1980, faqe 3)

8.

Jusuf Gërvalla: "Gjithë ata shqiptarë që - duke harruar demonstratat historike të vitit 1968 - ka harruar ç'është forca e masës së revoltuar, këto ditë pati rast të përkujtohet edhe njëherë, me demonstratat e futbolldashësve të Prishtinës, më 21 shtator.

Vendi dhe preteksti i tyre mund të jetë i pakuptim në dukje të parë: reagim për një padrejtësi sportive në fushën e futbollit. Por, duhet të jesh fare jashtë realitetit shoqëror kosovar, nëse çështjen e kufizon në këtë mënyrë. Edhe fizikisht, demonstratat kaluan jashtë fushës së sportit, u përhapën në rrugët e Prishtinës dhe zgjatën deri natën vonë. Vallë, një padrejtësi e thjeshtë sportive mund t'i shtynte qytetarët tanë që "tërbimin" e tyre ta derdhnin mbi çdo automjet, të madh a të vogël, që nuk kishte targë të Krahinës sonë?! A s'i përkujtojnë autobusët dhe veturat e përmbysura, demonstratat e 1968-ës?!

Ky dokument i gjallë i pakënaqësisë së masave, pos që i dha grusht qeverisë së Beogradit, duhet t'i bëjë të mendojnë pak më thellë edhe forcat tona revolucionare, sidomos pararojën e tyre: në qoftë se nuk evidentohet pakënaqësia e përgjithshme, në qoftë se ajo nuk shfrytëzohet në mënyrë të organizuar për qëllime revolucionare, atëherë s'do mend se pakënaqësia e tillë, si potencial që kërkon shkarkim të domosdoshëm, do të manifestohet patjetër në mënyrë spontane. Dhe dihet se në raste të, vendi dhe

preteksti s'kanë si të jenë të qëlluar, domethënë në mënyrë vitale të nisin dhe të zhvillohen atje dhe ashtu si e do puna.

Ky shpërthim ndodhi në një kohë të përshtatshme, kur disa elemente të revolucionit tonë, të tërhequr nga ofensiva për shkak të presionit të madh policor e politik të pushtetit, kishin zënë të përqafonin aty-këtu edhe ide disfatiste e kapitulluese. Një pjesë e intelgjencës sonë donte të thoshte - natyrisht, jashtë ligjeve të dialektikës - sesi te populli ynë qenkan vërejtur edhe shenja përgjumjeje dhe mosgatishmërie për t'iu përgjigjur pararojës revolucionare. Ata e harrojnë traditën shekullore luftarake të popullit shqiptar dhe, nga hutesa e vet, bëjnë llogari të gabuara dhe veprime të rrezikshme: dyshojnë dhe përhapin dyshime lidhur me situatën reale të ne dhe me shpirtin luftarak të popullit tonë në këto çaste të vështira robërie e mjerimi.

Tani, jo me fjalë e me shtrydhje sterile të trurit që të shpie në udhë të pakrye, po me një vepër të shkëlqyer të manifestimit konkret të forcës së popullit, këto demonstrata na e tërheqin veshin qortueshëm dhe sikur na thonë fare qartë se kush ka të drejtë të dëshpërohet: intelgjencia me popullin, apo populli me intelgjencën? Pakënaqësia dhe revolti i shtresuar i masës në rrethana të caktuara historiko-shoqërore janë, pa dyshim, të barasvlershme me potencialin e pafrenuar të rrymës së rrëmbeshme të lumit. A do të derdhet kot ai potencial, apo do t'i lëvizë turbinat e revolucionit, varet nga djalëria pararojë, pjesë e pandashme e së cilës është intelgjencia popullore." (Lajmëtari i lirisë, tetor 1980, faqe 6)

9.

Jusuf Gërvalla: "Në sytë e fshatarësisë dhe të punëtorisë shqiptare, lufta e pararojës shqiptare të rezistencës kundër hegjemonizmit dhe shovinizmit serbomadhuhej të paraqitej si pavor diuormius i disa individëve të papjekur, të cilëve u ka mbetur në fyt buka e bardhë titiste dhe prandaj kërkojnë pogaçe! Si do të nxirreshin ndryshe me dhunë nga populli ynë i robëruar (që, si thotë poeti, është afër sofrës po i pangrënë dhe afër dijes po i panxënë) deklarata sesi gjoja vetë populli e gjykon pikërisht brezin e vet që ndodhet në ballë të luftës?!" (Lajmëtari i lirisë, tetor 1980, faqe 10)

10.

Jusuf Gërvalla: "Në qoftë se vendet fqinje ballkanike kërkuan t'u ndaheshin tokat shqiptare si shpërblim për fitoren e tyre mbi Turqinë dhe në qoftë se kërkesën e tillë ta përlligjën fuqitë e mëdha të kohës, kjo nuk ngjau aspak për shkak se populli shqiptar nuk kishte luftuar. Përkundrazi njerëz përparimtarë nga gjiri shovinistëve të Ballkanit, siç është socialdemokrati serb D. Tucoviq, e thoshin me gojë të vet se populli shqiptar kishte qenë pararoja dhe shtylla e luftës shekullore kundër Turqisë." (Lajmëtari i lirisë, janar 1980, faqe 2-3)

11.

Jusuf Gërvalla: "Pararoja e rinisë kosovare ju fton në luftë për çlirimin e tokave tona të shtrenjta nga kthetrat e kralëve të rinj revizionistë jugosllavë. Lufta e popullit tonë për pavarësi nuk ka pushuar asnjëherë ndër shekuj. Populli ynë e rinia jonë heroike luftojnë e do të luftojnë deri në çlirimin e të gjitha territoreve nga shovinistët jugosllavë. Dhe për të ecur drejt kësaj rruge të shenjtë, sot duhet t'ia caktojmë vetes detyrat që kërkojnë prej nesh zgjidhje." (Lajmëtari i lirisë, janar 1981, faqe 4)

12.

Jusuf Gërvalla: "Ne nuk mund ta shtojmë numrin e shqiptarëve në Jugosllavi. Por, duke u nisur nga rëndësia që ka për ne ky regjistrim i popullsisë, pararoja jonë

revolucionare e patriotike e fton popullin tonë që syçeltësinë më të madhe në regjistrime ta kuptojë si një domosdoshmëri patriotike. Rinia përparimtare thirret të jetë sa më mobile me propagandën dhe agitacionin e drejtë në popull, në mënyrë që armikut t'i japim një grusht të fortë edhe në këtë drejtim, duke mos ia "falur" asnjë njeri. Një aktivitet jashtëzakonisht i gjallë propagandistik në këtë pikëpamje në mesin e shqiptarëve të shpërndarë nëpër republikat e Jugosllavisë – për ne duhet të jetë detyrë e posaçme dhe domosdoshmëri. (Lajmëtari i lirisë, janar 1981, faqe 9)

13.

Jusuf Gërvalla: "I shtyrë nga shtypja e egër ekonomike, politike, shoqërore e kombëtare nën thundrën e pushtetit gjakatar titist, populli shqiptar në Jugosllavi është ngritur i tëri në luftën e tij të drejt për bukë, liri dhe të drejta demokratike. Ai e pa të arsyeshme të kërkojë me këmbëngulje Republikën e federuar të shqiptarëve në Jugosllavi. Në themelet e kësaj kërkesë të shtruar në rrugë paqësore, me fajin e qeverisë shoviniste të Beogradit, u vu gjaku i derdhur, plagët e shumta dhe torturat çnjerëzore që po i bëhen burgjeve e gjyqeve një rinie të tërë shqiptare. Sot për këtë kërkesë është hedhur në gjyqin e tërbuar fashist i tërë populli ynë lirisdashës, të cilin, në prezencën dhe nën kërcënimin e milicisë dhe të ushtrisë serbe, po e detyrojnë të "diferencohet" nga kërkesat e veta më vitale, të shtruar në pranverë nga ana e djalërisë patriotike, komuniste e revolucionare të Kosovës.

Aktet barbare, me të cilat udhëheqja serbomadhe po përpiqet ta shtypë me çdo kusht e me çdo mjet vullnetin dhe të drejtat e patjetërsueshme të popullit tonë heroik, rrezikojnë në mënyrën më flagrante çdo arsyeshmëri dhe çdo cak të bashkëjetesës normale të popullit tonë me popujt e Jugosllavisë në kushtet ekzistuese, i hedhin helm plagës së madhe të popullit tonë martir dhe nxisin – me përmasa të papara deri më tash – urrejtjen ndërnacionale mes shqiptarëve dhe popujve të Jugosllavisë.

Prandaj, në mbrojtje të vullnetit sa e sa herë të ndrydhur e të nëpërkëmbur të popullit shqiptar në Jugosllavi, ne - një pjesë e pararojës patriotike e komuniste të shqiptarëve të robëruar, që jemi organizuar në gji të Lëvizjes Nacionalçlirimtare të Kosovës dhe Viseve të tjera Shqiptare në Jugosllavi – dalim para popullit tonë, para opinionit jugosllav dhe atij botëror me këto kërkesa minimale të parevokueshme:" (Zëri i Kosovës, i Jusuf Gërvallës, nëntor 1981, faqe 2)

14.

Jusuf Gërvalla: "Vërtet që, duke qenë radiotelevizioni dhe shtypi kosovar zëdhënës të politikës shoviniste që ndjek qeveria e Beogradit, Kosova ishte pa gojë. Por matanë kufirit, në Shqipërinë mëmë, vigjilon Partia e Punës, e cila e ngriti lart zërin e saj të fuqishëm në mbrojtje të popullit tonë të shumëvujtur. Dhe zërin e saj populli ynë i robëruar përkëtej kufirit, e mori si zë të vetin dhe u bë me një gojë që flet shtruar e me argumente të ngjeshura, sepse për bazë ka drejtësinë. Ndërkaq, me ato që bëri e po bën në fushën e betejës populli shqiptar në Jugosllavi, me vendosmërinë e tij për të mos kursyer sakrificat në realizimin e aspiratave të ligjshme, me trimërinë e tij të trashëguar përballë armiqve të egër e shumë më të mëdhenj, jo vetëm që mahniti botën, por u dha forca të pashtershme edhe revolucionarëve, komunistëve e patriotëve të tij pararojë." (Zëri i Jusuf Gërvallës, nëntor 1981, faqe 3)

15.

Jusuf Gërvalla: "Te kjo Shqipëri, pararoja patriotike e revolucionare e shqiptarëve me banim në Jugosllavi, gjeti jo vetëm Atdheun e vet të shenjtë, po edhe pishtarin më të denjë të ideve të luftës nacionalçlirimtare dhe të revolucionit.

Prandaj, përkundër robërisë e skamjes, torturave e kurbetit, që na i dha "peshqesh" titizmi, ne sot, më të fortë se asnjëherë në histori, po e ngrejmë së bashku këtë doli, duke përgëzuar 28 Nëntorin 1912, ditën e Pavarësisë së parë, dhe 29 Nëntorin 1944, ditën e Pavarësisë së madhe të Atdheut tonë.

Lavdi marksizëm-leninizmit, idesë dhe realitetit të pamposhtur të pararojës së njerëzimit!" (Lajmëtari i lirisë, janar 1981, faqe 3)

Tetor 2012